



BIBLIOTECA NAZ.  
Vittorio Emanuele III

XXI

A

23


NAPOLI

II

Lo

1xx

111







D. IVSTINIANI  
INSTITVTIONES  
TYPIS VARIAE;  
*rubris nucleum exhibentibus.*



AMSTELÆDAMI,  
Ex Officina WETSTENIANA, 1710.



INSTITUTIONES  
five ELEMENTA  
D. JUSTINIANI  
SACRATISS. PRINCIPIS  
typis variaz,  
rubris nucleum exhibentibus.

Accefferunt ex Digestis

TITULI

de Verborum Significatione &  
Regulis Juris:

*tum & iidem ordine alphabetico digesti.*



AMSTELÆDAMI  
EX OFFICINA WETSTENIANA.

MDCCX.



# LECTORI

Candido.

ARN. CORVINUS à Belderen

S. P. D.



*Quam necessaria sit futuris Jurisconsultis Institutionum Imperialium diligens lectio, Amice non ignoras. Sunt enim totius Jurisprudentiae primordia. Quippe non tantum Juris Antiqui, sed & Novi continent compendium. Utriusque Juris cognitio quidem utilis; sed hujus magis est necessaria. Proinde cum multa ab Imperatore in Institutionibus suis positivè (ut loquuntur) plurima tantum proponantur narrativè; illa ab his sunt abscindenda; abscissa memoriae studiosè insigenda. Quod ut legum cupida Juventus possit facere feliciter, illa rubrica, hæc atramento iteratè induximus; & sic Juventutem tædiosa minus necessariarum lectione levavimus. Huic labori fave. Vale. Ex Museo nostro, Leidæ 22. Julii Anno Christi 1610.*

# DE NOMINE INSTITUTIONUM.

*Ex A. Politiani Miscell. c. 48.*

**I**Nstitutiones hæ, quæ vocantur in Jure Civili, Justiniani Principis nomine editæ, à Triboniano tamen doctisque aliis Viris compositæ, etiam Græce scriptæ sub eodem prorsus intellectu reperiuntur: nisi quia ritusquidam, consuetudinesque Romanorum veteres, uberius aliquanto & latius in Græco ipso, quam in Latino codice referuntur, ut peregrinis hominibus, atque à Romanorum more consuetudineque alienis, res tota penitus inpotesceret. *Institutionum* nomine plerique veterum Jurisconsultorum, & Latinorum Scriptorum, libros suos inscripserunt. Theophilus tamen & Græci interpretes vocant hunc librum *Instituta*, idque exemplo Justiniani in multis constitutionibus. Sed & Probus & Vegetius eodem nomine, in eadem significatione utuntur.

INDEX  
TITULORUM  
feu  
RUBRICARUM  
QUATUOR LIBRORUM  
INSTITUTIONUM  
JUSTINIANI.

In quo numerus prior librum, alter titulum,  
postremus vero paginam hujus edi-  
tionis demonstrat.

A

*de Acquisitione per adrogationem* 3. 11. 122.  
*Actionibus* 4. 6. 167.

*Ademptione legatorum & translatione eorum* 2. 21.  
89.

*Adoptionibus* 1. 11. 16.

*Adsignatione libertorum.* 3. 9. 118

*Attiliano tutore & eo qui ex lege Julia & Titia  
dabatur* 1. 20. 26.

*Auctoritate tutorum & curatorum.* 1. 21. 27.

B

*de Bonorum possessionibus.* 3. 10. 119.

C

*de Capitis deminutione.* 1. 16. 23

*Codicillis* 2. 25. 95.

*Curatoribus.* 1. 23. 29.

D

*de Divisione stipulationum.* 3. 19. 131.

*Donationibus* 2. 7. 53;

*Duobus reis stipulandi & promittendi.* 3. 17. 132.

# INDEX TITULORUM.

## E

<i>de Emptione &amp; venditione</i>	3. <u>24.</u> <u>138</u>
<i>Eo, cui libertatis causa bona addicuntur</i>	3. 12 123
<i>Exceptionibus</i>	4. <u>13.</u> <u>187</u>
<i>Excusationibus tutorum vel curatorum</i>	1. 25. 31
<i>Exheredatione liberorum</i>	2. 13. <u>66</u>

## F

<i>de Fideicommissariis hereditatibus &amp; ad SC. Trebellianum</i>	2. 23. <u>91</u>
<i>Fidejussoribus</i>	3. 21. <u>136</u>
<i>Fiduciaria tutela.</i>	1. <u>19.</u> 25

## G

<i>de Gradibus cognationum</i>	3. 6. 112
--------------------------------	-----------

## H

<i>de Heredibus instituendis</i>	2. 14. <u>69</u>
<i>Hereditatibus qua ab intestato deferuntur</i>	3. 1. <u>99</u>
<i>Heredum qualitate &amp; differentia</i>	2. <u>19.</u> <u>78</u>
<i>His, qui sui vel alieni juris sunt</i>	1. 8. 11

## I

<i>de Ingeniis</i>	1. 4. 7
<i>Injuriis</i>	4. 4. <u>163</u>
<i>Inofficioso testamento</i>	2. 18. <u>77</u>
<i>Interdictis</i>	4. 15. <u>190</u>
<i>Inutilibus stipulationibus</i>	3. 20. 131
<i>Is per quos agere possumus</i>	4. 10. <u>183</u>
<i>Jure naturali, gentium &amp; civili</i>	1. 2. 4
<i>Jure personarum</i>	1. 3. 6
<i>Justitia &amp; jure</i>	1. 1. 3

## L

<i>de Legatis</i>	2. <u>20.</u> 81
<i>Lege Aquilia</i>	4. 3. <u>160</u>
<i>Lege Falcidia</i>	2. 22. 90
<i>Lex Fufia Caninia tollenda</i>	1. 7. 11
	Le-



# INDEX TITULORUM.

<i>Legitima agnatorum successione</i>	3. 2. 109
<i>Legitima agnatorum tutela</i>	1. 15. 23
<i>Legitima parentum tutela</i>	1. 18. 25
<i>Legitima patronorum tutela</i>	1. 17. 24
<i>Libertinis</i>	1. 5. 8
<i>Literarum obligationibus</i>	3. 22. 137
<i>Locatione &amp; conductione</i>	4. 25. 141

## M

<i>de Mandato</i>	3. 27. 145
<i>Militari testamento</i>	2. 11. 63

## N

<i>de Noxalibus actionibus</i>	4. 8. 181
<i>Nuptiis</i>	1. 10. 13

## O

<i>de Obligationibus</i>	3. 14. 26
<i>Obligationibus ex consensu</i>	3. 23. 138
<i>Obligationibus quæ quasi ex contractu nascuntur</i>	3. 28. 147
<i>Obligationibus, quæ ex delicto nascuntur</i>	4. 1. 153
<i>Obligationibus quasi ex delicto</i>	4. 5. 166
<i>Officio judicis</i>	4. 17. 195

## P

<i>de Patria potestate</i>	1. 9. 12
<i>Perpetuis &amp; temporalibus actionibus</i>	4. 12. 186
<i>Per quas Personas cuique acquiritur</i>	2. 9. 57
<i>Per quas Personas nobis obligatio acquiritur</i>	3. 29 149
<i>Pœna temere litigantium</i>	4. 16. 194
<i>Publicis judiciis</i>	4. 18. 197
<i>Pupillari substitutione</i>	2. 16. 73

## Q

<i>Quibus alienare licet, vel non</i>	2. 8. 55
<i>Quibus ex causis manumittere non licet</i>	1. 6. 9
<i>Quibus modis jus patriæ potestatis solvitur</i>	1. 12. 18

Qui-

# INDEX TITULORUM.

Quibus modis re contrahitur obligatio	3. 15. 126
Quibus modis testamenta infirmantur	2. 17. 75
Quibus modis tollitur obligatio	3. 30. 150
Quibus modis tutela finitur	1. 22. 28
Quibus non est permiffum facere testamentum	2. 12. 64
Qui testamento tutores dari poffunt	1. 14. 22
Quod cum eo, qui in aliena potestate est, negotium gestum esse dicitur	4. 7. 178

## R

de Rebus corporalibus & incorporalibus	2. 2. 46
Replicationibus	4. 14. 189
Rerum divisione, & acquirendo ipfarum dominio	2. 1. 36

## S

de Satisfactione tutorum vel curatorum	1. 24. 29
Satisfactionibus	4. 11. 184
Senatusconsulto Orphitiano	3. 4. 111
Senatusconsulto Tertulliano	3. 3. 109
Servili cognatione	3. 7. 114
Servitutibus prædiorum	2. 3. 47
Singulis rebus per fideicommissum relictis	2. 24. 96
Si quadrupes pauperiem fecisse dicatur	4. 9. 182
Societate	3. 26. 143
Stipulatione servorum	3. 18. 130
Successione Cognatorum	3. 5. 111
Successione libertorum	3. 8. 116
Successionibus sublatis, quæ fiebant per bonorum venditiones, & ex Senatusconsulto Claudiano	3. 13. 125
Suspectis tutoribus, vel curatoribus	1. 26. 33

## T

de Testamentis ordinandis	2. 10. 60
Testa-	

# INDEX TITULORUM.

<i>Testamento militari</i>	2. 11. 63
<i>Tutelis</i>	1. 13. 21

## V

<i>de Verborum obligationibus</i>	3. 16. 128
<i>Vi bonorum raptorum</i>	4. 2. 158
<i>Usucapionibus, &amp; longi temporis prescriptionibus</i>	2. 6. 50
<i>Usu &amp; habitatione</i>	2. 5. 49
<i>Usufructu</i>	2. 4. 47
<i>Vulgari substitutione</i>	2. 15. 72

---

<i>De verborum significatione</i>	200
<i>De regulis juris</i>	241

## LECTORI.

*En addit, demitque nihil de jure libellus;  
Succum rubra dabit littera, nigra nihil.*

P. WIBO.

PRO-

# PROOEMIUM

## De Confirmatione Institutionum.

[IN NOMINE DOMINI NOSTRI  
Jesu Christi.]

IMPERATOR *Casar Flavius Justinianus, Ale-  
manicus, Gothicus, Francicus, Germanicus, Anticus,  
Alanicus, Vandalicus, Africanus, Pius, Felix, In-  
clytus, victor ac triumphator semper Augustus, cupi-  
da legum juventuti* [S. D.]

**I**MPERATORIAM majestatem non so-  
lum armis decoratam, sed etiam legi-  
bus oportet esse armatam: ut utrum-  
que tempus, & bellorum, & pacis, re-  
cte possit gubernari: & princeps Roma-  
nus non solum in hostilibus praeliis vi-  
ctor existat, sed etiam per legitimos tramites calu-  
niantium iniquitates expellat: & fiat tam juris re-  
ligiosissimus, quam victis hostibus triumphator [ma-  
gnificus.]

1 ¶ Quorum utramque viam cum summis vigiliis,  
summaque providentia, annuente Deo, perfecimus.  
Et bellicos quidem audores nostros Barbaricæ gentes  
sub iuga nostra redactæ cognoscunt: & tam Africa,  
quam aliæ innumeræ provinciæ, post tanta tempo-  
rum spatia, nostris victoriis à cœlesti numine præsti-  
tis, iterum ditioni Romanæ, nostroque additæ im-  
perio, protestantur. Omnes vero populi legibus tam  
à nobis promulgatis, quam compositis, reguntur.

2 ¶ Et cum sacratissimas constitutiones, antea  
confusas, in luculentam ereximus consonantiam:  
tunc nostram extendimus curam ad immensa veteris  
prudentiæ volumina, & opus desperatum, quasi per  
medium profundum euntes, cœlesti favore jam ad-  
implevimus.

3 ¶ Cumque hoc, Deo propitio, peractum est:  
Triboniano viro magnifico, magistro, & exquæsto-  
re sacri palatii nostri, [& exconsule] nec non Theo-  
philo & Dorotheo, viris illustribus, antecessoribus,  
(quorum omnium solertiam, & legum scientiam, &

A

circa

circa nostras iussiones fidem, jam ex multis rerum argumentis accepimus) convocatis, mandavimus specialiter, ut ipsi nostra auctoritate, nostrisque suasionibus, Institutiones componerent. ut liceat vobis prima legum cunabula non ab antiquis fabulis discere, sed ab Imperiali splendore appetere: & tam aures quam animi vestri, nihil inutile, nihilque perperam positum, sed quod in ipsis rerum obtinet argumentis, accipiant: & quod priore tempore vix post quadriennium [prioribus] contingebat, [ut tunc constitutiones Imperatorias legerent:] hoc vos à primordio ingrediamini, digni tanto honore, tantaque referti felicitate, ut & initium vobis & finis legum eruditionis à voce principali procedat.

4 ¶ Igitur post libros quinquaginta Digestorum seu Pandectarum, (in quibus omne jus antiquum collectum est, quod per eundem virum excelsum Tribonianum: necnon ceteros viros illustres, & facundissimos confecimus) in quatuor libros easdem Institutiones partiri iussimus: ut sint totius legitimæ scientiæ prima elementa.

5 ¶ In quibus breviter expositum est: & quod antea obtinebat: & quod postea defuetudine inumbra- tum, Imperiali remedio illuminatum est.

6 ¶ Quas ex omnibus antiquorum Institutionibus, & præcipue ex commentariis Caji nostri, tam institutionum, quam rerum quotidianarum, aliisque multis commentariis compositas, cum tres viri prudentes prædicti nobis obtulerunt: & legimus & recognovimus, & plenissimum nostrarum constitutionum robur eis accommodavimus.

7 ¶ Summa itaque ope, & alacri studio has leges nostras accipite: & vosmetipsos sic eruditos ostendite: ut spes vos pulcherrima foveat, toto legitimo opere perfecto, posse etiam nostram Rempublicam, in partibus ejus vobis credendis gubernari. D. C. P. XI Kalend. Decemb. D. JUSTINIANO PP. A. III. CONS.

# INSTITUTIONUM,

seu Elementorum

D. JUSTINIANI,

sacratissimi Principis,

LIBER PRIMUS.

DE JUSTITIA ET JURE.

TITULUS I.



JUSTITIA est constans & perpetua voluntas jus suum cuique tribuendi.

1 ¶ Jurisprudentia est divinarum atque humanarum rerum notitia, justique injusti scientia.

2 ¶ His igitur generaliter cognitis, & incipientibus nobis exponere jura populi Romani: ita videntur posse tradi commodissime, si primo levi ac simplici via, post deinde diligentissima atque exactissima interpretatione, singula tradantur: alioqui si statim ab initio rudem adhuc & infirmum animum studiosi, multitudine ac varietate rerum oneraverimus: duorum alterum, aut desertorem studiorum efficiemus, aut cum magno labore, sæpe etiam cum diffidentia (quæ plerumque juvenes avertit) serius ad id perducemus: ad quod, leviori via ductus, sine magno labore, & sine ulla diffidentia, maturius perducere potuisset.

3 ¶ Juris præcepta sunt hæc: honeste vivere, alterum non lادere, suum cuique tribuere.

4 ¶ Hujus studii duæ sunt positiones, publicum & privatum. Publicum jus est, quod ad statum rei Romanæ spectat. Privatum, quod ad singulorum utilitatem. Dicendum est igitur de jure privato, quod tripartitum est: collectum est enim ex naturalibus præceptis, aut gentium, aut civilibus.

DE IVRE NATURALI, GENTIUM,  
& civili.

## TITULUS II.

**J**us naturale est, quod natura omnia animalia docuit. nam jus istud non humani generis proprium est: sed omnium animalium, [ quæ in cælo, ] quæ in terra, quæ in mari nascuntur. Hinc descendit maris atque foeminae conjunctio, quam nos matrimonium appellamus: hinc liberorum procreatio, hinc educatio. Videmus etenim cetera quoque animalia istius juris peritia censer.

**1 ¶** Jus autem civile à jure gentium distinguitur: quod omnes populi, qui legibus & moribus reguntur, partim suo proprio, partim communi omnium hominum jure utuntur: nam quod quisque populus ipse sibi jus constituit, id ipsius proprium civitatis est: vocaturque jus civile, quasi jus proprium ipsius civitatis. quod vero naturalis ratio inter omnes homines constituit, id apud omnes peræque custoditur: vocaturque jus gentium, quasi quo jure omnes gentes utantur. Et populus itaque Romanus partim suo proprio, partim communi omnium hominum jure utitur. Quæ singula qualia sint, suis locis proponemus.

**2 ¶** Sed jus quidem civile ex unaquaque civitate appellatur, veluti Atheniense. nam si quis velit Solonis, vel Draconis leges appellare jus civile Atheniense: non erraverit. sic enim & jus, quo Romanus populus utitur, jus civile Romanorum appellamus: vel jus Quiritum, quo Quirites utuntur. Romani enim [ à Romulo, ] Quirites à Quirino appellantur. Sed quoties non addimus nomen, cujus sit civitatis: nostrum jus significamus. sicuti cum Poëtam dicimus, nec addimus nomen, subauditur apud Græcos egregius Homerus, apud nos Virgilius. Ius autem gentium omni humano generi commune est. nam usu exigente, & humanis necessitatibus, gentes humanæ [ jura ] quædam sibi constituerunt. Bella etenim orta sunt, & captivitates sequuntur, & servitutes, quæ sunt naturali juri contrariæ. Jure enim natu-



naturali omnes homines ab initio liberi nascebantur. Et ex hoc jure gentium omnes pene contractus introducti sunt, ut emptio [ & ] venditio, locatio [ & ] conductio, societas, depositum, mutuum, & alii innumerabiles.

3 ¶ **Constat autem jus nostrum, quo utimur, aut scripto, aut sine scripto:** ut apud Græcos τὸ νόμον διὰ μὲν ἑγγεγραφοῖσι, διὰ δὲ ἄγραφοῖσι, id est, *Legum alia [sunt] scripta, alia non scripta. Scriptum autem jus est lex, plebiscitum, Senatusconsultum, principum placita, magistratuum edicta, responsa prudentium.*

4 ¶ **Lex est, quod populus Romanus senatorio magistratu interrogante (veluti Consule) constituebat. Plebiscitum est, quod plebs plebejo magistratu interrogante (veluti Tribuno) constituebat.** Plebs autem à populo eo differt, quæ species à genere: nam appellatione populi, universi cives significantur, connumeratis etiam patriciis & senatoribus. Plebis autem appellatione, sine patriciis & senatoribus ceteri cives significantur sed & **Plebiscita, lege Hortensia lata, non minus valere, quam leges cœperunt.**

5 ¶ **Senatusconsultum est, quod Senatus jubet, atque constituit.** Nam cum auctus esset populus Romanus in eum modum; ut difficile esset in unum eum convocari legis faciendæ causa: æquum visum est, Senatum vice populi consuli.

6 ¶ **Sed & quod Principi placuit, legis habet vigorem:** quum lege Regia, quæ de ejus imperio lata est, populus ei, & in eum omne imperium suum & potestatem concedat. Quodcunque ergo imperator per Epistolam constituit: vel cognoscens decrevit, vel edicto præcepit, legem esse constat: hæc sunt, quæ Constitutiones appellantur. Plane ex his quædam sunt personales, quæ nec ad exemplum trahuntur, [quoniam non hoc princeps vult.] nam quod alicui ob meritum indulget, vel si quam pœnam irrogavit, vel si cui sine exemplo subvenit: personam non transgreditur. Aliæ autem, quum generales sint, omnes proculdubio tenent.

7 ¶ **Prætorum quoque edicta non modicam obtinent juris auctoritatem.** Hoc etiam jus honorarium solemus appellare, quod qui honores gerunt, id est,

magistratus, auctoritatem huic juri dederunt. Proponabant & Aediles Curules edictum de quibusdam causis, quod & ipsum juris honorarii portio est.

8 ¶ Responsa prudentium sunt sententiae & opiniones eorum, quibus permissum erat de jure respondere. nam antiquitus constitutum erat, ut essent, qui jura publice interpretarentur, quibus à Cæsare jus respondendi datum est, qui Jurisconsulti appellabantur, quorum omnium sententiae & opiniones eam auctoritatem tenebant, ut iudici recedere à responso eorum non liceret, ut est constitutum.

9 ¶ Sine scripto jus venit, quod usus approbavit. nam diuturni mores consensu utentium comprobati, legem imitantur.

10 ¶ Et non ineleganter in duas species jus civile distributum esse videtur. nam origo ejus ab institutis duarum civitatum, Athenarum scilicet, & Lacedaemoniorum, fluxisse videtur. In his enim civitatibus ita agi solitum erat, ut Lacedaemonii quidem magis ea, quae pro legibus observabant, memoriae mandarent: Athenienses vero ea, quae in legibus scripta comprehendissent, custodirent.

11 ¶ Sed naturalia quidem jura, quae apud omnes gentes peraeque observantur: divina quadam providentia constituta, semper firma atque immutabilia permanent. Ea vero, quae ipsa sibi quaeque civitas constituit, saepe mutari solent, vel tacito consensu populi, vel alia postea lege lata.

12 ¶ Omne autem jus, quo utimur, vel ad personas pertinet, vel ad res, vel ad actiones. Et prius de personis videamus. nam parum est jus nosse, si personarum, quarum causa constitutum est, ignorentur.

## DE IVRE PERSONARUM.

### TITULUS III.

**S**umma itaque divisio de jure personarum hæc est: quod omnes homines, aut liberi sunt, aut servi.

1 ¶ Et libertas quidem (ex qua etiam liberi vocantur) est naturalis facultas ejus, quod cuique facere libet, nisi si quid vi aut jure prohibetur.

2 ¶ Servitus autem est constitutio juris gentium, qua

qua quis dominio alieno contra naturam subicitur.

3 ¶ Servi autem ex eo appellati sunt, quod imperatores captivos vendere, ac per hoc servare, nec occidere solent. qui etiam mancipia dicti sunt, [eo] quod ab hostibus manu capiuntur.

4 ¶ Servi autem aut nascuntur, aut sunt. nascuntur ex ancillis nostris. sunt, aut jure gentium, id est, ex captivitate: aut jure civili, cum liber homo major viginti annis ad pretium participandum sese venditari passus est.

5 ¶ In servorum conditione nulla est differentia: in liberis autem multæ; aut enim sunt ingenui, aut libertini.

## DE INGENUIS.

## TITULUS IV.

Ingenuus est is, qui statim, ut natus est, liber est: si-ve ex duobus ingenuis matrimonio editus est, si-ve ex libertinis duobus, si-ve ex altero libertino, & altero ingenuo. Sed & si quis ex matre nascitur libera, patre vero servo, ingenuus nihilominus nascitur, quemadmodum qui ex matre libera & incerto patre natus est, quoniam vulgo conceptus est. Sufficit autem liberam fuisse matrem eo tempore, quo nascitur, licet ancilla conceperit. Et è contrario, si libera conceperit, deinde ancilla facta pariat: placuit eum, qui nascitur, liberum nasci: quia non debet calamitas matris ei nocere, qui in ventre est. Ex his illud quæsitum est, Si ancilla prægnans manumissa sit: deinde ancilla postea facta pepererit: liberum, an servum pariat? Et Martianus probat liberum nasci. sufficit enim ei, qui in utero est, liberam matrem vel medio tempore habuisse, [ut liber nascatur:] quod & verum est.

1 ¶ Cum autem ingenuus aliquis natus sit, non officit ei in servitute fuisse, & postea manumissum esse: sapissime enim constitutum est, natalibus non officere manumissionem.

## DE LIBERTINIS.

## TITULUS V.

**L**ibertini sunt, qui ex justa servitute manumissi sunt: manumissio autem est de manu datio. nam quamdiu aliquis in servitute est, manui & potestati suppositus est: & manumissus liberatur potestate. Quæ res à jure gentium originem sumpit: utpote cum jure naturali omnes liberi nascerentur, nec esset nota manumissio, cum servitus esset incognita. Sed postquam jure gentium servitus invasit: sequutum est beneficium manumissionis, & cum uno communi nomine omnes *homines* appellarentur, jure gentium tria [hominum] genera esse cœperunt: liberi, & his contrarium servi, & tertium genus libertini, qui defierant esse servi.

1 ¶ Multis autem modis manumissio procedit, aut enim ex sacris constitutionibus in sacrosanctis ecclesiis, aut vindicta, aut inter amicos, aut per epistolam, aut per testamentum, aut per aliam quamlibet ultimam voluntatem. Sed & aliis multis modis libertas servo competere potest, qui tam ex veteribus, quam ex nostris constitutionibus introducti sunt.

2 ¶ Servi [vero] à dominis semper manumitti solent: adeo, ut vel in transitu manumittantur: veluti cum prætor, aut præses, aut proconsul in balneum, vel in theatrum eant.

3 ¶ Libertinorum autem status tripertitus antea fuerat. Nam qui manumittebantur, modo majorem & justam libertatem consequebantur, & fiebant cives Romani: modo minorem, & Latini ex lege Iunia Norbana fiebant: modo inferiorem, & fiebant ex lege Ælia Sentia dedititii. Sed quoniam dedititiorum quidem pessima conditio jam ex multis temporibus in desuetudinem abierat, Latinorum vero nomen non frequentabatur: ideoque nostra pietas omnia augere, & in meliorem statum reducere desiderans, duabus constitutionibus hoc emendavit, & in pristinum statum reduxit: quia & à primis urbis Romæ cunabulis una atque simplex libertas compete-

bar

bat : id est, eadem, quam habebat manumissor : nisi quod scilicet libertinus sit, qui manumittitur, licet manumissor ingenuus sit. Et dedititios quidem per constitutionem nostram expulimus, quam promulgavimus inter nostras decisiones : per quas, suggerente nobis Triboniano viro excelso, quaestore [nostro,] antiqui juris altercationes placavimus. Latinos autem Iunianos, & omnem quæ circa eos fuerat observantiam, alia constitutione per ejusdem quaestoris suggestionem correximus, quæ inter Imperiales radiat sanctiones. Et omnes liberos, nullo nec ætatis manumissi, nec domini manumittentis, nec in manumissionis modo discrimine habito (sicut jam antea observabatur) civitate Romana decoravimus : multis modis additis, per quos possit libertas servis cum civitate Romana, quæ sola est in præsentî, præstari.

QUIBUS EX CAUSIS MANUMITTERE  
non licet.

#### TITULUS VI.

**N**ON tamen cuicumque volenti manumittere licet. nam is, qui in fraudem creditorum manumittit, nihil agit : quia lex *Ælia Sentia* impedit libertatem.

1 ¶ Licet autem domino, qui solvendo non est, [in testamento] servum suum cum libertate hæredem instituire, ut liber fiat, hæresque ei solus & necessarius : si modo ei nemo alius ex eo testamento hæres extiterit : aut quia nemo hæres scriptus sit : aut quia is, qui scriptus est, qualibet ex causa hæres ei non extiterit. Idque eadem lege *Ælia Sentia* provisum est. & recte. Valde enim prospiciendum erat, ut egentes homines, quibus alius hæres extiturus non esset, vel servum suum necessarium hæredem haberent, qui satisfactorius esset creditoribus : aut hoc eo non faciente, creditores res hæreditarias servi nomine vendant, ne injuria defunctus afficiatur.

2 ¶ Idemque juris est, & si sine libertate servus hæres institutus est. Quod nostra constitutio non solum in domino, qui solvendo non est, sed genera-

liter constituit, nova humanitatis ratione: ut ex ipsa scriptura institutionis etiam libertas ei competere videatur: quum non sit verisimile, eum, quem hæredem sibi elegit, si prætermiserit libertatis dationem, servum remanere voluisse, & neminem sibi hæredem fore.

3 ¶ In fraudem autem creditorum manumittere videtur, qui vel jam eo tempore quo manumittit, solvendo non est: vel qui datis libertatibus, desiturus est solvendo esse. Prævaluisse tamen videtur (nisi animum quoque fraudandi manumissor habuerit) non impediri libertatem, quamvis bona [ejus] creditoribus non sufficiant. sæpe enim de facultatibus suis amplius, quam in his est, sperant homines. Itaque tunc intelligimus impediri libertatem, cum utroque modo fraudantur creditores, id est, & consilio manumittentis, & ipsa re, eo quod ejus bona non sunt suffectura creditoribus.

4 ¶ Eadem lege Ælia Sentia domino minori viginti annis non aliter manumittere permittitur, quam si vindicta apud consilium, justa causa manumissionis approbata, fuerint manumissi.

5 ¶ Justæ autem manumissionis causæ hæc sunt: veluti, Si quis patrem aut matrem, filium filiamve, aut fratres sororesve naturales, aut pedagogum, aut nutricem, aut educatorem, aut alumnum alumnamve, aut collactaneum manumittat: aut servum, procuratoris habendi gratia, aut ancillam matrimonii [habendi] causa: dum tamen intra sex menses in uxorem ducatur, nisi justa causa impediatur: & [servus,] qui manumittitur procuratoris habendi gratia, non minor decem & septem annis manumittatur.

6 ¶ Semel autem causa approbata, sive vera sit, sive falsa, non retractatur.

7 ¶ Cum ergo certus modus manumittendi minoribus viginti annis dominis per legem Æliam Sentiam constitutus esset: eveniebat, ut qui quatuordecim annos expleverat, licet testamentum facere, & in eo sibi hæredem instituere, legataque relinquere posset: tamen si adhuc minor esset viginti annis, libertatem servo dare non posset. Quod non erat ferendum: nam cui totorum suorum bonorum, in testa-

testamento dispositio data erat: quare non similiter ei, quemadmodum alias res; ita de servis suis in ultima voluntate disponere, quemadmodum voluerit, permittimus, ut & libertatem eis possit præstare? Sed quum libertas inæstimabilis res sit, & propter hoc ante xx ætatis annum antiquitas libertatem servo dare prohibebat: ideo nos mediam quodammodo viam eligentes, non aliter minori viginti annis libertatem in testamento dare servo suo concedimus, nisi **decimum septimum** annum impleverit, & **decimum octavum** attigerit. Quum enim antiquitas hujusmodi ætati, & pro aliis postulare concesserit: cur non etiam sui iudicii stabilitas ita eos adjuvare credatur, ut ad libertatem dandam servis suis possint pervenire.

DE LEGE FUSIA CANINIA  
tollenda.

TITULUS VII.

**L**ex Fusia Caninia certus modus constitutus erat in servis testamento manumittendis: quam, quasi libertates impediens, & quodammodo invidam, tollendam esse censuimus: quum satis fuerat inhumanum, vivos quidem licentiam habere totam suam familiam libertate donare, nisi alia causa impediatur libertatem: morientibus autem hujusmodi licentiam adimere.

DE HIS, QUI SUI, VEL ALIENI  
juris sunt.

TITULUS VIII.

**S**equitur de jure personarum alia divisio. Nam quædam personæ sui juris sunt, quædam alieno juri subiectæ. Rursus earum, quæ alieno juri subiectæ sunt, aliæ sunt in potestate parentum, aliæ in potestate dominorum. Videamus itaque de his, quæ alieno juri subiectæ sunt. nam si cognoverimus, quæ istæ personæ sunt: simul intelligemus quæ sui juris sunt, ac prius inspiciamus de his, quæ in potestate dominorum sunt.

1 ¶ In potestate itaque dominorum sunt servi, quæ quidem potestas juris gentium est. nam apud omnes peræque gentes animadvertere possumus, dominis in servos vitæ necisque potestatem fuisse: & quodcumque per servum acquiritur, id domino acquiri.

2 ¶ Sed hoc tempore nullis hominibus, qui sub imperio nostro sunt, licet, sine causa legibus cognita, in servos suos [supra modum] servire. Nam, ex constitutione divi Antonini, qui sine causa servum suum occiderit, non minus puniri jubetur, quam si alienum servum occiderit. Sed & major asperitas dominorum, ejusdem principis constitutione coercetur: nam [Antoninus] consultus à quibusdam præsidibus provinciarum de his servis, qui ad ædem sacram, vel ad statuam principum confugiunt, præcepit; ut si intolerabilis videatur servitia dominorum, cogantur servos suos bonis conditionibus vendere, ut pretium dominis daretur, & recte. expedit enim Reipublicæ, ne sua re quis male utatur. Cujus rescripti ad Ælium Martianum emissi verba sunt hæc: Dominorum quidem potestatem in servos suos illibatam esse oportet, nec cuiquam hominum jus suum detrahi. sed dominorum interest, ne auxilium contra servitiam, vel famem, vel intolerabilem injuriam denegetur iis, qui juste deprecantur. Ideoque cognosce de querelis eorum, qui ex familia Julii Sabini ad statuam confugerunt. &, si vel durius habitos, quam æquum est, vel infami injuria affectos esse cognoveris: venire jube, ita ut in potestatem domini non revertantur. Quod si meæ constitutioni fraudem fecerit, sciat me hoc admissum severius executurum.

## DE PATRIA POTESTATE.

### TITULUS IX.

IN potestate nostra sunt liberi nostri, quos ex justis nuptiis procreavimus.

1 ¶ Nuptiæ autem, sive matrimonium, est viri & mulieris conjunctio, individuam vitæ consuetudinem continens.



2 ¶ Jus autem potestatis, quod in liberos habemus, proprium est civium Romanorum. nulli enim alii sunt homines, qui talem in liberos habeant potestatem, qualem nos habemus.

3 ¶ Qui igitur ex te & uxore tua nascitur, in tua potestate est. Item qui ex filio tuo & uxore ejus nascitur, id est, nepos tuus & neptis, æque in tua sunt potestate, & pronepos, & proneptis, & deinceps ceteri. Qui autem ex filia tua nascuntur, in potestate tua non sunt, sed in patris eorum.

## DE NUPTIIS.

## TITULUS X.

Jussas autem nuptias inter se cives Romani contrahunt, qui secundum præcepta legum coeunt, masculi quidem puberes, foeminae autem viri potentes, sive patresfamiliarum sint, sive filiifamiliarum: dum tamen, si filiifamiliarum sint, consensum habeant parentum, quorum in potestate sunt. Nam hoc fieri debere, & civilis & naturalis ratio suadet: in tantum, ut jussus parentis præcedere debeat. Unde quaesitum est, an furiosi filia nubere, aut furiosi filius uxorem ducere possit? cumque super filio variabatur, nostra processit decisio, qua permissum est ad exemplum filiae furiosi, filium quoque [furiosi] posse & sine patris interventu matrimonium sibi copulare, secundum datum ex nostra constitutione modum.

1 ¶ Ergo non omnes nobis uxores ducere licet. nam à quarundam nuptiis abstinendum est. inter eas enim personas, quæ parentum liberorumve locum inter se obtinent, contrahi nuptiæ non possunt: veluti inter patrem & filiam, vel avum & neptem, vel matrem & filiam, vel aviam & nepotem, & usque in infinitum. Et si tales personæ inter se coierint: nefarias atque incestas nuptias contraxisse dicuntur. Et hæc adeo vera sunt, ut quamvis per adoptionem parentum liberorumve loco sibi esse cœperint, non possint inter se matrimonio jungi: in tantum, ut etiam dissoluta adoptione, idem juris maneat. Itaque eam, quæ tibi per adoptionem filia vel neptis esse cœpe-

rit, non poteris uxorem ducere, quamvis eam emancipaveris.

2 ¶ Inter eas quoque personas, quæ ex transverso gradu cognationis junguntur, est quædam similis observatio, sed non tanta. Sane enim inter fratrem sororemque nuptiæ prohibita sunt sive ab eodem patre eademque matre nati fuerint, sive ex altero eorum. Sed si qua per adoptionem soror tibi esse coeperit: quandiu quidem constat adoptio, sane inter te & eam nuptiæ consistere non possunt. cum vero per emancipationem adoptio sit dissoluta, poteris eam uxorem ducere. Sed & si tu emancipatus fueris, nihil est impedimento nuptiis. Et ideo constat, si quis generum adoptare velit, debere eum antea filiam suam emancipare: & si quis velit nurum adoptare, debere eum antea filium suum emancipare.

3 ¶ Fratris vero, vel sororis filiam, uxorem ducere non licet: sed nec neptem fratris vel sororis quis ducere potest, quamvis quatto gradu sint. Cujus enim filiam uxorem ducere non licet, neque ejus neptem permittitur. Ejus vero mulieris, quam pater tuus adoptavit, filiam non videris impediri uxorem ducere: quia neque naturali, neque civili jure tibi conjungitur.

4 ¶ Duorum autem fratrum vel sororum liberi, vel fratris & sororis, conjungi possunt.

5 ¶ Item amitam, licet adoptivam, ducere uxorem non licet, item nec materteram, quia parentum loco habentur. Qua ratione verum est, magnam quoque amitam, & materteram magnam prohiberi uxorem ducere.

6 ¶ Affinitatis quoque veneratione, à quarundam nuptiis abstinere necesse est: ut ecce, privignam aut nurum uxorem ducere non licet: quia utraque filia loco sunt. Quod ita scilicet accipi debet, si fuit nurus aut privigna tua. Nam si adhuc nurus tua est, id est, si adhuc nupta est filio tuo, alia ratione uxorem eam ducere non poteris: quia eadem duobus nupta esse non potest. Item si adhuc privigna tua est, id est, si mater ejus tibi nupta est, ideo eam uxorem ducere non poteris, quia duas uxores eodem tempore habere non licet.

7 ¶ Socrum quoque & novercam prohibitum est uxorem ducere: quia matris loco sunt. Quod & ipsum dissoluta demum affinitate procedit: alioquin si adhuc noverca est, id est, si adhuc patri tuo nupta est: communi jure impeditur tibi nubere, quia eadem duobus nupta esse non potest. Item si adhuc socrus est, id est, si adhuc filia ejus tibi nupta est: ideo impediuntur tibi nuptiæ, quia duas uxores habere non potes.

8 ¶ Mariti tamen filius ex alia uxore, & uxoris filia ex alio marito, vel contra, matrimonium recte contrahunt: licet habeant fratrem sororemve ex matrimonio postea contracto natos.

9 ¶ Si uxor tua post divortium ex alio filiam procreaverit: hæc non est quidem privigna tua: sed Julianus ab hujusmodi nuptiis abstinere debere ait. nam constat, nec sponsam filii nurum esse, nec patris sponsam novercam esse: rectius tamen, & jure facturos eos, qui ab hujusmodi nuptiis abstinerint.

10 ¶ Illud certum est, serviles quoque cognationes impedimento nuptiis esse: si forte pater & filia, aut frater & soror manumissi fuerint.

11 ¶ Sunt & aliæ personæ, quæ propter diversas rationes nuptias contrahere prohibentur, quas in libris Digestorum, seu Pandectarum, ex vetere jure collectarum, enumerari permisimus.

12 ¶ Si adversus ea, quæ diximus, aliqui coeunt: nec vir, nec uxor, nec nuptiæ, nec matrimonium, nec dos intelligitur. Itaque ii, qui ex eo coitu nascuntur, in potestate patris non sunt: sed tales sunt (quantum ad patriam potestatem pertinet) quales sunt ii, quos mater vulgo concepit. Nam nec hi patrem habere intelliguntur, cum & his pater incertus sit. unde solent spurii appellari *παρὰ τὴν πορὴν* id est, à *saturne* & *ἀπάτρως*, quasi sine patre filii. Sequitur ergo, ut dissoluto tali coitu, nec dotis, nec donationis exactioni locus sit. Qui autem prohibitas nuptias contrahunt, & alias poenas patiuntur, quæ sacris constitutionibus continentur.

13 ¶ Aliquando autem evenit, ut liberi, qui statim, ut nati sunt, in potestate parentum non sunt, postea redigantur in potestatem patris: qualis est is,

qui

qui dum naturalis fuerat, postea curiae datus, potestati patris subicitur: nec non is, qui à muliere libera procreatus, **cujus matrimonium minime legibus interdictum fuerat**, sed ad quam pater consuetudinem habuerat, postea **ex nostra constitutione** dotalibus instrumentis compositis, in potestate patris efficitur. Quod & aliis liberis, qui ex eodem matrimonio postea fuerint procreati, similiter nostra constitutio praebeat.

## DE ADOPTIONIBUS.

## TITULUS XI.

**N**on solum autem naturales liberi, secundum ea, quae diximus, in potestate nostra sunt: verum etiam ii, quos adoptamus.

1 ¶ Adoptio autem duobus modis fit, aut principali rescripto, aut imperio magistratus. Imperatoris auctoritate adoptare quis potest eos casus, qui quævis sui juris sunt: quæ species adoptionis dicitur arrogatio. Imperio magistratus adoptamus eos casus, qui quævis in potestate parentum sunt, sive primum gradum liberorum obtineant, qualis est filius, filia: sive inferiorem, qualis est nepos, neptis, pronepos, proneptis.

2 ¶ Sed hodie ex nostra constitutione, cum filiusfamilias à patre naturali extraneæ personæ in adoptionem datur: jura patris naturalis minime dissolvuntur, nec quicquam ad patrem adoptivum transit: nec in potestate eius est, licet ab intestato jura successionis ei à nobis tributa sint. Si vero pater naturalis non extraneo, sed avo filii sui materno, vel si ipse pater naturalis fuerit emancipatus, etiam avo vel proavo simili modo paterno vel materno filium suum dederit in adoptionem: in hoc casu, quia concurrunt in unam personam, & naturalia, & adoptionis jura: manet stabile jus patris adoptivi, & naturali vinculo copulatum, & legitimo adoptionis modo constitutum: ut & in familia, & in potestate hujusmodi patris adoptivi sit.

3 ¶ Cum autem iuniores per principale rescriptum arrogatur, causa cognita arrogatio fieri permittitur, &

& exquiritur causa arrogationis an honesta sit: expediatque pupillo. Et cum quibusdam conditionibus arrogatio fit, id est, ut caveat arrogator personæ publicæ, si intra pubertatem pupillus decesserit, restitutum se bona illis, qui, si adoptio facta non esset, ad successionem ejus venturi essent. Item non aliter emancipare eum potest arrogator, nisi causa cognita dignus emancipatione fuerit. & tunc sua bona ei reddat. Sed & si decedens pater eum exheredaverit, vel vivus sine iusta causa emancipaverit: jubetur quartam partem ei bonorum suorum relinquere, videlicet præter bona, quæ ad patrem adoptionis transiit, & quorum commodum ei postea acquisivit.

4 ¶ Minorem natu, majorem non posse adoptari placet. adoptio enim naturam imitatur: & pro monstro est, ut major sit filius, quam pater. Debet itaque is, qui sibi filium per adoptionem vel arrogationem facit, plena pubertate, id est, decem & octo annis præcedere.

5 ¶ Licet autem & in locum nepotis vel neptis, pronepotis vel proneptis, vel deinceps adoptare, quamvis filium quis non habeat.

6 ¶ Et tam filium alienum quis in locum nepotis adoptare potest, quam nepotem in locum filii.

7 ¶ Sed si quis nepotis loco adoptet, vel quasi ex filio quem habet jam adoptatum: vel quasi ex illo, quem naturalem in sua potestate habet: eo casu & filius consentire debet, ne ei invito suus hæres agnascatur: sed ex contrario, si avus ex filio nepotem det in adoptionem, non est necesse filium consentire.

8 ¶ In plurimis autem causis assimilatur is, qui adoptatus vel arrogatus est, ei, qui ex legitimo matrimonio natus est, & ideo, si quis per imperatorem, vel apud prætorem vel præsidem provinciæ non extraneum adoptaverit, potest eundem in adoptionem alii dare.

9 ¶ Sed & illud utriusque adoptionis commune est, quod & ii, qui generare non possunt (quales sunt spadones) adoptare possunt. [castrati autem non possunt.]

10 ¶ *Fœminæ quoque adoptare non possunt: quia nec naturales liberos in sua potestate habent: sed ex indulgentia principis ad solatium liberorum amissorum adoptare possunt.*

11 ¶ *Illud proprium est adoptionis illius, quæ per sacrum oraculum fit, quod is, qui liberos in potestate habet, si se arrogandum dederit, non solum ipse potestati arrogatoris subicitur, sed etiam liberi ejus in ejusdem fiunt potestate tanquam nepotes. sic etenim divus Augustus non ante Tiberium adoptavit, quam is Germanicum adoptasset: ut protinus adoptione facta, inciperet Germanicus Augusti nepos esse.*

12 ¶ *Apud Catonem bene scriptum refert antiquitas, Servos, si à domino adoptati sint, ex hoc ipso posse liberari. Unde & nos eruditi, in nostra constitutione etiam eum servum quem dominus actis intervenientibus filium suum nominaverat, liberum esse constituimus: licet hoc ad jus filii accipiendum non sufficiat.*

## QUIBUS MODIS JUS PATRIÆ potestatis solvitur.

### TITULUS XII.

**V**ideamus nunc, quibus modis ii, qui alieno juri sunt subjecti, eo jure liberentur. Et quidem quemadmodum liberentur servi à potestate dominorum, ex iis intelligere possumus, quæ de servis manumittendis superius exposuimus. Hi vero, qui in potestate parentis sunt, mortuo eo, sui juris fiunt. Sed hoc distinctionem recipit. nam mortuo patre, sane omni modo filii filiaque sui juris efficiuntur. Mortuo vero avo, non omnino nepotes neptesque sui juris fiunt: sed ita, si post mortem avi in potestatem patris sui recasuri non sunt. itaque si moriente avo pater eorum vivit, & in potestate patris sui est, tunc post obitum avi in potestate patris sui fiunt. Si vero is, quo tempore avus moritur, aut jam mortuus est, aut [per emancipationem] exiit de potestate patris: tunc ii, qui in potestatem ejus cadere non possunt, sui juris fiunt.

1 ¶ *Cuna.*

1 ¶ Cum autem is, qui ob aliquod maleficium in insulam deportatur, civitatem amittit: sequitur, ut qui eo modo ex numero civium Romanorum tollitur, perinde quasi eo mortuo, desinant liberi in potestate ejus esse. Pari ratione & si is, qui in potestate parentis sit, in insulam deportatus fuerit, desinit esse in potestate parentis. sed si ex indulgentia principis restituti fuerint; per omnia pristinum statum recipiunt.

2 ¶ Relegati autem patres in insulam, in potestate liberos retinent. Et ex contrario liberi relegati, in potestate parentum remanent.

3 ¶ Pœnæ servus effectus, filios in potestate habere desinit. Servi autem pœnæ efficiuntur, qui in metallum damnantur, & qui bestiis subjiuntur.

4 ¶ Filiusfamilias si militaverit, vel si senator, vel consul factus fuerit: remanet in potestate patris. militia enim, vel consularis dignitas de patris potestate filium non liberat. Sed ex constitutione nostra summa patriciatus dignitas illico, imperialibus codicillis præstitis, filium à patria potestate liberat: quis enim patitur patrem quidem posse per emancipationis modum potestatis suæ nexibus filium liberare: imperatoriam autem celsitudinem non valere eum, quem sibi patrem elegit, ab aliena eximere potestate?

5 ¶ Si ab hostibus captus fuerit parens, quamvis servus hostium fiat, tamen pendet jus liberorum propter jus postliminii: quia hi, qui ab hostibus capti sunt, si reversi fuerint, omnia pristina jura recipiunt. idcirco reversus etiam liberos habebit in potestate: quia postliminium fingit eum, qui captus est, in civitate semper fuisse: Si vero ibi decesserit: exinde, ex quo captus est pater, filius sui juris fuisse videtur. Ipse quoque filius, neposve, si ab hostibus captus fuerit: similiter dicimus propter jus postliminii, jus quoque potestatis parentis in suspenso esse. Dictum est autem postliminium à limine, & post. Unde eum, qui ab hostibus [captus est, &] in fines nostros postea pervenit, postliminio reversum recte dicimus. Nam limina, sicut in domo finem quemdam faciunt: sic & imperii finem esse limen veteres

voluerunt. Hinc & limen dictum est, quasi finis quidam & terminus. ab eo postliminium dictum est, quia ad idem limen revertebatur, quod amiserat. Sed & qui captus victis hostibus recuperatur, postliminio rediisse existimatur.

6 ¶ Præterea emancipatione quoque desinunt liberi in potestate parentum esse. Sed emancipatio antea quidem vel per antiquam legis observationem procedebat, quæ per imaginarias venditiones, & intercedentes manumissiones celebrabatur, vel ex imperiali rescripto. Nostra autem providentia etiam hoc in melius per constitutionem reformavit: ut fictione pristina explosa, recta via ad competentes iudices vel magistratus, parentes intrent: & filios suos, vel filias, vel nepotes, vel neptes, ac deinceps, à sua manu dimittant. Et tunc ex edicto prætoris in bonis huiusmodi filii, vel filiæ, vel nepotis, vel neptis, qui quæve à parente manumissus, vel manumissa fuerit, eadem iura præstantur parenti, quæ tribuuntur patrono in bonis liberti. Et præterea si impubes sit filius, vel filia, vel cæteri: ipse parens ex manumissione tutelam ejus nanciscitur.

7 ¶ Admonendi autem sumus, liberum arbitrium esse ei, qui filium, & ex eo nepotem vel neptem in potestate habebit: filium quidem de potestate dimittere: nepotem vero vel neptem retinere. & è converso filium quidem in potestate retinere, nepotem vero vel neptem manumittere, vel omnes sui juris efficere. Eadem & de pronepote & pronepte dicta esse intelligantur.

8 ¶ Sed & si pater filium, quem in potestate habet, avo vel proavo naturali secundum nostras constitutiones super his habitas, in adoptionem dederit: id est, si hoc ipsum actis intervenientibus apud competentem judicem manifestaverit, præsentem eo, qui adoptatur, & non contradicente, nec non eo [præsentem,] qui adoptat: solvitur quidem jus potestatis patris naturalis: transit autem in huiusmodi parentem adoptivum, in cujus persona & adoptionem esse plenissimam antea diximus.

9 ¶ Illud autem scire oportet, quod si nurus tua ex filio tuo conceperit, & filium postea emancipaveris



veris; vel in adoptionem dederis, **prægnante nuru tua: nihilominus** quod ex ea nascitur, in potestate tua nascitur. **Quod** si post emancipationem vel adoptionem conceptus fuerit: patris sui emancipati, vel avi adoptivi potestati subijcitur.

**10 ¶ Et quidem** neque naturales liberi, neque adoptivi ullo pene modo possunt cogere parentes, de potestate sua eos dimittere.

## DE TUTELIS.

## TITULUS XIII.

**T**Ranſeamus nunc ad aliam divisionem personarum. Nam ex his personis, quæ in potestate non sunt, quædam vel in tutela sunt vel in curatione, quædam neutro jure tenentur. Videamus ergo de his, quæ in tutela vel in curatione sunt. Ita enim intelligemus cæteras personas, quæ neutro jure tenentur. Ac prius despiciamus de his, quæ in tutela sunt.

**1 ¶** Est autem tutela (ut Servius definivit) vis ac potestas in capite libero ad tuendum eum, qui propter ætatem se defendere nequit, jure civili data ac permessa.

**2 ¶** Tutores autem sunt, qui eam vim ac potestatem habent, exque ipsa re nomen acceperunt. itaque appellantur tutores, quasi tuitores atque defensores: sicut æditi dicuntur, qui ædes tuentur.

**3 ¶** Permissum est itaque parentibus, liberis impuberibus, quos in potestate habent, testamento tutores dare. Et hoc in filios, filiasque procedit omnimodo. nepotibus vero neptibusque ita deinceps parentes possunt testamento tutores dare, si post mortem eorum in potestatem patris sui non sunt recasuri. Itaque si filius tuus mortis tue tempore in potestate tua sit: nepotes ex eo non poterunt [ex] testamento tuo tutores habere, quamvis in potestate tua fuerint: scilicet quia mortuo te, in potestatem patris sui recasuri sunt.

**4 ¶** Cum autem in compluribus aliis causis posthumi pro jam natis habeantur: & in hac causa placuit non minus posthumis, quam jam natis testamento tutores dari posse: si modo in ea causa sint, ut si  
vivis

vivis parentibus nascerentur, sui [hæredes,] & in potestate eorum fierent.

5 ¶ Sed & si emancipato filio tutor à patre datus fuerit testamento: confirmandus est ex sententia præsidis omni modo, id est, sine inquisitione.

## QUI TESTAMENTO TUTORES dari possunt.

### TITULUS XIV.

**D**Ari autem tutor potest testamento non solum paterfamilias, sed etiam filiusfamilias.

1. ¶ Sed & servus proprius testamento cum libertate recte tutor dari potest. Sed sciendum est, cum & sine libertate tutorem datum, tacite libertatem directam accepisse videri, & per hoc recte tutorem esse. Plane si per errorem, quasi liber, tutor datus sit, aliud dicendum est. Servus autem alienus pure inutiliter testamento datur tutor: sed ita; cum liber erit, utiliter datur; proprius autem servus inutiliter eo modo tutor datur.

2. ¶ Furiosus, vel minor vigintiquinque annis tutor testamento datus, tutor tunc erit, cum compos mentis, aut major vigintiquinque annis fuerit factus.

3. ¶ Ad certum tempus, vel ex certo tempore, vel sub conditione vel ante hæredis institutionem posse dari tutorem, non dubitatur.

4. ¶ Certa autem rei vel causæ tutor dari non potest: quia personæ, non causæ, vel rei [tutor] datur.

5. ¶ Si quis filiabus suis vel filiis tutores dederit: etiam posthumæ [vel posthumus] dedisse videtur: quia filii vel filiæ appellatione & posthumus & posthuma continentur. Quod si nepotes sint, an appellatione filiorum & ipsis tutores dati sint? Dicendum est, ut & ipsis quoque dati videantur: si modo liberos dixerit. Cæterum, si filios: non continebuntur, aliter enim filii, aliter nepotes appellantur. Plane si posteris dederit: tam filii posthumi, quam cæteri liberi continebuntur.

DE LEGITIMA AGNATORUM  
tutela.

## TITULUS XV.

**Q**uibus autem testamento tutor datus non est: **his** ex lege duodecim tabularum agnati sunt tutores, qui vocantur legitimi.

1 ¶ Sunt autem agnati, [cognati] per virilis sexus cognationem conjuncti, quasi à patre cognati: veluti frater [ex] eodem patre natus, fratris filius neposve ex eo: item patruus, & patruī filius neposve ex eo. At qui per fœminini sexus personas cognatione junguntur, agnati non sunt: sed alias naturali jure cognati. itaque amitæ tuæ filius non est tibi agnatus: sed cognatus: & invicem tu illi eodem jure conjungeris, quia qui [ex ea] nascuntur, patris, non matris familiam sequuntur.

2 ¶ Quod autem [lex duodecim tabularum] ab intestato vocat ad tutelam agnatos: non hanc habet significationem, si omnino non fecerit testamentum, qui poterat tutores dare: sed si, quantum ad tutelam pertinet, intestatus decesserit. quod tunc quoque accidere intelligitur, cum is, qui datus est tutor, vivo testatore decesserit.

3 ¶ Sed agnationis quidem jus omnibus modis capitis diminutione plerumque perimitur: nam agnatio juris [civilis] nomen est: cognationis vero jus non omnibus modis commutatur: quia civilis ratio civilia quidem jura corrumpere potest, naturalia vero non utique.

## DE CAPITIS DIMINUTIONE.

## TITULUS XVI.

**E**st autem capitis diminutio, status mutatio. Etque tribus modis accidit. Nam aut maxima est capitis diminutio aut minor (quam quidam mediam vocant) aut minima.

1 ¶ Maxima capitis diminutio est cum aliquis simul & civitatem & libertatem amittit: quod accidit in his, qui servi poenæ efficiuntur atrocitate sententiæ

tiæ: vel libertis, ut ingratis erga patronos condemnatis: [vel his,] qui se ad pretium participandum venundari passi sunt.

2 ¶ Minor, sive mediæ capitis diminutio est, cum civitas quidem amittitur, libertas vero retinetur, quod accidit ei, cui aqua & igni interdictum fuerit: vel ei, qui in insulam deportatus est.

3 ¶ Minima capitis diminutio est, cum civitas retinetur & libertas, sed status hominis commutatur: quod accidit in his, qui cum sui juris fuerint, coeperunt alieno juri subiecti esse, vel contra. [veluti si filiusfamilias à patre emancipatus fuerit, est capite diminutus.]

4 ¶ Servus autem manumissus, capite non minuitur: quia nullum caput habuit.

5 ¶ Quibus autem dignitas magis, quam status permittitur: capite non minuuntur: & ideo à senatu motos capite non minui constat.

6 ¶ Quid autem dictum est, manere cognationis jus etiam post capitis diminutionem: hoc ita est, si minima capitis diminutio interveniat, manet enim cognatio. nam si maxima capitis diminutio interveniat: jus quoque cognationis perit, ut puta servitute alicujus cognati: & ne quidem si manumissus fuerit, recipit cognationem. Sed & si in insulam quis deportatus sit, cognatio solvitur.

7 ¶ Quum autem ad agnatos tutela pertineat: non simul ad omnes pertinet, sed ad eos tantum, qui proximiores gradu sunt: vel si plures ejusdem gradus sunt, ad omnes [pertinet: veluti si plures fratres sunt, qui unum gradum obtinent, pariter ad tutelam vocantur.]

## DE LEGITIMA PATRONORUM tutela.

### TITULUS XVII.

**E**X eadem lege duodecim tabularum libertorum & libertarum tutela ad patronos liberosque eorum pertinet, quæ & ipsa legitima tutela vocatur: non quia nominatim [in] ea lege de hac tutela caveatur: sed

sed quia perinde accepta est per interpretationem, ac si verbis legis introducta esset. **Eo** enim ipso, quod **hæreditates libertorum libertarumque**, si intestati decessissent, iusserat lex ad patronos liberorumque pertinere; crediderunt veteres voluisse legem etiam tutelas ad eos pertinere: cum & agnatos, quos ad hæreditatem [lex] vocat, eosdem & tutores esse iusserit: quia plerumque ubi successionis est emolumentum, ibi & tutelæ onus esse debet. Ideo autem diximus plerumque: quia si à fœmina impubes manumittatur, ipsa ad hæreditatem vocatur, quum alius sit tutor.

## DE LEGITIMA PARENTUM

tutela.

## TITULUS XVIII.

**E**xemplo patronorum recepta est & alia tutela, quæ & ipsa legitima vocatur. nam si quis filium aut filiam, nepotem aut neptem ex filio, & deinceps impuberes emancipaverit: legitimus eorum tutor erit.

## DE FIDUCIARIA TUTELA.

## TITULUS XIX.

**E**st & alia tutela, quæ fiduciaria appellatur. nam si pater filium, vel filiam, nepotem, vel neptem, vel deinceps impuberes manumiserit: legitimam nanciscitur eorum tutelam. Quo defuncto, si liberi [ejus] virilis sexus existant, fiduciarium tutores vel fratris, vel sororis efficiuntur. Atqui patrono legitimo tutore mortuo, liberi quoque ejus legitimi sunt tutores: quoniam filius quidem defuncti, si non esset à vivo patre emancipatus, post obitum ejus sui juris efficeretur, nec in fratrum potestatem recideret, ideoque nec in tutelam. Libertus autem, si servus mansisset, utrique eodem jure apud liberos domini post mortem ejus futurus esset. Ita tamen hi ad tutelam vocantur, si perfectæ sint ætatis, quod nostra constitutio in omnibus tutelis & curationibus observari generaliter præcepit.

DE ATILIANO TUTORE, ET EO QUI  
lege Julia & Titia dabatur.

## TITULUS XX.

SI cui nullus omnino tutor fuerat: ei dabatur, in urbe quidem à prætore urbano, & maiore parte tribunorum plebis, tutor ex lege Atilia: in Provinciis vero à præsidibus provinciarum ex lege Julia & Titia.

1 ¶ Sed & si in testamento tutor sub conditione, aut ex die certo datus fuerat: quamdiu conditio aut dies pendebat, ex eisdem legibus tutor dari poterat. Item si pure datus fuerat: quamdiu ex testamento nemo hæres existerat, tamdiu ex eisdem legibus tutor petendus erat: qui desinebat esse tutor, si conditio extiterat, aut dies venerat, aut hæres extiterat.

2 ¶ Ab hostibus quoque tutore capto, ex his legibus tutor petebatur: qui desinebat esse tutor, si is, qui captus erat, in civitatem reversus fuerat. nam reversus recipiebat tutelam jure postliminii.

3 ¶ Sed ex his legibus tutores pupillis desierunt dari, posteaquam primo consules pupillis utriusque sexus tutores ex inquisitione dare cœperunt, deinde prætores ex constitutionibus. Nam supradictis legibus neque de cautione à tutoribus exigenda, rem salvam pupillis fore: neque de compellendis tutoribus ad tutelæ administrationem, quidquam cavebatur.

4 ¶ Sed hoc jure utimur, ut Romæ quidem præfectus urbi, vel prætor secundum suam jurisdictionem, in provinciis autem præfides ex inquisitione tutores crearent, vel magistratus jussu præsidum, si non sint magnæ pupilli facultates.

5 ¶ Nos autem per constitutionem nostram hujusmodi difficultates hominum rescantes: nec expectata jussione præsidum, disposuimus, si facultates pupilli vel adulti usque ad quingentos solidos valeant, defensores civitatum una cum ejusdem civitatis religiosissimo antistite, vel alias publicas personas, id est, magistratus, vel juridicum Alexandrinæ civitatis, tutores vel curatores creare: legitima cautela secundum ejusdem constitutionis normam

κ.

præ.

**præstanda**, videlicet eorum periculo, qui eam accipiunt.

6 ¶ Impuberes autem in tutela esse naturali juri conveniens est. ut is, qui perfectæ ætatis non sit, alterius tutela regatur.

7 ¶ Quum ergo pupillorum pupillarumque **tutores** negotia gerant: **post pubertatem tutelæ judicio rationem reddunt.**

## DE AUCTORITATE TUTORUM.

### TITULUS XXI.

**A**uctoritas autem tutoris in quibusdam causis necessaria **pupillis** est, in quibusdam non est necessaria, ut ecce si quid dari sibi stipulentur: non est necessaria tutoris auctoritas: quod si aliis promittant pupilli, necessaria est tutoris auctoritas. Namque placuit meliorem quidem conditionem licere eis faceretiā sine tutoris auctoritate: deteriorem vero non aliter quam [cum] tutoris auctoritate. Unde in his causis, ex quibus obligationes mutux nascuntur, ut in emptionibus, venditionibus, locationibus, conductionibus, mandatis, depositis: si tutoris auctoritas non interveniat: ipsi quidem, qui cum his contrahunt, obligantur: at invicem **pupilli** non obligantur.

1 ¶ Neque tamen hæreditatem adire, neque bonorum possessionem petere, neque hæreditatem ex fideicommissio suscipere aliter possunt, nisi tutoris auctoritate (quamvis [illis] lucrosa sit) ne ullum damnum habeant.

2 ¶ Tutor autem statim in ipso negotio **præsens** debet auctor fieri, si hoc pupillo prodesse existimaverit, post tempus vero, vel per epistolam interposita auctoritas, nihil agit.

3 ¶ Si inter tutorem **pupillumque** **judicium agendum** sit: quia ipse tutor in rem suam auctor esse non potest: non prætorius tutor (ut olim) constituitur, sed **curator** in locum ejus **datur**: quo [curatore] interveniente, judicium peragitur, & eo peracto, curator esse desinit.

## QUIBUS MODIS TUTELA FINITUR.

## TITULUS XXII.

**P**upilli, pupillæque, cum puberes esse coeperint, [a] tutela liberantur. Pubertatem autem veteres quidem non solum ex annis, sed etiam ex habitu corporis in masculis æstimari volebant. Nostra autem majestas dignum esse castitate nostrorum temporum [existimans,] bene putavit: quod in foeminis etiam antiquis impudicum esse visum est, id est, inspectionem habitudinis corporis, hoc etiam in masculos extendere. Et ideo [nostra] sancta constitutione promulgata, pubertatem in masculis post decimumquartum annum completum illico initium accipere disposuimus: antiquitatis normam in foeminis bene positam, [in] suo ordine relinquentes, ut post duodecim annos completos viri potentes esse credantur.

1 ¶ Item finitur tutela, si arrogati sint adhuc impuberes, vel deportati: item si in servitutem pupillus redigatur, vel [si] ab hostibus captus fuerit.

2 ¶ Sed & si usque ad certam conditionem datus sit [tutor] testamento: æque evenit, ut desinat esse tutor existente conditione.

3 ¶ Simili modo finitur tutela morte vel pupillorum, vel tutorum.

4 ¶ Sed & capitis deminutione tutoris, per quam libertas vel civitas amittitur, omnis tutela perit. Minima autem capitis deminutione tutoris, veluti si se in adoptionem dederit, legitima tantum tutela perit, ceteræ non pereunt. Sed pupilli & pupillæ capitis deminutio licet minima sit, omnes tutelam tollit.

5 ¶ Præterea qui ad certum tempus testamento dantur tutores, finito eo, deponunt tutelam.

6 ¶ Desinunt etiam tutores esse, qui vel remonentur à tutela ob id quod suspecti visi sunt: vel qui ex justa causa sese excusant, & onus administrandæ tutelæ deponunt, secundum ea quæ inferius proponemus.



## DE CURATORIBUS:

## TITULUS XXIII.

**M**asculi [quidem] pubères, & fœminæ viri potentes, usque ad vicesimum quintum annum completum curatores accipiant: quia licet puberes sint, adhuc tamen ejus ætatis sunt, ut sua negotia tueri non possint.

1 ¶ Dantur autem curatores ab eisdem magistratibus à quibus & tutores. Sed curator testamento non datur: datus tamen confirmatur decreto pratoris vel præsidis.

2 ¶ Item inviti adolescentes, curatores non accipiunt, præterquam in litem. curator enim & ad certam causam dari potest.

3 ¶ Furiosi quoque & prodigi, licet majores vintiquinque annis sint: tamen in curatione sunt agnatorum ex lege duodecim tabularum. Sed solent Romæ præfectus urbi vel prætores, & in provinciis præsidēs ex inquisitione eis curatores dare.

4 ¶ Sed & mente captis, & surdis, & mutis, & qui perpetuo morbo laborant (quia rebus suis superesse non possunt) curatores dandi sunt.

5 ¶ Interdum autem & pupilli curatores accipiunt, utputa, si legitimus tutor non sit idoneus: quoniam habenti tutorem tutor dari non potest. Item si testamento datus tutor, vel à prætore, aut præside, idoneus non sit ad administrationem, nec tamen fraudulenter negotia administret: solet ei curator adungi. Item loco tutorum, qui non in perpetuum, sed ad tempus à tutela excusantur, solent curatores dari.

6 ¶ Quod si tutor adversa valetudine, vel alia necessitate impediatur, quo minus negotia pupilli administrare possit: & pupillus vel absit, vel infans sit: quem velit actorem, periculo ipsius tutoris, prætor, vel qui provinciæ prærit, decreto constituet.

## DE SATISDATIONE TUTORUM

vel curatorum.

## TITULUS XXIV.

**N**E tamen pupillorum pupillarumve, & eorum qui quæve in curatione sunt, negotia à curatoribus

tutoribusve consumantur, vel diminuantur: curet prætor, ut & tutores, & curatores eo nomine satisfident. Sed hoc non est perpetuum. nam tutores testamento dati satisfacere non coguntur: quia fides eorum & diligentia ab ipso testatore approbata est. item ex inquisitione tutores vel curatores dati, satisfactione non onerantur: quia idonei electi sunt.

1 ¶ Sed si ex testamento vel inquisitione duo pluresve dati fuerint: potest unus offerre satisfactionem de indemnitate pupilli vel adolescentis, & contutori suo vel concuratori præferri, ut solus administraret: vel ut contutor [aut concurator] satis offerens præponatur ei, ut & ipse solus administraret. Itaque per se non potest petere satisfactionem à contutore suo vel concuratore: sed offerre debet, ut electionem det concuratori vel contutori suo, utrum velit satis accipere, an satisfacere. Quod si nemo eorum satis offerat: si quidem adscriptum fuerit à testatore, quis gerat: ille gerere debet. Quod si non fuerit adscriptum: quem major pars elegerit, ipse gerere debet, ut edicto prætoris cavetur. Sin autem ipsi tutores dissenserint, circa eligendum eum, vel eos, qui gerere debent: prætor partes suas interponere debet. Idem & in pluribus ex inquisitione datis comprobandum est: id est, ut major pars eligere possit, per quem administratio fiat.

2 ¶ Sciendum autem est, non solum tutores vel curatores pupillis, vel adultis, cæterisque personis ex administratione rerum teneri: sed etiam in eos, qui satisfactionem accipiunt, subsidiariam actionem esse, quæ ultimum eis præsidium possit afferre. Subsidiaria autem actio in eos datur, qui aut omnino à tutoribus vel curatoribus satisfacere non curaverunt, aut non idoneè passi sunt caveri. quæ quidem tam ex prudentium responsis, quam ex constitutionibus imperialibus etiam in hæredes eorum extenditur.

3 ¶ Quibus constitutionibus & illud exprimitur, ut, nisi caveant tutores & curatores, pignoribus capitis coercerentur.

4 ¶ Neque autem præfectus urbi, neque prætor, neque præses provinciæ, neque quisquam alius, cui tutores dandi jus est, hac actione tenebitur: sed hi tantummodo, qui satisfactionem exigere solent. DE

## DE EXCUSATIONIBUS TUTORUM

vel curatorum.

## TITULUS XXV.

**E**Xcusantur autem tutores & curatores variis ex causis: plerumque tamen propter liberos, siue in potestate sint, siue emancipati. Si enim tres liberos superstites Romæ quis habeat, vel in Italia quatuor, vel in provinciis quinque: à tutela vel cura potest excusari, exemplo cæterorum munerum. nam & tutelam & curam placuit publicum munus esse. Sed adoptivi liberi non profunt. In adoptionem autem dati, naturali patri profunt. Item nepotes ex filio profunt, ut in locum patris sui succedant: ex filia non profunt. Filii autem superstites tantum ad tutelæ vel curæ muneris excusationem profunt: defuncti autem non profunt. Sed si in bello amissi sunt: quæsitum est, an profint? Et constat eos solos prodesse, qui in acie amittuntur. hi enim, qui pro republica ceciderunt, in perpetuum per gloriam vivere intelliguntur.

1 ¶ Item divus Marcus in Semestribus rescripsit, eum, qui res fisci administrat, à tutela vel cura, quamdiu administrat, excusari posse.

2 ¶ Item qui reipublicæ causa absunt, à tutela vel cura excusantur. Sed & si fuerint tutores vel curatores [dati,] deinde reipublicæ causa abesse cœperint: à tutela vel cura excusantur, quatenus reipublicæ causa absunt: & interea curator loco eorum datur: qui si reversi fuerint, recipiunt onus tutelæ. nam nec anni habent vacationem, ut Papinianus libro quinto Responsorum scripsit. nam hoc spatium habent ad novas tutelas vocati.

3 ¶ Et qui potestatem aliquam habent, se excusare possunt, ut divus Marcus rescripsit: sed susceptam tutelam deferere non possunt.

4 ¶ Item propter litem, quam cum pupillo vel adulto tutor vel curator habet, excusari non potest: nisi forte de omnibus bonis, vel hæreditate controversia sit.

5 ¶ Item tria onera tutelæ non affectatæ, vel curæ, præstant vacationem, quamdiu administrantur. ut tam

men plurium pupillorum tutela vel cura eorundem bonorum, veluti fratrum, pro uno computetur.

6 ¶ Sed & propter paupertatem excusationem tribui, tam divi fratres, quam per se divus Marcus rescripsit, si quis imparem se oneri injuncto possit docere.

7 ¶ Item propter adversam valetudinem, propter quam ne suis quidem negotiis interesse potest, excusatio locum habet.

8 ¶ Similiter eos, qui literas nesciunt, esse excusandos, divus Fius rescripsit: quamvis & imperiti literarum possint ad administrationem negotiorum sufficere.

9 ¶ Item si propter inimicitias aliquem testamento tutorem pater dederit: hoc ipsum praestat ei excusationem: sicut per contrarium non excusantur, qui se tutelam administraturos patri pupillorum promiserant.

10 ¶ Non esse autem admittendam excusationem ejus, qui hoc solo utitur, quod ignotus patri pupillorum sit, divi fratres rescripserunt.

11 ¶ Inimicitiae, quas quis cum patre pupillorum vel adultorum exercuit: si capitales fuerunt, nec reconciliatio intervenit: à tutela vel cura solent excusare.

12 ¶ Item is, qui status controversiam à pupillorum patre passus est, excusatur à tutela.

13 ¶ Item major septuaginta annis à tutela & cura se potest excusare. minores autem viginti quinque annis, olim quidem excusabantur: nostra autem constitutione prohibentur ad tutelam vel curam adspirare: adeo, ut nec excusatione opus sit. Qua constitutione cavetur, ut nec pupillus ad legitimam tutelam vocetur, nec adultus: quum sit incivile, eos, qui alieno auxilio in rebus suis administrandis egere noscuntur, & ab aliis reguntur, aliorum tutelam vel curam subire.

14 ¶ Idem & in milite observandum est, ut nec volens ad tutelae onus admittatur.

15 ¶ Item Romae grammatici, rhetores, & medici, & qui in patria sua has artes exercent, & intra numerum sunt: à tutela & cura habent vacationem.

16 ¶ Qui

16 ¶ Qui autem vult se excusare, si plures habeat excusationes, & de quibusdam non probaverit: aliis uti intra tempora [constituta] non prohibetur. Qui autem excusare se volunt, non appellant: sed intra quinquaginta dies continuos, ex quo cognoverint se esse tutores vel curatores datos, se excusare debent, cujuscunque generis sint, id est, qualitercunque dati fuerint tutores: si intra centesimum lapidem sunt ab eo loco, ubi tutores dati sunt. Si vero ultra centesimum lapidem habitant: enumeratione facta viginti millium diurnorum, & amplius triginta dierum. qui tamen (ut Scævola dicebat) sic debent computari, ne minus sint, quam quinquaginta dies.

17 ¶ Datus autem tutor, ad universum patrimonium datus esse creditur.

18 ¶ Qui tutelam alicujus gessit, invitus curator ejusdem fieri non compellitur: in tantum, ut licet paterfamilias, qui testamento tutorem dedit, adiecit se eundem curatorem dare: tamen invitum eum curam suscipere non cogendum, divi Severus & Antoninus rescripserunt.

19 ¶ Eodem rescripserunt, maritum uxori suae curatorem datum, excusare se posse, licet se immisceat.

20 ¶ Si quis autem falsis allegationibus excusationem tutelæ meruerit: non est liberatus onere tutelæ.

## DE SUSPECTIS TUTORIBUS, VEL curatoribus.

### TITULUS XXVI.

Sciendum est, suspecti crimen ex lege duodecim tabularum descendere.

1 ¶ Datum est autem jus removendi tutores suspectos Romæ prætori, & in provinciis præsidibus earum, & legato proconsulis.

2 ¶ Ostendimus, qui possint de suspecto cognoscere: nunc videamus, qui suspecti fieri possint: Et possunt quidem omnes tutores fieri suspecti, siue sint testamentarii, siue non sint: sed alterius generis tutores. Quare & si legitimus fuerit tutor, accusari poterit. Quid si patronus? Adhuc idem erit dicen-

dum: dummodo meminerimus, famæ patroni parcendum esse, licet ut suspectus remotus fuerit.

3 ¶ Consequens est, ut videamus, qui possint suspectos postulare. Et sciendum est, quasi publicam esse hanc accusationem, hoc est, omnibus patere. Quinimo & mulieres admittuntur [ex rescripto divorum Severi & Antonini:] sed ex solâ, quæ pietatis necessitudine ductâ, ad hoc procedunt; utputa mater, nutrix quoque, & avia. potest & soror. sed & si qua alia mulier fuerit, quam prætor propensa pietate intellexerit, sexus verecundiam non egredientem, sed pietate productam, non sustinere injuriam pupillorum: admittet eam ad accusationem.

4 ¶ Impuberes non possunt tutores suos suspectos postulare. puberes autem curatores suos ex consilio necessariorum suspectos possunt arguere: & ita divi Severus & Antoninus rescripserunt.

5 ¶ Suspectus autem est, qui non ex fide tutelam gerit, licet solvendo sit, ut Julianus quoque scripsit. Sed & ante, quam incipiat tutelam gerere tutor, posse eum quasi suspectum removeri: Idem Julianus scripsit, & secundum eum constitutum est.

6 ¶ Suspectus autem remotus, si quidem ob dolum: famosus est. si ob culpam: non æque.

7 ¶ Si quis autem suspectus postulatur: quoad cognitio finiatur: interdicitur ei administratio, ut Papiniano visum est.

8 ¶ Sed si suspecti cognitio suscepta fuerit, posteaquam tutor vel curator decesserit, extinguitur suspecti cognitio.

9 ¶ Si quis tutor copiam sui non faciat, ut alimenta pupillo decernantur: cavetur epistola divorum Severi & Antonini, ut in possessionem bonorum ejus pupillus mittatur: & quæ mora deteriora futura sunt, dato curatore distrahi jubentur. Ergo ut suspectus removeri poterit, qui non præstat alimenta.

10 ¶ Sed si quis præsens negat propter inopiam alimenta posse discerni: si hoc per mendacium dicat: remittendum eum esse ad præfectum urbi puniendum placuit: sicut ille remittitur, qui data pecunia ministerium tutelæ acquisierit, vel redemerit.

11 ¶ Libertus quoque, si fraudulenter tutelam filiorum vel nepotum patroni gessisse probetur, ad præfectum urbi remittitur puniendus.

12 ¶ Novissime autem sciendum est eos, qui fraudulenter tutelam administrant, etiam si satis offerant, removendos esse à tutela : quia satisfactio tutoris propositum malevolum non mutat, sed diutius graffandi in re familiari facultatem præstat. Suspectum etiam cum putamus, qui moribus talis est, ut suspectus sit. Enimvero tutor vel curator, quamvis pauper est, fidelis tamen & diligens, removendus non est quasi suspectus.

## INSTITUTIONUM,

seu Elementorum,

D. JUSTINIANI,

sacratissimi Principis,

LIBER SECUNDUS.

DE RERUM DIVISIONE, [ET AC-  
quirendo ipsarum dominio.]

## TITULUS I.



Superiore libro de jure personarum exposuimus: modo videamus de rebus, quæ vel in nostro patrimonio, vel extra patrimonium nostrum habentur. Quædam enim naturali jure communia sunt omnium, quædam publica, quædam universitatis, quædam nullius, pleraque singulorum, quæ ex variis causis cuique acquiruntur, sicut ex subiectis apparebit.

1 ¶ Et quidem naturali jure communia sunt omnium hæc: aer, aqua profluens, & mare, & per hoc littora maris. Nemo igitur ad littus maris accedere prohibetur: dum tamen à villis, & monumentis & ædificiis absteineat: quia non sunt juris gentium, sicut est mare.

2 ¶ Flumina autem omnia, & portus, publica sunt, ideoque jus piscandi omnibus commune est in portu fluminibusque.

3 ¶ Est autem littus maris, quatenus hybernus fluctus maximus excurrit.

4 ¶ Riparum quoque usus publicus est jure gentium, sicut ipsius fluminis. Itaque naves ad eas appellere, funes arboribus ibi natis religare, onus aliquod in his reponere, cuilibet liberum est, sicut per ipsum flumen navigare, sed proprietas earum illorum est, quorum prædiis hærent, qua de causa arbores quoque in iisdem natæ, eorundem sunt.

5 ¶ Littorum quoque usus publicus est, & juris gentium, sicut & ipsius maris. & ob id cuilibet liberum



berum est casam ibi ponere, in quam se recipiat: sicut retia siccare, & ex mari deducere. proprietates autem eorum potest intelligi nullius esse: sed ejusdem juris esse, cujus & mare, & quæ subjacet mari terra vel arena.

6 ¶ Universitatis sunt, non singulorum, quæ in civitatibus sunt; theatra, stadia, & si qua alia sunt communia civitatum.

7 ¶ Nullius autem sunt res sacræ & religiosæ, & sanctæ. quod enim divini juris est, id nullius in bonis est.

8 ¶ Sacræ res sunt, quæ rite per pontifices Deo consecratæ sunt: veluti ædes sacræ, & donaria quæ rite ad ministerium Dei dedicata sunt: quæ etiam per nostram constitutionem alienari & obligari prohibuimus: excepta causa redemptionis captivorum. Si quis autem auctoritate sua quasi sacrum sibi constituerit: sacrum non est, sed profanum. Locus autem, in quo ædes sacræ sunt ædificatæ, etiam diruto ædificio, sacer adhuc manet, ut & Papinianus scripsit.

9 ¶ Religiosum locum unusquisque sua voluntate facit, dum mortuum in locum suum. [In communem autem locum purum invito socio inferre non licet.] in commune vero sepulchrum etiam invitatis ceteris licet inferre. [Item si alienus ususfructus est: proprietarium placet, nisi consentiente usufructuario, locum religiosum non facere.] In alienum locum consentiente domino licet inferre: & licet postea ratum [non] habuerit, quam illatus est mortuus, tamen locus religiosus fit.

10 ¶ Sanctæ quoque res, veluti muri & portæ [civitatis] quodammodo divini juris sunt: & ideo nullius in bonis sunt. Ideo autem muros sanctos dicimus, quia poena capitis constituta est in eos, qui aliquid in muros deliquerint. Ideo & legum eas partes, quibus poenas constituimus adversus eos, qui contra leges fecerint, sanctiones vocamus.

11 ¶ Singulorum autem hominum multis modis res sunt. quarundam enim rerum dominium nanciscimur jure naturali. quod (sicut diximus) appellatur jus gentium: quarundam, [vero] jure civili,

Commodius est itaque à vetustiore jure incipere. palam est autem vetustius esse jus naturale, quod cum ipso genere humano rerum natura prodidit. civilia autem jura tunc esse coeperunt, cum & civitates condi, & magistratus creari, & leges scribi coeperunt.

12 ¶ Fera igitur bestia, & volucres, & pisces, & omnia animalia, quæ mari, cœlo, & terra nascuntur: simulatque ab aliquo capta fuerint, jure gentium statim illius esse incipiunt: quod enim ante nullius est, id naturali ratione occupanti conceditur. nec interest, feras bestias & volucres utrum in suo fundo quis capiat, an in alieno. Plane qui alienum fundum ingreditur venandi aut aucupandi gratia: potest à domino, si is præviderit, prohiberi, ne ingrediatur. Quicquid autem eorum ceperis, eousque tuum esse intelligitur, donec tua custodia coërectur. Cum vero tuam evaserit custodiam, & in libertatem naturalem sese receperit: tuum esse desinit, & rursus occupantis fit. Naturalem autem libertatem recipere intelligitur, cum vel oculos tuos effugerit, vel ita sit in conspectu tuo, ut difficilis sit ejus persequutio.

13 ¶ Illud quæsitum est, an si fera bestia ita vulnerata sit, ut capi possit, statim tua esse intelligatur? [Et] quibusdam placuit, statim esse tuam: & eousque tuam videri, donec eam persequaris. quod si desieris persequi: desinere esse tuam, & rursus fieri occupantis. Alii vero putaverunt, non aliter tuam esse, quam si eam ceperis. Sed posteriorem sententiam nos confirmamus, quod multa accidere soleant, ut eam non capias.

14 ¶ Apium quoque fera natura est. Itaque [apes.] quæ in arbore tua confederint, antequam à te alveo includantur, non magis tuæ intelliguntur esse, quam volucres quæ in arbore tua nidum fecerint: ideoque si alius eas incluserit: is earum dominus erit. Favos quoque, si quos effecerint, eximere quilibet potest. Plane integra re, si prævideris ingredientem fundum tuum, poteris eum jure prohibere, ne ingrediatur. Examen quoque, quod ex alveo tuo evolverit, eousque intelligitur esse tuum, donec in conspectu tuo est, nec difficilis persequutio ejus est, alioquin occupantis fit.

15 ¶ Pavonum quoque & columbarum fera natura est. nec ad rem pertinet, quod ex consuetudine evolare & revolare solent. nam & apes idem faciunt, quarum constat feram esse naturam. Cervos quoque quidam ita mansuetos habent, ut in sylvam ire, & redire soleant: quorum & ipsorum feram esse naturam, nemo negat. In iis autem animalibus, quæ ex consuetudine abire & redire solent, talis regula comprobata est: ut consuetudine esse intelligantur, donec animum revertendi habeant. nam si revertendi animum habere desierint: etiam tua esse desinunt, & sunt occupantium. Revertendi autem animum videntur desinere habere tunc, cum revertendi consuetudinem deseruerint.

16 ¶ Gallinarum autem & anserum non est fera natura. idque ex eo possumus intelligere, quod aliæ sunt gallinæ, quas feras vocamus: item alii sunt anseres, quos feros appellamus. Ideoque si anseres tui, aut gallinæ tuæ, aliquo modo turbati turbatæve evolverint: licet conspectum tuum effugerint, quocunque tamen loco sint, tui tuæve esse intelliguntur: & qui lucrandi animo ea animalia detinet, furtum committere intelligitur.

17 ¶ Item ea, quæ ex hostibus capimus, jure gentium statim nostra sunt: adeo quidem, ut & liberi homines in servitutem nostram deducantur: qui tamen, si evaserint nostram potestatem, & ad suos reversi fuerint: pristinum statum recipiunt.

18 ¶ Item lapilli, & gemmæ, & cætera, quæ in littore maris inveniuntur, jure naturali statim inventoris sunt.

19 ¶ Item ea, quæ ex animalibus dominio tuo subjectis nata sunt, eodem jure tibi acquiruntur.

20 ¶ Præterea quod per alluvionem agro tuo flumen adjecit, jure gentium tibi acquiritur. Est autem alluvio incrementum latens. Per alluvionem autem id videtur adjici, quod ita paulatim adjicitur, ut intelligi non possit, quantum quoquo temporis momento adjiciatur.

21 ¶ Quod si vis fluminis de tuo prædio pattem aliquam detraxerit, & vicini prædio attulerit: patet iam eam tuam permanere. Plane si longiore tempore

pore fundo vicini tui hæserit, arboreſque, quas ſecum traxit, in eum fundum radices egerint: ex eo tempore videntur vicini fundo acquiſitæ eſſe.

22 ¶ Inſula, quæ in mari nata eſt, (quod raro accidit) occupantis ſit. nullius enim eſſe creditur. At inſula in flumine nata (quod frequenter accidit) ſiquidem mediam partem fluminis tenet: communis eſt eorum, qui ab utraque parte fluminis prope ripam prædia poſſident: pro modo [ſcilicet] latitudinis cuiusque fundi, quæ prope ripam ſit. Quod ſi alteri parti proximior ſit: eorum eſt tantum, qui ab ea parte prope ripam prædia poſſident. Quod ſi aliqua parte diſiſum ſit flumen, deinde infra unitum, agrum alicujus in formam inſulæ redegerit: ejuſdem permanet is ager, cujus & fuerat.

23 ¶ Quod ſi naturali alveo in univerſum dereliſto, ad aliam partem fluere cœperit: prior quidem alveus eorum eſt, qui prope ripam ejus prædia poſſident: pro modo ſcilicet latitudinis cuiusque agri, quæ prope ripam ſit. novus autem alveus ejus juris eſſe incipit, cujus & ipſum flumen eſt, id eſt, publicus. Quod ſi poſt aliquod tempus ad priorem alveum reſerſum fuerit flumen: ruſus novus alveus eorum eſſe incipit, qui prope ripam ejus prædia poſſident.

24 ¶ Alia ſane cauſa eſt, ſi cujus totus ager inundatus fuerit. neque enim inundatio fundi ſpeciem commutat: & ob id, ſi receſſerit aqua: palam eſt eum fundum ejus manere, cujus & fuit.

25 ¶ Quum ex aliena materia ſpecies aliqua facta ſit ab aliquo: quaeri ſolet, quis eorum naturali ratione dominus ſit: utrum is, qui fecerit, an potius ille, qui materiæ dominus fuerit? ut ecce, ſi quis ex alienis uvis, aut olivis, aut ſpicis, vinum, aut oleum, aut frumentum fecerit: aut ex alieno auro, vel argento, vel ære vas aliquod fecerit: vel ex alieno vino & melle muſum miſcuerit: vel ex medicamenti alieni emplaſtrum aut collyrium compoſuerit: vel ex aliena lana veſtimentum fecerit: vel ex alienis tabulis navem, vel armarium, vel ſubſellia fabricaverit. Et poſt multam Sabinianorum & Proculianorum ambiguitatem, placuit media ſententia exiſtimantium, ſi ea ſpecies ad priorem & eundem materiam

teriam reduci possit: eum videri dominum esse, qui materiæ dominus fuerit, si non possit reduci: eum potius intelligi dominum, qui fecerit: ut ecce, vas conflatum potest ad rudem materiam æris, vel argenti, vel auri reduci. vinum autem, vel oleum, aut frumentum ad uvas, vel olivas, vel spicas reverti non potest. ac ne mulsum quidem ad vinum & mel resolvi potest. Quod si partim ex sua materia, partim ex aliena speciem aliquam fecerit quis: veluti ex suo vino & alieno melle mulsum miscuerit, aut ex suis & alienis medicamentis emplastrum aut collyrium, aut ex sua lana & aliena vestimentum fecerit: dubitandum non est, hoc casu eum esse dominum, qui fecerit: cum non solum operam suam dederit, sed & partem ejusdem materiæ præstiterit.

26 ¶ Si [tamen] alienam purpuram vestimento suo quis intexuerit: licet pretiosior sit purpura, tamen accessionis vice cedit vestimento: & qui dominus fuit purpuræ, adversus eum, qui subripuit, habet furti actionem, & conditionem: sive ipse sit, qui vestimentum fecit, sive alius. nam extinctæ res, licet vindicari non possint, condici tamen furibus, & quibusque aliis possessoribus possunt.

27 ¶ Si duorum materiæ ex voluntate dominorum confusæ sint: totum id corpus, quod ex confusione fit, utriusque commune est: veluti si qui vina sua confuderint, aut massas argenti vel auri conflaverint. Sed & si diversæ materiæ sint, & ob id propria species facta sit: forte ex vino & melle mulsum, aut ex auro & argento electrum: idem juris est. nam & hoc casu communem esse speciem non dubitatur. Quod si fortuito, & non voluntate dominorum confusæ fuerint, vel ejusdem generis materiæ, vel diversæ: idem juris esse placuit.

28 ¶ Quod si frumentum Titii frumento tuo mixtum fuerit, si quidem ex voluntate vestra, commune est: quia singula corpora, id est, singula grana, quæ cujusque propria fuerunt, ex consensu vestro communicata sunt. Quod si casu id mixtum fuerit, vel Titius id miscuerit sine tua voluntate, non videtur commune esse: quia singula corpora in sua substantia durant. Sed nec magis istis casibus commune  
fit

fit frumentum, quam grex intelligitur esse communis, si pecora Titii tuis pecoribus mista fuerint. Sed si ab alterutro vestrum totum id frumentum retineatur: in rem quidem actio pro modo frumenti cuiusque competit: arbitrio autem iudicis continetur, ut ipse aestimet, quale cuiusque frumentum fuerit.

29 ¶ Cum in suo solo aliquis ex aliena materia ædificaverit, ipse intelligitur dominus ædificii, quia omne, quod solo inædificatur, solo cedit. Nec tamen ideo is, qui materiam dominus fuerat, desinit dominus ejus esse: sed tantisper neque vindicare eam potest, neque ad exhibendum de ea re agere, propter legem duodecim tabularum, qua cavetur, ne quis tignum alienum ædibus suis junctum eximere cogatur, sed duplum pro eo præstet per actionem, quæ vocatur de tigno juncto. Appellatione autem tigni omnis materia significatur, ex qua ædificia fiunt. Quod ideo provisum est, ne ædificia rescindi necesse sit. Quod si aliqua ex causa dirutum sit ædificium, poterit materiam dominus, si non fuerit duplum jam consequutus, tunc eam vindicare, & ad exhibendum de ea re agere.

30 ¶ Ex diverso, si quis in alieno solo ex sua materia domum ædificaverit, illius sit domus, cujus & solum est. Sed hoc casu materiam dominus proprietatem ejus amittit: quia voluntate ejus intelligitur esse alienata, utique si non ignorabat se in alieno solo ædificare: & ideo licet diruta sit domus, materiam tamen vindicare non potest. Certe illud constat, si in possessione constituto ædificatore, soli dominus petat domum suam esse, nec solvat pretium materiam, & mercedes fabricorum: posse eum per exceptionem doli mali repelli: utique si bonæ fidei possessor fuerit, qui ædificavit. Nam scienti alienum solum esse, potest obijci culpa, quod ædificaverit temere in eo solo, quod intelligebat alienum esse.

31 ¶ Si Titius alienam plantam in solo suo posuerit, ipsius erit. Et ex diverso: si Titius suam plantam in Mævii solo posuerit, Mævii planta erit. si modo utroque casu radices egerit. ante enim, quam radices egerit, ejus permanet, cujus fuerat. Adeo autem ex eo tempore, quo radices egerit planta, proprie-

prietas ejus commutatur : ut si vicini arbor ita terram Titii presserit, ut in ejus fundum radices egerit : Titii effici arborem dicamus. ratio enim non permittit, ut alterius arbore esse intelligatur, quam cujus in fundum radices egerit. Et ideo prope confinium arbor posita, si etiam in vicini fundum radices egerit, communis fit.

32 ¶ Qua ratione autem plantæ, quæ terræ coalescunt, solo cedunt, eadem ratione frumenta quoque, quæ sata sunt, solo cedere intelliguntur. Cæterum sicut is, qui in alieno solo ædificavit : si ab eo dominus petat ædificium, defendi potest per exceptionem doli mali, secundum ea, quæ diximus : ita ejusdem exceptionis auxilio tutus esse potest is, qui alienum fundum sua impensa, [bona fide] consevit.

33 ¶ Literæ quoque, licet aureæ sint, perinde chartis membranisque cedunt, ac solo cedere solent ea, quæ inædificantur, aut inferuntur. ideoque si in chartis membranisque tuus carmen, vel historiam, vel orationem Titius scripserit : hujus corporis non Titius, sed tu dominus esse videris. Sed si à Titio petas tuos libros, tuasve membranas, nec impensas scripturæ solve- re paratus sis : poterit se Titius defendere per exceptionem doli mali. utique si earum chartarum membranarumve possessionem bona fide nactus est.

34 ¶ Si quis in aliena tabula pinxerit, quidam putant tabulam picturæ cedere : aliis videtur, picturam, qualiscunque sit, tabulæ cedere : sed nobis videtur melius esse, tabulam picturæ cedere. Ridiculum est enim, picturam Apellis vel Parrhasii in accessionem vilissimæ tabulæ cedere. Unde si à domino tabulæ imaginem possidente, is, qui pinxit, eam petat, nec solvat pretium tabulæ, poterit per exceptionem doli mali submoveri. At si is qui pinxit, [eam] possideat : consequens est, ut utilis actio domino tabulæ adversus eum detur : quo casu, si non solvat impensam picturæ, poterit per exceptionem doli mali repelli, utique si bona fide possessor fuerit ille, qui picturam imposuit. Illud enim palam est, quod si is, qui pinxit, subripuit tabulas, siue alius : competit domino tabularum furti actio.

35 ¶ Si quis à non domino, quem dominum esse cre-

crediderit, bona fide fundum emerit, vel ex donatione, aliave qualibet iusta causa æque bona fide acceperit: naturali ratione placuit fructus, quos percepit, ejus esse pro cultura & cura. Et ideo si postea dominus supervenerit, & fundum vindicet, de fructibus ab eo consumptis agere non potest. Ei vero qui alienum fundum sciens possederit, non idem concessum est: itaque cum fundo etiam fructus, licet consumpti sint, cogitur restituere.

36 ¶ Is vero ad quem ususfructus fundi pertinet, non aliter fructuum dominus efficitur, quam si ipse eos percepit. Et ideo licet maturis fructibus, nondum tamen perceptis, decesserit: ad hæredes ejus non pertinent, sed domino proprietatis acquiruntur. Eadem fere & de colono dicuntur.

37 ¶ In pecudum fructu etiam foetus est, sicuti lac, pilus & lana. itaque agni, hœdi, & vituli, & equuli, & fuculi statim naturali jure domini fructuarii sunt. Partus vero ancillæ in fructu non est, itaque ad dominum proprietatis pertinet. absurdum enim videbatur, hominem in fructu esse: quum omnes fructus rerum natura gratia hominis comparaverit.

38 ¶ Sed si gregis usumfructum quis habeat, in locum demortuorum capitum ex foetu fructuarius submittere debet, (ut & Juliano visum est) & in vinearum demortuarum vel arborum locum, alias debet substituere. recte enim colere, & quasi bonus patet-familias uti debet.

39 ¶ Thesauros, quos quis in loco suo invenerit, divus Hadrianus naturalem æquitatem sequutus, ei concessit, qui [eos] invenerit. Idemque statuit, si quis in sacro, aut religioso loco fortuito casu invenerit. At si quis in alieno loco, non data ad hoc opera, sed fortuito invenerit: dimidium domino soli concessit, & dimidium inventori. Et convenienter, si quis in Cæsaris loco invenerit, dimidium inventoris, & dimidium esse Cæsaris statuit. Cui conveniens est [ut] si quis in fiscali loco, vel publico [vel civitatis] invenerit, dimidium ipsius esse [debeat,] & dimidium fisci, vel civitatis.

40 ¶ Per traditionem quoque jure naturali res nobis acquiruntur: nihil enim tam conveniens est naturali



turali æquitati, quam voluntatem domini volentis rem suam in alium transferre, ratam haberi: & ideo, cujuscunque generis sit corporalis res, tradi potest, & à domino tradita alienatur. Itaque stipendiaria quoque & tributaria prædia eodem modo alienantur. Vocantur autem stipendia & tributaria prædia, quæ in provinciis sunt, inter quæ, nec non & Italica prædia, ex nostra constitutione nulla est differentia. sed si quidem ex causa donationis aut dotis, aut qualibet alia ex causa tradantur, sine dubio transferuntur.

41 ¶ Venditæ vero res & traditæ, non aliter emptori acquiruntur, quam, si is venditori pretium solverit, vel alio modo ei satisfecerit: veluti expromissore aut pignore dato. quod quanquam cavetur ex lege duodecim tabularum, tamen recte dicitur & jure gentium, id est, jure naturali, id effici. sed si is, qui vendidit, fidem emptoris sequutus fuerit, dicendum est, statim rem emptoris fieri.

42 ¶ Nihil autem interest, utrum ipse dominus tradat alicui rem suam, an voluntate ejus alius, [cui ejus rei possessio permessa sit.]

43 ¶ Qua ratione, si cui libera universorum negotiorum administratio permessa fuerit à domino, isque ex his negotiis rem vendiderit & tradiderit: faciet eam accipientis.

44 ¶ Interdum etiam sine traditione nuda voluntas domini sufficit ad rem transferendam: veluti si rem, quam tibi aliquis commodaverit, aut locaverit, aut apud te deposuerit, [postea aut vendiderit tibi,] aut donaverit, [aut dotis nomine dederit.] Quamvis enim ex ea causa tibi eam non tradiderit: eo tamen ipso, quod patitur tuam esse, statim tibi acquiritur proprietas, perinde ac si eo nomine tibi tradita fuisset.

45 ¶ Item si quis merces in horreo depositas vendiderit, simul atque claves horrei tradiderit emptori, transfert proprietatem mercium ad emptorem.

46 ¶ Hoc amplius interdum & in incertam personam collata voluntas domini transfert rei proprietatem: ut ecce, prætores & consules, cum missilia jactant in vulgus, ignorant quod eorum quisque sit excepturus: & tamen quia volunt quod quisque acce-

pe

perit, ejus esse: statim eum dominum efficiunt.

47 ¶ Qua ratione verius esse videtur, si rem pro derelicto à domino habitam occupaverit quis, statim eum dominum effici. Pro derelicto autem habetur, quod dominus ea mente abjecerit, ut id [in numero] rerum suarum esse nolit: ideoque statim dominus ejus esse desinit.

48 ¶ Alia sane causa est earum rerum, quæ intempestate levandæ navis causa ejiciuntur. hæ enim dominorum permanent: quia palam est, eas non eo animo ejici, quod quis eas habere nolit, sed quo magis cum ipsa navi maris periculum effugiat. Qua de causa, si quis eas fluctibus expulsas, vel etiam in ipso mari nactus, lucrandi animo abstulerit, furtum committit. Nec longe videntur discedere ab his, quæ de rheda currente non intelligentibus dominis cadunt.

## DE REBUS CORPORALIBUS,

& incorporalibus.

### TITULUS II.

Quædam præterea res corporales sunt, quædam incorporales.

1 ¶ Corporales hæ sunt quæ tangi possunt: veluti fundus, homo, vestis, aurum, argentum, & denique aliæ res innumerabiles.

2 ¶ Incorporales autem sunt, quæ tangi non possunt: qualia sunt ea, quæ in jure consistunt: sicut hæreditas, ususfructus, usus [&] obligationes quoquo modo contractæ. Nec ad rem pertinet, quod in hæreditate res corporales continentur: nam & fructus qui ex fundo percipiuntur, corporales sunt: & id, quod ex aliqua obligatione nobis debetur, plerumque corporale est: veluti fundus, homo, pecunia. nam ipsum jus hæreditatis, & ipsum jus utendi fruendi, & ipsum jus obligationis incorporale est.

3 ¶ Eodem numero sunt jura prædiorum, urbanorum & rusticorum, quæ etiam servitutes vocantur.

## DE SERVITUTIBUS PRÆDIORUM.

## TITULUS III.

**R**usticorum prædiorum jura sunt hæc: iter, actus, via, aquæductus. Iter est jus eundi ambulandi hominis, non etiam jumentum agendi, [vel vehiculum.] Actus est jus agendi vel jumentum, vel vehiculum. ita qui habet iter, actum non habet: qui actum habet, & iter habet, [eoque uti potest] etiam sine jumento. Via est jus eundi & agendi & ambulandi: nam & iter & actum via in se continet. Aquæductus est jus aquæ ducendæ per fundum alienum.

1 ¶ Prædiorum urbanorum servitutes sunt hæ, quæ ædificiis in hærent: ideo urbanorum prædiorum dictæ, quoniam ædificia omnia; urbana prædia appellamus, etsi in villa ædificata sint. Item urbanorum prædiorum servitutes sunt, ut vicinus onera vicini sustineat: ut in parietem ejus liceat vicino tignum immittere: ut stillicidium vel flumen recipiat quis in ædes suas, vel in aream, vel in cloacam: ne alius quis tollat ædes suas, ne luminibus vicini officiat.

2 ¶ Iter rusticorum prædiorum servitutes quidam computari recte putant aquæ haustum, pecoris ad aquam appulsum, jus pascendi, calcis coquendæ, aræ fodiendæ.

3 ¶ Ideo autem hæ servitutes prædiorum appellantur, quoniam sine prædiis constitui non possunt. nemo enim potest servitutem acquirere urbani vel rustici prædii, nisi qui habet prædium.

4 ¶ Si quis velit vicino aliquod jus constituere: pactionibus atque stipulationibus id efficere debet. Potest etiam testamento quis hæredem suum damnare ne alius tollat ædes suas, ne luminibus ædium vicini officiat: vel ut patiatur eum tignum in parietem suum immittere, stillicidiumve adversus eum habere: vel ut patiatur eum per fundum ire, agere, aquamve ex eo ducere.

## DE USUFRUCTU.

## TITULUS IV.

**U**susfructus est jus alienis rebus utendi fruendi, salva rerum substantia. Est autem jus in corpore: quo

quo sublato, & ipsum tolli necesse est.

1 ¶ **Ususfructus** à proprietate separationem recipit: idque pluribus modis accidit: ut ecce, si quis **usumfructum** alicui legaverit. nam hæres nudam habet proprietatem, legatarius vero **usumfructum**. Et contra, si fundum legaverit deducto **usufructu**: legatarius nudam habet proprietatem: hæres vero **usumfructum**. Item alii **usumfructum**, alii deducto eo fundum legare potest. Sine testamento [vero] si quis velit **usumfructum** alii constituere: pactionibus & stipulationibus id efficere debet. Ne tamen in universum inutiles essent proprietates, semper abscedente **usufructu**: placuit certis modis extinguí **usumfructum**, & ad proprietatem reverti.

2 ¶ **Constituitur autem ususfructus** non tantum in fundo & ædibus, verumetiam in servis, & jumentis, & cæteris rebus: (exceptis iis, quæ ipso usu consumuntur.) Nam hæ res neque naturali ratione, neque civili recipiunt **usumfructum**, quo [in] numero sunt vinum, oleum, frumentum, vestimenta: quibus proxima est pecunia numerata, namque ipso usu assidue permutatione quodammodo extinguitur. Sed utilitatis causa senatus censuit, posse etiam earum rerum **usumfructum** constitui: ut tamen eo nomine hæredi utiliter caveatur. Itaque si pecuniæ **ususfructus** legatus sit: ita datur legatario, ut ejus fiat, & legatarius satisfat hæredi de tanta pecunia restituenda, si morietur, aut capite minuetur. Cæteræ quoque res ita traduntur legatario, ut ejus fiant: sed æstimatis his, satisfatur: ut si moriatur, aut capite minuatur, tanta pecunia restituatur, quanti hæ fuerint [æstimata.] Ergo senatus non fecit quidem earum rerum **usumfructum**, (nec enim poterat) sed per cautionem quasi **usumfructum** constituit.

3 ¶ **Finitur autem ususfructus** morte usufructuarii, & duabus capitis diminutionibus, maxima & media, & non utendo per modum & tempus: quæ omnia nostra statuit constitutio. Item finitur **ususfructus**, si domino proprietatis ab usufructuario cedatur (nam cedendo extraneo, nihil agitur.) vel ex contrario si usufructuarius proprietatem rei adquisierit: quæ res consolidatio appellatur. Eo amplius constat, si ades in-

incendio consumptæ fuerint, vel etiam terræ motu, vel vitio suo corruerint: extingui usumfructum, & ne aræ quidem usumfructum deberi.

4 ¶ Cum autem finitus fuerit totus ususfructus, revertitur scilicet ad proprietatem, & ex eo tempore nudæ proprietatis dominus incipit plenam in re habere potestatem.

## DE USU ET HABITATIONE.

## TITULUS V.

**I**isdem illis modis, quibus ususfructus constituitur, etiam nudus usus constitui solet: iisdemque illis modis finitur, quibus & ususfructus desinit.

1 ¶ Minus autem juris est in usu, quam in usufructu: nam is, qui fundi nudum habet usum, nihil ulterius habere intelligitur, quam ut oleribus, pomis, floribus, fœno, stramentis, & lignis ad usum quotidianum utatur: in eoque fundo hæcenus ei morari licet, ut neque domino fundi molestus sit, neque iis, per quos opera rustica fiunt, impedimento: nec ulli alii jus, quod habet, aut locare, aut vendere, aut gratis concedere potest: [quum is, qui usumfructum habet possit hæc omnia facere.]

2 ¶ Item is, qui ædium usum habet, hæcenus jus habere intelligitur, ut ipse tantum inhabitet, nec hoc jus ad alium transferre potest. & vix receptum esse videtur, ut hospitem ei recipere liceat: & cum uxore, liberisque suis, item libertis: nec non personis aliis liberis, quibus non minus, quam servis utitur, habitandi jus habeat. Et convenienter, si ad mulierem usus ædium pertineat, cum marito ei habitare liceat.

3 ¶ Item is, ad quem servi usus pertinet, ipse tantum opera atque ministerio ejus, uti potest: ad alium vero nullo modo jus suum transferre ei concessum est. Idem scilicet juris est & in jumento.

4 ¶ Sed & si pecorum, vel ovium usus legatus sit: neque lacte, neque agnis, neque lana utetur usufructarius, quia ea in fructu sunt. Plane ad stercoreandum agrum suum pecoribus uti potest.

5 ¶ Sed si cui habitatio legata, sive aliquo modo constituta sit, neque usus videtur, neque usufructus,

fructus, sed quasi proprium aliquod jus: quanquam habitationem habentibus, propter rerum utilitatem, secundum Marcelli sententiam nostra decisione promulgata, **permisimus** non solum in ea degere, sed etiam alius locare.

6 ¶ Hæc de servitutibus, & usufructu, & usu, & habitatione dixisse sufficiat. De hæreditatibus autem & obligationibus, suis locis proponemus. **Exposuimus summatum quibus modis jure gentium res acquiruntur: modo videamus, quibus modis legitimo & civili jure acquiruntur.**

## DE USUCAPIONIBUS, ET LONGI

temporis præscriptionibus.

### TITULUS VI.

**J**ure civili constitutum fuerat, ut qui bona fide ab eo, qui dominus non erat, cum crederet eum dominum esse, rem emerit, vel ex donatione, aliave quavis justa causa acceperit, is eam rem, si mobilis erat, anno ubique uno: si immobilis, biennio tantum in Italico solo usucaperet, ne rerum dominia in incerto essent. Et quum hoc placitum erat, putantibus antiquioribus, dominis sufficere ad inquirendas res suas præfata tempora: **Nobis melior sententia resedit**, ne domini maturius suis rebus defraudentur, neque certo loco beneficium hoc concludatur: & ideo constitutionem super hoc promulgavimus, qua cautum est, ut res quidem mobiles, per triennium: immobiles vero per longi temporis possessionem (id est, inter præsentis decennio, inter absentes viginti annis) usucapiantur: & his modis non solum in Italia, sed etiam in omni terra, quæ nostro imperio gubernatur, dominia rerum justa causa possessionis præcedente acquirantur.

1 ¶ Sed aliquando etiam si maxime quis bona fide rem possederit: non tamen illius usucapio ullo tempore procedit: veluti si quis liberum hominem, vel rem sacram, vel religiosam, vel servum fugitivum possideat.

2 ¶ Furtivæ quoque res, & quæ vi possessæ, sunt nec si prædicto longo tempore bona fide possessæ fuerint, usucapi possunt. nam furtivarum rerum lex duo-  
decim

decim tabularum, & lex Atilia, inhibent usucapionem: vi possessorum, lex Julia & Plautia.

3 ¶ Quod autem dictum est, furtivarum & vi possessorum rerum usucapionem per leges prohibitam esse: non eo pertinet, ut ne ipse fur, quive pervia possidet, usucapere possit; (nam his alia ratione usucapio non competit, quia scilicet mala fide possident) sed ne ullus alius, quamvis ab eis bona fide emerit, vel ex alia causa acceperit, usucapiendi jus habeat. Unde in rebus mobilibus non facile procedit, ut bonæ fidei possessoribus usucapio competat. Nam qui [sciens] alienam rem vendiderit, vel ex alia causa tradiderit, furtum ejus committit.

4 ¶ Sed tamen id aliquando aliter se habet. nam si hæres rem defuncto commodatam, aut locatam, vel apud eum depositam, existimans hæreditariam esse, bona fide accipienti vendiderit, aut donaverit, aut dotis nomine dederit: quin is, qui acceperit, usucapere possit, dubium non est: quippe cum ea res in furti vitium non ceciderit: quum utique hæres, qui bona fide tanquam suam alienaverit, furtum non committat.

5 ¶ Item si is, ad quem ancillæ ususfructus pertinet, partum suum esse credens vendiderit, aut donaverit, furtum non committit. furtum enim sine affectu furandi non committitur.

6 ¶ Aliis quoque modis accidere potest, ut quis sine vitio furti, rem alienam ad aliquem transferat, & efficiat, ut à possessore usucapiatur.

7 ¶ Quod autem ad eas res, quæ solo continentur, expedit, jus ita procedit, ut si quis loci vacantis possessionem propter absentiam aut negligentiam domini, aut quia sine successore decesserit, sine vi nanciscatur: quamvis ipse mala fide possideat; (quia intelligit se alienum fundum occupasse) tamen si aliæ bona fide accipienti tradiderit, poterit ei longa possessione res acquiri: quia neque furtivum, neque vi possessum acceperit. Abolita est enim quorundam veterum sententia, existimantium etiam fundi locive furtum fieri: & eorum utilitati, qui res soli possident, principalibus constitutionibus prospicitur, ne cui longa & indubitata possessio debeat auferri.

8 ¶ Aliquando etiam furtiva, vel vi possessa res usucapi potest: veluti si in domini potestatem reversa fuerit. tunc enim vitio rei purgato, procedit ejus usucapio.

9 ¶ Res fisci nostri usucapi non potest. Sed Papinianus scripsit, bonis vacantibus fisco nondum nunciatis, bonæ fidei emptorem traditam sibi rem ex his bonis usucapere posse: & ita divus Pius, & divi Severus & Antoninus rescripserunt.

10 ¶ Novissime sciendum est, rem talem esse debere, ut in se non habeat vitium, ut à bonæ fidei emptore usucapi possit, vel qui ex alia iusta causa possidet.

11 ¶ Error autem falsæ causæ usucapionem non parit: veluti si quis cum non emerit, emisit se existimans, possideat: vel cum ei donatum non fuerit, quasi ex donatione possideat.

12 ¶ Diutina possessio, quæ prodesse cœperat defuncto, & hæredi, & bonorum possessori continuatur, licet ipse sciat prædium alienum esse. quod si ille initium justum non habuit: hæredi & bonorum possessori, licet ignoranti, possessio non prodest. Quod nostra constitutio similiter & in usucapionibus observari constituit, ut tempora continuentur. Inter venditorem quoque & emptorem conjungi tempora, divi Severus & Antoninus rescripserunt.

13 ¶ Edicto divi Marci cavetur, eum, qui à fisco rem alienam emit, si post venditionem quinquennium præterierit, posse dominum rei exceptione repellere. Constitutio autem divæ memoriæ Zenonis bene prospexit iis, qui à fisco per venditionem, aut donationem, vel alium titulum accipiunt aliquid: ut ipsi quidem securi statim fiant: & victores existant, si ve experiantur, si ve convenientur. Adversus autem sacratissimum ærarium usque ad quadriennium liceat eis intendere, qui pro dominio vel hypotheca earum rerum, quæ alienatæ sunt, putaverint sibi quasdam competere actiones. Nostra autem divina constitutio, quam nuper promulgavimus, etiam de iis, qui à nostra, vel venerabilis Augustæ domo aliquid acceperint, hæc statuit, quæ in fiscalibus alienationibus præfatæ Zenonianæ constitutionis continentur.



## DE DONATIONIBUS.

## TITULUS VII.

**E**st & aliud genus acquisitionis, donatio. Donationum autem duo sunt genera: mortis causa, & non mortis causa.

**I** ¶ Mortis causa donatio est, quæ propter mortis sit suspicionem: cum quis ita donat, ut si quid humanitus ei contigisset, haberet is, qui accepit. si autem supervivisset: is, qui donavit, reciperet: vel si eum donationis pœnituisse: aut prior decesserit, cui donatum sit. Hæ mortis causa donationes ad exemplum legatorum redactæ sunt per omnia: nam cum prudentibus ambiguum fuerat, utrum donationis, an legati instar eam obtinere oporteret, & utriusque causæ quædam habebat insignia, & alii ad aliud genus eam retrahebant: à nobis constitutum est, ut per omnia fere legatis connumeretur, & sic procedat, quemadmodum nostra constitutio eam formavit. Et in summa, mortis causa donatio est, cum magis se quis velit habere, quam eum, cui donat: magisque eum, cui donat, quam hæredem suum: sic & apud Homerum Telemachus donat Piræo:

Πείραι, ἔ γάρ τ' ἴδμεν ὅπως ἔσαι τάδε ἔργα·  
 Εἶκεν ἐμὲ μνηστῆρες, ἀγένορες ἐν μεγάροισι  
 Λάβρη κτείναντες, πατρίᾳ πάντα δάσονται,  
 Αὐτὸν ἔχοντα σε βάλομ' ἐπαυρέμεν, ἢ τινα τῶν δέ.  
 Εἰδὲ κ' ἐγὼ τέτοισι φόνον καὶ κῆρα φυτεύσω,  
 Δὴ τότε μοι χαίροντι φέρειν παρὲς δώματα χαίρων.  
 id est,

*Piræe incertus quoniam rerum exitus harum est,  
 Si tacita incantum stolidi me forte necare  
 Morte proci poterunt, & opes vexare paternas:  
 Hac ego te malo, quam illorum quempiam habere,  
 Sin ego eos iusta meritos affecero clade,  
 Tum mihi tu lato reddes illa omnia latus.*

**2** ¶ Aliæ autem donationes sunt, quæ sine ulla mortis cogitatione fiunt, quas inter vivos appellamus, quæ non omnino comparantur legatis: quæ si fuerint perfectæ temere revocari non possunt. Perficiuntur autem, cum donator suam voluntatem scrip-

ptis, aut sine scriptis manifestaverit. Et ad exemplum venditionis, nostra constitutio eas etiam in se habere necessitatem traditionis voluit: ut etiam si non tradantur, habeant plenissimum & perfectum robur, & traditionis necessitas incumbat donatori. Et cum retro principum dispositiones insinuari eas actis intervenientibus volebant, si majores fuerant ducentorum solidorum: constitutio nostra eam quantitatem usque ad quingentosolidos ampliavit, quam stare etiam sine insinuatione statuit: sed & quasdam donationes invenit, quæ penitus insinuationem fieri minime desiderant, sed in se plenissimam habent firmitatem. Alia insuper multa ad uberiores exitum donationum invenimus: quæ omnia ex nostris constitutionibus, quas super his exposuimus, colligenda sunt. Sciendum est tamen, quod etsi plenissimæ sint donationes: si tamen ingrati existant homines, in quos beneficium collatum est: donatoribus per nostram constitutionem licentiam præstitimus certis ex causis eas revocare: ne illi, qui suas res in alios contulerint, ab his quandam patiantur injuriam vel jacturam, secundum enumeratos in constitutione nostra modos.

3 ¶ Est & aliud genus inter vivos donationis, quod veteribus quidem prudentibus penitus erat incognitum, postea autem à junioribus divis principibus introductum est, quod ante nuptias vocabatur; & tacitum in se conditionem habebat, ut tunc ratum esset, cum matrimonium esset insequentum. Ideoque ante nuptias appellabatur, quod ante matrimonium efficiebatur, & nunquam post nuptias celebratas talis donatio procedebat. Sed primus quidem divus Justinus pater noster, cum augeri dotes & post nuptias fuerat permissum: si quid tale eveniret, & ante nuptias augeri donationem & constante matrimonio, sua constitutione permisit: sed tamen nomen inconveniens remanebat, cum ante nuptias quidem vocabatur, post nuptias autem tale accipiebat incrementum. Sed nos plenissimo fini tradere sanctiones cupientes, & consequentia nomina tebus esse studentes, constituimus, ut tales donationes non augeantur tantum, sed etiam constante matrimonio initium acci-

accipiant: & non ante nuptias, sed propter nuptias vocentur: & dotibus in hoc exæquantur, ut quemadmodum dotes constante matrimonio non solum augentur, sed etiam fiunt: ita & istæ donationes, quæ propter nuptias introductæ sunt, non solum antecedant matrimonium, sed eo etiam contracto augeantur, & constituentur.

4 ¶ Erat olim & aliûs modus civilis acquisitionis, per jus accrescendi, quod est tale: Si communem servum habens aliquis cum Titio, solus libertatem ei imposuerit vel vindicta, vel testamento: eo casu pars ejus amittebatur, & socio accrescebat. Sed cum pessimum fuerat exemplo, & libertate servum defraudari, & ex ea humanioribus quidem dominis damnum inferri, favioribus autem dominis lucrum accedere: hoc quasi invidia plenum, pio remedio per nostram constitutionem mederi necessarium duximus. Et invenimus viam, per quam & manumissor, & socius ejus, & qui libertatem accepit, nostro beneficio fruantur libertate cum effectu procedente (cujus favore antiquos legumlatores multa etiam contra communes regulas statuisset manifestum est) & eo, qui eam libertatem imposuit, sue liberalitatis stabilitate gaudente: & socio indemni conservato, pretiumque servi secundum partem domini, quod nos definivimus, accipiente.

## QUIBUS ALIENARE LICET, VEL NON.

## TITULUS VIII.

**A**ccidit aliquando, ut qui dominus sit, alienare non possit: & contra, qui dominus non sit, alienandæ rei potestatem habeat. Nam dotale prædium maritus invita muliere per legem Juliam prohibetur alienare: quamvis ipsius sit, dotis causa ei datum. quod nos, legem Juliam corrigentes, in meliorem statum deduximus. Cum enim lex in solis tantummodo rebus locum habebat, quæ Italicæ fuerant: & alienationes inhibebat, quæ invita muliere fiebant, hypothecas autem earum rerum, etiam volente ea: utrique remedium imposuimus, ut etiam in eas res, quæ in provinciali solo positæ sunt,

interdicta sit alienatio vel obligatio: ut neutrum eorum neque consentientibus mulieribus procedat, ne sexus muliebris fragilitas in perniciem substantiæ earum convertatur.

1 ¶ Contra autem creditor pignus ex pactione, quamvis ejus ea res non sit, alienare potest. Sed hoc forsitan ideo videtur fieri, quod voluntate debitoris intelligitur pignus alienari, quia ab initio contractus pactus est, ut liceret creditori pignus vendere, si pecunia non solvatur. Sed ne creditores jus suum persequi impedirentur, neque debitores temere suarum rerum dominium amittere viderentur: nostra constitutione consultum est, & certus modus impositus est, per quem pignorum distractio possit procedere: cujus tenore utrique parti, creditorum & debitorum, satis abunde provisum est.

2 ¶ Nunc admonendi sumus, neque pupillum, neque pupillam ullam rem sine tutoris auctoritate alienare posse. Ideoque si mutuam pecuniam sine tutoris auctoritate alicui dederit, non contrahit obligationem: quia pecuniam non facit accipientis, ideoque vindicari nummi possunt, sicubi extant. Sed si nummi, quos mutuo minor dederit, ab eo, qui accepit, bona fide consumpti sunt: condici possunt. si mala fide, ad exhibendum de his agi potest. At ex contrario, omnes res pupillo & pupillæ sine tutoris auctoritate recte dari possunt. Ideoque si debitor pupillo solvat, necessaria est debitoris tutoris auctoritas, alioqui non liberabitur. Sed hoc etiam evidentissima ratione statutum est in constitutione, quam ad Casarienses advocatos ex suggestione Triboniani viri eminentissimi, quaestoris sacri palatii nostri, promulgavimus: qua dispositum est, ita licere tutori vel curatori debitorem pupillarem solvere, ut prius judicialis sententia sine omni damno celebrata, hoc permittat. quo subsequuto, si & judex pronunciaverit, & debitor solverit: sequatur hujusmodi solutionem plenissima securitas. Sin autem aliter, quam disposuimus, solutio facta fuerit, pecuniam autem salvam habeat pupillus, aut ex ea locupletior sit, & adhuc eandem pecuniæ summam petat: per exceptionem doli mali poterit submoveri. Quod si male consumpserit,

pferit, aut furto, [aut vi] amiserit: nihil proderit debitori doli mali exceptio, sed nihilominus condemnabitur: quia temere sine tutoris auctoritate, & non secundum nostram dispositionem solverit. Sed ex diverso, pupilli vel pupillæ solvere sine tutoris auctoritate non possunt, quia id, quod solvunt, non fit accipientis: quum scilicet nullius rei alienatio eis sine tutoris auctoritate concessa sit.

PER QUAS PERSONAS CUIQUE  
acquiritur.

TITULUS IX.

**A**cquiritur vobis non solum per vosmetipsos, sed etiam per eos, quos in potestate habetis: [item per servos, in quibus usumfructum habetis:] item per homines liberos, & per servos alienos quos bona fide possideris, de quibus singulis diligentius dispiciamus.

**I**gitur liberi vestri utriusque sexus, quos in potestate habetis, olim quidem, quicquid ad eos pervenerat (exceptis videlicet castrensibus pecuniis) hoc parentibus suis acquirebant sine ulla distinctione: & hoc ita parentum fiebat, ut etiam esset eis licentia, quod per unum vel unam eorum acquisitum esset, alii filio, vel extraneo donare, vel vendere, vel quocumque modo voluerant, applicare. Quod nobis inhumanum visum est: & generali constitutione emissa, & liberis pepercimus, & patribus honorem debitum reservavimus. Sancitum etenim à nobis est, ut si quid ex re patris ei obveniat, hoc secundum antiquam observationem totum parenti acquiratur. Quæ enim invidia est, quod ex patris occasione profectum est, hoc, ad eum reverti? Quod autem ex alia causa sibi filius familias acquisivit: huius usumfructum patri quidem acquirat, dominium autem apud eum remaneat: ne quod ei suis laboribus, vel prospera fortuna accesserit, hoc in alium perveniens, luctuosum ei procedat.

**H**oc quoque à nobis dispositum est & in ea specie, ubi parens emancipando liberos suos ex rebus, quæ acquisitionem effugiebant, sibi tertiam par-

tem retinere (si voluerat) licentiam ex anterioribus constitutionibus habebat, quasi pro pretio quodammodo emancipationis: & inhumanum quiddam accidebat, ut filius rerum suarum ex hac emancipatione dominio pro parte [tertia] defraudaretur: & quod honoris ei ex emancipatione additum erat, quod sui juris effectus esset, hoc per rerum diminutionem decresceret. Ideoque statuimus, ut parens pro tertia parte domini, quam retinere poterat, dimidiam non domini rerum, sed usufructus retineat. Ita etenim res intactæ apud filium remanebunt, & pater ampliore summa fruetur, pro tertia dimidia potiturus.

3 ¶ Item vobis acquiritur, quod servi vestri ex traditione nanciscuntur: sive quid stipulentur, sive ex donatione, vel ex legato, vel ex qualibet alia causa acquirant. Hoc enim vobis ignorantibus & invitis obvenit. Ipse enim servus, qui in potestate alterius est, nihil suum habere potest. Sed si hæres institutus sit, non alias nisi vestro jussu, hæreditatem adire potest. Et si vobis jubentibus adierit: vobis hæreditas acquiritur, perinde ac si vos ipsi hæredes instituti essetis. Et convenienter scilicet vobis legatum per eos acquiritur. Non solum autem proprietas per eos, quos in potestate habetis, vobis acquiritur: sed etiam possessio. Cujuscunque enim rei possessionem adepti fuerint, id vos possidere videmini. Unde etiam per eos usucapio, vel longi temporis possessio vobis accidit.

4 ¶ De iis autem servis, in quibus tantummodo usufructum habetis, ita placuit: ut quicquid ex re vestra, vel ex operis suis acquirant, id vobis adjiciatur: quod vero extra eas causas consequuti sunt, id ad dominum proprietatis pertineat. Itaque si is servus hæres institutus sit, legatumve quid ei, aut donatum fuerit: non usufructuario, sed domino proprietatis acquiritur. Idem placet & de eo, qui à vobis bona fide possidetur: sive is liber sit, sive alienus servus. Quod enim placuit de usufructuario, idem placet & de bonæ fidei possessore. Itaque quod extra istas duas causas acquiritur: id vel ad ipsum pertinet, si liber est: vel ad dominum, si servus est.

Sed

Sed bonæ fidei possessor cum usuceperit servum, (quia eo modo dominus fit) ex omnibus causis per eum sibi acquirere potest. Fruituarius vero usucapere non potest: primum, quia non possidet, sed habet jus utendi fruendi: deinde quia scit servum alienum esse. Non solum autem proprietas per eos servos, in quibus usumfructum habetis, vel quos bona fide possidetis, aut per liberam personam, quæ bona fide vobis servit, vobis acquiritur: sed etiam possessio. Loquimur autem in utriusque persona secundum distinctionem, quam proxime exposuimus: id est, si quam possessionem ex re vestra, vel ex suis operis adepti fuerint.

5 ¶ Ex his itaque apparet, per liberos homines, quos neque vestro juri subjectos habetis, neque bona fide possidetis: item per alienos servos, in quibus neque usumfructum habetis, neque possessionem justam; nulla ex causa vobis acquiri posse. Et hoc est, quod dicitur, per extraneam personam nihil acquiri posse: excepto eo, quod per liberam personam (veluti per procuratorem) placet non solum scientibus, sed & ignorantibus vobis acquiri possessionem, secundum divi Severi constitutionem: & per hanc possessionem etiam dominium, si dominus fuerit, qui tradidit: vel usucapionem, aut longi temporis præscriptionem, si dominus non sit.

6 ¶ Hactenus tantisper admonuisse sufficiat, quemadmodum singulæ res vobis acquirantur. nam legatorum jus, quo & ipso singulæ res vobis acquiruntur: item fideicommissorum, ubi singulæ res vobis relinquuntur: opportunius inferiore loco referemus. Videamus itaque nunc, quibus modis per universitatem res vobis acquirantur. Si cui ergo hæredes facti sitis, sive cuius bonorum possessionem petieritis, vel si quem arrogaveritis, vel si cuius bona libertatum conservandarum causa vobis addicta fuerint: ejus res omnes ad vos transeunt. Ac prius de hæreditatibus despiciamus, quarum duplex conditio est. nam vel ex testamento, vel ab intestato ad vos pertinent. Et prius est, ut de his despiciamus, quæ ex testamento vobis obveniunt. qua in re necessarium est, initium de ordinandis testamentis exponere.

## DE TESTAMENTIS ORDINANDIS.

## TITULUS X.

**T**estamentum ex eo appellatur, quod testatio mentis sit.

1 ¶ Sed ut nihil antiquitatis penitus ignoretur, sciendum est, olim quidem duo genera Testamentorum in usu fuisse: quorum altero in pace & otio utebantur, quod calatis comitiis appellabant: altero, cum in prælium exituri essent, quod procinctum dicebatur. Accessit deinde tertium genus testamentorum, quod dicebatur per æs & libram: scilicet quod per emancipationem, id est, imaginariam quandam venditionem agebatur, quinque testibus, & libripende, civibus Romanis puberibus præsentibus, & eo, qui familiæ emptor dicebatur. Sed illa quidem priora duo genera testamentorum ex veteribus temporibus in defuetudinem abierunt. quod vero per æs & libram fiebat, licet diutius permanserit, attamen partim & hoc in usu esse desiit.

2 ¶ Sed prædicta quidem nomina testamentorum ad jus civile referebantur, postea vero ex edicto prætoris forma alia faciendorum testamentorum introducta est. Jure enim honorario nulla emancipatio desiderabatur: sed septem testium signa sufficiebant, cum jure civili signa testium non essent necessaria.

3 ¶ Sed cum paulatim tam ex usu hominum, quam ex constitutionum emendationibus cœpit in unam consonantiam jus civile & prætorium jungi: constitutum est, ut uno eodemque tempore (quod jus civile quodammodo exigebat) septem testibus adhibitis, & subscriptione testium (quod ex constitutionibus inventum est, & ex edicto prætoris) signacula testamenti imponerentur: ita, ut hoc jus tripartitum esse videatur: & testes quidem & eorum præsentia uno contextu testamenti celebrandi gratia, à jure civili descendant: subscriptiones autem testatoris & testium, ex sacrarum constitutionum observatione adhibeantur: signacula autem, & testium numerus, ex edicto prætoris.

4 ¶ Sed his omnibus à nostra constitutione propter



pter testamentorum sinceritatem, ut nulla fraus adhibeatur, **hoc additum est**: ut per manus testatoris vel testium **nomen hæredis exprimatur**, & omnia secundum illius constitutionis tenorem procedant.

5 ¶ **Possunt** autem omnes **testes & uno annulo signare testamentum**. quid enim si septem annuli una sculptura fuerint, secundum quod Papiniano visum est? Sed & alieno quoque annulo licet signare [testamentum.]

6 ¶ **Testes** autem **adhiberi possunt ii**, cum quibus testamenti factio est. Sed neque mulier, neque impubes, neque servus, neque furiosus, neque mutus, neque surdus, neque is, cui bonis interdictum est, neque ii quos leges jubent improbos intestabilesque esse: possunt in numerum testium adhiberi.

7 ¶ Sed cum aliquis ex testibus testamenti quidem faciendi tempore liber existimabatur, postea autem servus apparuit: tam divus Hadrianus Catonio, quam postea divi Severus & Antoninus rescripserunt, subvenire se ex sua liberalitate testamento: ut sic habeatur [firmum,] ac si, ut oportebat, factum esset, cum eo tempore quo testamentum signaretur, omnium consensu hic testis liberi loco fuerit: neque quisquam esset, qui status ei quæstionem moveret.

8 ¶ **Pater**, nec non is, qui in potestate ejus est, item **duo fratres**, qui in ejusdem patris potestate sunt, utique **testes in uno testamento fieri possunt**: quia nihil nocet, ex una domo plures testes alieno negotio adhiberi.

9 ¶ **In testibus autem non debet esse is**, qui in potestate testatoris est. Sed si filiusfamilias de castrensi peculio post missionem faciat testamentum; nec pater ejus recte adhibetur testis, nec is, qui in potestate ejusdem patris est. reprobatur enim in ea re domesticum testimonium.

10 ¶ **Sed neque hæres scriptus**, neque is, qui in potestate ejus est, neque pater ejus qui cum habet in potestate, neque fratres, qui in ejusdem patris potestate sunt, **testes adhiberi possunt**: quia hoc totum negotium, quod agitur testamenti ordinandi gratia, creditur hodie inter testatorem & hæredem

agi. Licet autem totum jus tale conturbatum fuerat, & veteres quidem familiæ emptorem, & eos qui per potestatem ei conjuncti fuerant, à testamentariis testimoniis repellebant: hæredi[autem,] & iis, qui per potestatem ei conjuncti fuerant, concedebant testimonia in testamentis præstare: licet ii, qui id permittebant, hoc jure minime abuti eos debere suadebant: tamen nos eandem observationem corrigentes, & quod ab illis suatum est, in legis necessitatem transferentes, ad imitationem pristini familiæ emptoris, merito nec hæredi, (qui imaginem vetustissimi familiæ emptoris obtinet) neque aliis personis, quæ ei (ut dictum est) conjunctæ sunt, licentiam concedimus, sibi quodammodo testimonia præstare. ideoque nec ejusmodi veteres constitutiones nostro Codici inferi permisimus.

11 ¶ Legatariis autem & fideicommissariis, quia non juris successores sunt, & aliis personis eis conjunctis testimonium non denegamus: immo in quadam nostra constitutione & hoc specialiter eis concessimus. Et multo magis iis, qui in eorum potestate sunt, vel qui eos habent in potestate, hujusmodi licentiam damus.

12 ¶ Nihil autem interest, testamentum in tabulis, an in chartis, membranisque, vel in alia materia fiat.

13 ¶ Sed & unum testamentum pluribus codicibus conficere quis potest, secundum obtinentem tamen observationem omnibus factis. quod interdum etiam necessarium est: veluti si quis navigaturus & secum ferre, & [domi] relinquere judiciorum suorum contestationem velit, vel propter alias innumerabiles causas, quæ humanis necessitatibus imminet.

14 ¶ Sed hæc quidem de testamentis, quæ scriptis conficiuntur, [sufficiunt.] si quis autem sine scriptis voluerit ordinare jure civili testamentum: septem testibus adhibitis, & sua voluntate coram eis nuncupata, sciat hoc perfectissimum testamentum jure civili, firmumque constitutum.

## DE MILITARI TESTAMENTO.

## TITULUS XL.

SUPRA dicta diligens observatio in ordinandis testamentis, militibus, propter nimiam imperitiam eorum, constitutionibus [principalibus] remissa est. Nam quamvis ii neque legitimum numerum testium adhibuerint, neque aliam testamentorum solemnitatem observaverint: recte nihilominus testantur, videlicet cum in expeditionibus occupati sunt: quod merito nostra constitutio introduxit. Quoquo enim modo voluntas ejus suprema inveniatur, sive scripta, sive sine scriptura: valet testamentum ex voluntate ejus. Illis autem temporibus, per quæ citra expeditionum necessitatem in aliis locis vel suis ædibus degunt: minime ad vendicandum tale privilegium adjuvantur. sed testari quidem, etsi filii familiarum sint, propter militiam conceduntur: jure tamen communi eadem observatione & in eorum testamentis adhibenda, quam in testamentis paganorum proxime exposuimus.

¶ Plane de testamentis militum divus Trajanus, Catilio Severo ita rescripsit: Id privilegium, quod militantibus datum est, ut quoquo modo facta ab his testamenta rata sint: sic intelligi debet, ut utique prius constare debeat, testamentum factum esse, quod & sine scriptura & à non militantibus fieri potest. Si ergo miles, de cujus bonis apud te quæritur, convocatis ad hoc hominibus, ut voluntatem suam testaretur, ita loquutus est, ut declararet, quem vellet sibi hæredem esse, & cui libertatem tribueret: potest videri sine scripto hoc modo esse testatus, & voluntas ejus rata habenda est. Caterum si (ut plerumque sermonibus fieri solet) dixit alicui, *ego te hæredem facio*, aut, *bona mea tibi relinquo*: non oportet hoc pro testamento observari. Nec ullorum magis interest, quam ipsorum, quibus id privilegium datum est, ejusmodi exemplum non admitti. Alioqui non difficulter post mortem alicujus militis testes existerent, qui affirmarent se audisse dicentem aliquem, relinquere se bona, cui vi-

visum sit, & per hoc vera judicia subverterentur.

2 ¶ Quinimo & **mutus & surdus miles testamentum facere potest.**

3 ¶ Sed hætenus hoc illis à principalibus constitutionibus conceditur, **quatenus militent, & in castris degunt.** Post missionem vero veterani, vel extra castra [alii,] si faciant adhuc militantes testamentum, communi omnium civium Romanorum jure id facere debent. Et quod in castris fecerint testamentum, non communi jure, sed quomodo voluerint: post missionem intra annum tantum valebit. Quid ergo si intra annum quis decesserit, conditio autem hæredi adscripta post annum extiterit? an quasi militis testamentum valeat? Et placet valere quasi militis.

4 ¶ Sed & si quis ante militiam non jure fecit testamentum, & miles factus, & in expeditione degens resignavit illud, & quædam adjecit, sive detraxit, vel alias manifesta est militis voluntas hoc valere volentis: dicendum est valere hoc testamentum, quasi ex nova militis voluntate.

5 ¶ Denique & si in arrogationem datus fuerit miles, vel filiusfamilias emancipatus est, **testamentum ejus quasi ex nova militis voluntate valet, nec videtur capitis deminutione irritum fieri.**

6 ¶ Sciendum tamen est, quod cum ad exemplum castrensis peculii, tam anteriores leges, quam principales constitutiones quibusdam quasi castrensiis dederant peculia, & horum quibusdam permissum fuerat etiam in potestate degentibus testari: **nostra [id] constitutio latius extendens, permiserit omnibus in hujusmodi peculiis testari quidem, sed jure communi.** Cujus constitutionis tenore prospecto; licentia est; nihil eorum, quæ ad præfatum jus pertinent, ignorare.

### QUIBUS NON EST PERMISSUM FACERE Testamentum.

#### TITULUS XII.

**N**ON tamen omnibus licet facere testamentum. Statim enim ii, **qui alieno juri subiecti sunt, testamenti faciendi jus non habent:** adeo quidem, ut quamvis parentes eis permiserint, nihilo magis jure testari

testari possunt: exceptis iis, quos antea enumeravimus, & præcipue militibus qui in potestate parentum sunt, quibus de eo, quod in castris acquisierunt, permissum est ex constitutionibus principum testamentum facere. Quod quidem jus ab initio tantum militantibus datum est, tam ex auctoritate divi Augusti, quam Nervæ, nec non optimi Imperatoris Trajani: postea vero subscriptione divi Hadriani, etiam dimissis à militia, id est, veteranis concessum est. Itaque si quidem fecerint de castrensi peculio testamentum; pertinebit hoc ad eum, quem hæredem reliquerunt. si vero intestati decesserint, nullis liberis vel fratribus superstitibus: ad parentes eorum jure communi pertinebit. Ex hoc intelligere possumus: quod in castris acquisierit miles, qui in potestate patris est, neque ipsum patrem adimere posse, neque patris creditores id vendere, vel aliter inquietare, neque patre mortuo cum fratribus commune esse: sed scilicet proprium ejus esse, qui id in castris acquisierit: quanquam jure civili omnium, qui in potestate parentum sunt, peculia perinde in bonis parentum computentur, ac servorum peculia in bonis dominorum numerantur: exceptis videlicet iis, quæ ex sacris constitutionibus, & præcipue nostris, propter diversas causas non acquiruntur. præter hos igitur, qui castrense peculium vel quasi castrense habent, si quis alius filiusfamilias testamentum fecerit, inutile est, licet suæ potestatis factus decesserit.

1 ¶ Præterea testamentum facere non possunt impuberes: quia nullum eorum animi judicium est. Item furiosi: quia mente carent. Nec ad rem pertinet, si impubes, postea pubes: aut furiosus, postea compos mentis factus fuerit, & decesserit. Furiosi autem, si per id tempus fecerint testamentum, quo furor eorum intermissus est: jure testati esse videntur, certe eo, quod ante furorem fecerint, testamento valente. Nam neque testamentum recte factum, neque ullum aliud negotium recte gestum, postea furor interveniens perimit.

2 ¶ Item prodigus, cui bonorum suorum administratio interdicta est, testamentum facere non potest;  
sed

sed id, quod ante fecerit, quam interdictio bonorum suorum ei fiat, ratum est.

3 ¶ Item surdus & mutus non semper testamentum facere possunt. Utique autem de eo surdo loquimur, qui omnino non exaudit, non qui tarde exaudit. nam & mutus is intelligitur, qui eloqui nihil potest, non qui tarde loquitur. saepe enim etiam literati & eruditi homines variis casibus & audiendi & loquendi facultatem amittunt. Unde nostra constitutio etiam his subvenit, ut certis casibus & modis secundum normam ejus possint testari, aliaque facere, quæ eis permixta sunt. Sed si quis post testamentum factum, adversa valetudine, aut quolibet alio casu mutus aut surdus esse cœperit, ratum nihilominus manet ejus testamentum.

4 ¶ Cæcus autem non potest facere testamentum, nisi per observationem, quam lex divi Justinii patris nostri introduxit.

5 ¶ Ejus, qui apud hostes est, testamentum, quod ibi fecit, non valet, quamvis redierit. sed quod, dum in civitate fuerat, fecit: sive redierit, valet jure postliminii: sive illic decesserit, valet ex lege Cornelia.

## DE EXHÆREDATIONE LIBERORUM.

### TITULUS XIII.

**N**on tamen ut omnino valeat testamentum, sufficit hæc observatio, quam supra exposuimus: sed qui filium in potestate habet, curare debet, ut eum hæredem instituat, vel exhæredem cum nominatim faciat: ~~ut~~ si cum silentio præterierit, inutiliter testabitur: adeo quidem, ut si vivo patre, filius mortuus sit, nemo hæres ex eo testamento existere possit, quia scilicet ab initio non constiterit testamentum. Sed non ita de filiabus, & aliis per virilem sexum descendantibus liberis utriusque sexus antiquitari fuerat observatum: sed si non fuerant scripti hæredes scriptæve, vel exhæredati exhæredatæve: testamentum quidem non infirmabatur, jus tamen accrescendi eis ad certam portionem præstabatur. sed nec nominatim eas personas exhæredare parentibus  
ne-

neceſſe erat, ſed licebat inter cæteros hoc facere. Nominatim autem quis exhæredari videtur, ſive ita exhæredetur, *Titius filius meus exhaeres eſto*: ſive ita, *ſilius meus exhaeres eſto*, non adjecto proprio nomine, ſcilicet ſi alius filius non exiſtet.

1 ¶ Poſthumi quoque liberi, vel hæredes inſtitui debent, vel exhæredari. Et in eo par omnium conditio eſt, quod & filio poſthumo, & quolibet ex cæteris liberis, ſive fœminini ſexus, ſive maſculini, præterito: valet quidem teſtamentum, ſed poſtea adgnatione poſthumi ſive poſthumæ rumpitur, & ea ratione totum infirmatur. Ideoque ſi mulier, ex qua poſthumus aut poſthuma ſperabatur, abortum fecerit: nihil impedimento eſt ſcriptis hæredibus ad hæreditatem adeundam. Sed fœminini quidem ſexus perſonæ vel nominatim, vel inter cæteros exhæredari ſolebant: dum tamen, ſi inter cæteros exhæredarentur, aliquid eis legaretur, ne viderentur præteritæ eſſe per oblivionem. Maſculos vero poſthumos, id eſt, Filios, & deinceps, placuit non aliter recte exhæredari, niſi nominatim exhæredarentur: hoc ſcilicet modo, *quicumque mihi filius genitus fuerit, exhaeres eſto*.

2 ¶ Poſthumorum autem loco ſunt & hi, qui in ſui hæredis locum ſuccedendo, quaſi adgnascento ſunt parentibus ſui hæredes: ut ecce, ſi quis filium, & ex eo nepotem neptemve in poteſtate habeat: quia filius gradu præcedit, is ſolus jura ſui hæredis habet, quamvis nepos quoque & neptis ex eo in eadem poteſtate ſint. Sed ſi filius ejus vivo eo moriatur, aut qualibet alia ratione exeat de poteſtate ejus: incipit nepos neptiſve in ejus locum ſuccedere, & eo modo jura ſuorum hæredum quaſi adgnatione nanciſcuntur. Ne ergo eo modo rumpatur ejus teſtamentum: ſicut ipſum filium vel hæredem inſtituere, vel nominatim exhæredare debet teſtator, ne non jure faciat teſtamentum: ita & nepotem neptemve ex filio neceſſe eſt ei vel hæredem inſtituere, vel exhæredare: ne forte eo vivo, filio mortuo ſuccedendo in locum ejus nepos neptiſve, quaſi adgnatione rumpat teſtamentum. Idque lege Julia Velleia proviſum eſt, in qua ſimilis exhæredationis modus ad ſimilitudinem poſthumorum demonſtratur.

3 ¶ Emancipatos liberos jure civili neque hæredes instituere, neque exhæredare necesse est: quia non sunt sui hæredes. Sed prætor omnes, tam fœminini sexus, quam masculini, si hæredes non instituantur, exhæredari jubet: virilis sexus nominatim: fœminini vero inter cæteros: quia si neque hæredes instituti fuerint, neque ita (ut diximus) exhæredati, permittit eis prætor contra tabulas testamenti bonorum possessionem.

4 ¶ Adoptivi liberi, quamdiu sunt in potestate patris adoptivi, ejusdem juris habentur, cujus sunt justis nuptiis quæsit. itaque hæredes instituendi, vel exhæredandi sunt secundum ea, quæ de naturalibus exposuimus. Emancipati vero à patre adoptivo, neque jure civili, neque [eo jure,] quod ad edictum prætoris attinet, inter liberos connumerantur. Quæ ratione accidit, ut ex diverso (quod ad naturalem parentem attinet) quamdiu quidem sunt in adoptiva familia, extraneorum numero habeantur: ut eos neque hæredes instituere, neque exhæredare necesse sit. cum vero emancipati fuerint ab adoptivo patre: tunc incipiant in ea causa esse, in qua futuri essent, si à naturali patre emancipati fuissent.

5 ¶ Sed hæc quidem vetustas introducebat. nostra vero constitutio inter masculos & fœminas in hoc jure nihil interesse existimans: quia utraque persona in hominum procreatione simili naturæ officio fungitur, & lege antiqua [duodecim tabularum] omnes similiter ad successionem ab intestato vocabantur, quod & prætores postea secuti esse videntur: idè simplex ac simile jus, & in filiis, & in filiabus, & in cæteris descendantibus per virilem sexum personis, non solum jam natis, sed etiam posthumis, introduxit: ut omnes, sive sui, sive emancipati sint, vel hæredes instituantur, vel nominatim exhæredentur: & eundem habeant effectum circa testamenta parentum suorum infirmanda, & hæreditatem auferendam, quem filii sui vel emancipati habent, sive jam nati sint, sive adhuc in utero constituti, postea nati sint. Circa adoptivos autem [filios] certam induximus divisionem, quæ in nostra constitutione, quam super adoptivis tulimus, continetur.

6 ¶ Sed



6 ¶ Sed si in expeditione occupatus miles testamentum faciat, & liberos suos jam natos, vel posthumos nominatim non exhæredaverit, sed [silentio] præterierit, non ignorans, an habeat liberos: silentium ejus pro exhæredatione nominatim facta valere, constitutionibus principum cautum est.

7 ¶ Mater, vel avus maternus, necesse non habent liberos suos, aut hæredes instituere, aut exhæredare: sed possunt eos silentio omittere. nam silentium matris, aut avi materni, & cæterorum per matrem ascendentium, tantum facit, quantum exhæredatio patris. Neque enim matri filium filiamve, neque avo materno nepotem neptemve ex filia, si eum eamve hæredem non instituat, exhæredare necesse est: sive de jure civili quæramus, sive de edicto prætoris, quo [prætor] præteritis liberis contra tabulas bonorum possessionem permittit: sed aliud eis adminiculum servatur, quod paulo post vobis manifestum fiet.

## DE HÆREDIBUS INSTITUENDIS.

## TITULUS XIV.

Hæredes instituere permissum est tam liberos homines, quam servos: & tam proprios quam alienos. Proprios autem olim quidem secundum plerumque sententias non aliter, quam cum libertate, recte instituere licebat: hodie vero etiam sine libertate, ex nostra constitutione hæredes eos instituere permissum est. Quod non per innovationem induximus, sed quoniam æquius erat, & Atilicino placuisse Paulus suis libris, quos tam ad Masurium Sabinum, quam ad Plautium scripsit, refert. Proprius autem servus etiam is intelligitur, in quo nudam proprietatem testator habet, alio usumfructum habente. Est tamen casus, in quo nec cum libertate utiliter servus à domina hæres instituitur, ut constitutione divorum Severi & Antonini cavetur, cujus verba hæc sunt: Servum adulterio maculatum, non jure testamento manumissum ante sententiam ab ea muliere videri, quæ rea fuerat ejusdem criminis postulata, rationis est. Quare sequitur,

ut

ut in eundem à domina collata hæredis institutio, nullius momenti habeatur. **A alienus servus etiam is intelligitur, in quo usumfructum testator habet.**

1 ¶ **Servus autem à domino suo hæres institutus, siquidem in eadem causa manserit: fit ex testamento liber, hæresque ei necessarius. Si vero à vivo testatore manumissus fuerit, suo arbitrio adire hæreditatem potest: quia non fit hæres necessarius, cum utrumque ex domini testamento non consequatur. Quod si alienatus fuerit: jussu novi domini adire hæreditatem debet, & ea ratione per eum dominus fit hæres. nam ipse alienatus, neque liber neque hæres esse potest, etiamsi cum libertate hæres institutus fuerit. destitisse enim à libertatis datione videtur dominus, qui eum alienavit. Alienus quoque servus hæres institutus, si in eadem causa duraverit, jussu ejus domini adire hæreditatem debet. Si vero alienatus fuerit ab eo, aut vivo testatore, aut post mortem ejus, antequam adeat, debet jussu novi domini adire. At si manumissus est vivo testatore, vel mortuo, antequam adeat, suo arbitrio adire potest hæreditatem.**

2 ¶ **Servus etiam alienus post domini mortem recte hæres instituitur: quia & cum hæreditariis servis est testamenti factio. Nondum enim adita hæreditas, personæ vicem sustinet, non hæredis futuri, sed defuncti: cum etiam ejus, qui in utero est, servus recte hæres instituatur.**

3 ¶ **Servus [autem] plurium, cum quibus testamenti factio est, ab extraneo institutus hæres, unicuique dominorum, cujus jussu adierit, pro portione domini acquirit hæreditatem.**

4 ¶ **Et unum hominem, & plures usque in infinitum, quot quis hæredes velit facere, licet.**

5 ¶ **Hæreditas plerumque dividitur in duodecim uncias, quæ assis appellatione continentur. Habent autem & hæ partes propria nomina ab uncia usque ad assen hæc: sextans, quadrans, triens, quincunx, semis, septunx, bes, dodrans, dextans, deunx. Non autem utique [semper] duodecim uncias esse oportet. nam tot uncia assen efficiunt, quot testator voluerit. & si unum tantum quis ex semisse (verbi gratia) hæredem scripserit: totus as in semisse erit.**

Neque

Neque enim idem ex parte testatus, & ex parte intestatus decedere potest: nisi sit miles, cujus sola voluntas in testando spectatur. Et è contrario potest quis in quocunque voluerit plurimas uncias suam hæreditatem dividere.

6 ¶ Si plures instituantur hæredes: ita demum in hoc casu partium distributio necessaria est, si nolit testator eos ex æquis partibus hæredes esse. satis enim constat, nullis partibus nominatis, ex æquis partibus eos hæredes esse. Partibus autem in quorundam personis expressis, si quis alius sine parte nominatus erit: si quidem aliqua pars assignaverit: ex ea parte hæres fit. Et si plures sine parte scripti sunt, omnes in eandem partem concurrunt. Si vero totus as completus sit: ii, qui nominatim expressas partes habent, in dimidiam partem vocantur: & ille vel illi omnes in alteram dimidiam. Nec interest, primus, an medius, an novissimus, sine parte hæres scriptus sit. ea enim pars data intelligitur, quæ vacat.

7 ¶ Videamus, si pars aliqua vacet, nec tamen quisquam sine parte sit hæres institutus, quid juris sit. veluti si tres ex quartis partibus hæredes scripti sunt. Et constat vacantem partem singulis tacite pro hæreditaria parte accedere, & perinde haberi, ac si ex tertiis partibus hæredes scripti essent, & ex diverso, si plures hæredes scripti in portionibus sint: tacite singulis decrescere: ut si (verbi gratia) quatuor ex tertiis partibus hæredes scripti sint, perinde habeantur, ac si unusquisque ex quarta parte hæres scriptus fuisset.

8 ¶ Et si plures uncie, quam duodecim distributæ sint: is, qui sine parte institutus est, quod dupondio deest, habebit. Idemque erit, si dupondius expletus sit. quæ omnes partes ad assem postea revocantur, quamvis sint plurium unciarum.

9 ¶ Hæres & pure & sub conditione institui potest: ex certo tempore, aut ad certum tempus non potest: veluti, post quinquennium quam moriar, vel ex calendis illis, vel usque ad calendas illas hæres esto. Denique diem adjectum haberi pro supervacuo placet: & perinde esse, ac si pure hæres institutus esset.

10 ¶ **Impossibilis conditio** in institutionibus & legatis, necnon in fideicommissis & libertatibus, **pro non scripta habetur.**

11 ¶ **Si plures condiciones** in institutionibus **adscriptæ** sunt: siquidem **conjunctim**, ut puta *si illud & illud factum fuerit*: **omnibus parendum est, si separatim**, veluti *si illud aut illud factum eris*: **cuilibet** [conditioni] obtemperare satis est.

12 ¶ **Si**, quos nunquam testator vidit, **hæredes institui possunt.** veluti si fratris filios peregrinantes, ignorans qui essent, hæredes instituerit. ignorantia enim testantis inutilem institutionem non facit.

## DE VULGARI SUBSTITUTIONE.

### TITULUS XV.

**P**otest autem quis in testamento suo plures gradus **hæredum facere**: ut puta, *Si ille hæres non erit, ille hæres esto*: & deinceps, in quantum velit testator: ut novissimo loco in subsidium vel servum necessarium hæredem instituere [possit.]

1 ¶ **Et plures** in unius locum possunt substitui, **vel unus** in plurium, vel singuli in singulorum, vel invicem ipsi, qui hæredes instituti sunt.

2 ¶ **Et si ex disparibus partibus hæredes scriptos** invicem substituerit, & nullam mentionem in substitutione partium habuerit: eas videtur in substitutione partes dedisse, quas in institutione expressit: & ita divus Pius rescriptit.

3 ¶ **Sed si** instituto hæredi, cohærede substituto dato, alius ei substitutus fuerit: divi Severus & Antoninus sine distinctione rescripserunt, ad utramque partem substitutum admitti.

4 ¶ **Si servum alienum** quis patremfamilias arbitratus, hæredem scripserit: & si hæres non esset, Mævium ei substituerit: isque servus jussu domini adierit hæreditatem: [Mævius] substitutus, in partem admittitur. **Illa enim verba**, *si hæres non erit*, in eo quidem, quem alieno juri subjectum esse testator scit, sic accipiuntur: si neque ipse hæres erit, neque alium hæredem effecerit. in eo vero, quem patremfamilias esse arbitratur, illud significant: si hære-

hereditatem sibi, vel ei, cujus juri postea subjectus esse coeperit, non adquisierit. Idque Tiberius Cæsar in persona Parthenii servi sui constituit.

## DE PUPILLARI SUBSTITUTIONE.

## TITULUS XVI.

**L**iberis suis impuberibus, quos in potestate quis habet, non solum ita, ut supra diximus, substituere potest: id est, ut si hæredes ei non exstiterint, alius sit ei hæres: sed eo amplius ut si hæredes ei exstiterint, & adhuc impuberes mortui fuerint, sit eis aliquis hæres: veluti si quis dicat hoc modo, *Titius filius meus hæres mihi esto. Et si filius meus hæres mihi non erit: sive hæres erit, & prius moriatur, quam in suam tutelam venerit: tunc Sejus hæres esto.* quo casu, siquidem non exstiterit hæres filius: tunc substitutus patri sit hæres. si vero exstiterit hæres filius, & ante pubertatem decesserit: ipsi filio sit hæres substitutus. nam moribus institutum est, ut quum ejus ætatis filii sint, in qua ipsi sibi testamentum facere non possunt: parentes eis faciant.

1 ¶ Qua ratione excitati, etiam constitutionem posuimus in nostro Codice, qua prospectum est, ut si qui mente captos habeant filios, vel nepotes, vel pronepotes, cujuscunque sexus vel gradus: liceat eis, & si puberes sint, ad exemplum pupillaris substitutionis, certas personas substituere. sin autem respuerint, eandem substitutionem infirmari sancimus; & hoc ad exemplum pupillaris substitutionis, quæ postquam pupillus adoleverit, infirmatur.

2 ¶ Igitur in pupillari substitutione secundum præfatum modum ordinata, duo quodammodo sunt testamenta: alterum patris, alterum filii, tanquam si ipse filius sibi hæredem instituisset: aut certe unum testamentum est duarum causarum, id est, duarum hereditatum.

3 ¶ Sin autem quis ita formidolosus sit. ut timeat, ne filius suus pupillus adhuc, ex eo, quod palam substitutum acceperit, post obitum ejus periculo insidiarum subiaceat: vulgarem quidem substitutionem palam facere, & in primis testamenti partibus  
D [ordi]

[ordinare] debet: illam autem substitutionem, per quam, si hæres exstiterit pupillus, & intra pubertatem decesserit, substitutus vocatur: separatim in inferioribus partibus scribere, eamque partem proprio lino, propriaque cera consignare: & in priore parte testamenti cavere, ne inferiores tabula vivo filio & adhuc impubere aperiantur. Illud palam est, non ideo minus valere substitutionem impuberis filii, quod in eisdem tabulis scripta sit, quibus sibi quisque hæredem instituisse, quamvis pupillo hoc periculosum sit.

4 ¶ Non solum autem hæredibus institutis impuberibus liberis ita substituere parentes possunt, ut si hæredes eis exstiterint, & ante pubertatem mortui fuerint, sit eis hæres is, quem ipsi voluerint: sed etiam exhæredatis. Itaque eo casu si quid [exhæredato] pupillo ex hæreditatibus, legatise, aut donationibus propinquorum atque amicorum acquisitum fuerit: id omne ad substitutum pertinebit. Quæcunque diximus de substitutione impuberum liberorum, vel hæredum institutorum, vel exhæredatorum: eadem etiam de posthumis intelligimus.

5 ¶ Liberis autem suis testamentum nemo facere potest, nisi & sibi faciat. nam pupillare testamentum, pars & sequela est paterui testamenti: adeo, ut si patris testamentum non valeat: nec filii quidem valebit.

6 ¶ Vel singulis liberis, vel ei, qui eorum novissimus impubes morietur, substitui potest singulis quidem, si neminem eorum intestatum decedere voluerit: novissimo, si jus legitimarum hæreditatum integrum inter eos custodiri velit.

7 ¶ Substituitur autem impuberi aut nominatim, veluti Titius: aut generaliter, ut quisquis mihi hæres erit. Quibus verbis vocantur ex substitutione, impubere mortuo filio, illi, qui & scripti sunt hæredes, & exstiterunt, & pro qua parte hæredes facti sunt.

8 ¶ Mascule igitur usque ad quatuordecim annos substitui potest: feminae usque ad duodecim annos: & si hoc tempus excesserint, substitutio evanescit.

9 ¶ Extranec vero, vel filio puberi hæredi instituto, ita substituere nemo potest, ut si hæres exstiterit,

terit, & intra aliquod tempus decesserit, alius ei sit hæres: sed hoc solum permissum est, ut cum per hædeicommissum testator obliget alii hæreditatem ejus, vel totam, vel pro parte restituere. quod jus quale sit, suo loco trademus.

QUIBUS MODIS TESTAMENTA INFIRMANTUR.

TITULUS XVII.

Testamentum jure factum usque eo valet, donec rumpatur, irritumve fiat.

1 ¶ Rumpitur autem testamentum, cum in eodem statu manente testatore, ipsius testamenti jus vitatur. Si quis enim post factum testamentum adoptaverit sibi filium per Imperatorem, eum, qui est sui juris: aut per prætorem secundum nostram constitutionem, eum, qui in potestate parentis fuerit: testamentum ejus rumpitur, quasi adgnatione sui hæredis.

2 ¶ Posteriori quoque testamento, quod jure perfectum est, superius rumpitur. nec interest, exstiterit aliquis hæres ex eo, an non: hoc enim solum spectatur, an aliquo casu existere potuerit. Ideoque si quis noluerit hæres esse, aut vivo testatore, aut post mortem ejus, antequam hæreditatem adiret, decesserit: aut conditione, sub qua hæres institutus est, defectus sit: in his casibus paterfamilias intestatus moritur. Nam & prius testamentum non valet, ruptum à posteriore: & posterius æque nullas habet vires, cum ex eo nemo hæres exstiterit.

3 ¶ Sed & si quis priore testamento jure perfecto, posterius æque jure fecerit: etiam si ex certis rebus in eo hæredem instituerit: superius tamen testamentum sublatum esse: divi Severus & Antoninus rescripserunt. cujus constitutionis verba [ & hic ] inferi jussimus, quum aliud quoque præterea in ea constitutione expressum sit. Imperatores Severus & Antoninus Coccejo Campano. Testamentum secundo loco factum, licet in eo certarum rerum hæres scriptus sit, perinde jure valere, ac si rerum mentio facta non esset: sed & teneri hæredem scriptum, ut contentus rebus sibi datis, aut suppleta quarta ex lege

ge Falcidia, hæreditatem restituat his, qui in priorē testamento scripti fuerant, propter inserta fideicommissi verba, quibus, ut valeret prius testamentum, expressum est: dubitari non oportet. Et ruptum quidem testamentum hoc modo efficitur.

4 ¶ Alio autem modo testamenta jure facta infirmantur: veluti cum is, qui fecit testamentum, capite deminutus sit. quod quibus modis accadat, primo libro retulimus.

5 ¶ Hoc autem casu irrita fieri testamenta dicuntur: quum alioqui & quæ rumpuntur, irrita fiant: & ea, quæ statim ab initio non jure fiunt, irrita sint. sed & ea, quæ jure facta sunt, & postea per capitis deminutionem irrita fiunt, possumus nihilominus rupta dicere. Sed quia sane commodius erat singulas causas singulis appellationibus distinguere: ideo quædam non jure facta dicuntur, quædam jure facta rumpi, vel irrita fieri.

6 ¶ Non tamen per omnia inutilia sunt ea testamenta, quæ ab initio jure facta, per capitis deminutionem irrita facta sunt. nam si septem testium signis signata sunt: potest scriptus hæres secundum tabulas testamenti bonorum possessionem agnoscere. si modo defunctus, & civis Romanus, & suæ potestatis mortis tempore fuerit. Nam si ideo irritum factum sit testamentum, quia civitatem, vel etiam libertatem testator amisit, aut quia in adoptionem se dedit, & mortis tempore in adoptivi patris potestate sit: non potest scriptus hæres secundum tabulas bonorum possessionem petere.

7 ¶ Ex eo autem solo non potest infirmari testamentum, quod postea testator id noluerit valere: usque adeo, ut & si quis post factum prius testamentum posterius facere cœperit: & aut mortalitate præventus, aut quia eum ejus rei pœnituit, id non perfecit: divi Pertinacis oratione cautum sit, ne alias tabulæ priores jure factæ irritæ fiant, nisi sequentes jure ordinatæ & perfectæ fuerint. nam imperfectum testamentum sine dubio nullum est.

8 ¶ Eadem oratione expressit, non admissurum se hæreditatem ejus, qui litis causa principem reliquerit hæredem: neque tabulas non legitime factas,  
in



in quibus ipse ob eam causam hæres institutus erat, probaturum: neque ex nuda voce hæredis nomen admissurum: neque ex ulla scriptura, cui juris auctoritas desit, aliquid adepturum. Secundum hoc divi Severus & Antoninus sapissime rescripserunt. Licet enim (inquiunt) legibus soluti simus, attamen legibus vivimus.

## DE INOFFICIOSO TESTAMENTO.

### TITULUS XVIII.

**Q**uia plerumque parentes sine causa liberos suos exheredant, vel omittunt: inductum est, ut de inofficioso testamento agere possint liberi, qui queruntur, aut inique se exheredatos, aut inique præteritos: hoc colore, quasi non sanæ mentis fuerint, cum testamentum ordinarent. Sed hoc dicitur, non quasi vere furiosus sit, sed recte quidem fecerit testamentum, non autem ex officio pietatis. Nam si vere furiosus sit, nullum testamentum est.

1. ¶ Non autem liberis tantum **permisum est testamentum** parentum inofficiosum accusare, verum etiam liberorum parentibus. Soror autem & frater, turpibus personis scriptis hæredibus, ex sacris constitutionibus prælati sunt. Non ergo contra omnes hæredes agere possunt. Ultra fratres igitur & sorores cognati nullo modo aut agere possunt, aut agentes vincere.

2. ¶ Tam autem **naturales liberi**, quam secundum nostræ constitutionis divisionem adoptati, ita demum de inofficioso testamento agere possunt, si nullo alio jure ad defuncti bona venire possint. Nam qui ad hæreditatem totam vel partem ejus alio jure veniunt, de inofficioso agere non possunt. Posthumi quoque, qui nullo alio jure venire possunt, de inofficioso agere possunt.

3. ¶ Sed hæc ita accipienda sunt, si nihil eis penitus à testatoribus **testamento relictum est**. quod nostra constitutio ad verecundiam naturæ introduxit. Sin vero quantacunque pars hæreditatis vel res eis fuerit relicta: de inofficioso querela quiescente, id quod eis deest, usque ad quartam legitimæ partis

sequeatur: licet non fuerit adjectum, boni viri arbitratu debere eam compleri.

4 ¶ Si tutor nomine pupilli, cujus tutelam gerebat, ex testamento patris sui legatum acceperit, cum nihil erat ipsi tutori relictum à patre suo: nihilominus poterit nomine suo de inofficioso patris testamento agere.

5 ¶ Sed si è contrario pupilli nomine, cui nihil relictum fuerat, de inofficioso egerit, & superatus est: ipse [tutor,] quod sibi in testamento eodem legatum relictum est, non amittit.

6 ¶ Igitur quartam quis debet habere, ut de inofficioso agere non possit: sive jure hæreditario, sive jure legati, vel fideicommissi: vel si mortis causa ei quarta donata fuerit, vel inter vivos: in iis tantummodo casibus, quorum mentionem facit nostra constitutio: vel aliis modis, qui [in nostris] constitutionibus continentur. Quod autem de quarta diximus, ita intelligendum est: ut si unus fuerit, si plures, quibus agere de inofficioso testamento permittitur: una quarta eis dari possit, ut ea pro rata eis distribuatur.

## DE HÆREDUM QUALITATE, ET differentia.

### TITULUS XIX.

**H**æredes autem, aut necessarii dicuntur, aut sui & necessarii, aut extranei.

1 ¶ Necessarius hæres, est servus hæres institutus. Ideoque sic appellatur, quia si velit, si nolit, omnino post mortem testatoris protinus liber & necessarius hæres fit. Unde qui facultates suas suspectas habent: solent servum suum primo aut secundo, aut etiam ulteriore gradu hæredem instituere: ut si creditoribus satis non fiat, potius ejus hæredis bona, quam ipsius testatoris à creditoribus possideantur, vel distrahantur, vel inter eos dividantur. Pro hoc tamen incommodo, illud ei commodum præstatur: ut ea, quæ post mortem patroni sui sibi acquisierit, ipsi reserventur. Et quamvis bona defuncti non sufficiant creditoribus: [iterum] tamen ex ea causa res ejus, quas sibi acquisierit, non veneunt.

2 ¶ Sui

2 ¶ Sui autem & necessarii hæredes sunt, veluti filius, filia, nepos neptisve ex filio, & deinceps ceteri liberi, qui in potestate morientis modo fuerint. Sed ut nepos, neptisve sui hæredes sint, non sufficit eum eamve in potestate avi mortis tempore fuisse: sed opus est, ut pater ejus vivo patre suo desierit suus hæres esse, aut morte interceptus, aut quolibet alia ratione liberatus à patris potestate: tunc enim nepos neptisve in locum patris sui succedit. Sed sui quidem hæredes ideo appellantur, quia domesticæ hæredes sunt, & vivo quoque patre quodammodo domini existimantur. Unde etiam si quis intestatus moriatur: prima causa est in successione liberorum. Necessarii vero ideo dicuntur, quia omnino, siue velint, siue noliunt, tam ab intestato, quam ex testamento [ex lege duodecim tabularum] hæredes sunt. Sed his prætor permittit volentibus abstinere hæreditate: ut potius parentis, quam ipsorum bonæ similiter à creditoribus possideantur.

3 ¶ Ceteri, qui testatoris juri subiecti non sunt, extranei hæredes appellantur. Itaque liberi quoque nostri, qui in potestate nostra non sunt, hæredes à nobis instituti, extranei hæredes nobis videntur. Qua de causa, & qui hæredes à matre instituuntur, eodem numero sunt: quia foemina in potestate liberos non habent. Servus quoque hæres à domino institutus; & post testamentum factum ab eo manumissus, eodem numero habetur.

4 ¶ In extraneis hæredibus illud observatur, ut sit cum eis testamenti factio: siue hæredes ipsi instituantur, siue hi, qui in potestate eorum sunt. & id duobus temporibus inspicitur: testamenti quidem [facti] tempore, ut constiterit institutio: mortis vero testatoris, ut effectum habeat. Hoc amplius, & cum adit hæreditatem, esse debet cum eo testamenti factio, siue pure, siue sub conditione hæres institutus sit. nam jus hæredis eo maxime tempore inspicendum est, quo acquirit hæreditatem. Medio autem tempore inter factum testamentum, & mortem testatoris, vel conditionem institutionis existentem, mutatio juris non nocet hæredi: quia (ut diximus) tria tempora inspicere debent. Testamenti autem factionem

non solum is habere videtur, qui testamentum facere potest: sed etiam qui ex alieno testamento vel ipse capere potest, vel alii acquirere, licet non possit facere testamentum. Et ideo furiosus, & mutus, & posthumus, & infans, & filiusfamilias, & servus alienus testamenti factionem habere dicuntur. Licet enim testamentum facere non possint, attamen ex testamento vel sibi, vel alii acquirere possunt.

5 ¶ Extraneis autem hæredibus deliberandi potestas est de adeunda hæreditate, vel non **adeunda**. Sed si ve is, cui abstinendi potestas est, immiscuerit se bonis hæreditatis, si ve **extraneus**, cui de adeunda hæreditate deliberare licet, adierit: postea relinquenda hæreditatis facultatem non habet, nisi minor sit vigintiquinque annis. Nam hujus ætatis hominibus, sicut in cæteris omnibus causis, deceptis: ita & si temere damnosam hæreditatem susceperint, prætor succurrit. Sciendum est tamen, divum Hadrianum etiam majori vigintiquinque annis veniam dedisse, cum post aditam hæreditatem grande æs alienum, quod aditæ hæreditatis tempore latebat, emerisset. Sed hoc quidem divus Hadrianus cuidam speciali beneficio præstitit: divus autem Gordianus postea militibus tantummodo hoc concessit.

6 ¶ Sed nostra benevolentia commune omnibus subjectis Imperio nostro hoc beneficium præstitit: & constitutionem tam æquissimam, quam nobilissimam scripsit: cujus tenorem si observaverint homines, licet eis adire hæreditatem, & in tantum teneri, quantum valere bona hæreditatis contingit: ut ex hac causa neque deliberationis auxilium sit eis necessarium, nisi omissa observatione nostræ constitutionis, & deliberandum existimaverint, & sese veteri gravamini aditionis supponere maluerint.

7 ¶ Item extraneus hæres **testamento** institutus, aut ab intestato ad legitimam hæreditatem vocatus, potest aut pro hærede gerendo, aut etiam nuda voluntate suscipiendæ hæreditatis hæres fieri: Pro hærede autem gerere quis videtur, si rebus hæreditariis tanquam hæres utatur, vel vendendo res hæreditarias, vel prædia colendo locandove, & quoquo modo voluntatem suam declaret, vel re, vel verbo de

de adeunda hæreditate: dummodo sciat eum, in cuius bonis pro hærede gerit, testatum intestatumve obfisse, & se ei hæredem esse. Pro hærede enim gerere, est pro domino gerere. veteres enim hæredes pro dominis appellabant. Sicut autem nuda voluntate extraneus hæres fit: ita contraria destinatione statim ab hæreditate repellitur. Eum, qui surdus vel mutus natus, vel postea factus est, nihil prohibet pro hærede gerere, & acquirere sibi hæreditatem: si tamen intelligit, quod agit.

## DE LEGATIS.

## TITULUS XX.

Post hæc videamus de legatis: quæ pars juris extrapropositam quidem materiam videtur, (nam loquimur de iis juris figuris, quibus per universitatem res nobis acquiruntur) sed cum omnino de testamentis, & de hæredibus, qui in testamento instituuntur, loquuti sumus: non sine causa sequenti loco potest hæc juris materia tractari.

1 ¶ Legatum itaque est donatio quædam à defuncto relicta, ab hærede præstanda.

2 ¶ Sed olim quidem erant legatorum genera quatuor: per vindicationem, per damnationem, sinendi modo, per præceptionem: & certa quædam verba cuique generi legatorum assignata erant, per quæ singula genera legatorum significabantur. Sed ex constitutionibus divorum Principum solennitas huiusmodi verborum penitus sublata est. Nostra autem constitutio, quam cum magna fecimus lucubratione, defunctorum voluntates validiores esse cupientes, & non verbis, sed voluntatibus eorum faventes, disposuit; ut omnibus legatis una sit natura, & quibuscunque verbis aliquid relictum sit, liceat legatariis id persequi, non solum per actiones personales, sed etiam per in rem, & per hypothecariam. Cujus constitutionis perpensum modum ex ipsius tenore perfectissime accipere possibile est.

3 ¶ Sed non usque ad eam constitutionem standum esse existimavimus. Cum enim antiquitatem invenimus legata quidem stricte concludentem, fideicommissis autem, quæ ex voluntate magis descen-

debant defunctorum, pinguiorem naturam indulgentem: necessarium esse duximus, omnia legata fideicommissis exequare: ut nulla sit inter ea differentia: sed quod deest legatis, hoc repleatur ex natura fideicommissorum: & si quid amplius est in legatis, per hoc crescat fideicommissorum natura. Sed ne in primis legum cunabulis permistim de his exponendo, studiosis adolescentibus quandam introducamus difficultatem: operapretium esse duximus, interim separatim prius de legatis: & postea de fideicommissis tractare; ut natura utriusque juris cognita, facile possint permissionem eorum eruditi subtilioribus auribus accipere.

4 ¶ Non solum autem testatoris vel hæredis res, sed etiam aliena legari potest: ita, ut hæres cogatur redimere eam, & præstare: vel si eam non potest redimere, æstimationem ejus dare. Sed si talis sit res, cujus commercium non est, [vel adipisci non potest:] nec æstimatio ejus debetur; veluti si campum Martium, vel basilicas, vel templa, vel quæ publico usui destinata sunt, legaverit. nam nullius momenti [tale] legatum est. Quod autem diximus alienam rem posse legari: ita intelligendum est, si defunctus sciebat alienam rem esse, non si ignorabat. Forfitan enim si scivisset alienam rem esse, non legasset: & ita divus Pius rescripsit. Et verius est, ipsum qui agit, id est, legatarium probare oportere, scivisse alienam rem legare defunctum: non hæredem probare oportere, ignorasse alienam: quia semper necessitas probandi incumbit illi, qui agit.

5 ¶ Sed & si rem obligatam creditori aliquis legaverit, necesse habet hæres [eam] luere. Et [in] hoc quoque casu idem placet, quod in re aliena: ut ita demum luere necesse habeat hæres, si sciebat defunctus rem obligatam esse. & ita divi Severus & Antoninus rescripserunt. Si tamen defunctus voluerit legatarium luere, & hoc expresse: non debet hæres eam luere.

6 ¶ Si res aliena legata fuerit: & ejus rei vivo testatore legatarius dominus factus fuerit: si quidem ex causa emptionis: ex testamento actione pretium consequi potest. Sivero ex causa lucrativa, veluti ex do-

donatione, vel ex alia simili causa, agere **non** potest. nam traditum est duas lucrativas causas in eundem hominem & eandem rem concurrere non posse. Hac ratione, si ex duobus testamentis eadem res eidem debeatur: interest, utrum rem, an aestimationem ex testamento consequutus sit. nam si rem habet, agere non potest, quia habet eam ex causa lucrativa: si aestimationem, agere potest.

7 ¶ **Ea quoque res, quæ in rerum natura non est, si modo futura est, recte legatur:** veluti fructus, qui in illo fundo nati erunt, aut quod ex illa ancilla natum erit.

8 ¶ **Si eadem res duobus legata sit, sive conjunctim, sive disjunctim: si ambo perveniant ad legatum, scinditur inter eos legatum: si alter deficiat (quia aut spreverit legatum, aut vivo testatore decesserit, vel alio quoquo modo defecerit) totum ad collegatarium pertinet.** Conjunctim autem legatur, veluti si quis dicat, *Titio & Sejo hominem Stichum do lego.* disjunctim ita, *Titio hominem Stichum do lego. Sejo hominem Stichum do lego.* Sed & si expresserit eundem hominem Stichum, æque disjunctim legatum intelligitur.

9 ¶ **Si cui fundus alienus legatus sit, & emerit proprietatem deducto usufructu, & usufructus ad eum pervenerit, & postea ex testamento agat: recte eum agere, & fundum petere, Julianus ait:** quia usufructus, in petitione, servitutis locum obtinet. sed officio judicis continetur, ut deducto usufructu, jubeat aestimationem praestari.

10 ¶ **Sed si rem legatarii quis ei legaverit, inutile est legatum:** quia quod proprium est ipsius, amplius ejus fieri non potest: & licet alienaverit eam, non debetur nec ipsa res, nec aestimatio ejus.

11 ¶ **Si quis rem suam quasi alienam legaverit: valet legatum.** nam plus valet quod in veritate est, quam quod in opinione. **Sed & si legatarii esse putavit, valere constat:** quia exitum voluntas defuncti habere potest.

12 ¶ **Si rem suam legaverit testator, posteaque eam alienaverit: Celsus putat, si non adimendi animo vendidit, nihilominus deberi.** Idemque divi Se-

verus & Antoninus rescripserunt. Iidem rescripserunt cum, qui post testamentum factum prædia, quæ legata erant, pignori dedit, ademisse legatum non videri: & ideo legatarium cum hærede [ejus] agere posse, ut prædia a creditore luantur. Si vero quis partem rei legata alienaverit: pars, quæ non est alienata omnino debetur, pars autem alienata ita debetur, si non adimendi animo alienata sit.

13 ¶ Si quis debitori suo liberationem legaverit, legatum utile est: & neque ab ipso debitore, neque ab hærede ejus potest hæres petere: neque ab alio, qui hæredis loco sit. Sed & potest à debitore conveniri, ut liberet eum. Potest etiam quis vel ad tempus jubere, ne hæres petat.

14 ¶ Ex contrario, si debitor creditori suo quod debet legaverit: inutile est legatum, si nihil plus est in legato, quam in debito: quia nihil amplius per legatum habet. Quod si in diem, vel sub conditione debitum ei pure legaverit: utile est legatum propter representationem. Quod si vivo testatore dies venerit, vel conditio extiterit: Papinianus scripsit, utile esse nihilominus legatum: quia semel constitit, quod & verum est. Non enim placuit sententia existimantium, extinctum esse legatum, quia in eam causam pervenerit, à qua incipere non potest.

15 ¶ Sed si uxori maritus dotem legaverit, valet legatum: quia plenius est legatum, quam de dote actio. Sed si, quam non accepit dotem, legaverit: divi Severus & Antoninus rescripserunt, si quidem simpliciter legaverit, inutile esse legatum: si vero certa pecunia, vel certum corpus, aut instrumenta dotis in prælegando demonstrata sunt, valere legatum.

16 ¶ Si res legata sine facto hæredis perierit, legatario decedit. Et si servus alienus legatus sine facto hæredis manumissus fuerit: non tenetur hæres. Si vero hæredis servus legatus sit, & ipse eum manumiserit, teneri ipsum Julianus scripsit. nec interest, sciverit, an ignoraverit à se eum legatum esse. Sed & si alii donaverit servum, & is, cui donatus est, eum manumiserit: tenetur hæres quamvis ignoraverit à se eum legatum esse.

17 ¶ Si quis ancillas cum suis natis legaverit, er-



iam si ancillæ mortuæ fuerint, partus legato cedunt. Idem est, & si ordinarii servi cum vicariis legati fuerint: quia licet mortui sint ordinarii, tamen vicarii legato cedunt. Sed si servus fuerit cum peculio legatus: mortuo servo, vel manumisso, vel alienato, peculii legatum extinguitur. Idem est, si fundus instructus, vel cum instrumento legatus fuerit. Nam fundo alienato, & instrumenti legatum extinguitur.

18 ¶ Si grex legatus fuerit: & postea ad unam ovem pervenerit: quod superfuerit, vindicari potest.

Grege autem legato, etiam eas oves, quæ post testamentum factum gregi adjiciuntur, legato cedere, Julianus ait. Est autem gregis unum corpus ex distantibus capitibus, sicut ædium unum corpus est ex cohærentibus lapidibus.

19 ¶ Aedibus denique legatis, columnas & marmora, quæ post testamentum factum adjecta sunt, legato [dicimus] cedere..

20 ¶ Si peculium legatum fuerit: sine dubio, quicquid peculio accedit, vel decedit vivo testatore, legatarii lucro vel damno est. Quod si post mortem testatoris ante aditam hæreditatem [aliquid] servus acquisierit: Julianus ait, si quidem ipsi manumisso peculium legatum fuerit: omne, quod ante aditam hæreditatem acquisitum est, legatario cedere; quia hujusmodi legati dies ab adita hæreditate cedit. sed si extraneo peculium legatum fuerit: non cedere ea legato, nisi ex rebus peculiaribus auctum fuerit peculium. Peculium autem, nisi legatum fuerit, manumisso non debetur: quamvis si vivus manumiserit, sufficit, si non adimatur. & ita divi Severus & Antoninus rescripserunt. Idem rescripserunt, peculio legato, non videri id relictum, ut petitionem habeat pecuniæ, quam in rationes dominicas impenderit. Idem rescripserunt, peculium videri legatum, cum rationibus redditis liber esse jussus est, & ex eo reliqua inferre.

21 ¶ Tam autem corporales res legari possunt, quam incorporales: & ideo quod defuncto debetur, potest alicui legari, ut actiones suas hæres legatario præstet: nisi exegerit vivus testator pecuniam. nam hoc casu legatum extinguitur. Sed & tale legatum

valet, *damnas esto haeres meus domum illius reficere, vel, illum ere alieno liberare.*

22 ¶ *Si generaliter servus, vel res alia legetur: electio legatarii est, nisi aliud testator dixerit.*

23 ¶ Optionis legatum, [id est,] ubi testator ex servis suis, vel aliis rebus optare legatarium iusserat, habebat olim in se conditionem: & ideo nisi ipse legatarius vivus optasset, ad hæredem legatum non trans mittebat. sed ex constitutione nostra & hoc in meliorem statum reformatum est: & data est licentia hæredi legatarii optare [servum,] licet vivus legatarius hoc non fecerit. Et diligentiore tractatu habito, & hoc in nostra constitutione additum est: *sive plures legatarii extiterint, quibus optio relicta est, & dissentiant in corpore eligendo: sive unius legatarii plures hæredes [sint,] & inter se circa optandum dissentiant, alio aliud corpus eligere cupiente, ne pereat legatum (quod plerique prudentium contra benevolentiam introducebant) fortunam esse hujus optionis iudicem, & sorte hoc esse dirimendum, ut ad quem fors pervenerit, illius sententia in optione præcellat.*

24 ¶ Legari autem illis solum potest, cum quibus testamenti factio est.

25 ¶ *Incertis vero personis neque legata, neque fideicommissa olim relinqui concessum erat.* Nam nemiles quidem incertæ personæ poterat relinquere, ut divus Hadrianus rescripsit. Incerta autem persona videbatur, quam incerta opinione animo suo testator subijciebat: veluti si quis ita dicat, *quicumque filio meo filiam suam in matrimonium dederit, ei haeres meus illum fundum dato.* Illud quoque, quod iis relinquebatur, qui post testamentum scriptum primi Consules designati essent: æque incertæ personæ legari videbatur. & denique multæ aliæ hujusmodi species sunt. Libertas quoque incertæ personæ non videbatur posse dari, quia placebat nominatim servos liberari. *sub certa vero demonstratione, id est, ex certis personis incertæ personæ recte legabatur: veluti, ex cognatis meis, qui nunc sunt, si quis filiam meam uxorem duxerit, ei haeres meus illam rem dato.* *Incertis autem personis legata vel fideicommissa relicta,*

sta, & per errorem soluta, repeti non posse, sacris constitutionibus cautum erat.

26 ¶ Posthumus quoque alieno inutiliter [antea] legabatur. Est autem alienus posthumus, qui natus inter suos, hæres testatori futurus non est. Ideoque ex emancipato filio conceptus nepos, extraneus erat posthumus avo.

27 ¶ Sed nec hujusmodi species penitus est sine justa emendatione relicta, quum in nostro Codice constitutio posita sit, per quam & huic parti medemur, non solum in hæreditatibus, sed etiam in legatis & fideicommissis: quod evidenter ex ipsius constitutionis lectione clarescit. Tutor autem nec per nostram constitutionem incertus dari debet: quia certo judicio debet quis pro tutela suæ posteritati cavere.

28 ¶ Posthumus autem alienus hæres institui & ante poterat, & nunc potest. nisi in utero ejus sit, quæ jure nostro uxor esse non potest.

29 ¶ Si quidem in nomine, cognomine, prænomine, [agnomine] legatarii testator erraverit: cum de persona constat, nihilominus valet legatum. Idemque in hæredibus servatur, & recte. Nomina enim, significandorum hominum gratia reperta sunt: qui si alio quolibet modo intelligantur, nihil interest.

30 ¶ Huic proxima est illa juris regula, falsa demonstratione legatum non perimi: veluti si quis ita legaverit, *Stichum servum meum verna[m] do lego*: licet enim non verna, sed emptus sit: si tamen de servo constat, utile est legatum. Et convenienter, si ita demonstraverit, *Stichum servum, quem à Sejo emi*, sitque ab alio emptus: utile est legatum, si de servo constat.

31 ¶ Longe magis legato falsa causa [adjecta] non nocet: veluti cum quis ita dixerit: *Titio, quia me absente negotia mea curavit, Stichum do lego*: vel ita, *Titio, quia patrocínio ejus capitali crimine liberatus sum, Stichum do lego*. Licet enim neque negotia testatoria unquam gesserit Titius, neque patrocínio ejus liberatus sit, legatum tamen valet. Sed si conditionaliter enunciata fuerit causa, aliud juris est: veluti hoc modo, *Titio, si negotia mea curaveris, fundum [meum] do lego*.

32 ¶ An servo hæredis recte legemus, quæritur. & constat pure inutiliter legari, nec quicquam proficere, si vivo testatore de potestate hæredis exierit: quia quod inutile foret legatum, si statim post factum testamentum decessisset testator, hoc non debet ideo valere, quia diutius testator vixerit. Sub conditione vero recte legatur [servo,] ut requiramus, an quo tempore dies legati cedit, in potestate hæredis non sit.

33 ¶ Ex diverso, hærede instituto servo, quin domino recte etiam sine conditione legetur, non dubitatur. Nam etsi statim post factum testamentum decesserit testator: non tamen apud eum, qui hæres sit, dies legati cedere intelligitur: cum hæreditas à legato separata sit: & possit per eum servum alius hæres effici, si prius, quam jussu domini adeat, in alterius potestatem translatus sit: vel manumissus ipse hæres efficitur; quibus casibus utile est legatum: quod si in eadem causa permanferit, & jussu legatarii adierit: evanescit legatum.

34 ¶ Ante hæredis institutionem inutiliter antea legabatur: scilicet quia testamenta vim ex institutione hæredis accipiunt, & ob id veluti caput atque fundamentum intelligitur totius testamenti hæredis institutio. Pari ratione nec libertas ante hæredis institutionem dari poterat. Sed quia incivile esse patavimus, scripturæ ordinem quidem sequi (quod: & ipsi antiquitati vituperandum fuerat visum) sperni autem testatoris voluntatem: per nostram constitutionem & hoc vitium emendavimus: ut liceat & ante hæredis institutionem, & inter medias hæredam institutiones legatum relinquere, & multo magis libertatem, cujus usus favorabilior est.

35 ¶ Post mortem quoque hæredis aut legatarii simili modo inutiliter legabatur: veluti si quis ita dicat, *cum hæres meus mortuus fuerit, do lego.* Item, *pridie quam hæres aut legatarius morietur.* Sed simili modo & hoc correximus, firmitatem hujusmodi legatis ad fideicommissorum similitudinem præstantes: ne in hoc casu deterior causa legatorum, quam fideicommissorum inveniatur.

36 ¶ Poenæ quoque nomine inutiliter [antea legaba-

gabatur & adimebatur, vel transferebatur. Poenæ autem nomine legari videtur, quod coërcendi hæredis causa relinquitur, quo magis aliquid faciat, aut non faciat: veluti si quis ita scripserit: *hæres meus si filiam suam in matrimonium Titio collocaverit: vel ex diverso, si non collocaverit, dato decem aureos Seio: aut si ita scripserit, hæres meus si servum Stichum alienaverit: vel ex diverso, si non alienaverit, Titio decem aureos dato.* Et in tantum hæc regula observabatur, ut quam plurimis principalibus constitutionibus significaretur, nec principem agnoscere, quod ei poenæ nomine legatum sit. nec ex militis quidem testamento talia legata valebant, quamvis aliæ militum voluntates in ordinandis testamentis valde observabantur, quin etiam nec libertates poenæ nomine dari posse placebat. eo amplius nec hæredem poenæ nomine adjici posse, Sabinus existimabat: veluti si quis ita dicat, *Titius hæres esto; si Titius filiam suam in matrimonium Seio collocaverit, Seius quoque hæres esto.* Nihil enim intererat, qua ratione Titius coërceretur, utrum legati datione, an cohæredis adjectione. Sed hujusmodi scrupulositas nobis non placuit: & generaliter ea, quæ relinquuntur, licet poenæ nomine fuerint relicta, vel adempta, vel in alium translata: nihil distare à cæteris legatis constituimus, **vel in dando, vel in adimendo, vel in transferendo:** exceptis videlicet iis, quæ impossibilia sunt, vel legibus interdicta, aut alias probrosa. Hujusmodi enim testamentorum dispositiones valere, secta meorum temporum non patitur.

## DE ADEPTIONE LEGATORUM,

&amp; translatione.

## TITULUS XXI.

**A**demptio legatorum (sive eodem testamento adimantur, sive codicillis) firma est, sed & sive contrariis verbis fiat ademptio: veluti si quis ita quid legaverit, *do lego:* ita adimatur, *non do, non lego:* sive non contrariis: sed & aliis quibuscunque verbis.

**I** ¶ Transferri quoque legatum ab alio ad alium potest: veluti si quis ita dixerit, *hominem Stichum,*  
quem

*quem Titio legavi, Seio do lego: sive in eodem testamento, sive in codicillis hoc fecerit. quo casu simul [&] Titio adimi videtur, & Seio dari.*

## DE LEGE FALCIDIA.

## TITULUS XXII.

**S**UPEREST, ut de lege Falcidia dispiciamus, qua modus novissime legatis impositus est. Cum enim olim lege duodecim tabularum libera erat legandi potestas, ut liceret vel totum patrimonium legatis erogare (quippe [cum] ea lege ita cautum esset: *ut quisque legasset sua rei, ita jus esto*) visum est hanc legandi licentiam coarctare: idque ipsorum testatorum gratia provisum est, ob id, quod plerumque intestati moriebantur, recusantibus scriptis hæredibus pro nullo aut minimo lucro hæreditates adire. Et cum super hoc tam lex Furia, quam lex Voconia latae sunt, quarum neutra sufficiens ad rei consumptionem videbatur: novissime lata est lex Falcidia, qua cavetur, ne plus legare liceat, quam dodrantem totorum bonorum: id est, ut sive unus hæres institutus sit, sive plures, apud eum eoque pars quarta remaneat.

1 ¶ Et cum quaesitum esset, duobus hæredibus institutis (veluti Titio & Sejo) si Titii pars, aut tota exhausta sit legatis, quæ nominatim ab eo data sunt, aut supra modum onerata: à Sejo vero aut nulla relicta sint legata, aut quæ partem ejus duntaxat in partem dimidiam minuant: an quia is quartam partem totius hæreditatis aut amplius habet, Titio nihil ex legatis, quæ ab eo relicta sunt, retinere liceat, ut quartam partem suæ partis salvam habeat: placuit posse retinere. & enim in singulis hæredibus ratio legis Falcidiæ ponenda est.

2 ¶ Quantitas autem patrimonii, ad quam ratio legis Falcidiæ redigitur, mortis tempore spectatur. Itaque (verbi gratia) si is, qui centum aureorum patrimonium in bonis habeat, centum aureos legaverit: nihil legatariis prodest, si ante aditam hæreditatem per servos hæreditarios, aut ex parte ancillarum hæreditariarum, aut ex foetu pecorum, tantum accesserit hæreditati, ut centum [aureis] legatorum

torum nomine erogatis, hæres quartam partem hæreditatis habiturus sit: sed necesse est, ut nihilominus quarta pars legatis detrahatur. Ex diverso, si septuagintaquinque legaverit, & ante aditam hæreditatem in tantum decreverint bona (incendiis forte, aut naufragiis, aut morte servorum) ut non amplius, quam septuagintaquinque [aureorum substantia,] vel etiam minus relinquatur: solida legata debentur: Nec ea res damnosa est hæredi, cui liberum est non adire hæreditatem: quæ res efficit, ut sit necesse legatariis, ne destituto testamento nihil consequantur, cum hærede in portione pacisci.

3 ¶ Cum autem ratio legis Falcidix ponitur, ante deducitur ars alienum: item funeris impensa, & pretia servorum manumissorum: tunc demum in reliquo ita ratio habetur, ut ex eo quarta pars apud hæredem remaneat, tres vero partes inter legatarios distribuantur: pro rata scilicet portione ejus, quod cuique eorum legatum fuerit. Itaque si fingamus quadringentos aureos legatos esse, & patrimonii quantitatem, ex qua legata erogari oportet, quadringentorum esse: quarta pars legatariis singulis debet detrahi. Quod si trecentos quinquaginta legatos fingamus: octava debet detrahi. Quod si quingentos legaverit: initio quinta, deinde quarta detrahi debet. Ante enim detrahendum est, quod extra bonorum quantitatem est, deinde quod ex bonis apud hæredem remanere oportet.

DE FIDEICOMMISSARIIS HÆREDITATIBUS: [& ad SCtum Trebellianum.]

#### TITULUS XXIII.

Nunc transeamus ad fideicommissa. sed prius est, ut de hæreditatibus fideicommissariis videamus.

1 ¶ Sciendum itaque est, omnia fideicommissa primis temporibus infirma fuisse, quia nemo invitus cogebatur præstare id, de quo rogatus erat. Quibus enim non poterant hæreditatem, vel legata relinquere, si relinquebant, fidei committebant eorum, qui capere ex testamento poterant [hæreditatem.] Et ideo fideicommissa appellata sunt, quia nullo  
vin-

vinculo juris, sed tantum pudore eorum, qui rogabantur, continebantur. *Postea* divus *Augustus*, primus, semel iterumque gratia personarum motus, vel quia per ipsius salutem rogatus quis diceretur, aut ob insignem quorundam perfidiam, *jussit Consulibus auctoritatem suam interponere. Quod* quia iustum videbatur, & populare erat: paulatim *conversum est in assiduam jurisdictionem*: tantusque eorum favor factus est, ut paulatim etiam *prætor proprius crearetur, qui de fideicommissis jus diceret, quem fideicommissarium appellabant.*

2 ¶ In primis igitur sciendum est, opus esse, ut aliquis recto jure testamento hæres instituat: ejusque fidei committatur, ut eam hæreditatem alii restituat. alioqui inutile est testamentum, in quo nemo hæres instituitur. Cum igitur aliquis scripserit, *Lucius Titius hæres esto*: potest adjicere, rogo te *Lucio Titi, ut cum primum poteris hæreditatem meam adire, eam Caio Seio reddas restituas. Potest autem quisque & de parte restituenda hæredem rogare. Et liberum est, vel pure, vel sub conditione relinquere fideicommissum, vel ex certo die.*

3 ¶ Restituta autem hæreditate, is quidem, qui restituit, nihilominus hæres permanet: is vero, qui recipit hæreditatem, aliquando hæredis, aliquando legatarii loco habetur.

4 ¶ Et Neronis quidem temporibus, *Trebellio Maximo & Annæo Seneca Consulibus, Senatusconsultum factum est: quo cautum est, ut si hæreditas ex fideicommissi causa restituta sit: omnes actiones, quæ jure civili hæredi, & in hæredem competerent, ei, & in eum darentur, cui ex fideicommissio restituta esset hæreditas. Post quod Senatusconsultum prætor utiles actiones ei, & in eum, qui recipit hæreditatem, quasi hæredi, & in hæredem dare cœpit.*

5 ¶ Sed quia hæredes scripti, cum aut totam hæreditatem, aut pene totam plerumque restituere rogabantur, adire hæreditatem ob nullum vel minimum lucrum recusabant, atque ob id extinguebantur fideicommissa: postea *Vespasiani Augusti temporibus, Pegaso & Tusione Consulibus, Senatus censuit: ut ei, qui rogatus esset hæreditatem restituere,*  
per-



perinde liceret quartam partem retinere, atque ex lege Falcidia ex legatis retinere conceditur. Ex singulis quoque rebus, quæ per fideicommissum relinquuntur, eadem retentio permixta est. Post quod Senatusconsultum ipse hæres onera hæreditaria sustinebat. Ille autem, qui ex fideicommissum recipiebat partem hæreditatis, legatarii partiarum loco erat; id est, ejus legatarii, cui pars bonorum legabatur; quæ species legati, partitio vocabatur: quia cum hærede legatarius partiebatur hæreditatem. Unde quæ solebant stipulationes inter hæredem & partiarum legatarium interponi: eadem interponebantur inter eum, qui ex fideicommissum recepit hæreditatem & hæredem, id est, ut lucrum & damnum hæreditarium pro rata parte inter eos commune esset.

¶ Ergo siquidem non plus, quam dodrantem hæreditatis scriptus hæres rogatus sit restituere: tunc ex Trebelliano Senatusconsulto restituebatur hæreditas, & in utrumque actiones hæreditariæ pro rata parte dabantur: in hæredem quidem jure civili; in eum vero, qui recipiebat hæreditatem, ex Senatusconsulto Trebelliano tanquam in hæredem. At si plus, quam dodrantem, vel etiam totam hæreditatem restituere rogatus esset: locus erat Pegasiano senatusconsulto, & hæres, qui semel adierat hæreditatem (si modo sua voluntate adierat) sive retinuerat quartam partem, sive retinere noluerat: ipse universa onera hæreditaria sustinebat. Sed quarta quidem retenta, quasi partis & pro parte stipulationes interponebantur, tanquam inter partiarum legatarium & hæredem. si vero totam hæreditatem restitueret: emptæ & venditæ hæreditatis stipulationes interponebantur. Sed si recusabat scriptus hæres adire hæreditatem; ob id, quod diceret eam sibi suspectam esse quasi damnosam: cavebatur Pegasiano senatusconsulto, ut desiderante eo, cui restituere rogatus esset, jussu prætoris adiret, & restitueret hæreditatem: perindeque ei & in eum, qui reciperet hæreditatem, actiones darentur, ac juris est ex Trebelliano senatusconsulto. quo casu nullis stipulationibus est opus: quia simul & huic, qui restituit, securitas datur; & actiones hæreditariæ ei & in eum trans-

transferuntur, qui recipit hæreditatem, utroque senatusconsulto in hac specie concurrente.

7 ¶ *Sed* quia stipulationes ex senatusconsulto Pegasiano descendentes, & ipsi antiquitati displicuerunt, & quibusdam casibus captiosas eas homo excelsi ingenii Papinianus appellat, & nobis in legibus magis simplicitas quam difficultas placet: ideo omnibus nobis suggestis tam similitudinibus, quam differentiis utriusque senatusconsulti: placuit, exemplo senatusconsulto Pegasiano, quod postea supervenit, omnem auctoritatem Trebelliano Senatusconsulto præstare, ut ex eo fideicommissariæ hæreditates restituantur: siue habeat hæres ex voluntate testatoris quartam, siue plus, siue minus, siue nihil penitus: ut tunc, quando vel nihil, vel minus quarta apud eum remanet, liceat ei vel quartam, vel quod deest, ex nostra auctoritate retinere, vel repetere solutum quasi ex Trebelliano Senatusconsulto: pro rata portione actionibus, tam in hæredem, quam in fideicommissarium competentibus. si vero totam hæreditatem sponte restituerit: omnes hæreditariæ actiones fideicommissario, & adversus eum competant. Sed etiam id, quod præcipuum Pegasiani Senatusconsulti fuerat, ut quando recusaret hæres scriptus sibi datam hæreditatem adire, necessitas ei imponeretur totam hæreditatem volenti fideicommissario restituere, & omnes ad eum & contra eum transferre actiones: & hoc transposuimus ad Senatusconsultum Trebellianum, ut ex hoc solo necessitas hæredi imponatur, si ipso nolente adire, fideicommissarius desideret restitui sibi hæreditatem, nullo nec damno nec commodo apud hæredem remanente.

8 ¶ Nihil autem interest, utrum aliquis ex affe hæres institutus, aut totam hæreditatem, aut pro parte restituere rogatur: an ex parte hæres institutus, aut totam eam partem, aut partem partis restituere rogatur. Nam & hoc casu eadem observari præcipimus, quæ in totius hæreditatis restitutione diximus.

9 ¶ Si quis una aliqua re deducta, siue præcepta, quæ quartam continet (veluti fundo, vel alia re) rogatus sit restituere hæreditatem: similimodo ex Trebelliano

**belliano** **Senatusconsulto** restitutio fiet, perinde ac si quarta parte retenta rogatus esset reliquam hæreditatem restituere. sed **illud interest, quod altero casu, id est, cum deducta, sive præcepta aliqua re, restituitur hæreditas: in solidum ex eo Senatusconsulto** actiones transferuntur: & res, quæ remanet apud hæredem, sine ullo onere hæreditario apud eum remanet, quasi **ex legato ei acquisita. altero vero casu, id est, cum quarta parte retenta rogatus est hæres restituere hæreditatem, & restituit: scinduntur actiones, & pro dodrante quidem transferuntur ad fideicommissarium, pro quadrante remanent apud hæredem.** Quinetiam licet una re aliqua deducta, aut præcepta, restituere aliquis hæreditatem rogatus sit, in qua maxima pars hæreditatis contineatur: æque in solidum transferuntur actiones: & secum deliberare debet is, cui restituitur hæreditas, an expediat sibi restitui. Eadem scilicet interveniunt, & si duabus pluribusve deductis præceptisve rebus, restituere hæreditatem rogatus sit. Sed & si certa summa deducta præceptave, quæ quartam vel etiam maximam partem hæreditatis continet, rogatus sit aliquis hæreditatem restituere: idem juris est. Quæ [autem] diximus de eo, qui ex asse institutus est: eadem transferimus & ad eum, qui ex parte hæres scriptus est.

**10 ¶** Præterea intestatus quoque moriturus, potest rogare eum, ad quem bona sua, vel legitimo jure, vel honorario pertinere intelligit: ut hæreditatem suam totam, partemve ejus, aut rem aliquam (veluti fundum, hominem, pecuniam) alicui restituat: cum alioqui legata, nisi ex testamento, non valeant.

**11 ¶** Eum quoque, cui aliquid restituitur, potest rogare, ut id rursum alii aut totum, aut partem, vel etiam aliquid aliud restituat.

**12 ¶** Et quia prima fideicommissorum cunabula à fide hæredum pendent, & tam nomen, quam substantiam acceperunt: ideo divus Augustus ad necessitatem juris ea retraxit. Nuper & nos eundem principem superare contententes, ex facto, quod Tribonianus vir excellentissimus exquæstore sacri palatii

tii suggessit, constitutionem fecimus: per quam disposuimus, si testator fidei hæredis sui commisit, ut vel hæreditatem, vel speciale fideicommissum restituat, & neque ex scriptura, neque ex quinquetestium numero (qui in fideicommissis legitimus esse noscitur) possit res manifestari, sed vel pauciores, quam quinque, vel nemo penitustestis intervenit: tunc siue pater hæredis, siue alius, quicumque sit, qui fidem hæredis elegerit, & ab eo restitui aliquid voluerit: si hæres perfidia tentus adimplete fidem recusat, negando rem ita esse subsequutam, si fideicommissarius iurjurandum ei detulerit, cum prius ipse de calumnia iuraverit: necesse cum habere vel iurjurandum subire, quod nihil tale à testatore audiverit, vel recusantem ad fideicommissi vel universalis, vel specialis solutionem coarctari, ne depercat ultima voluntas testatoris fidei hæredis commissa. Eadem observari censuimus, & si à legatario vel fideicommissario aliquid similiter relictum sit. Quod si is, à quo relictum dicitur, [postquam negaverit,] confiteatur quidem aliquid à se relictum esse, sed ad legis subtilitatem recurrat, omnino solvere cogendus est.

## DE SINGULIS REBUS PER FIDEI- commissum relictis.

### TITULUS XXIV.

**P**otest tamen quis etiam singulas res per fideicommissum relinquere: veluti fundum, argentum, hominem, vestem, [&] pecuniam numeratam: & vel ipsum hæredem rogare, ut alicui restituat, vel legatarium, quamvis à legatario legari non possit.

**I** ¶ Potest autem non solum proprias res testator per fideicommissum relinquere: sed & hæredis, aut legatarii, aut fideicommissarii, aut cujuslibet alterius. Itaque & legatarius & fideicommissarius non solum de ea re rogari potest, ut eam alicui restituat, quæ ei relicta sit: sed etiam de alia, siue ipsius, siue aliena sit. Hoc solum observandum est, ne plus quisquam rogetur alicui restituere, quam ipse ex testamento ceperit: nam quod amplius est, inutiliter relin-

linquitur. Cum autem aliena res per fideicommissum relinquitur: necesse est ei, qui rogatus est, aut ipsam redimere & præstare, aut æstimationem ejus solvere.

2 ¶ Libertas quoque servo per fideicommissum dari potest, ut hæres eum rogetur manumittere, vel legatarius, vel fideicommissarius. nec interest, utrum de suo proprio servo testator roget; an de eo, qui ipsius hæredis, aut legatarii, vel etiam extranei sit. Itaque & alienus servus redimi & manumitti debet. Quod si dominus eum non vendat: si modo nihil ex iudicio ejus, qui reliquit libertatem, recepit: non statim extinguitur fideicommissaria libertas, sed differtur, quia possit tempore procedente, ubicunque occasio servi redimendi fuerit, præstari libertas. Qui autem ex fideicommissi causa manumittitur, non testatoris fit libertus, etiam si testatoris servus sit, sed ejus, qui manumittit. At is, qui directo ex testamento liber esse jubetur, ipsius testatoris libertus fit: qui etiam Orcinus appellatur. Nec alius ullus directo ex testamento libertatem habere potest, quam qui utroque tempore testatoris fuerit, & quo faceret testamentum, & quo moreretur. Directo autem libertas tunc dari videtur, cum non ab alio servum manumitti rogat, sed velut ex suo testamento libertatem ei competere vult.

3 ¶ Verba autem fideicommissorum hæc maxime in usu habentur, *peto, rogo, volo, mando, fidei tua committo.* quæ perinde singula firma sunt, atque si omnia in unum congesta essent.

## DE CODICILLIS.

## TITULUS XXV.

ANTE Augusti tempora constat codicillorum jus in usu non fuisse: sed primus Lucius Lentulus, (ex cujus persona etiam fideicommissa [esse] cœperunt) codicillos introduxit. Nam cum decederet in Africa, scripsit codicillos testamento confirmatos, quibus ab Augusto petiit per fideicommissum, ut faceret aliquid. Et cum divus Augustus voluntatem ejus impleisset: deinceps reliqui ejus auctoritatem secuti, fideicommissa præstabant: & filia Lentuli legata, quæ

tii suggessit, constitutionem fecimus: per quam disposuimus, si testator fidei hæredis sui commisit, ut vel hæreditatem, vel speciale fideicommissum restituat, & neque ex scriptura, neque ex quinquetestium numero (qui in fideicommissis legitimus esse noscitur) possit res manifestari, sed vel pauciores, quam quinque, vel nemo penitus testis intervenierit: tunc siue pater hæredis, siue alius, quicumque sit, qui fidem hæredis elegerit, & ab eo restitui aliquid voluerit: si hæres perfidia tentus adimplere fidem recusat, negando rem ita esse subsequutam, si fideicommissarius iurandum ei detulerit, cum prius ipse de calumnia iuraverit: necesse cum habere vel iurandum subire, quod nihil tale à testatore audiverit, vel recusantem ad fideicommissi vel universalis, vel specialis solutionem coarctari, ne depercat ultima voluntas testatoris fidei hæredis commissa. Eadem observari censuimus, & si à legatario vel fideicommissario aliquid similiter relictum sit. Quod si is, à quo relictum dicitur, [postquam negaverit,] confiteatur quidem aliquid à se relictum esse, sed ad legis subtilitatem recurrat, omnino solvere cogendus est.

### DE SINGULIS REBUS PER FIDEI- commissum relictis.

#### TITULUS XXIV.

**P**otest tamen quis etiam singulas res per fideicommissum relinquere: veluti fundum, argentum, hominem, vestem, [&] pecuniam numeratam: & vel ipsum hæredem rogare, ut alicui restituat, vel legatarium, quamvis à legatario legari non possit.

**I** ¶ Potest autem non solum proprias res testator per fideicommissum relinquere: sed & hæredis, aut legatarii, aut fideicommissarii, aut cujuscunque alterius. Itaque & legatarius & fideicommissarius non solum de ea re rogari potest, ut eam alicui restituat, quæ ei relicta sit: sed etiam de alia, siue ipsius, siue aliena sit. Hoc solum observandum est, ne plus quisquam rogetur alicui restituere, quam ipse ex testamento ceperit: nam quod amplius est, inutiliter relin-

linquitur. Cum autem aliena res per fideicommissum relinquitur: necesse est ei, qui rogatus est, aut ipsam redimere & præstare, aut æstimationem ejus solvere.

2 ¶ Libertas quoque servo per fideicommissum dari potest, ut hæres cum rogetur manumittere, vel legatarius, vel fideicommissarius. nec interest, utrum de suo proprio servo testator roget; an de eo, qui ipsius hæredis, aut legatarii, vel etiam extranei sit. Itaque & alienus servus redimi & manumitti debet. Quod si dominus eum non vendat: si modo nihil ex iudicio ejus, qui reliquit libertatem, recepit: non statim extinguitur fideicommissaria libertas, sed differtur, quia possit tempore procedente, ubicunque occasio servi redimendi fuerit, præstari libertas. Qui autem ex fideicommissi causa manumittitur, non testatoris fit libertus, etiam si testatoris servus sit, sed ejus, qui manumittit. At is, qui directo ex testamento liber esse jubetur, ipsius testatoris libertus fit: qui etiam Orcinus appellatur. Nec alius ullus directo ex testamento libertatem habere potest, quam qui utroque tempore testatoris fuerit, & quo faceret testamentum, & quo moreretur. Directo autem libertas tunc dari videtur, cum non ab alio servum manumitti rogat, sed velut ex suo testamento libertatem ei competere vult.

3 ¶ Verba autem fideicommissorum hæc maxime in usu habentur, *peto, rogo, volo, mando, fidei tua committo.* quæ perinde singula firma sunt, atque si omnia in unum congesta essent.

## DE CODICILLIS.

## TITULUS XXV.

ANTE Augusti tempora constat codicillorum jus in usu non fuisse: sed primus Lucius Lentulus, (ex cujus persona etiam fideicommissa [esse] cœperunt) codicillos introduxit. Nam cum decederet in Africa, scripsit codicillos testamento confirmatos, quibus ab Augusto petiit per fideicommissum, ut faceret aliquid. Et cum divus Augustus voluntatem ejus impleffet: deinceps reliqui ejus auctoritatem secuti, fideicommissa præstabant: & filia Lentruli legata,

E

quæ

quæ jure non debebat, solvit. Dicitur autem Augustus convocasse sapientes viros, interque eos Trebatium quoque, cujus tunc autoritas maxima erat, & quæsisse, an posset recipi hoc, nec absonans à juris ratione codicillorum usus esset: & Trebatium suasisse Augusto, quod diceret utilissimum & necessarium hoc civibus esse, propter magnas & longas peregrinationes, quæ apud veteres fuissent: ubi si quis testamentum facere non posset, tamen codicillos posset. **Post** quæ tempora, cum & Labeo codicillos fecisset: jam nemini dubium erat, quin codicilli jure optimo admitterentur.

**1 ¶** Non tantum autem testamento facto potest quis codicillos facere, sed [&] intestatus quis decedens fideicommittere codicillis potest. Sed cum ante testamentum factum codicilli facti erant: Papinianus ait, non aliter vires habere, quam si speciali postea voluntate confirmentur. Sed divi Severus & Antoninus rescripserunt: ex iis codicillis, qui testamentum præcedunt, posse fideicommissum peti: si appareat eum, qui testamentum fecit, à voluntate, quam in codicillis expresserat, non recessisse.

**2 ¶** Codicillis autem hæreditas neque dari, neque adimi potest: ne confundatur jus testamentorum & codicillorum. & ideo nec exhæredatio scribi. Directo autem hæreditas codicillis neque dari, neque adimi potest: nam per fideicommissum hæreditas codicillis jure relinquitur. Nec conditionem hæredi instituto codicillis adjicere, neque substituere directo [quis] potest.

**3 ¶** Codicillos etiam plures quis facere potest: & nullam solemnitatem ordinationis desiderant.



## INSTITUTIONUM,

seu Elementorum,

D. JUSTINIANI,

Sacratissimi Principis,

LIBER TERTIUS,

DE HÆREDITATIBUS, QUÆ AB

intestato deferuntur.

TITULUS I.



**I**ntestatus decedit, qui aut omnino testamentum non fecit: aut non jure fecit: aut id quod fecerat, ruptum irritumve factum est; aut si ex eo nemo hæres extiterit.

**I** ¶ Intestatorum autem hæreditates ex lege duodecim tabularum, primum ad suos hæredes pertinent.

**2** ¶ Sui autem hæredes existimantur (ut supra diximus) qui in potestate morientis fuerint: veluti filius filiave, nepos neptisve ex filio, pronepos proneptisve ex nepote, ex filio nato prognatus prognatave. Nec interest utrum naturales sint liberi, an adoptivi. Quibus connumerari necesse est etiam eos, qui ex legitimis quidem [nuptiis vel] matrimoniis non sunt progeniti, curiis tamen civitatum dati secundum divalium constitutionum, quæ super his posita sunt, tenorem, [hæredum] suorum jura nanciscuntur. Necnon eos, quos nostræ amplexæ sunt constitutiones, per quas jussimus, [ut] si quis mulierem in suo contubernio copulaverit, non ab initio affectione maritali, eam tamen, cum qua poterat habere conjugium, & ex ea liberos sustulerit: postea vero affectione procedente, etiam nuptialia instrumenta cum ea fecerit, & filios vel filias habuerit: non solum eos liberos, qui post dotem editi sunt, justos & in potestate patris esse: sed etiam anteriores, qui & iis qui postea nati sunt, occasio-

nem legitimi nominis præstiterunt. Quod obtinere censuimus, & si non progeniti fuerint post dotale instrumentum confectum liberi, vel etiam nati ab hac luce fuerint subtrahæti. Ita demum tamen nepos neptisve, pronepos proneptisve, suorum hæredum numero sunt, si præcedens persona desierit in potestate parentis esse: sive morte id acciderit, sive alia ratione, velut emancipatione. Nam si per id tempus, quo quis moritur, filius in potestate ejus sit: nepos ex eo, suus hæres esse non potest. Idque & in cæteris deinceps liberorum personis dictum [esse] intelligimus. Posthumi quoque, qui si vivo parente nati essent, in potestate [ejus] futuri forent, sui hæredes sunt.

3 ¶ Sui autem hæredes fiunt etiam ignorantes, & licet furiosi sint, hæredes possunt existere: quia quibus ex causis ignorantibus nobis acquiritur, ex his causis & furiosis acquiri potest. Et statim morte parentis quasi continuatur dominium, & ideo nec tutoris auctoritate opus est pupillis, cum etiam ignorantibus acquiratur suis hæredibus hæreditas. nec curatoris assensu acquiritur furioso, sed ipso jure.

4 ¶ Interdum autem, licet in potestate [parentis] mortis tempore suus hæres non fuerit, tamen suus hæres parenti efficitur: veluti [si] ab hostibus quis reversus fuerit post mortem patris [sui.] jus enim postliminii hoc facit.

5 ¶ Per contrarium [autem hoc] evenit, ut licet quis in familia defuncti sit mortis tempore, tamen suus hæres non fiat: veluti si post mortem suam pater judicatus fuerit perduellionis reus, ac per hoc memoria ejus damnata fuerit. suum enim hæredem habere non potest, cum fiscus ei succedat. sed potest dici ipso [quidem] jure suum hæredem esse, sed desinere.

6 ¶ Cum filius filiave, & ex altero filio nepos neptisve existunt, pariter ad hæreditatem [avi] vocantur: nec qui gradu proximior est, ulteriorem excludit. Æquum enim esse videtur, nepotes neptesque in patris sui locum succedere. Pari ratione & si nepos neptisve sit ex filio, & ex nepote pronepos proneptisve: simul vocantur. Et quia placuit nepotes

tes neptefve, item pronepotes proneptefve in parentis fui locum succedere: conveniens esse vifum est, non in capita, fed in ftripes hæreditatem dividi, ut filius partem dimidiam hæreditatis habeat, & ex altero filio duo pluresve nepotes alteram dimidiam. Item fi ex duobus filiis nepotes neptefve exiftant, ex altero unus forte aut duo, ex altero tres aut quatuor: ad unum aut duos dimidia pars pertineat, ad tres vel ad quatuor altera dimidia.

7 ¶ Cum autem quæritur, an quis fuus hæres exiftere poffit: eo tempore quærendum eft, quo certum eft aliquem fine testamento deceffiffe; quod accidit & deftituto testamento. Hac ratione, fi filius exhæredatus fuerit, & extraneus hæres institutus, & filio mortuo, poftea certum fuerit hæredem institutum ex testamento non fieri hæredem, aut quia noluit effe hæres, aut quia non potuit, nepos avo fuus hæres exiftet: quia quo tempore certum eft intestatum deceffiffe patremfamilias, folus invenitur nepos, & hoc certum eft.

8 ¶ Et licet poft mortem avi natus fit, tamen avo vivo conceptus, mortuo patre ejus, pofteaque deferto avi testamento, fuus hæres efficitur. Planè fi & conceptus & natus fuerit poft mortem avi: mortuo patre fuo, defertoque poftea avi testamento, fuus hæres avo non exiftet: quia nullo jure cognationis patrem fui patris attigit. fed nec ille eft inter liberos avi, quem filius emancipatus adoptavit. Hi autem, cum non funt fui (quantum ad hæreditatem) liberi: neque bonorum poffeffionem petere poffunt quali proximi cognati. Hæc de fuis hæredibus.

9 ¶ Emancipati autem liberi, jure civili nihil juris habent, (neque enim fui hæredes funt, qui in potestate parentis effe defierunt) neque ullo alio jure per legem duodecim tabularum vocantur. fed prætor naturali æquitate motus, dat eis bonorum poffeffionem. Unde liberi, perinde ac fi in potestate parentis tempore mortis fuiffent: five foli fint, five cum fuis hæredibus concurrant. Itaque duobus liberis exiftentibus, emancipato uno, & eo qui tempore mortis in potestate fuerit: fane quidem is, qui in potestate fuit, folus jure civili hæres eft, & folus

lus suus hæres, sed cum emancipatus beneficio prætoris in partem admittitur, evenit, ut suus hæres pro parte hæres fiat.

10 ¶ At hi, qui emancipati à parente in adoptionem se dederunt, non admittuntur ad bona naturalis patris quasi liberi: si modo, cum is moreretur, in adoptiva familia fuerint. Nam vivo eo emancipati ab adoptivo patre, perinde admittuntur ad bona naturalis patris, ac si emancipati ab ipso essent, nec unquam in adoptiva familia fuissent. Et convenienter, quod ad adoptivum patrem pertinet, extraneorum loco esse incipiunt. Post mortem vero naturalis patris emancipati ab adoptivo patre: & quantum ad hunc adoptivum patrem pertinet, æque extraneorum loco sunt: & quantum ad naturalis patris bona pertinet, nihilo magis liberorum gradum nanciscuntur. Quod ideo sic placuit, quia iniquum erat esse in potestate patris adoptivi, ad quos bona naturalis patris pertineant, utrum ad liberos ejus, an ad agnatos.

11 ¶ Minus ergo juris habent adoptivi [filii] quam naturales. namque naturales emancipati, beneficio prætoris gradum liberorum retinent, licet jure civili perdant: adoptivi vero emancipati & jure civili perdunt gradum liberorum, & à prætore non admittuntur; & recte. naturalia enim jura civilis ratio perimere non potest; nec quia desinunt sui hæredes esse, possunt desinere filii filiarve, aut nepotes neptesve esse. adoptivi vero emancipati, extraneorum loco incipiunt esse: quia jus nomenque filii filiarve, quod per adoptionem consequuti sunt, alia civili ratione, i. e. emancipatione perdunt.

12 ¶ Eadem hæc observantur, & in ea bonorum possessione, quam contra tabulas testamenti parentis liberis præteritis, id est, neque hæredibus institutis, neque ut oportet exhereditatis, prætor pollicetur. Nam eos quidem, qui in potestate mortis tempore fuerint, & emancipatos, vocat prætor ad eandem bonorum possessionem: eos vero, qui in adoptiva familia fuerint per hoc tempus quo naturalis parens moreretur, repellit. Item adoptivos liberos emancipatos ab adoptivo patre, sicut ab intestato,

testato, ita longe minus contra tabulas testamenti ad bona ejus [non] admittit: quia desinunt [in] numero liberorum [ejus] esse.

13 ¶ Admonendi tamen sumus, eos, qui in adoptiva familia sunt, quive post mortem naturalis parentis ab adoptivo patre emancipati fuerint: intestato parente naturali mortuo, licet ea parte edicti, qua liberi ad bonorum possessionem vocantur, non admittantur, alia tamen parte vocari, scilicet qua cognati defuncti vocantur. Ex qua parte ita admittuntur, si neque sui hæredes liberi, neque emancipati obstant, neque agnatus quidem ullus interveniat. Ante enim prætor liberos vocat tam suos hæredes, quam emancipatos, deinde legitimos hæredes, deinde proximos cognatos.

14 ¶ Sed ea omnia antiquitati [quidem] placuerunt: aliquam autem emendationem à nostra constitutione acceperunt, quam super iis personis composuimus, quæ à patribus suis naturalibus in adoptionem aliis dantur. Invenimus etenim nonnullos casus, in quibus filii & naturalium parentum successionem propter adoptionem amittebant: & adoptione facile per emancipationem soluta, ad neutrius patris successionem vocabantur. Hoc solito more corrigentes, constitutionem scripsimus, per quam definimus, quando parens naturalis filium suum adoptandum alii dederit, integra omnia jura ita servari, atque si in patris naturalis potestate permanisset, nec penitus adoptio fuisset subsequuta: nisi in hoc tantummodo casu, ut possit ab intestato ad patris adoptivi venire successionem. Testamento autem ab eo facto, neque jure civili, neque prætório, ex hæreditate ejus aliquid persequi potest, neque contra tabulas bonorum possessione agnita, neque inofficiosi querela instituta: cum nec necessitas patri adoptivo imponatur, vel hæredem eum instituere, vel exhæredatum eum facere, utpote nullo vinculo naturali copulatum; neque si ex Sabiniano Senatusconsulto ex tribus maribus fuerit adoptatus. Nam & in ejusmodi casu, neque quarta ei servatur, neque ulla actio ad ejus persequutionem ei competit. Nostra autem constitutione exceptus est is, quem pa-

rens naturalis adoptandum susceperit. Utroque enim jure tam naturali, quam legitimo in hanc personam concurrente, pristina jura tali adoptioni servamus, quemadmodum si paterfamilias sese dederit arrogandum: quæ specialiter & singulatim ex præfatæ constitutionis tenore possunt colligi.

15 ¶ Item vetustas ex masculis progenitos plus diligens, solos nepotes vel neptes, qui [quæve] ex virili sexu descendunt, ad suorum vocabat successionem, & jure agnatorum eos anteponebat: nepotes autem, qui ex filiabus nati sunt, & pronepotes ex neptibus, cognatorum loco connumerans, post agnatorum lineam eos vocabat tam in avi vel proavi materni, quam in avia vel proavia, sive paternæ, sive maternæ successionem. Divi autem principes non passi sunt talem contra naturam injuriam sine competenti emendatione relinquere: sed cum nepotis & pronepotis nomen commune sit utrisque, tam qui ex masculis, quam qui ex fœminis descendunt: ideo eundem gradum & ordinem successionis eis donaverunt. Sed ut amplius aliquid sit eis, qui non solum naturæ, sed etiam veteris juris suffragiis muniuntur: portionem nepotum, vel neptum, vel deinceps (de quibus supra diximus) paulo minuendam esse existimaverunt: ut minus tertia parte acciperent, quam mater eorum, vel avia fuerat acceptura, vel pater eorum, vel avus paternus, sive maternus, quando fœmina mortua sit, cujus de hæreditate agitur: iisque (licet soli sint) adgnatos minime vocabant. Et quemadmodum lex duodecim tabularum filio mortuo, nepotes vel neptes, pronepotes vel proneptes in locum patris sui ad successionem avi sui vocat: ita & principalis dispositio in locum matris suæ vel avia, eos cum jam designata partis tertiæ deminutione vocat.

16 ¶ Sed nos, cum adhuc dubitatio maneret inter agnatos & memoratos nepotes, quartam partem substantiæ defuncti agnatis sibi vindicantibus ex cujusdam constitutionis auctoritate: memoratam quidem constitutionem à nostro Codice segregavimus, neque inferi eam ex Theodosiano Codice in eo concessimus. Nostra autem constitutione promulgata,

gata, toti juri ejus derogatum est: & **sancimus**, talibus nepotibus ex filia, vel pronepotibus ex nepte, & deinceps, superstitibus, adgnoscat nullam partem mortui successionis sibi vindicare: ne hi, qui ex transversa linea veniunt, potiores iis habeantur, qui recto jure descendunt. Quam constitutionem nostram obtinere secundum sui vigorem & tempora, & nunc sancimus: ita tamen, ut quemadmodum inter filios & nepotes ex filio antiquitas statuit, non in capita, sed in stirpes dividi hereditatem: similiter nos inter filios & nepotes ex filia, distributionem fieri jubeamus, vel inter omnes nepotes & neptes, & inter pronepotes & proneptes, & alias deinceps personas: ut utraque progenies, matris vel patris, avia vel avi, portionem sine ulla diminutione consequatur: ut si forte unus vel duo ex una parte, ex altera tres aut quatuor existant: unus aut duo dimidiam, alteri tres aut quatuor alteram dimidiam hereditatis habeant.

## DE LEGITIMA ADGNATORUM successione.

### TITULUS II.

**SI** nemo suus hæres, vel eorum, quos inter suos hæredes prætor, vel constitutiones vocant, existat, qui successionem quoquo modo amplectatur: tunc ex lege duodecim tabularum ad adgnatum proximum pertinet hereditas.

I ¶ Sunt autem adgnati (ut primo quoque libro tradidimus) cognati per virilis sexus personas cognitione conjuncti, quasi à patre connati. Itaque [ex] eodem patre nati fratres, adgnati sibi sunt; qui & consanguinei vocantur: nec requiritur, an etiam eandem matrem habuerint. Item patruus fratris filio, & invicem is illi adgnatus est. Eodem numero sunt fratres patruales, id est, qui ex duobus fratribus procreati sunt, qui etiam consobrini vocantur. Qua ratione etiam ad plures gradus adgnationis pervenire poterimus. Ii etiam, qui post mortem patris nascuntur, jura consanguinitatis nanciscuntur. Non tamen omnibus simul **adgnatis dat lex hereditatem:**

E. S.

fcd.

sed iis qui **tunc** proximiores gradu sunt, cum certum esse coeperit aliquem intestatum decessisse.

2 ¶ Per adoptionem **quoque** agnationis jus consistit: **veluti** inter filios naturales, & eos, quos pater eorum adoptavit. Nec dubium est, quin **impro-**  
**prie** consanguinei appellentur. Item si quis ex cæteris agnatis [tuis,] **veluti** frater, aut patruus, aut denique is, qui longiore gradu est, adoptaverit aliquem: agnatus inter suos hæredes esse non dubitatur.

3 ¶ **Cæterum** inter masculos **quidem** agnationis jure hæreditas, etiam si longissimo gradu sint, ultro citroque capitur. Quod ad fœminas **vero** attinet; ita placebat, ut ipsæ consanguinitatis jure tantum capiant hæreditatem, si sorores sint: ulterius non **capiant**. masculi **autem** ad earum hæreditates (etiam si longissimo gradu sint) admittantur. Qua de causa fratris tui, aut patrui tui filiæ, vel amitæ tuæ hæreditas ad te pertinebat: tua vero ad illas non pertinebat. Quod ideo ita constitutum erat, quia commodius videbatur ita jura constitui, ut plerumque hæreditates ad masculos confluerent. Sed quia sane iniquum erat, in universum eas quasi extraneas repelli: prætor eas ad bonorum possessionem admittit ea parte, qua proximitatis nomine bonorum possessionem pollicetur; ex qua parte ita scilicet admittuntur, si neque agnatus ullus, neque proximior cognatus interveniat. Et hæc quidem lex duodecim tabularum nullo modo introduxit: sed simplicitatem legibus amicam amplexa, simili modo omnes agnatos, sive masculos, sive fœminas, cujuscunque gradus, ad similitudinem suorum invicem ad successionem vocabat. Media autem jurisprudentia, quæ erat quidem lege duodecim tabularum junior, imperiali autem dispositione anterior, subtilitate quadam excogitata, præfatam differentiam inducebat, & penitus eas à successione agnatorum repellebat: omni alia successione incognita, donec prætores paulatim asperitatem juris civilis corrigentes, sive, quod deerat, implentes, humano proposito, alium ordinem suis edictis addiderunt: & cognationis linea proximitatis nomine introducta, per bonorum possessionem eas ad-



adjuvabant, & pollicebantur his bonorum possessionem, quæ unde cognati appellatur. Nos vero, legem duodecim tabularum sequentes, & ejus vestigia in hac parte conservantes, laudamus quidem prætores suæ humanitatis, non tamen eos in plenum [huic] causæ mederi invenimus. Quare etenim uno eodemque gradu naturali concurrente, & adgnationis titulis, tam in masculis, quam in foeminis æqualitate constitutis, masculis quidem dabatur ad successionem venire omnium adgnatorum: ex adgnatis autem mulieribus nulli penitus, nisi soli sorori, ad adgnatorum successionem patebat aditus? Ideo [nos] in plenum omnia reducentes, & ad jus duodecim tabularum eandem dispositionem exæquantes, nostra constitutione sancimus: omnes legitimas personas, id est, per virilem sexum descendentes (sive masculini generis, sive foeminini sint) simili modo ad jura successionis legitimæ ab intestato vocari secundum sui gradus prærogativam: nec ideo excludendas, quia consanguinitatis jura, sicut germanæ, non habent.

4 ¶ Hoc etiam addendum nostræ constitutioni existimavimus, ut transferatur unus tantummodo gradus à jure cognationis in legitimam successionem: ut non solum fratris filius & filia (secundum quod jam definivimus) ad successionem patris sui vocentur: sed etiam germanæ consanguineæ, vel sororis uterinæ filius & filia soli, & non deinceps personæ una cum his ad jura avunculi sui perveniant: & mortuo eo, qui patruus quidem est sui fratris filiis, avunculus autem sororis suæ soboli: simili modo ab utroque latere succedant, tanquam si omnes ex masculis descendentes, legitimo jure veniant, scilicet ubi frater & soror superstites non sunt. His etenim personis præcedentibus & successionem admittentibus, cæteri gradus remanent penitus semoti, videlicet hæreditate non in stirpes, sed in capita dividenda.

5 ¶ Si plures sint gradus adgnatorum: aperte lex duodecim tabularum proximum vocat. Itaque si (verbi gratia) sint defuncti frater, & alterius fratris filius, aut patruus: frater potior habetur. Et quamvis sin-

gulari numero usa lex [duodecim tabularum] proximum vocet, tamen dubium non est, quin, si plures sint ejusdem gradus, omnes admittantur. Nam & proprie proximus ex pluribus gradibus intelligitur: & tamen non dubium est, quin licet unus sit gradus adgnatorum, pertineat ad eos hæreditas.

6 ¶ Proximus autem, si quidem nullo testamento facto quisquam decesserit, per hoc tempus requiritur, quo mortuus est is, cujus de hæreditate queritur. Quod si facto testamento quisquam decesserit: per hoc tempus requiritur, quo certum esse coeperit, nullum ex testamento hæredem existurum. tunc enim proprie quisque intestatus decessisse intelligitur. Quod quidem aliquando longo tempore declaratur. In quo spatio temporis sæpe accidit, ut proximior mortuo, proximus esse incipiat, qui moriente testatore non erat proximus.

7 ¶ Placebat autem in eo genere percipiendum hæreditatum successionem non esse: id est, ut quamvis proximus, qui secundum ea, quæ diximus, vocatur ad hæreditatem, aut spreverit hæreditatem, aut antequam adeat, decesserit: nihilo magis legitimo jure sequentes admittantur. Quod iterum prætores imperfecto jure corrigentes, non in totum sine adminiculo relinquebant: sed ex cognatorum ordine eos vocabant, utpote adgnationis jure eis recluso. Sed nos nihil perfectissimo juri deesse cupientes, nostra constitutione, quam de jure patronatus, humanitate suggerente, protulimus, (sanctimus) successionem in adgnatorum hæreditatibus non esse eis delegandam: cum satis absurdum erat, quod cognatis à prætore apertum est, hoc adgnatis esse reclusum: maxime cum in onere quidem tutelarum, & primo gradu deficiente, sequens succedit: & quod in onere obtinebat, non erat in lucro permissum.

8 ¶ Ad legitimam successionem nihilominus vocatur etiam pater, qui contracta fiducia filium vel filiam, nepotem vel neptem, ac deinceps emancipat. quod ex nostra constitutione omnino inducitur, ut emancipationes liberorum semper videantur quasi contracta fiducia fieri: cum apud veteres non aliter hoc obtinebat, nisi specialiter contracta fiducia pater manumississet.

## DE SENATUSCONSULTO

Tertulliano.

## TITULUS III.

**L** Ex duodecim tabularum ita stricto jure utebatur, & præponebat masculorum progeniem: & eos, qui per foeminini sexus necessitudinem sibi junguntur, adeo expellebat, ut ne quidem inter matrem & filium filianve ultro citroque hæreditatis capiendæ jus daret: nisi quod prætores ex proximitate cognatorum eas personas ad successionem, bonorum possessione, unde cognati, accommodata, vocabant.

1 ¶ Sed hæc juris angustia postea emendata sunt. Et primus quidem divus Claudius matri, ad solatium liberorum amissionum, legitimam eorum detulit hæreditatem.

2 ¶ Postea autem Senatusconsulto Tertulliano, quod divi Hadriani temporibus factum est, plenissime, de tristi successione matri, non etiam aviæ deferenda cautum est: ut ingenua trium liberorum jus habens, libertina quatuor, ad bona filiorum filiarumve admittatur intestato mortuorum, licet in potestate parentis sit: ut scilicet cum alieno juri subiecta est, jussu ejus adeat [hæreditatem] cujus juri subiecta est.

3 ¶ Præferuntur autem matri liberi defuncti, qui sui sunt, quive suorum loco sunt, sive primi gradus, sive ulterioris. Sed & filia suæ mortuæ filius vel filia præponitur ex constitutionibus matri defunctæ, id est, aviæ suæ. Pater vero utriusque, non etiam avus & proavus matri anteponitur, scilicet cum inter eos solos de hæreditate agitur. Frater autem consanguineus tam filii, quam filia excludebat matrem: soror autem consanguinea pariter cum matre admittebatur. Sed si fuerant frater & soror consanguinei, & mater liberis onerata: frater quidem matrem excludebat, communis autem erat hæreditas ex æquis partibus fratribus & sororibus.

4 ¶ Sed nos constitutione, quam in Codice nostro nomine decorato posuimus, matri subveniendum.

dum esse existimavimus : respicientes ad naturam, & puerperium, & periculum, & sæpe mortem ex hoc casu matribus illatam. Ideoque impium esse credidimus, casum fortuitum in ejus admitti detrimentum. si enim ingenua ter, vel libertina quater non peperit, immerito defraudabatur successione suorum liberorum: quid enim peccavit, si non plures sed paucos peperit? Et dedimus jus legitimum plenum matribus (sive ingenuis sive libertinis) & si non ter enixæ fuerint vel quater, sed cum tantum vel eam, qui quæve morte intercepti sunt, ut sic vocentur in liberorum suorum legitimam successionem.

5 ¶ Sed cum antea constitutiones, jura legitimæ successionis perscrutantes, partim matrem adjuvabant, partim eam prægravabant, nec in solidum eam vocabant, sed in quibusdam casibus tertiam ei partem abstrahentes, certis legitimis dabant personis, in aliis autem contrarium faciebant: nobis visum est recta & simplici via matrem omnibus personis legitimis anteponi, & sine ulla deminutione filiorum suorum successionem accipere: excepta fratris & sororis persona, sive consanguinei sint, sive sola cognationis jura habentes: ut quemadmodum eam toti alii ordini legitimo præposuimus, ita omnes fratres & sorores, sive legitimi sint, sive non, ad capiendas hæreditates simul vocemus: ita tamen, ut si quidem solæ sorores adgnatæ vel cognatæ, & mater defuncti vel defunctæ supersint; dimidiam quidem mater, alteram vero dimidiam partem omnes sorores habeant. Si vero matre superstiti & fratre, vel fratribus solis, vel etiam cum sororibus, sive legitimis, sive sola cognationis jura habentibus, intestatus quis vel intestata moriatur: in capita distribuatur ejus hæreditas.

6 ¶ Sed quemadmodum nos matribus prospeximus, ita eas oportet suæ soboli consulere: scituris eis, quod si tutores liberis non petierint, vel in locum remoti vel excusati, intra annum petere neglexerint: ab eorum impuberum morientium successione merito repellentur.

7 ¶ Licet autem vulgo quæsitus sit filius filia:ve: potest [tamen] ad bona ejus mater ex Tertulliano Senatusconsulto admitti.

D E.

## DE SENATUSCONSULTO ORPHITIANO.

## TITULUS IV.

**P**ER contrarium autem liberi ad bona matrum intestatarum admittuntur ex Senatusconsulto Orphitiano, quod Orphitio & Rufo consulibus effectum est, divi Marci temporibus, & data est tam filio quam filię legitima hæreditas, etiam si alieno juri subiecti sint: & præferuntur consanguineis & adgnatis defunctæ matris.

1 ¶ Sed cum ex hoc Senatusconsulto nepotes [& neptes] ad aviæ successionem legitimo jure non vocarentur: postea hoc constitutionibus principalibus emendatum est, ut ad similitudinem filiorum filiarumque, & nepotes & neptes vocentur.

2 ¶ Sciendum autem est hujusmodi successiones, quæ ex Tertulliano & Orphitiano Senatusconsultis deferuntur, capitis deminutione non perimi, propter illam regulam, qua novæ hæreditates legitimæ capitis deminutione non pereunt, sed illæ solæ, quæ ex lege duodecim tabularum deferuntur.

3 ¶ Novissime sciendum est, etiam illos liberos, qui vulgo quæriti sunt, ad matris hæreditatem ex hoc Senatusconsulto admitti.

4 ¶ Si ex pluribus legitimis hæredibus quidam omiserint hæreditatem, vel morte, vel alia causa impediti fuerint, quominus adeant: reliquis, qui adierint, adcrefcit illorum portio. & licet ante decesserint, ad hæredes tamen eorum pertinet.

## DE SUCCESSIONE COGNATORUM.

## TITULUS V.

**P**ost suos hæredes, eosque, quos inter suos hæredes prætor & constitutiones vocant, & post legitimos (quo numero sunt adgnati, & hi, quos in locum adgnatorum tam supradicta Senatusconsulta, quam nostra crexit constitutio) proximos cognatos prætor vocat.

1 ¶ Qua parte naturalis cognatio spectatur. nam adgnati capite deminuti, quique ex his progeniti sunt,

sunt, ex lege duodecim tabularum inter legitimos non habentur, sed à pratore tertio ordine vocantur: exceptis solis tantummodo fratre & sorore emancipatis, non etiam liberis eorum, quos lex Anastasiana cum fratribus integri juris constitutis, vocat: quidem ad legitimam fratris hæreditatem, sive sororis: non æquis tamen partibus, sed cum aliqua deminutione, quam facile est ex ipsius constitutionis verbis colligere. Aliis vero adgnatis inferioris gradus, licet capitis deminutionem passi non sunt, tamen anteponit eos & proculdubio cognatis.

2 ¶ Eos etiam, qui per fœminini sexus personas ex transverso cognatione junguntur, tertio gradu proximitatis nomine prætor ad successionem vocat.

3 ¶ Liberi quoque, qui in adoptiva familia sunt, ad naturalium parentum hæreditatem hoc eodem gradu vocantur.

4 ¶ Vulgo quæsitos, nullos habere adgnatos manifestum est: quum adgnatio à patre sit, cognatio à matre, hi autem nullum patrem habere intelligantur. Eadem ratione ne inter se quidem possunt videri consanguinei esse: quia consanguinitatis jus species est adgnationis. Tantum ergo cognati sunt sibi, sicut & matri cognati sunt. Itaque omnibus istis [ex] ea parte competit bonorum possessio, qua proximitatis nomine cognati vocantur.

5 ¶ Hoc loco & illud necessario admonendi sumus: adgnationis quidem jure admitti aliquem ad hæreditatem, etsi decimo gradu sit: sive de lege duodecim tabularum quæramus, sive de edicto, quo prætor legitimis hæredibus daturum se bonorum possessionem pollicetur. Proximitatis vero nomine his solis prætor promittit bonorum possessionem, qui usque ad sextum gradum cognationis sunt, & ex septimo sobrino sobrinaque nato natæve.

## DE GRADIBUS COGNATIONUM.

### TITULUS VI.

**H**Oc loco necessarium est exponere, quemadmodum gradus cognationis numerentur. Quare in primis admonendi sumus, cognationem <sup>aliam</sup> supra

III.

numerari, aliam infra, aliam ex transverso, quæ etiam à latere dicitur. superior cognatio est parentum: inferior liberorum: ex transverso fratrum sororumve, & eorum qui quæve ex his generantur, & convenienter patruus, amita, avunculus, matertera. Et superior quidem & inferior cognatio à primo gradu incipit: at ea, quæ ex transverso numeratur, à secundo.

1 ¶ Primo gradu est supra pater, mater: infra filius, filia.

2 ¶ Secundo [gradu] supra avus, avia: infra nepos, neptis: ex transverso frater, soror.

3 ¶ Tertio [gradu] supra proavus, proavia: infra pronepos, proneptis: ex transverso fratris sororisque filius, filia, & convenienter patruus, amita, avunculus, matertera. Patruus est frater patris, qui Græce πατεράδελφος appellatur. Avunculus est frater matris, qui Græce μητεράδελφος dicitur. & uterque promiscue Δείος appellatur. Amita est patris soror, [quæ Græce πατεράδελφη appellatur.] Matertera vero matris soror, [quæ Græce μητεράδελφη dicitur,] & utraque promiscue Δεία appellatur.

4 ¶ Quarto gradu supra abavus, abavia: infra abnepos, abneptis: ex transverso fratris sororisque nepos neptisve, & convenienter patruus magnus, amita magna, id est, avi frater & soror; item avunculus magnus, & matertera magna, id est, aviæ frater & soror; consobrinus, consobrina, id est, qui quæve, ex sororibus aut fratribus procreantur. Sed quidam recte consobrinus eos proprie dici putant, qui ex duobus sororibus progenerantur, quasi consororinos: eos vero, qui ex duobus fratribus progenerantur, proprie fratres patruales vocari. Si autem ex duobus fratribus filia nascuntur, sorores patruales appellari. At eos, qui ex fratre & sorore progenerantur, amitinos proprie dici [putant.] Amitæ tuæ filii, consobrinum te appellant, tu illos amitinos.

5 ¶ Quinto [gradu] supra adavus, adavia: infra adnepos, adneptis: ex transverso fratris sororisque pronepos, proneptis, & convenienter propatruus, proamita, id est, proavi frater & soror; [&] proavunculus & promatertera, id est, proaviæ frater & soror;

foror; item fratris patruelis, vel sororis patruelis, consobrini & consobrina, amitini & amitina filius filia, propius sobrino, propius sobrina; hi sunt patruus magni, amitæ magnæ, avunculi magni, matertera magnæ filius filia.

6 ¶ Sexto gradu supra tritavus, tritavia: infra trinepos, trineptis: ex transverso fratris sororisque abnepos, abneptis, & convenienter abpatruus, abamita, id est, abavi frater & soror: abavunculus, abmatertera, id est, abavia frater & soror. [item propatruus, proamita, proavunculus, promatertera filius filia. item propius sobrino sobrinave filius filia:] item sobriini, sobrina, id est, qui quæve ex fratribus vel sororibus patruelibus vel consobrinis vel amitinis progenerantur.

7 ¶ Hactenus ostendisse sufficiat, quemadmodum gradus cognationis numerentur. Namque ex his palam est intelligere, quemadmodum ultiores quoque gradus numerare debeamus: quippe semper generata persona gradum adjicit, ut longe facilius sit respondere, quoto quisque gradu sit, quam propria cognationis appellatione quemquam denotare.

8 ¶ Adgnationis quoque gradus eodem modo numerantur.

9 ¶ Sed cum magis veritas oculata fide, quam per aures animis hominum infigatur: ideo necessarium duximus post narrationem graduum, eos etiam præsentis libro inscribi, quatenus possint & auribus, & oculorum inspectione adolescentes perfectissimam graduum doctrinam adipisci.

## DE SERVILI COGNATIONE.

### TITULUS VII.

ILLud certum est, ad serviles cognationes illam partem edicti, qua proximitatis nomine bonorum possessio promittitur, non pertinere: nam nec ulla antiqua lege talis cognatio computabatur. Sed nostra constitutione, quam pro jure patronatus fecimus (quod jus usque ad nostra tempora satis obscurum, atque nube plenum & undique confusum fuerat) & hoc humanitate suggerente concessimus, ut si quis in  
ser-



servili **constitutus** consortio, liberum vel liberos habuerit, sive ex libera, sive ex servilis conditionis muliere; vel contra, serva mulier ex libero vel servo habuerit liberos **cujuscunque sexus**: & ad libertatem his pervenientibus, ii, qui ex servili ventre nati sunt, libertatem meruerint, vel dum mulieres liberae erant, ipsi in servitute eos habuerint, & postea ad libertatem pervenerint: ut hi omnes ad successionem patris vel matris veniant, patronatus jure in hac parte sopito. Hos enim liberos non solum in suorum parentum **successionem**, sed etiam alterum in alterius successionem mutuam vocavimus; ex illa lege specialiter eos vocantes, sive soli inveniantur, qui in servitute nati, & postea manumissi sunt; sive una cum aliis, qui post libertatem parentum concepti sunt; sive ex eodem patre, sive ex eadem matre, sive ex aliis nuptiis; ad similitudinem eorum, qui ex justis nuptiis procreati sunt.

I ¶ Repetitis itaque omnibus, quæ jam tradidimus, apparet non semper eos, qui parem gradum cognationis obtinent, pariter vocari. eoque amplius, ne eum quidem, qui proximior sit cognatus, semper potiolem esse. Cum enim prima causa sit suorum hæredum, & eorum, quos inter suos hæredes enumeravimus: apparet pronepotelem vel abnepotelem defuncti potiolem esse, quam fratrem aut patrem matremque defuncti: cum alioqui pater quidem & mater (ut supra quoque tradidimus) primum gradum cognationis obtineant, frater vero secundum, pronepos autem tertio gradu sit cognationis, & abnepos quarto. Nec interest, in potestate morientis fuerit, an non, quod vel emancipatus, vel ex emancipato, aut ex foemineo sexu propagatus est. Amotis quoque suis hæredibus, & quos inter suos hæredes vocari diximus: adgnatus, qui integrum jus habet adgnationis, etiam si longissimo gradu sit, plerumque potior habetur, quam proximior cognatus. Nam patrui nepos vel pronepos avunculo vel matertera præfertur. Totiens igitur dicimus aut potiolem haberi eum; qui proximiolem gradum cognationis obtinet, aut pariter vocari eos, qui cognati sunt: quotiens neque suorum hæredum, quique inter suos hæredes sunt, neque adgnationis [jure,] aliquis præferri

ferri debeat, secundum ea quæ tradidimus: exceptis fratre & sorore emancipatis, qui ad successionem fratrum vel sororum vocantur: qui etsi capite deminuti sunt, tamen præferuntur cæteris ulterioris gradus agnatis.

## DE SUCCESSIONE LIBERTORUM.

### TITULUS VIII.

**N**unc de libertorum bonis videamus. Olim itaque licebat liberto patronum suum impune testamentum præterire: nam ita demum lex duodecim tabularum ad hæreditatem liberti vocabat patronum, si intestatus mortuus esset libertus, hærede suo nullo relicto. Itaque intestato mortuo liberto, si is suum hæredem reliquisset, patrono nihil in bonis ejus juris erat. Et si quidem ex naturalibus liberis aliquem suum hæredem reliquisset, nulla videbatur querela: si vero adoptivus filius fuisset, aperte iniquum erat, nihil juris patrono superesse.

**1** ¶ Qua de causa postea prætoris edicto hæc juris iniquitas emendata est: sive enim faciebat testamentum libertus, jubebatur ita testari, ut patrono partem dimidiam bonorum suorum relinqueret: & si aut nihil, aut minus parte dimidia reliquerat; dabatur patrono contra tabulas testamenti partis dimidiæ bonorum possessio: Sive intestatus moriebatur, suo hærede relicto filio adoptivo; dabatur æque patrono, contra hunc suum hæredem, partis dimidiæ bonorum possessio. Prodesse autem liberto solebant ad excludendum patronum naturales liberi, non solum quos in potestate mortis tempore habebat, sed etiam emancipati, & in adoptionem dati: si modo ex aliqua parte scripti hæredes erant, aut præteriti, contra tabulas, bonorum possessionem ex edicto [prætorio] petierant. nam exhæredati nullo modo repellabantur patronum.

**2** ¶ Postea [vero] lege Papia adaugeta sunt jura patronorum, qui locupletiores libertos habebant. Cautum est enim, ut ex bonis ejus, qui sestertium centum millium patrimonium reliquerat, & pauciores, quam tres liberos habebat; sive is testamento facto, sive intestatus mortuus erat; virilis pars patrono deberetur.

**beretur.** Itaque cum unum [quidem] filium filiamve hæredem reliquerat libertus; perinde pars dimidia debebatur patrono, ac si is sine ullo filio filiave intestatus decessisset. cum [vero] duos duasve hæredes reliquerat, tertia pars debebatur patrono: si tres reliquerat, repellebatur patronus.

3 ¶ **Sed nostra constitutio**, quam pro omni natione, Græca lingua compendioſo tractatu habito composuimus, ita huiusmodi causam **definit**: **ut si quidem libertus vel liberta** minores centenariis sint, id est, **minus centum aureis habeant substantiam** (sic enim legis Papiæ summam interpretati sumus, ut pro mille sestertiis unus aureus computetur) **nulum locum habeat patronus in eorum successione: si tamen testamentum fecerint.** Sin autem intestati decesserint, nullo liberorum relicto: tunc patronatus jus (quod erat ex lege duodecim tabularum) integrum reservavit. Cum vero maiores centenariis sint, si hæredes vel bonorum possessores liberos habeant, sive unum, sive plures, cujuscunque sexus vel gradus: **ad eos successiones parentum deduximus**, patronis omnibus modis una cum sua progenie semotis. Sin autem **sine liberis decesserint: si quidem intestati**, ad omnem hæreditatem patronos patronæque vocavimus; si vero testamentum quidem fecerint, patronos autem aut patronas præterierint, cum nullos liberos haberent, vel habentes eos exhæredaverint, vel mater sive avus maternus eos præterierint, ita quod non possint argui inofficiosa eorum testamenta: **tunc ex nostra constitutione per bonorum possessionem contra tabulas, non dimidiam (ut antea) sed tertiam partem bonorum liberti consequantur: vel quod deest, eis ex constitutione nostra repleatur**, si quando minus tertia parte bonorum suorum libertus vel liberta eis reliquerit: ita **sine onere**, ut nec liberis liberti libertæque ex ea parte legata vel fideicommissa præstentur, sed ad cohæredes eorum hoc onus redundet: multis aliis casibus à nobis in præfata constitutione congregatis, quos necessarios esse ad huiusmodi dispositionem juris perspeximus, ut tam patroni patronæque, quam liberi eorum, nec non qui ex transverso latere veniunt, usque

usque ad quintum gradum ad successionem libertorum libertarumve vocentur, sicut ex ea constitutione intelligendum est: & si ejusdem patroni vel patronæ, vel duorum duarumve pluriumve liberi sint: qui proximior est, ad liberti vel libertæ vocetur successionem, & in capita non in stirpes dividatur successio: eodem modo & in iis, qui ex transverso latere veniunt, servando. Pene enim consonantia jura ingenuitatis & libertinitatis in successionebus fecimus.

4 ¶ Sed hæc de iis libertinis hodie dicenda sunt, qui in civitatem Romanam pervenerunt: cum nec sint alii liberti, simul & Dedititiis & Latinis sublati; cum Latinorum legitimæ successiones nullæ penitus erant, quia licet ut liberi vitam suam peragebant, attamen ipso ultimo spiritu simul animam atque libertatem amittebant, & quasi servorum bonorum jure quodammodo peculii ex lege Junia [Norbana] manumissores detinebant. Postea vero Senatusconsulto Largiano cautum fuerat, ut liberi manumissoris non nominatim exheredati facti, extraneis hæredibus eorum in bonis Latinorum præponerentur. Quibus etiam supervenit Divi Trajani edictum, quod eundem hominem, si invito vel ignorante patrono ad civitatem Romanam venire ex beneficio principis festinarat, faciebat quidem vivum civem Romanum, Latinum vero morientem. sed nostra constitutione propter hujusmodi conditionum vices, & alias difficultates, cum ipsis Latinis etiam legem Juniam, & Senatusconsultum Largianum, & edictum divi Trajani, in perpetuum deleri censuimus: ut omnes liberti civitate Romana fruantur; & mirabili modo quibusdam adjectionibus ipsas vias, quæ in Latinitatem ducebant, ad civitatem Romanam capiendam transposuimus.

## DE ADSIGNATIONE LIBERTORUM.

### TITULUS IX.

**IN** summa (quod ad bona libertorum [attinet]) admonendi sumus, censuisse Senatum, ut quamvis ad omnes patroni liberos, qui ejusdem gradus sunt, æqua-

æqualiter bona libertorum pertineant: tamen licere parenti, uni ex liberis assignare libertum, ut post mortem ejus solus is patronus habeatur, cui assignatus est; & ceteri liberi, qui ipsi quoque ad eadem bona, nulla assignatione interveniente, pariter admitterentur, nihil juris in his bonis habeant; sed ita demum pristinum jus recipiant, si is, cui assignatus est, decesserit nullis liberis relictis.

1 ¶ Nec tantum libertum, sed etiam libertam, & non tantum filio, nepotivæ, sed etiam filiæ neptivæ assignare permittitur.

2 ¶ Datur autem hæc assignandi facultas ei, qui duos pluresve liberos in potestate habebit, ut eis, quos in potestate habet, assignare libertum libertamve liceat. Unde quærebatur, si eum, cui assignavit, postea emancipaverit: num evanescat assignatio? Sed placuit evanescere, quod & Juliano & aliis plerisque visum est.

3 ¶ Nec interest, [an] testamento quis assignet, an sine testamento, sed etiam quibuscunque verbis patronis hoc permittitur facere, ex ipso Senatusconsulto, quod Claudianis temporibus factum est, Sabellio Rufo & Asterio Scapula consulibus.

## DE BONORUM POSSESSIONIBUS.

## TITULUS X.

Us bonorum possessionis introductum est à prætore emendandi veteris juris gratia. Nec solum in intestatorum hæreditatibus vetus jus eo modo prætor emendavit, sicut supra dictum est: sed in eorum quoque qui testamento facto decesserint. Nam si alienus posthumus hæres fuerit institutus: quamvis hæreditatem jure civili adire non poterat, cum institutio non valebat: honorario tamen jure bonorum possessor efficiebatur, videlicet cum à prætore adjuvabatur. sed & is à nostra constitutione hodie recte hæres instituitur, quasi & jure civili non incognitus. Aliquando tamen, neque emendandi, neque impugnandi veteris juris, sed magis confirmandi gratia, [prætor] pollicetur bonorum possessionem. Nam illis quoque, qui recte testamento facto hæredes instituti sunt, dat secundum tabulas bonorum possessionem.

sionem. Item ab intestato suos hæredes, & agnatos ad bonorum possessionem vocat. Sed & remota quoque bonorum possessione, ad eos pertinet hæreditas jure civili.

2 ¶ Quos autem solus vocat prætor ad hæreditatem, hæredes quidem ipso jure non fiunt, nam prætor hæredem facere non potest: per legem enim tantum, vel similem juris constitutionem hæredes fiunt, veluti per Senatusconsulta & constitutiones principales: sed cum eis prætor dat bonorum possessionem, loco hæredum constituuntur, & vocantur bonorum possessores. Adhuc autem & alios complures gradus prætor fecit in bonorum possessionibus dandis, dum id agebat, ne quis sine successore moreretur. Nam angustissimis finibus constitutum per legem duodecim tabularum jus percipiendarum hæreditatum, prætor ex bono & æquo dilatavit.

3 ¶ Sunt autem bonorum possessiones ex testamento quidem hæ. Prima, quæ præteritis liberis datur, vocaturque contra tabulas. Secunda quam omnibus jure scriptis hæredibus prætor pollicetur, ideoque vocatur secundum tabulas. Et cum de testamentis prius locutus est, ad intestatos transitum fecit. Et primo loco suis hæredibus, & iis, qui ex edicto prætoris inter suos hæredes connumerantur, dat bonorum possessionem, quæ vocatur unde liberi: Secundo, legitimis hæredibus. Tertio, decem personis, quas extraneo manumissori præferebat. sunt autem decem personæ hæ: pater, mater, avus, avia, tam paterni quam materni: item filius, filia, nepos, neptis, tam ex filio, quam ex filia: frater, sororve, consanguinei, vel uterini. Quarto, cognatis proximis. Quinto, tanquam ex familia. Sexto, patrono patronæque, liberisque eorum, & parentibus. Septimo, viro & uxori. Octavo, cognatis manumissoris.

4 ¶ Sed eas quidem prætorias introduxit jurisdictione: à nobis tamen nihil incuriosum prætermisum est, sed nostris constitutionibus omnia corrigentes, contra tabulas quidem & secundum tabulas bonorum possessiones admisimus. utpote necessarias constitutas: nec non ab intestato unde liberi & unde legitimi bonorum possessiones. Quæ autem in prætoris edicto quinto

quinto loco posita fuerat, id est, unde decem persona, eam pio proposito, & compendioſo ſermone ſupervacuam oſtendimus. Cum enim præfata bonorum poſſeſſio decem personas præponebat extraneo manumifſori: noſtra conſtitutio, quam de emancipatione liberorum fecimus, omnibus parentibus, eisdemque manumifſoribus contracta fiducia manumifſionem facere dedit: ut ipſa manumifſio eorum hoc in ſe habeat privilegium, & ſupervacua fiat ſupradicta bonorum poſſeſſio. Sublata igitur prædicta quinta bonorum poſſeſſione, in gradum ejus ſextam antea bonorum poſſeſſionem induximus: & quintam fecimus, quam prætor proximis cognatis pollicetur. Cumque antea fuerat ſeptimo loco bonorum poſſeſſio tanquam ex familia, & octavo unde patroni patronaque & parentes eorum: utramque per conſtitutionem noſtram, quam de jure patronatus fecimus, penitus evacuavimus. Cum enim ad ſimilitudinem ſucceſſionis ingenuorum, libertinorum ſucceſſiones poſuimus, quas uſque ad quintum gradum tantummodo coarctavimus, ut ſit aliqua inter ingenuos & libertinos differentia: ſufficit eis tam contra tabulas bonorum poſſeſſio, quam unde legitimi, & unde cognati, ex quibus poſſunt ſua jura vindicare, omni ſcrupuloſitate & inextricabili errore iſtarum duarum bonorum poſſeſſionum reſoluta. Aliam vero bonorum poſſeſſionem, quæ unde vir & uxor appellatur, & nono loco inter veteres bonorum poſſeſſiones poſita fuerat, & in ſuo vigore ſervavimus, & altiore loco, id eſt, ſexto eam poſuimus: decima quoque bonorum poſſeſſione, quæ erat unde cognati manumifſoris, propter cauſas enumeratas merito ſublata: ut ſextantummodo bonorum poſſeſſiones ordinariæ permaneant, ſuo vigore pollentes. Septima eas ſecuta, quam optima ratione prætores introduxerunt. Noviffime enim promittitur ediſto iis etiam bonorum poſſeſſio, quibus ut detur, lege, vel Senatusconſulto, vel conſtitutione comprehenſum eſt: quam neque bonorum poſſeſſionibus, quæ ab inteſtato veniunt, neque iis, quæ ex teſtamento ſunt, prætor ſtabili jure connumeravit: ſed quaſi ultimum & extraordinarium auxilium (prout re exegit) accommodavit,

davit, scilicet iis, qui ex legibus, Senatusconsultis, constitutionibusve principum, ex novo jure, vel ex testamento, vel ab intestato veniunt. **Cum** igitur **plures species successionum prætor introduxisset**, easque per ordinem disposuisset: & in unaquaque specie successionis sæpe plures essent dispari gradu personæ: ne actiones creditorum differrentur, sed haberent, quos convenirent, & ne facile in possessionem bonorum defuncti mitterentur, & eo modo sibi consulerent: ideo **petendæ bonorum possessioni certum tempus præfinivit**. **Liberis** itaque & **parentibus**, tam **naturalibus**, quam **adoptivis** in petenda bonorum possessione **anni spatium**, **cæteris** [autem] **adgnatis**, vel **cognatis**, **centum dierum** dedit.

5 ¶ **Et si intra hoc tempus aliquis bonorum possessionem non petierit: ejusdem gradus personis adcrevit: vel si nullus sit, deinceps cæteris** bonorum possessionem perinde ex successorio edicto pollicetur, ac si is, qui præcedebat, ex eo numero non esset. Si quis itaque delatam sibi bonorum possessionem repudiaverit, non quousque tempus bonorum possessioni præfinitum exceßerit, expectatur: sed statim cæteri ex eodem edicto admittuntur.

6 ¶ **In petenda** autem bonorum possessione **dies utiles** singuli **considerantur**.

7 ¶ Sed bene anteriores principes & huic causæ providerunt, ne quis pro petenda bonorum possessione curet: sed quocumque modo admittentis eam judicium (intra statuta tamen tempora) ostenderit, plenum habeat earum beneficium.

## DE ACQUISITIONE PER ARRO- gationem.

### TITULUS XI.

**Est** & alterius generis per universitatem successio, quæ neque lege duodecim tabularum, neque prætoris edicto, sed eo jure, quod consensu receptum est, introducta est.

1 ¶ **Ecce enim cum paterfamilias sese in adrogationem dat, omnes res ejus corporales & incorporales, quæque ei debita sunt, arrogatori antea qui-**  
dem



dem pleno jure acquirebantur: exceptis iis, quæ per capitis deminutionem pereunt, quales sunt operarum obligationes, & jus adgnationis. Usus etenim & usufructus, licet his antea connumerabantur, attamen capitis deminutione minima eos tolli prohibuit nostra constitutio.

2 ¶ Nunc autem nos eandem acquisitionem, quæ per arrogationem fiebat, coarctavimus ad similitudinem naturalium parentum. Nihil enim aliud, nisi tantummodo usufructus tam naturalibus parentibus, quam adoptivis, per filios familiarum acquiritur in iis rebus, quæ extrinsecus filiis obveniunt, dominio eis integro servato. Mortuo autem filio arrogato in adoptiva familia, etiam dominium [rerum] ejus ad arrogatorem pertransit: nisi supersint aliæ personæ, quæ ex constitutione nostra, patrem in iis, quæ acquiri non possunt, antecedant.

3 ¶ Sed ex diverso, pro eo, quod is debuit, qui se in adoptionem dedit, ipso quidem jure arrogator non tenetur, sed nomine filii convenitur: & si noluerit eum defendere, permittitur creditoribus per competentes nostros magistratus, bona, quæ ejus cum usufructu futura fuissent, si se alieno juri non subjecisset, possidere, & legitimo modo ea disponere.

## DE EO, CUI LIBERTATIS CAUSA

bona addicuntur.

## TITULUS XII.

**A**ccessit novus casus successionis ex constitutione divi Marci. Nam si ii, qui libertatem acceperunt à domino in testamento, ex quo non aditur hereditas, velint bona sibi addici libertatum conservandarum causa: audiuntur.

1 ¶ Et ita divi Marci rescripto ad Pompilium Rufum continetur. verba rescripti ita se habent: Si Verginio Valenti, qui testamento suo libertatem quibusdam adscripsit, nemine successore ab intestato existente, in ea causa bona [ejus] esse cœperunt, ut venire debeant: is, cujus de ea re notio est, aditus rationem desiderii tui habebit, ut libertatum tantarum, quæ directo, quam earum, quæ per speciem

fideicommissi relictae sunt, tuendarum gratia addicantur tibi: si idonee creditoribus caveris de solido, quod cuique debetur, solvendo. Et ii quidem, quibus directa libertas data est, perinde liberi erunt, ac si hereditas adita esset. Ii autem, quos haeres manumittere rogatus est, à te libertatem consequentur: ita, ut si non alia conditione velis tibi bona addici, quam ut [ii] etiam, qui directo libertatem acceperunt, tui liberti fiant. Nam huic etiam voluntati tuae, si ii, quorum de statu agitur, consentiant, auctoritatem nostram accommodamus. Et ne hujus rescriptionis nostrae emolumentum alia ratione irritum fiat: si fiscus bona agnoscere voluerit, & ii, qui rebus nostris attendunt, sciant commodo pecuniario praefendam esse libertatis causam: & ita bona cogenda, ut libertas iis salva sit, qui eam adipisci potuerunt, ac si hereditas ex testamento adita esset.

2 ¶ Hoc rescripto subventum est & libertatibus, & defunctis, ne bona eorum à creditoribus possideantur & veneant. Certe si fuerint hac de causa bona addicta: cessat bonorum venditio. existit enim defuncti defensor, & quidem idoneus, qui de solido creditoribus cavet.

3 ¶ In primis hoc rescriptum totiens locum habet, quotiens testamento libertates datae sunt. Quid ergo si quis intestatus decedens, codicillis libertates dederit, neque adita sit ab intestato hereditas: [an] favor constitutionis debebit locum habere? Certe si intestatus decesserit, & codicillis dederit libertatem: competere eam, nemini dubium est.

4 ¶ Tunc [enim] constitutioni locum esse verba ostendunt, cum nemo successor ab intestato existat. Ergo quandiu incertum erit, utrum existat, an non: cessabit constitutio. Si vero certum esse coeperit, neminem existere: tunc erit constitutioni locus.

5 ¶ Si is, qui in integrum restitui potest, abstinuerit hereditate: an quamvis potest in integrum restitui, possit admitti constitutio, & bonorum addictio fieri? Quid ergo si post additionem libertatum conservandarum causa factam in integrum sit restitutus? Utique non erit dicendum revocari libertates: quia semel competerunt.

6 ¶ Hæc constitutio libertatum tuendarum causa introducta est. Ergo si libertates nullæ sunt datæ: cessat [hæc] constitutio. Quid ergo si vivus dederit libertates, vel mortis causa; & ne de hoc quærat, utrum in fraudem creditorum, an non factum sit, idcirco velint sibi addici bona: an audiendi sint? Et magis est, ut audiri debeant, etsi deficient verba constitutionis.

7 ¶ Sed cum multas divisiones ejusmodi constitutioni deesse perspeximus, lata est à nobis plenissima constitutio, in qua multæ species collatæ sunt, quibus jus hujusmodi successionis plenissimum est effectum, quas ex ipsius lectione constitutionis potest quis cognoscere.

DE SUCCESSIONIBUS SUBLATIS,  
quæ fiebant per bonorum venditiones, &  
ex Scto Claudiano.

### TITULUS XIII.

ERant ante prædictam successionem olim & aliæ per universitatem successiones; qualis fuerat bonorum emptio, quæ de bonis debitoris vendendis per multas ambages fuerat introducta, & tunc locum habebat, quando judicia ordinaria in usu fuerant. sed cum extraordinariis judiciis posteritas usa est: ideo cum ipsis ordinariis judiciis etiam bonorum venditiones expiraverunt, & tantummodo creditoribus datur officio judicis bona possidere, & prout utile eis visum est, ea disponere; quod ex latioribus Digestorum libris perfectius apparebit.

1 ¶ Erat & ex Senatusconsulto Claudiano miserabilis per universitatem acquisitio: cum libera mulier servili amore bacchata, ipsam libertatem per Senatusconsultum amittebat, & cum libertate substantiam: quod indignum nostris temporibus esse existimantes, & à nostra civitate deleri, & non inferi nostris digestis concessimus.

## DE OBLIGATIONIBUS.

## TITULUS XIV.

**N**unc transeamus ad obligationes. Obligatio est juris vinculum, quo necessitate adstringimur alicujus rei solvendæ secundum nostræ civitatis jura.

1 ¶ Omnium autem obligationum summa divisio in duo genera diducitur. namque aut civiles sunt, aut prætoriz. Civiles sunt quæ aut legibus constitutz, aut certo jure civili comprobatz sunt. Prætoriz sunt, quas prætor ex sua jurisdictione constituit, quæ etiam honorariæ vocantur.

2 ¶ Sequens divisio in quatuor species dividitur. Aut enim ex contractu sunt, aut quasi ex contractu, aut ex maleficio, aut quasi ex maleficio. Prius est, ut de iis, quæ ex contractu sunt, dispiciamus. Harum æque quatuor sunt species. Aut enim re contrahuntur, aut verbis, aut literis, aut consensu, de quibus singulis dispiciamus.

### QUIBUS MODIS RE CONTRAHITUR obligatio.

## TITULUS XV.

**R**E contrahitur obligatio, [veluti] mutui datione. Mutui autem datio in iis rebus consistit, quæ pondere, numero, mensura constant: veluti vino, oleo, frumento, pecunia numerata: ære, argento, auro: quas res aut numerando, aut metiendo, aut adpendendo in hoc damus, ut accipientium fiant. Et quoniam nobis non eadem res, sed aliæ ejusdem naturæ & qualitatis redduntur: inde etiam mutuum appellatum est, quia ita à me tibi datur, ut ex meo tuum fiat: & ex eo contractu nascitur actio, quæ vocatur condictio.

1 ¶ Is quoque qui non debitum accepit ab eo, qui per errorem solvit, re obligatur: daturque agenti contra eum propter repetitionem condictitia actio. Nam perinde ei condici potest, si apparet eum dare oportere, ac si mutuum accepisset. Unde pupillus, si ei sine tutoris auctoritate indebitum per errorem datum est, non tenebitur indebiti conductione: non magis, quam mutui datione. Sed hæc species

cies obligationis non videtur ex contractu consistere: cum is, qui solvendi animo dat, magis voluerit negotium distrahere, quam contrahere.

2 ¶ Item is, cui res aliqua utenda datur, id est, commodatur, re obligatur, & tenetur *commodati actione*. Sed is, ab eo, qui mutuum accepit, longe distat. namque non ita res datur, ut ejus fiat, & ob id de ea re ipsa restituenda tenetur. Et is quidem, qui mutuum accepit, si quolibet fortuito casu amiserit, quod accepit: veluti incendio, ruina, naufragio, aut latronum hostiumve incurso: nihilominus obligatus remanet. At is, qui utendum accepit, sane quidem exactam diligentiam custodiendæ rei præstare jubetur: nec sufficit ei tantam diligentiam adhibuisse, quantam suis rebus adhibere solitus est; si modo alius diligentior poterat eam rem custodire. sed propter majorem vim majoresve casus non tenetur, si modo non ipsius culpa is casus intervenit. alioqui si id, quod tibi commodatum est domi, peregre tecum ferre malueris, & vel incurso hostium prædonumve, vel naufragio amiseris: dubium non est, quin de restituenda ea re tenearis. Commodata autem res tunc proprie intelligitur, si nulla mercede accepta vel constituta, [res] tibi utenda data est. alioqui mercede interveniente, locatus tibi usus rei videtur: Gratuitum enim debet esse commodatum.

3 ¶ Præterea & is, apud quem res aliqua depositur, re obligatur; teneturque actione depositi: quia & ipse de ea re, quam accepit, restituenda tenetur. Sed is ex eo solo tenetur, si quid dolo commiserit. culpæ autem nomine, id est, desidii ac negligentia, non tenetur. Itaque securus est, qui parum diligenter custoditam rem furto amiserit: quia qui negligenti amico rem custodiendam tradit, [non ei] sed suæ facilitati id imputare debet.

4 ¶ Creditor quoque, qui pignus accepit, re obligatur: quia & ipse de ea re, quam accepit, restituenda tenetur actione pignoratitia. Sed quia pignus utriusque gratia datur, & debitoris, quo magis pecunia ea credatur, & creditoris, quo magis ei in tuto sit creditum: placuit sufficere, si ad eam rem

custodiendam exactam diligentiam adhibeat: quam si praestiterit: & aliquo fortuito casu rem amiserit, securum esse, nec impediri creditum petere.

## DE VERBORUM OBLIGATIONIBUS.

### TITULUS XVI.

**V**erbis obligatio contrahitur ex interrogatione & responsione, cum quid dari fierive nobis stipulamur. ex qua duæ proficiuntur actiones, tam conditio certi, si certa sit stipulatio: quam ex stipulatu: si incerta sit; quæ hoc nomine inde utitur, quod stipulum apud veteres firmum appellabatur, forte à stipite descendens.

1 ¶ In hac re olim talia verba tradita fuerunt. *Spondes? spondeo. Promittis? promitto. [Fidepromittis? fidepromitto.] Fidejubes? fidejubeo. Dabis? dabo. Facies? faciam.* Utrum autem Latina, an Græca, vel qua libet alia lingua stipulatio concipiatur, nihil interest: scilicet si uterque stipulantium intellectum ejus linguae habeat: nec necesse est eadem lingua utrunque uti, sed sufficit congruenter ad interrogata respondere. Quinetiam duo Græci Latina lingua obligationem contrahere possunt. Sed hæc solennia verba olim quidem in usu fuerunt: postea autem Leonina constitutio lata est, quæ solennitate verborum sublata, sensum & consonantem intellectum ab utraque parte solum desiderat, quibuscunque tandem verbis expressum est.

2 ¶ Omnis stipulatio aut pure, aut in diem, aut sub conditione fit. Pure, veluti, *quinque aureos dare spondes?* Idque confestim peti potest. In diem, cum adjecto die, quo pecunia solvatur, stipulatio fit: veluti, *decem aureos primis kalendis Martiis dare spondes?* Id autem quod in diem stipulamur, statim quidem debetur: sed peti prius, quam dies venerit, non potest, at ne eo quidem ipso die, in quem stipulatio facta est, peti potest: quia totus is dies arbitrio solventis tribui debet. Neque enim certum est eo die, in quem promissum est, datum non esse, prius quam is praterierit.

3 ¶ At si ita stipuleris, *decem aureos annuos*, quoad vi-

*vivam, dare spondes?* & pure facta obligatio intelligitur, & perpetuatur: quia ad tempus non potest deberi: sed hæres petendo, pacti exceptione submovebitur.

4 ¶ Sub conditione stipulatio fit, cum in aliquem casum differtur obligatio: ut si aliquid factum fuerit, vel non fuerit, committatur stipulatio: veluti, *Si Titius consul fuerit factus, quinque aureos dare spondes?* Si quis ita stipuletur, *si in capitolium non ascendero, dare spondes?* perinde erit ac si stipulatus esset, cum moreretur, sibi dari. Ex conditionali stipulatione tantum spes est debitum iri: eamque ipsam spem in hæredem transmittimus, si prius quam conditio exstet, mors nobis contigerit.

5 ¶ Loca etiam inferi stipulationi solent: veluti, *Carthagini dare spondes?* Quæ stipulatio licet pure fieri videtur, tamen re ipsa habet tempus adjectum, quo promissor utatur ad pecuniam Carthagini dandam. Et ideo si quis Romæ ita stipuletur, *hodie Carthagini dare spondes?* inutilis erit stipulatio, cum impossibilis sit repromissio.

6 ¶ Conditiones, quæ ad præsens vel præteritum tempus referuntur, aut statim infirmant obligationem, aut omnino non differunt; veluti, *Si Titius Consul fuit, vel si Mævius vivit, dare spondes?* Nam si ea ita non sunt, nihil valet stipulatio: sin autem ita se habent, statim valet. Quæ enim per rerum naturam sunt certa, non morantur obligationem, licet apud nos incerta sint.

7 ¶ Non solum res in stipulatum deduci possunt, sed etiam facta, ut si stipulemur aliquid fieri, vel non fieri. & in huiusmodi stipulationibus optimum erit pœnam subicere, ne quantitas stipulationis incerto sit, ac necesse sit actori probare, quod ejus interfit. Itaque si quis, ut fiat aliquid, stipuletur: ita adjici pœna debet, *Si ita factum non erit, tunc pœna nomine decem aureos dare spondes?* sed si quædam fieri, quædam non fieri, una eademque conceptione stipuletur quis: clausula huiusmodi erit adjicienda, *Si adversus ea factum erit: sive quid ita factum non fuerit: tunc pœna nomine decem aureos dare spondes?*

## DE DUOBUS REIS STIPULANDI ET promittendi.

### TITULUS XVII.

**ET** stipulandi & promittendi duo pluresve rei fieri possunt. Stipulandi ita, si post omnium interrogationem promissor respondeat, *Spondeo*. ut puta cum duobus separatim stipulantibus ita promissor respondeat, *Utrique vestrum dare spondeo*. Nam si prius Titio sponderit, deinde alii interroganti spondeat; alia atque alia erit obligatio, nec creduntur duo rei stipulandiesse. Duo pluresve rei promittendi ita fiunt: *Mihi decem aureos dare spondes? & Sei eosdem decem aureos dare spondes?* [si] respondeant singuli separatim, *spondeo*.

1 ¶ Ex huiusmodi obligationibus, & stipulationibus solidum singulis debetur, & promittentes singuli in solidum tenentur. In utraque tamen obligatione una res vertitur: & vel alter debitum accipiendo, vel alter solvendo, omnium perimit obligationem, & omnes liberat.

2 ¶ Ex duobus reis promittendi: alius pure, alius in diem, vel sub conditione obligari potest; nec impedimento erit dies aut conditio, quo minus ab eo, qui pure obligatus est, petatur.

## DE STIPULATIONE SERVORUM.

### TITULUS XVIII.

**S**ervus ex persona domini jus stipulandi habet. Sed & hæreditas in plerisque personarum defuncti vicem sustinet. ideoque quod servus hæreditarius ante aditam hæreditatem stipulatur, acquirit hæreditati: ac per hoc etiam hæredi postea facto acquiritur.

1 ¶ Sive autem domino, sive sibi, sive conservo suo, sive impersonaliter servus stipuletur: Domino acquirit. Idem juris est & in liberis, qui in potestate patris sunt, ex quibus causis acquirere possunt.

2 ¶ Sed cum factum in stipulatione continebitur: omni modo persona stipulantis continetur: veluti si servus stipuletur, ut sibi ire agere liceat. ipse enim tan-



tantum prohiberi non debet, non etiam dominus ejus.

3 ¶ Servus communis stipulando, unicuique dominorum pro portione domini acquirit: nisi jussu unius eorum, aut nominatim alicui eorum stipulatus est. tunc enim soli ei acquiritur. Quod servus communis stipulatur, si alteri ex dominis acquiri non potest, solidum alteri acquiritur; veluti si res, quam dari stipulatus est, unius domini sit.

## DE DIVISIONE STIPULATIONUM.

### TITULUS XIX.

Stipulationum alia[rum] sunt] judiciales, alia[rum] pratoria[rum], alia[rum] conventionales, alia[rum] communes, tam pratoria[rum], quam judiciales.

1 ¶ Judiciales sunt duntaxat, quæ à mero iudicis officio proficiuntur: veluti de dolo cautio; [vel de persequendo servo, qui in fuga est: restituendo-ve pretio.]

2 ¶ Pratoria[rum] sunt, quæ a mero prætoris officio proficiuntur: veluti damni infecti [vel legatorum.] Pratorias autem stipulationes sic exaudiri oportet, ut in his etiam contineantur ædilitiæ; nam & hæc à jurisdictione [prætoris] veniunt.

3 ¶ Conventionales sunt, quæ ex conventionione utriusque partis concipiuntur: [hoc est, neque jussu iudicis, neque jussu prætoris, sed ex conventionione contrahentium,] quarum totidem genera sunt, quos (pene dixerim) rerum contrahendarum.

4 ¶ Communes sunt, veluti rem salvam fore pupillo: (Nam & prætor jubet rem salvam fore pupillo caveri: & interdum iudex, si aliter hæc res expediri non potest:) vel de rato stipulatio.

## DE INUTILIBUS STIPULATIONIBUS.

### TITULUS XX.

Omnis res, quæ dominio nostro subicitur, in stipulationem deduci potest; siue mobilis sit, siue soli.

1 ¶ At si quis rem, quæ in rerum natura non est, aut esse non potest, dari stipulatus fuerit: veluti Sti-

chum, qui mortuus sit, quem vivere credebatur: aut hippocentaurum qui esse non possit: inutilis erit stipulatio.

2 ¶ Idem juris est, si rem sacram aut religiosam, quam humani juris esse credebatur: vel rem publicam, quæ usibus populi perpetuo exposita sit, ut forum, vel theatrum: vel liberum hominem, quem servum esse credebatur, vel ejus commercium non habuerit: vel rem suam dari quis stipuletur. Nec in pendentem stipulationem ob id, quod publica res in privatum deduci, & ex libero servus fieri potest, & commercium adipisci stipulator potest, & res [sua] stipulatoris esse desinere potest: sed protinus inutilis est. Item contra: licet initio utiliter res in stipulationem deducta sit: si [tamen] postea in aliquem eorum causa, de quibus supra dictum est, sine facto promissoris devenerit: extinguatur stipulatio. At nec statim ab initio talis stipulatio valebit, *Lucium Titium, cum servus erit, dare spondes?* & similia. quæ enim natura sui dominio nostro exempta sunt, in obligationem deduci nullo modo possunt.

3 ¶ Si quis alium daturum facturumve quid promiserit: non obligabitur; veluti si spondeat Titium quinque aureos daturum. Quod si effecturum se, ut Titius daret, sponderit, obligatur.

4 ¶ Si quis alii, quam ei, ejus juri subjectus sit, stipuletur: nihil agit. Plane solutio etiam in extraneam personam conferri potest: veluti si quis ita stipuletur, *Mihi aut Sejo dare spondes?* ut obligatio quidem stipulatori acquiratur, solvi tamen Sejo, etiam invito eo, recte possit, ut liberatio ipso jure contingat; sed ille adversus Sejum habeat mandati actionem. Quod si quis sibi, & alii, ejus juri subjectus non sit, dari decem aureos stipulatus est: valet quidem stipulatio; sed utrum totum debeatur [stipulatori,] quod in stipulationem deductum est, an vero pars dimidia, dubitatum est: sed placuit, non plus quam dimidiam partem ei acquiri. Ej [vero,] qui juri tuo subjectus est, si stipulatus sis, tibi acquiris: quia vox tua, tanquam filii sit; sicuti & filii vox, tanquam tua intelligitur in iis rebus, quæ tibi acquiri possunt.

5 ¶ Præterea inutilis est stipulatio, si [quis] ad ea, quæ interrogatus fuerit, non respondeat: *veluti si quis decem aureos à te dari stipuletur, tu quinque promittas, vel contra: aut si ille pure stipuletur, tu sub conditione promittas, vel contra: si modo scilicet id exprimas, id est, si cui sub conditione vel in diem stipulanti, tu respondeas, præsentī die spondeo.* Nam si hoc solum respondeas, *promitto: breviter videris in eandem diem vel conditionem spondidisse.* Neque enim necesse est in respondendo eadem omnia repeti, quæ stipulator expresserit.

6 ¶ Item inutilis est stipulatio, si vel ab eo stipuleris, qui tuo juri subjectus est, vel si is à te stipuletur. Sed servus quidem non solum domino suo obligari non potest, sed ne quidem ulli alii. filii vero familiarum aliis obligari possunt.

7 ¶ Mutum neque stipulari, neque promittere posse palam est. quod & in surdo receptum est: quia & is, qui stipulatur, verba promittentis, & is, qui promittit, verba stipulantis audire debet: unde apparet non de eo nos loqui, qui tardius exaudit: sed de eo, qui omnino non audit.

8 ¶ Furiosus nullum negotium gerere potest: quia non intelligit, quod agit.

9 ¶ Pupillus omne negotium recte gerit: ita tamen, ut ubi tutoris auctoritas necessaria sit, adhibeatur tutor: *veluti si ipse obligetur. nam alium sibi obligare etiam sine tutoris auctoritate potest.*

10 ¶ Sed quod diximus de pupillis, utique de iis verum est, qui jam habent aliquem intellectum. nam infans, & qui infantia proximus est, non multum à furioso distant: quia hujusmodi ætatis pupilli nullum habent intellectum. Sed in proximis infantia, propter utilitatem eorum, benignior juris interpretatio facta est: ut idem juris habeant, quod pubertati proximi. Sed qui in potestate parentis est impubes, ne auctore quidem patre obligatur.

11 ¶ Si impossibilis conditio obligationibus adjiciatur: nihil valet stipulatio. Impossibilis autem conditio habetur, cui natura impedimento est, quo minus existat: *veluti si quis ita dixerit, Si digito calum attinge-*

ro, dare spondes? At si ita stipuletur, *si digito cælum non attigero, dare spondes?* pure facta obligatio intelligitur, ideoque statim peti potest.

12 ¶ Item verborum obligatio inter absentes concepta, inutilis est. Sed cum hoc materiam litium contentiosis hominibus præstabat, forte post tempus tales allegationes opponentibus, & non præsentibus: ideo nostra constitutio propter celeritatem dirimendarum litium introducta est, quam ad Cæsarienses advocatos scripsimus: per quam disposuimus, tales scripturas, quæ præsto esse partes indicant, omnino esse credendas, nisi is, qui talibus utitur improbis allegationibus, manifestissimis probationibus vel per scripturam, vel per testes idoneos approbaverit, toto eo die quo conficiebatur instrumentum, sese vel adversarium suum in aliis locis fuisse.

13 ¶ Post mortem suam dari sibi nemo stipulari poterat: non magis, quam post ejus mortem, à quo stipulabatur. Ac nec is, qui in alicujus potestate est, post mortem ejus stipulari poterat: quia patris vel domini voce loqui videretur. Sed & si quis ita stipuletur, *Pridie quam moriar, vel pridie quam morieris, dare spondes?* inutilis erat stipulatio. Sed cum (ut jam dictum est) ex consensu contrahentium stipulationes valeant: placuit nobis etiam in hunc juris articulum necessariam inducere emendationem: ut sive post mortem, sive pridie quam moriatur stipulator, sive promissor, stipulatio concepta sit: stipulatio valeat.

14 ¶ Item si quis ita stipulatus erat, *Si navis cras ex Asia venerit, hodie dare spondes?* inutilis erat stipulatio, quia præpostere concepta est. Sed quum Leonicytæ recordationis, in dotibus eandem stipulationem, quæ præpostera nuncupatur, non esse rejiciendam existimaverit: nobis placuit, & huic perfectum robur accommodare, ut non solum in dotibus, sed etiam in omnibus valeat hujusmodi conceptio stipulationis.

15 ¶ Ita autem stipulatio concepta, velut si Titius dicat, *cum moriar, dare spondes? vel cum morieris?* & apud veteres utilis erat, & nunc valet,

16 ¶ Item post mortem alterius recte stipulamur.

17 ¶ Si scriptum in instrumento fuerit, promississe aliquem: perinde habetur, atque, si interrogatione præcedente responsum sit.

18 ¶ Quotiens plures res una stipulatione comprehenduntur, si **quidem** promissor **simpliciter** respondeat, *dare spondeo*: propter omnes tenetur. Si vero una ex his, vel quasdam daturum se sponderit; obligatio in iis, pro quibus sponderit, contrahitur. Ex pluribus enim stipulationibus, una, vel quædam videntur esse perfectæ. singulas enim res stipulari, & ad singulas respondere debemus.

19 ¶ Alteri stipulari (ut supra dictum est,) nemo potest. Inventæ enim sunt hujusmodi [stipulationes vel] obligationes ad hoc, ut unusquisque acquirit sibi, quod sua interest. cæterum si alii detur, nihil interest stipulatoris. Plane si quis velit hoc facere, pœnam stipulati conveniet: ut nisi ita factum sit, ut est comprehensum, committatur pœnæ stipulatio etiam ei, cujus nihil interest. Pœnam enim cum stipulatur quis, non illud inspicitur, quod intersit ejus, sed quæ sit quantitas in conditione stipulationis. Ergo si quis [ita] stipuletur, *Titio dari*, nihil agit; sed si adjecerit pœnam, *nisi dederis, tot aureos dare spondes?* tunc committitur stipulatio.

20 ¶ Sed [&] si quis stipuletur alii, cum ejus interesset; placuit stipulationem valere. Nam si is, qui pupilli tutelam administrare cœperat, cesserit administrationem contutori suo, & stipuletur rem pupilli salvam fore: quoniam interest stipulatoris fieri, quod stipulatus est (cum obligatus futurus sit pupillo, si male res gesserit) tenet obligatio. Ergo & si quis procuratori suo dari stipulatus sit: habebit vires stipulatio. Et si creditori suo [quis stipulatus sit,] quod sua interest, ne forte vel pœna committatur, vel prædia distrahantur, quæ pignori data erant: valet stipulatio.

21 ¶ Versa vice, qui alium facturum promissit, videtur in ea esse causa, ut non teneatur, nisi pœnam ipse promiserit.

22 ¶ Item nemo rem suam futuram, in eum casum, quo sua sit, utiliter stipulatur.

23 ¶ Si de alia re stipulator senserit, de alia promissor: perinde nulla contrahitur obligatio, ac si ad interrogatum responsum non esset: veluti si hominem Stichum à te quis stipulatus fuerit, tu de Pamphilo senseris, quem Stichum vocari credideris.

24 ¶ Quod turpi ex causa promissum est: veluti si quis homicidium vel sacrilegium se facturum promittat: non valet.

25 ¶ Cum quis sub aliqua conditione stipulatus fuerit: licet ante conditionem decesserit: postea existente conditione hæres ejus agere potest. Idem est & ex promissoris parte.

26 ¶ Qui hoc anno, aut hoc mense dari stipulatus est: nisi omnibus partibus anni vel mensis præteritis, non recte petet.

27 ¶ Si fundum dari stipuleris, vel hominem: non poteris continuo agere: nisi tantum spatium præterierit, quo traditio fieri possit.

## DE FIDEJUSSORIBUS.

### TITULUS XXI.

PRO eo qui promittit, solent alii obligari, qui fidejussores appellantur: quos homines accipere solent, dum curant, ut diligentius sibi cautum sit.

1 ¶ In omnibus autem obligationibus adsumi possunt: id est, si re, si verbis, si litteris, si consensus contractæ fuerint. At nec illud quidem interest, utrum civilis, an naturalis sit obligatio, cui adjicitur fidejussor: adeo quidem, ut pro servo quoque obligetur, si extraneus sit, qui fidejussorem, à servo accipiat, si ipse dominus in id, quod sibi naturaliter debetur.

2 ¶ Fidejussor non tantum ipse obligatur, sed etiam hæredem relinquit obligatum.

3 ¶ Fidejussor & præcedere obligationem, & sequi potest.

4 ¶ Si plures sint fidejussores: quotquot erunt numero, singuli in solidum tenentur. Itaque liberum est creditori, à quo velit solidum petere. Sed ex epistola divi Hadriani compellitur creditor à singulis, qui modo solvendo sunt, litis contestatæ tempore,  
pat-

partes petere. Ideoque si quis ex fidejussoribus eo tempore solvendo non sit: hoc ceteros onerat. Sed si ab uno fidejussore creditor totum consequutus fuerit: hujus solius detrimentum erit; si is, pro quo fidejussit, solvendo non sit: & sibi imputare debet, cum potuerit juvari ex epistola divi Hadriani, & desiderare, ut pro parte in se detur actio.

5 ¶ Fidejussores ita obligari non possunt, ut plus debeant, quam debet is, pro quo obligantur. Nam eorum obligatio, accessio est principalis obligationis: nec plus in accessione potest esse, quam in principali re. At ex diverso, ut minus debeant, obligari possunt. Itaque si reus decem aureos promiserit: fidejussor in quinque recte obligatur: contra vero obligari non potest. Item si ille pure promiserit; fidejussor sub conditione promittere potest: contra vero non potest. Non solum autem in quantitate, sed etiam in tempore minus aut plus intelligitur. Plus est enim statim aliquid dare: minus est post tempus dare.

6 ¶ Si quid autem fidejussor pro reo solverit: ejus recuperandi causa habet cum eo mandati judicium.

7 ¶ Græce etiam fidejussor ita accipitur, τῇ ἐμῇ πίσει καλεῖσθαι ἐγώ. i. mea fide jubeo ego. [sed & si dixerit] εἰλω, sive βέλομαι, i. volo, sed & φημί, i. affirmo: pro eo erit, ac si dixerit λέγω. i. dico.

8 ¶ In stipulationibus fidejussorum sciendum est hoc generaliter accipi: ut quodcunque scriptum sit quasi actum, videatur etiam actum. Ideoque constat, si quis scripserit se fidejussisse: videri omnia solemniter acta.

## DE LITERARUM OBLIGATIONIBUS.

## TITULUS XXII.

**O**Lim scriptura fiebat obligatio, quæ nominibus fieri dicebatur, quæ nomina hodie non sunt in usu. Plane si quis debere se scripserit, quod sibi numeratum non est, de pecunia minime numerata, post multum temporis exceptionem opponere non potest. hoc enim sapissime constitutum est. sic fit, ut & hodie, dum quæri non potest, scriptura obli-  
ge-

getur: & ex ea nascatur conditio, cessante scilicet verborum obligatione. Multum autem tempus in hac exceptione antea quidem ex principalibus constitutionibus usque ad quinquennium procedebat. sed ne creditores diutius possint suis pecuniis forsitan defraudari, per constitutionem nostram tempus coarctatum est, ut **ultra biennii metas** huiusmodi **exceptio minime extendatur.**

## DE OBLIGATIONIBVS EX CONSENSV.

### TITVLVS XXIII.

**C**onsensu fiunt obligationes in emptionibus, venditionibus, locationibus, conductionibus, societatibus, mandatis. ideo autem istis modis obligatio dicitur consensu contrahi: **quia** neque scriptura, neque presentia omnimodo opus est. at nec dare quicquam necesse est, ut substantiam capiat obligatio: sed **sufficit, eos, qui negotia gerunt, consentire.** unde inter absentes quoque talia negotia contrahuntur, veluti per epistolam, vel per nuntium. Item **in his contractibus alter alteri obligatur in id, quod alterum alteri ex bono & æquo præstare oportet.** [cum aliqui in verborum obligationibus alius stipuletur, alius promittat.]

## DE EMPTIONE ET VENDITIONE.

### TITVLVS XXIV.

**E**mptio & venditio contrahitur, simulatque de pretio convenerit: quamvis nondum pretium numeratum sit, ac ne arrha quidem data fuerit. Nam quod arrhæ nomine datur, argumentum est emptionis & venditionis contractæ. **Sed** hoc quidem de emptionibus & venditionibus quæ sine scriptura consistunt, obtinere oportet; nam nihil à nobis **in huiusmodi emptionibus & venditionibus** innovatum est; in iis autem, quæ scriptura conficiuntur, non aliter **perfectam esse venditionem & emptionem constitimus, ni si & instrumenta emptionis fuerint conscripta, vel manu propria contrahentium, vel ab alio quidem scripta, à contrahentibus autem sub-**  
scripta;



scripta; & si per tabellionem sunt, nisi & completiones acceperint, & fuerint partibus absoluta. Donec enim aliquid deest ex his; & poenitentiae locus est, & potest emptor vel venditor sine poena recedere ab emptione [ & venditione. ] Ita tamen impune [eis recedere] concedimus, nisi si jam arrharum nomine aliquid fuerit datum: hoc enim subsequuto, siue in scriptis, siue sine scriptis venditio celebrata est: is, qui recusat adimplere contractum, si quidem est emptor, perdit, quod dedit. si vero venditor, duplum restituere compellitur: licet super arrhis nihil expressum est.

1. ¶ Pretium autem constitui oportet: nam nulla emptio sine pretio esse potest. Sed & certum esse pretium debet. alioqui si inter aliquos ita conuenit, ut quanti Titius rem aestimauerit, tanti sit emptor: inter veteres satis abundeque hoc dubitabatur, constaretne venditio, an non. Sed nostra decisio ita hoc constituit, ut quotiens sic composita sit venditio, quanti ille aestimauerit, sub hac conditione statet contractus: ut si quidem ille, qui nominatus est, pretium definierit: [tunc] omnimodo secundum ejus aestimationem & pretium persolvatur, & res tradatur, & venditio ad effectum perducatur; emptore quidem ex emptio actione, venditore ex vendito agente. Sin autem ille, qui nominatus est, vel noluerit, vel non potuerit pretium definire: tunc pro nihilo esse venditionem, quasi nullo pretio statuto. Quod jus, cum in venditionibus nobis placuerit: non est absurdum in locationibus & [in] conductionibus trahere.

2. ¶ Item pretium in numerata pecunia consistere debet. Nam in ceteris rebus, an pretium esse posset, valde quaerebatur: veluti an homo, aut fundus, aut toga alterius rei pretium esse posset. [Et] Sabinus & Cassius etiam in alia re putabant pretium posse consistere; unde illud est, quod vulgo dicebatur, permutatione rerum emptionem & venditionem contrahi; eamque speciem emptionis & venditionis vetustissimam esse: argumentoque utebantur Graeco poeta Homero, qui aliquam partem exercitus Achivorum vinum sibi comparasse ait, permutatis quibusdam rebus, his verbis:

- Εὐθεν ἄρ' οἰνίζοντο κερηκομόοντες ἀχαιῶι  
 Ἄλλοι μὲν χαλκῷ, ἄλλοι δ' αἶθρον σιδήρῳ  
 Ἄλλοι δ' ῥινόεσσι, ἄλλοι δ' αὐτοῖσι βόεσσιν,  
 Ἄλλοι δ' ἀνδραπέδεσσι.

Id est,

- Hinc sibi certatim gentis de more comati  
 Vina parant Graji are dato, fulgenteque ferro,  
 Tergoribusque, bubus sed & ipsis, mancipiisque.*

- Diversæ scholæ auctores contra sentiebant: aliudque esse existimabant permutationem rerum, aliud emptionem & venditionem: alioqui non posse rem expediri, permutatis rebus, quæ videatur res venisse, & quæ pretii nomine data esse. nam utramque videri & venisse, & pretii nomine datam esse, rationem non pati. Sed Proculi sententia, dicentis permutationem propriam esse speciem contractus à venditione separatam, merito prævaluit: cum & ipse aliis Homericis versibus adjuvabatur, & validioribus rationibus argumentabatur: quod & anteriores divi principes admiserunt, & in nostris Digestis latius significatur.

3 ¶ Quum autem emptio & venditio contracta sit (quod effici diximus, simulatque de pretio convenerit, cum sine scriptura res agitur) periculum rei venditæ statim ad emptorem pertinet, tametsi adhuc ea res emptori tradita non sit. Itaque si homo mortuus sit, vel aliqua parte corporis læsus fuerit, aut ædes totæ vel aliqua ex parte incendio consumptæ fuerint: aut fundus vi fluminis totus vel aliqua ex parte ablatus sit, sive etiam inundatione aquæ aut arboribus turbine dejectis longe minor aut deterior esse cœperit, emptoris damnum est; cui necesse est, licet rem non fuerit nactus, pretium solvere. Quicquid enim sine dolo & culpa venditoris accidit, in eo venditor securus est. Sed & si post emptionem fundo aliquid per alluvionem accesserit, ad emptoris commodum pertinet. Nam & commodum ejus esse debet, cujus periculum est. Quod si fugerit homo, qui venit, aut subreptus fuerit, ita ut neque dolo, neque culpa venditoris intervernerit: animadvertendum erit, an custodiam ejus usque ad traditionem venditor susceperit. Sane enim  
 fi

si susceperit, ad ipsius periculum is casus pertinet. si non susceperit, securus est. Idem & in cæteris animalibus, cæterisque rebus intelligimus. Utique tamen vindicationem rei & conditionem exhibere debet emptori: quia sane qui nondum rem emptori tradidit, adhuc ipse dominus est. Idem etiam est de furti & damni injuriæ actione.

4 ¶ **Emptio tam sub conditione quam pure contrahi potest.** Sub conditione, veluti, *Si Stichus intra certum diem tibi placuerit, erit tibi emptus aureis tot.*

5 ¶ **Loca sacra vel religiosa, item publica veluti forum, basilicam) frustra quis sciens emit, quæ tamen si pro profanis vel privatis deceptus à venditore quis emerit, habebit actionem ex empto, quod non habere ei liceat, ut consequatur, quod sua interest cum deceptum non esse.** Idem juris est, si hominem liberum pro servo emerit.

## DE LOCATIONE ET CONDVCTIONE.

### TITULUS XXV.

**L**ocatio & conductio proxima est emptioni & venditioni, iisdemque juris regulis consistit. Nam ut emptio & venditio ita contrahitur, si de pretio convenerit: sic & locatio & conductio ita **contrahi intelligitur, si merces constituta sit, & competit locatori quidem locati actio, conductori vero conducti.**

1 ¶ **Et quæ supra diximus, si alieno arbitrio pretium promissum fuerit: eadem & de locatione & conductione dicta esse intelligimus, si alieno arbitrio merces permissa fuerit.** Qua de causa si fulloni polienda curandave, ac sarcinatori sarcienda vestimenta quis dederit, nulla statim mercede constituta, sed postea tantum daturus, quantum inter eos convenerit: non proprie locatio & conductio contrahi intelligitur, sed eo nomine actio præscriptis verbis datur.

2 ¶ **Præterea sicut vulgo quærebatur, an permutatis rebus emptio & venditio contraheretur: ita quæri solebat de locatione & conductione, si forte rem aliquam utendam sive fruendam tibi aliquis dederit, & invicem à te utendam sive fruendam aliam [rem] acceperit.** Et placuit non esse locationem & con-

conductionem, sed **proprium genus contractus**, veluti si cum unum bovem quis haberet, & vicinus ejus unum, placuerit inter eos, ut per denos dies invicem boves commodarent, ut opus facerent, & apud alterum [alterius] bos perierit: neque locati, neque conducti, neque commodari comperit actio: quia non fuit commodatum gratuitum. verum **præscriptis verbis agendum** est.

3 ¶ Adeo autem aliquam familiaritatem inter se videntur habere emptio & venditio, item locatio & conductio: ut in quibusdam causis quæri soleat, utrum emptio & venditio contrahatur, an locatio & conductio? ut ecce de prædiis, quæ perpetuo quibusdam fruenda traduntur, id est, ut quamdiu pensio sive redditus pro his domino præstetur, neque ipsi conductori, neque hæredi ejus, cuive conductor hæresve ejus id prædium vendiderit, aut donaverit, aut dotis nomine dederit, aliove quocunque modo alienaverit, auferre liceat. Sed talis contractus, quia inter veteres dubitabatur, & à quibusdam locatio à quibusdam venditio existimabatur: **lex Zenoniana lata est, quæ emphyteuscos contractus propriam statuit naturam**, neque ad locationem neque ad venditionem inclinantem, sed suis actionibus fulciendam: & si quidem aliquid pactum fuerit, hoc ita obtinere, ac si naturalis esset contractus. sin autem nihil de periculo rei fuerit pactum, tunc si quidem totius rei interitus accesserit, ad dominum super hoc redundare periculum: sin autem particularis, ad emphyteuticarium hujusmodi damnum venire. quo jure utimur.

4 ¶ Item quæritur, si cum aurifice Titius convenit, ut is ex auro suo certi ponderis certæque formæ annulos ei faceret, & acciperet (verbi gratia) decem aureos: utrum emptio & venditio, an locatio & conductio contrahi videatur? Cassius ait, materiæ quidem emptionem & venditionem contrahi, operæ autem locationem & conductionem. Sed placuit tantum emptionem & venditionem contrahi. Quod si suum aurum Titius dederit, mercede pro opera constituta: dubium non est, quin locatio & conductio sit.

5 ¶ Conductor [autem] omnia secundum legem conductionis facere debet: & si quid in lege prætermissum fuerit, id ex bono & æquo præstare. Qui pro usu aut vestimentorum, aut argenti, aut iumentorum, mercedem aut dedit, aut promisit: ab eo custodia talis desideratur, qualem diligentissimus paterfamilias suis rebus adhibet. quam si præstiterit, & aliquo casu [fortuito eam] rem amiserit: de restituenda ea non tenebitur.

6 ¶ Mortuo conductore intra tempora conductionis, hæres ejus eodem jure in conductione succedit.

## DE SOCIETATE.

## TITULUS XXVI.

Societatem coire solemus aut totorum bonorum, quam Græci specialiter *κοινωνία* appellant: aut unius alicujus negotiationis, veluti mancipiorum vendendorum emendorumque, aut olei, aut vini, aut frumenti emendi vendendique.

1 ¶ Et quidem si nihil de partibus lucri & damni nominatim convenerit: æquales scilicet partes & in lucro & in damno spectantur. Quod si expressæ fuerint [partes:] hæ servari debent. Nec enim unquam dubium fuit, quin valeat conventio, si duo inter se pacti sint, ut ad unum quidem duæ partes & lucri & damni pertineant, ad alium tertia.

2 ¶ De illa sane conventionione quaesitum est, si Titius & Sejus inter se pacti sint, ut ad Titium lucri duæ partes pertineant, damni tertia: ad Sejum duæ partes damni, lucri tertia: an rata debeat haberi conventio? Quintus Mutius contra naturam societatis talem pactiōem esse existimavit, & ob id non esse ratam habendam. Servius Sulpitius (cujus sententia prævaluit) contra sensit: quia sæpe quorundam ita pretiosa est opera in societate, ut eos justum sit conditione meliore in societatem admitti. Nam & ita coiri posse societatem non dubitatur, ut alter pecuniam conferat, alter non conferat, & tamen lucrum inter eos commune sit, quia sæpe opera alicujus pro pecunia valet. Et adeo contra Quinti Mutii sententiam obtinuit, ut illud quoque constiterit posse convenire, ut quis lucri partem ferat,  
de

**de damno non teneatur**: quod & ipsum Servius convenienter [sibi] fieri existimavit. **Quod** tamen **ita intelligi oportet**, ut si in alia re lucrum, in alia damnum illatum sit: compensatione facta, **solum**, quod superest, intelligatur lucro esse.

3 ¶ Illud **expeditum est**, si in una causa pars fuerit **expressa**, veluti in solo lucro vel in solo damno, in altero vero **omissa**: in eo quoque, quod pratermissum est, **eandem partem servari**.

4 ¶ **Manet autem societas** eousque, **donec in eodem consensu perseveraverint**. At cum aliquis renunciaverit societati, solvitur societas. Sed plane si quis **callide in hoc renunciaverit societati**, ut obveniens aliquod lucrum **solus habeat**: veluti si totorum bonorum socius, cum ab aliquo hæres esset relictus, in hoc renunciaverit societati, ut hæreditatem solus lucrificeret: **cogitur hoc lucrum communicare**. Si quid vero aliud lucrificiat, quod non captaverit: **ad ipsum solum pertinet**. Ei vero, cui renunciatum est, quicquid omnino post renunciatam societatem acquiritur, soli conceditur.

5 ¶ **Solvitur adhuc societas etiam morte socii**: quia qui societatem contrahit, certam personam sibi eligit. sed & si consensu plurium societas contracta sit: morte unius socii solvitur, etsi plures supersint: nisi in coeunda societate aliter convenerit.

6 ¶ Item si alicujus rei contracta societas sit, & **finis negotio impositus est**: finitur societas.

7 ¶ Publicatione quoque **distrahi societatem manifestum est**: scilicet si **universa bona socii publicentur**. nam cum in ejus locum alius succedat, pro mortuo habetur.

8 ¶ Item si quis ex sociis **mole debiti prægravatus**, bonis suis cesserit, & ideo propter publica aut privata debita substantia ejus veneat: **solvitur societas**. sed hoc casu si adhuc consentiant in societatem, nova videtur incipere societas.

9 ¶ **Socius socio** utrum eo nomine tantum **teneatur pro socio actione**, si quid dolo commiserit, sicut is, qui deponi apud se passus est: an etiam culpa, id est, desidii atque negligentii nomine: **quæsitum est**? prævaluit tamen **etiam culpa nomine**

neri

neri cum. Culpa autem non ad exactissimam diligentiam dirigenda est. Sufficit enim talem diligentiam communibus rebus adhibere [socium,] qualem suis rebus adhibere solet. Nam qui parum diligentem socium sibi adsumit; de se queri, sibi que hoc imputare debet.

## DE MANDATO.

## TITULUS XXVII.

**M**andatum contrahitur quinque modis: sive sua tantum gratia aliquis tibi mandet, sive sua & tua, sive aliena tantum, sive sua & aliena, sive tua & aliena. At si tua tantum gratia mandatum sit: supervacuum est mandatum, & ob id nulla ex eo obligatio, nec mandati inter vos actio nascitur.

1 ¶ Mandantis [tantum] gratia intervenit mandatum: veluti si quis tibi mandet, ut negotia ejus gereres, vel ut fundum ei emereres, vel ut pro eo sponderes.

2 ¶ Tua gratia & mandantis: veluti si mandet tibi, ut pecuniam sub usuris crederes ei, qui in rem ipsius mutaretur: aut si volente te agere cum eo ex fidejussoria causa, mandet tibi, ut cum reo agas, periculo mandantis: vel ut ipsius periculo stipuleris ab eo, quem tibi delegerit in id, quod tibi debuerat.

3 ¶ Aliena autem [tantum] causa intervenit mandatum, veluti si tibi aliquis mandet, ut Titii negotia gereres, vel ut Titio fundum emereres, vel ut pro Titio sponderes.

4 ¶ Sua & aliena: veluti si de communibus suis & Titii negotiis gerendis tibi mandet, vel ut sibi & Titio fundum emereres, vel ut pro eo & Titio sponderes.

5 ¶ Tua & aliena: veluti si tibi mandet, ut Titio sub usuris crederes: quia si sine usuris pecuniam crederes, aliena tantum gratia intercedit mandatum.

6 ¶ Tua tantum gratia intervenit mandatum: veluti si tibi mandet, ut pecunias tuas in emptiones potius prædiorum colloques, quam fœneres: vel ex diverso, ut pecunias tuas fœneres potius, quam in emptione prædiorum colloques. Cujus generis mandatum, magis consilium, quam mandatum est, & ob id non est obligatorium: quia nemo ex consilio

mandati obligatur, etiam si non expediat ei, cui mandabatur; cum liberum cuique sit apud se explorare, an sibi expediat consilium. Itaque si otiosam pecuniam domi te habentem hortatus fuerit aliquis, ut rem aliquam emereres, vel eam crederes: quamvis non expediat eam tibi emisse, vel credidisse, non tamen tibi mandati tenetur. Et adeo hæc ita sunt, ut quaesitum sit, an **mandati teneatur, qui mandavit tibi, ut pecuniam Titio fœnerares?** sed obtinuit Sabini sententia, obligatorium esse in hoc casu mandatum: **quia non aliter Titio credidisses, quam si tibi mandatum esset.**

7 ¶ **Illud quoque mandatum non est obligatorium, quod contra bonos mores est:** veluti si Titius de furto, aut [de] damno faciendo, aut de injuria facienda mandet tibi. licet enim pœnam istius facti nomine præstiteris, non tamen ullam habes adversus Titium actionem.

8 ¶ **Is qui exequitur mandatum, non debet excedere fines mandati.** ut ecce, si quis usque ad centum aureos mandaverit tibi, ut fundum emereres, vel ut pro Titio sponderes: neque pluris emere debes, neque in ampliorem pecuniam fidejubere. alioqui non habebis cum eo mandati actionem. adeo quidem, ut Sabino & Cassio placuerit, etiam si usque ad centum aureos cum eo agere volueris: inutiliter te acturum. [Sed] diversæ scholæ auctores recte usque ad centum aureos te acturum existimant: quæ sententia sane benignior est. Quod si minoris emeris, habebis scilicet cum eo mandati actionem: quoniam qui mandat, ut sibi centum aureorum fundus emeretur, is utique mandasse intelligitur, ut minoris (si possit) emeretur.

9 ¶ **Recte quoque mandatum contractum, si dum adhuc integra res sit, revocatum fuerit, evanescit.**

10 ¶ **Item si adhuc integro mandato, mors alterutrius interveniat, id est, vel ejus qui mandaverit, vel illius, qui mandatum suscepit; solvitur mandatum.** Sed utilitatis causa receptum est: si eo mortuo, qui tibi mandaverat, tu ignorans eum decessisse, executus fueris mandatum: posse te agere mandati actione. alioqui justa & probabillis ignorantia tibi



tibi damnum afferret. Et huic simile est, quod placuit, si debitores manumisso dispensatore Titii, per ignorantiam liberto solverint, liberari eos, cum aliqui stricta juris ratione non possent liberari, quia alii solvissent, quam cui solvere debuerint.

11 ¶ Mandatum non suscipere, cuilibet liberum est: susceptum autem consummandum est, aut quam primum renunciandum, ut per semetipsum, aut per alium eandem rem mandator exequatur. Nam nisi ita renunciatur, ut integra causa mandatori reserve- tur eandem rem explicandi: nihilominus mandati actio locum habet: nisi iusta causa intercesserit, aut non renunciandi, aut intempestive renunciandi.

12 ¶ Mandatum & in diem differri, & sub conditione fieri potest.

13 ¶ In summa sciendum est, mandatum, nisi gratuitum sit, in aliam formam negotii cadere. Nam mercede constituta, incipit locatio & conductio esse. Et (ut generaliter dicamus) quibus casibus sine mercede suscepto officio, mandati sive depositi contrahitur negotium: iis casibus interveniente mercede locatio & conductio intelligitur contrahi. Et ideo si fulloni polienda curandave quis dederit vestimenta, aut sarcinatori sarcienda, nulla mercede constituta neque promissa: mandati competit actio.

DE OBLIGATIONIBUS, [QUÆ] QUASI  
ex contractu [nascuntur].

### TITULUS XXVIII.

Post genera contractuum enumerata dispiciamus etiam de iis obligationibus, quæ quidem non proprie nasci ex contractu intelliguntur: sed tamen quia non ex maleficio substantiam capiunt, quasi ex contractu nasci videntur.

1 ¶ Igitur cum quis negotia absentis gesserit: ultro citroque inter eos nascuntur actiones: quæ appellantur negotiorum gestorum. sed domino quidem rei gestæ adversus eum, qui gessit, directa competit actio: negotiorum autem gestori, contraria. quas ex nullo contractu proprie nasci, manifestum est: quippe ita nascuntur istæ actiones, si sine mandato quis-

quisque alienis negotiis gerendis se obtulerit. ex qua causa ii, quorum negotia gesta fuerint, etiam ignorantes obligantur. Idque utilitatis causa receptum est: ne absentium, qui subita festinatione coacti, nulli demandata negotiorum suorum administratio-  
ne, peregre profecti essent, defererentur negotia: quæ sane nemo curaturus esset, si de eo, quod quis impendisset, nullam habiturus esset actionem. Sicut autem is, qui utiliter gessit negotia, dominum habet obligatum negotiorum gestorum: ita & contra iste quoque tenetur, ut administrationis reddat rationem. Quo casu ad exactissimam quisque diligentiam compellitur reddere rationem: nec sufficit talem diligentiam adhibere, qualem suis rebus adhibere solet: si modo alius diligentior [eo] commodius administraturus esset negotia.

2 ¶ Tutores quoque, qui tutelæ iudicio tenentur, non proprie ex contractu obligati [esse] intelliguntur (nullum enim negotium inter tutorem & pupillum contrahitur): sed quia sane non ex maleficio tenentur, quasi ex contractu teneri videntur. Hoc autem casu mutua sunt actiones. Non tantum enim pupillus cum tutore habet tutelæ actionem: sed & contra tutor cum pupillo habet contrariam tutelæ, si vel impenderit aliquid in rem pupilli, vel pro eo fuerit obligatus, aut rem suam creditoribus ejus obligaverit.

3 ¶ Item si inter aliquos communis res sit sine societate: veluti quod pariter eis legata donatave esset: & alter eorum alteri ideo teneatur communi dividendo iudicio, quod solus fructus ex ea re perceperit, aut quod socius ejus solus in eam rem necessarias impensas fecerit: non intelligitur ex contractu proprie obligatus esse: quippe nihil inter se contraxerunt. sed quia ex maleficio non tenetur: quasi ex contractu teneri videtur.

4 ¶ Idem juris est de eo, qui cohæredi familiæ eriscundæ iudicio ex his causis obligatus est.

5 ¶ Hæres quoque legatorum nomine non proprie ex contractu obligatus intelligitur: (neque enim cum hærede, neque cum defuncto, ullum negotium legatarius gessisse proprie dici potest): &  
tamen

tamen quia ex maleficio non est obligatus, quasi ex contractu debere intelligitur.

6 ¶ Item is, cui quis per errorem non debitum solvit, [quasi ex contractu debere videtur.] Adeo enim non intelligitur proprie ex contractu obligatus [esse,] ut si certiore rationem sequamur, magis (ut supra diximus) ex distractu, quam ex contractu possit dici obligatus esse. nam qui solvendi animo pecuniam dat, in hoc dare videtur, ut distrahat potius negotium, quam contrahat. Sed tamen perinde is, qui accipit, obligatur, ac si mutuum ei daretur. & ideo conditione tenetur.

7 ¶ Ex quibusdam tamen causis repeti non potest, quod per errorem non debitum solutum sit, sic namque definierunt veteres, ex quibus causis inficiando lis crescit, ex his causis non debitum solutum, repeti non posse: veluti ex lege Aquilia, item ex legato. Quod veteres quidem in iis legatis locum habere voluerunt, quæ certa constituta, per damnationem cuique legata fuerant. nostra autem constitutio, cum unam naturam omnibus legatis & fideicommissis indulsit, huiusmodi augmentum in omnibus legatis & fideicommissis extendi voluit: sed non omnibus legatariis hoc præbuit, sed tantummodo in iis legatis & fideicommissis, quæ sacrosanctis ecclesiis, & cæteris venerabilibus locis, quæ religionis vel pietatis intuitu honorantur, relicta sunt: quæ si indebita solvantur, non reperuntur.

PER QUAS PERSONAS NOBIS OBLIGATIO ACQUIRITUR.

#### TITULUS XXIX.

**E**Xpositis generibus obligationum, quæ ex contractu vel quasi ex contractu nascuntur: admonendum sumus acquiri nobis non solum per nosmetipsos, sed per eas quoque personas; quæ in nostra potestate sunt: veluti per servos & filios nostros: ut tamen, quod per servos [nostros] nobis acquiritur, totum nostrum fiat: quod autem per liberos, quos in potestate habemus, ex obligatione fuerit acquisitum, hoc dividatur secundum imaginem rerum proprietatis

ris & usufructus, quam nostra decrevit constitutio: ut quod ab **actione** commodum perveniat, **hujus usufructum** quidem habeat pater, **proprietas** autem filio servetur, scilicet **patre actionem movente** secundum novellæ nostræ constitutionis divisionem.

1 ¶ Item per liberos homines, & alienos servos, quos bona fide possidemus, acquiritur nobis: sed tantum ex duabus causis, id est, si quid ex operis suis, vel ex re nostra acquirant.

2 ¶ Per eum quoque servum, in quo usufructum [vel usum habemus,] similiter ex duabus istis causis nobis acquiritur.

3 ¶ Commūnem servum pro dominica parte dominis acquirere certum est: excepto eo, quod nominatim uni stipulando, aut per traditionem accipiendo, illi soli acquirit: veluti cum ita stipulatur, *Titio Domino meo dare spondes?* Sed si domini unius jussu servus fuerit stipulatus, licet antea dubitabatur, tamen post nostram decisionem res expedita est, ut illi tantum acquirat, qui hoc ei facere jussit, ut supra dictum est.

## QUIBUS MODIS TOLLITUR

obligatio.

### TITULUS XXX.

**T**OLLITUR autem omnis obligatio solutione ejus, quod debetur: vel si quis, consentiente creditore, aliud pro alio solverit. Nec interest, quis solvat: utrum ipse, qui debet, an alius pro eo. Liberatur enim & alio solvente: sive sciente, sive ignorante debitore, vel invito [eo] solutio fiat. Item si reus solverit: etiam ii, qui pro eo intervenerunt, liberantur. Idem ex contrario contingit, si fidejussor solverit: non enim ipse solus liberatur, sed etiam reus.

1 ¶ Item per acceptilationem tollitur obligatio. Est autem acceptilatio, imaginaria solutio. Quod enim ex verborum obligatione Titio debetur, id si velit Titius remittere, poterit sic fieri, ut patiatur hæc verba debitorem dicere: *Quod ego tibi promisi, habesne acceptum?* & Titius respondeat, *habeo*. Sed & græce

græce potest acceptilatio fieri: dummodo sic fiat, ut Latinis verbis solet [exigi,] ἔχεις λαβάν δηνάρια τόσα; ἔχω λαβάν. id est, tot denarios acceptos habes? acceptos habeo. Quo genere (ut diximus) tantum ex solvuntur obligationes, quæ ex verbis consistunt, non etiam ceteræ. Consentaneum enim visum est, verbis factam obligationem, aliis posse verbis dissolvi. Sed & id, quod alia ex causa debetur, potest in stipulationem deduci, & per acceptilationem dissolvi. Sicut autem quod debetur, pro parte recte solvitur: ita in parte debiti acceptilatio fieri potest.

2 ¶ Est [autem] prodita stipulatio, quæ vulgo Aquiliana appellatur, per quam contingit, ut omnium rerum obligatio in stipulatum deducatur, & ea per acceptilationem tollatur. Stipulatio enim Aquiliana renovat omnes obligationes, & à Gallo Aquilio ita composita est: *Quicquid te mihi ex quacunque causa dare facere oportet, oportebitve, præsens in diemve: quarumcunque rerum mihi tecum actio est: quæque adversus te petitio, vel adversus te persecutio est, eritve: quodvntu meum habes, tenes, possides, [dolove malo fecisti, quo minus possideas:] quanti quæque earum rerum res erit, tantam pecuniâ dari stipulatus est Aulus Agerius, spondit Numerius Nigidius. quod Numerius Nigidius Aulo Agerio spondit, id haberetne à se acceptum Numerius Nigidius Aulum Agerium rogavit. Aulus Agerius Numerio Nigidio acceptum fecit.*

3 ¶ Præterea novatione tollitur obligatio: veluti si id quod tibi Sėjus debebat, à Titio dari stipulatus sis. Nam interventu novæ personæ nova nascitur obligatio, & prima tollitur, translata in posteriorem: adeo, ut interdum, licet posterior stipulatio inutilis sit, tamen prima novationis jure tollatur: veluti si id, quod tu Titio debes, à pupillo sine tutoris auctoritate stipulatus fueris. quo casu res amittitur: nam & prior debitor liberatur, & posterior obligatio nulla est. Non idem juris est, si à servo quis fuerit stipulatus. nam tunc prior perinde obligatus manet, ac si postea nullus stipulatus fuisset. Sed si eadem persona sit, a qua postea stipuleris: ita demum novatio fit, si quid in posteriore stipulatione novi sit: forte si conditio aut dies, aut fidejussor ad-

ñiciatur, aut detrahatur. Quod autem diximus, si conditio adjiciatur, novationem fieri: sic intelligi oportet, ut ita dicamus factam novationem, si conditio extiterit: alioqui si defecerit, durat prior obligatio. Sed, cum hoc quidem inter veteres constabat, tunc fieri novationem, cum novandi animo in secundam obligationem itum fuerat; per hoc autem dubium erat, quando novandi animo videretur hoc fieri, & quasdam de hoc præsumptiones alii in aliis casibus introducebant: ideo nostra processit constitutio, quæ apertissime definivit, tunc solum novationem prioris obligationis fieri, quoties hoc ipsum inter contrahentes expressum fuerit, quod propter novationem prioris obligationis conveniunt; alioqui & manere pristinam obligationem, & secundam ei accedere, ut maneat ex utraque causa obligatio secundum nostræ constitutionis definitionem, quam licet ex ipsius lectione apertius cognoscere.

4 ¶ Hoc amplius, ex obligationes, quæ consensu contrahuntur, contraria voluntate dissolvuntur. Nam si Titius & Sejus inter se consenserint, ut fundum Tusculanum emptum Sejus haberet centum aureis: deinde re nondum secuta, id est, neque pretio soluto, neque fundo tradito, placuerit inter eos, ut discederetur ab ea emptione & venditione: invicem liberantur. Idem est in conductione & locatione, & in omnibus contractibus, qui ex consensu descendunt, sicut jam dictum est.

## INSTITUTIONUM,

seu Elementorum,

## D. JUSTINIANI,

Sacratissimi Principis,

## LIBER QUARTUS.

DE OBLIGATIONIBUS, QUÆ EX  
delicto nascuntur.

## TITULUS I.



Uum sit expositum superiore libro de obligationibus ex contractu, [ & quasi ex contractu : ] *sequitur, ut de obligationibus ex maleficio, [ & quasi ex maleficio, ] dispiciamus.* Sed illæ quidem ( ut suo loco tradidimus ) in quatuor genera dividuntur. hæ vero unius generis sunt. nam omnes ex re nascuntur, id est, ex ipso maleficio, veluti ex furto, rapina, damno, injuria.

1 ¶ Furtum est contrectatio fraudulosa, lucri faciendi gratia, vel ipsius rei, vel etiam usus ejus possessionisve, quod lege naturali prohibitum est admittere.

2 ¶ Furtum autem vel à furvo, id est, nigro, dictum est, quod clam & obscure fiat, & plerumque nocte: vel à fraude: vel à ferendo, id est, auferendo: vel à Græco sermone, quod φῦρας appellant fures. Imo & Græci à ferendo φῦρας dixerunt.

3 ¶ Furtorum autem duo sunt genera: manifestum, & nec manifestum. Nam conceptum & oblatum, species potius actionis sunt furto coherentes, quam genera furtorum, sicut inferius apparebit. manifestus fur est, quem Græci ἐν αὐτοφώρῳ appellant: nec solum is, qui in ipso furto apprehenditur, sed etiam is, qui in eo loco apprehenditur, quo [furtum] fit: veluti qui in domo furtum fecit, & nondum egressus januam, apprehensus fuerit: & qui in oliveto olivarum: aut in vineto uvarum furtum fecit, quamdiu in eo oliveto aut vineto de-

prehensus fuerit. Imo ulterius furtum manifestum est extendendum, quamdiu eam rem fur tenens vi-  
sus vel deprehensus fuerit: sive in publico, sive in privato: vel a domino, vel ab alio, antequam eo pervenerit, quo deferre vel deponere destinasset. Sed si pertulit, quo destinavit, tametsi deprehendatur cum re furtiva, non est manifestus fur. Nec manifestum furtum quid sit, ex iis, quæ diximus, intelligitur. nam quod manifestum non est, id scilicet nec manifestum est.

4 ¶ Conceptum furtum dicitur, cum apud aliquem testibus præsentibus furtiva res quaesita & inventa sit, nam in eum propria actio constituta est, quamvis fur non sit, quæ appellatur concepti. Oblatum furtum dicitur, cum res furtiva ab aliquo tibi oblata sit, eaque apud te concepta sit: utique si ea mente tibi data fuerit, ut apud te potius quam apud eum, quid dedit, conciperetur. nam tibi, apud quem concepta sit, propria adversus eum, qui obtulit, quamvis fur non sit, constituta est actio, quæ appellatur oblatus. Est etiam prohibiti furti actio adversus eum, qui furtum quaerere testibus præsentibus volentem prohibuerit. Præterea poena constituitur edicto prætoris per actionem furti non exhibiti, adversus eum, qui furtivam rem apud se quaesitam & inventam non exhibuit. Sed hæc actiones, scilicet concepti & oblatus, & furti prohibiti, nec non furti non exhibiti, in defuetudinem abierunt. Quum enim requisitio rei furtivæ hodie secundum veterem observationem non fiat: merito ex consequentia etiam præfatæ actiones ab usu communi recesserunt: quum manifestum sit, quod omnes, qui scientes rem furtivam susceperint, & celaverint, furti nec manifesti obnoxii sunt.

5 ¶ Poena manifesti furti, quadrupli est, tam ex servi, quam ex liberi persona: nec manifesti, dupli.

6 ¶ Furtum autem fit, non solum cum quis interceptiendi causa rem alienam amovet: sed generatim cum quis alienam rem invito domino contrahat. Itaque sive creditor pignore, sive is, apud quem res deposita est, ea re utatur, sive is, qui rem utendam accepit, in alium usum eam transferat, quam  
cujus.



cujus gratia ei data est: furtum committit. veluti si quis argentum utendum acceperit, quasi amicos ad coenam invitaturus, & id peragre secum tulerit: aut si quis equum gestandi causa commodatum sibi, longius aliquo duxerit: quod veteres scripserunt de eo, qui in aciem equum perduxisset.

7 ¶ **Placuit** tameneos qui rebus commodatis aliter uterentur, quam utendas acceperint, ita furtum committere: si se intelligant, id invito domino facere: eumque, si intellexisset, non permissurum. at si permissurum credant, extra crimen videri, optima sane distinctione: quia furtum, sine affectu furandi non committatur.

8 ¶ **Sed & si** credat aliquis invito domino se rem commodatam sibi contrectare, domino autem volente id fiat: dicitur furtum non fieri. Unde illud quaesitum est, cum Titius servum Mavii sollicitaverit, ut quasdam res domino subriperet, & ad eum perferret, & servus id ad Mavium pertulerit: Mavius [antem] dum vult Titium in ipso delicto deprehendere, permiserit servo quasdam res ad eum perferre: utrum furti, an servi corrupti iudicio teneatur Titius, an neutro? Et cum nobis super hac dubitatione suggestum est, & antiquorum prudentium super hoc altercationes perspeximus, quibusdam neque furti, neque servi corrupti actionem praestantibus, quibusdam furti tantummodo: nos huiusmodi calliditati obviam euntes, per nostram decisionem sancimus, non solum furti actionem, sed & servi corrupti contra eum dari. Licet enim [is] servus deterior [a sollicitatore] minime factus est, & ideo non concurrant regulae, quae servi corrupti actionem introducunt: tamen consilium corruptoris ad perniciem probitatis servi introductum est, ut sit ei poenalis actio imposita, tanquam [si] re ipsa fuisset servus corruptus: ne ex huiusmodi impunitate & in alium servum, qui facile posset corrupti, tale facinus a quibusdam perpetretur.

9 ¶ **Interdum** etiam liberorum hominum furtum fit, veluti si quis liberorum nostrorum, qui in potestate nostra sunt, subreptus fuerit:

10 ¶ **Aliquando** autem etiam suæ rei furtum quis com-

committit : veluti si debitor rem, quam creditori pignoris causa dedit, subtraxerit.

11 ¶ Interdum [quoque] **furti tenetur**, qui ipse furtum non fecit : qualis est is, **cujus ope & consilio furtum factum est**. In quo numero est, qui tibi nummos excussit, ut alius eos raperet : aut tibi obstitit, ut alius rem tuam exciperet : aut oves tuas vel boves fugaverit, ut alius eas acciperet. Et hoc veteres scripserunt de eo, qui panno rubro fugavit armentum. Sed **si quid eorum per lasciviam, & non data opera, ut furtum admitteretur, factum est : in factum actio dari debet**. At ubi ope Mævii Titius furtum fecerit : ambo furti tenentur. Ope & consilio ejus quoque furtum admitti videtur, qui scalas forte fenestris supponit : aut ipsas fenestras vel ostium effringit, ut alius furtum faceret : quive ferramenta ad effringendum, aut scalas, ut fenestris supponerentur, commodaverit, sciens cujus rei gratia commodaverit. Certe **qui nullam opem ad furtum faciendum adhibuit, sed tantum consilium dedit, atque hortatus est ad furtum faciendum, non tenetur furti**.

12 ¶ Hi, **qui in parentum vel dominorum potestate sunt, si rem eis subripiunt, furtum quidem faciunt**, & res in furtivam causam cadit (nec ob id ab ullo usucapi potest, antequam in domini potestatem revertatur) : **sed furti actio non nascitur** : quia nec ex alia ulla causa potest inter eos actio nasci. Si vero ope & consilio alterius furtum factum fuerit : quia utique furtum committitur, convenienter ille furti tenetur : quia verum est, ope & consilio ejus furtum factum esse.

13 ¶ **Furti autem actio ei competit, cujus interest rem salvam esse, licet dominus non sit**. Itaque nec domino aliter competit, quam si ejus intersit rem non perire.

14 ¶ **Unde constat creditorem de pignore subrepto furti [actione] agere posse, etiam si idoneum debitorem habeat** : quia expedit ei pignori potius incumbere, quam in personam agere : adeo quidem, ut quamvis ipse debitor eam rem subriperit : nihilominus creditori competat actio furti.

15 ¶ Item si fullo polienda curandave, aut sarcinator farcienda vestimenta mercede certa [constituta] acceperit, eaque furto amiserit: ipse furti habet actionem, non dominus; quia domini nihil interest eam rem non perire, quum iudicio locati à fullone aut sarcinatore rem suam persequi possit. Sed & bonæ fidei emptori subrepta re, quam emerit, quamvis dominus non sit, omnino competit furti actio, quemadmodum & creditori. Fulloni vero & sarcinatori non aliter furti actionem competere placuit, quam si solvendo fuerint: hoc est, si domino rei æstimationem solvere possint. Nam si solvendo non sint: tunc quia ab eis suum dominus consequi non possit: ipsi domino furti competit actio: quia hoc casu ipsius interest rem salvam esse. Idem est, & si in parte solvendo fuerit fullo aut sarcinator.

16 ¶ Quæ de fullone & sarcinatore diximus, eadem & ad eum, cui commodata res est, transferenda veteres existimabant. Nam ut ille fullo mercedem accipiendo, custodiam præstat: ita is quoque, qui commodatum utendi causa accepit, similiter necesse habet custodiam præstare. Sed nostra providentia etiam hoc in nostris decisionibus emendavit, ut in domini voluntate sit: si commodati actionem adversus eum, qui rem commodatam accepit, movere desiderat: si furti adversus eum, qui rem subripuit: & alterutra earum electa, dominum non posse ex pœnitentia ad alteram venire actionem. sed si quidem furem elegerit: illum, qui rem utendam accepit, penitus liberari. sin autem commodator veniat adversus eum, qui rem utendam accepit, ipsi quidem nullo modo competere posse adversus furem furti actionem, eum autem, qui pro re commodata convenitur, posse adversus furem furti habere actionem: ita tamen, si dominus sciens rem esse subreptam, adversus eum, cui res commodata fuerit, pervenit. sin autem nescius & dubitans rem esse subreptam, apud eum commodati actionem instituerit, postea autem re comperta voluerit remittere quidem commodati actionem, ad furti autem actionem pervenire: tunc licentia ei conceditur &

adversum furem venire, obstaculo nullo ei opponendo; quoniam incertus constitutus movit adversus eum, qui rem utendam accepit, commodati actionem: nisi domino ab eo satisfactum fuerit. tunc etenim omnino furem à domino quidem furti actione liberari: suppositum autem esse ei, qui pro re sibi commodata domino satisfecit: cum manifestissimum sit, etiam si ab initio dominus actionem commodati instituerit, ignarus rem esse subreptam, postea autem hoc ei cognito, adversus furem transierit: omnino liberari eum, qui rem commodatam accepit, quicumque causæ exitum dominus adversus furem habuerit: eadem definitione obtinente, sive in parte, sive in solidum solvendo sit is, qui rem commodatam accepit.

17 ¶ Sed is, apud quem res deposita est, custodiam non præstat: sed tantum in eo obnoxius est, si quid ipse dolo malo fecerit, qua de causa si res ei subrepta fuerit: quia restituendæ ejus rei nomine depositi non tenetur, nec ob id ejus interest rem salvam esse, furti agere non potest: sed furti actio domino competit.

18 ¶ In summa, sciendum est, quasitum esse, an impubes rem alienam amovendo, furtum faciat? Et placuit: quia furtum ex affectu [surandi] consistit, ita demum obligari eo crimine impuberem, si proximus pubertati sit, & ob id intelligat se delinquere.

19 ¶ Furti actio sive dupli, sive quadrupli, tantum ad pœnæ persecutionem pertinet. Nam ipsius rei persecutionem extrinsecus habet dominus, quam aut vindicando, aut condicendo potest auferre. Sed rei vindictio quidem adversus possessorem est: sive fur ipse possidet, sive alius quilibet: condictio autem adversus furem ipsum hæredemve ejus, licet non possideat, competit.

## DE VI BONORUM RAPTORUM.

### TITULUS II.

QUI res alienas rapit, tenetur quidem etiam furti (quis enim magis alienam rem invito domino contrectat, quam qui vi rapit? ideoque rectè dictum est,

est, eum improbum furem esse:) sed tamen propriam actionem ejus delicti nomine prætor introduxit, quæ appellatur Vi bonorum raptorum: & est intra annum quadrupli, post annum simpli: quæ actio utilis est, etiam si quis unam rem, licet minimam, rapuerit. Quadruplum autem non totum poena est, sicut in actione furti manifesti diximus, sed in quadruplo inest & rei persecutio: ut poena tripli sit, si-  
 ve comprehendatur raptor in ipso delicto, si-  
 ve non. Ridiculum enim esset levioris conditionis esse eum, qui vi rapit, quam qui clam amover.

1 ¶ Ita tamen competit hæc actio, si dolo malo quis rapuerit. Nam qui aliquo errore ductus, rem suam esse existimans, & imprudens juris, eo animo rapuerit, quasi domino liceat etiam per vim rem suam auferre à possessoribus: absolvi debet. Cui scilicet conveniens est, nec furti teneri eum, qui eodem hoc animo rapuit. Sed ne, dum talia excogitantur, inveniatur via per quam raptiores impune suam exerceant avaritiam: melius divalibus constitutionibus pro hac parte prospectum est, ut nemini liceat vi rapere vel rem mobilem vel se moventem, licet suam eandem rem existimet. sed si quis contra statuta principum fecerit, rei quidem suæ dominio cadere: si autem aliena [res] sit, post restitutionem ejus, etiam actionem ejusdem rei præstare. Quod non solum immobilibus rebus, quæ rapi possunt constitutiones obtinere censuerunt: sed etiam [in] invasionibus quæ circa res soli sunt, ut ex hac causa ab omni rapina homines abstineant.

2 ¶ Sane in hac actione non utique expectatur, rem in bonis actoris esse. nam si-ve in bonis sit, si-ve non: si tamen ex bonis sit, locum hæc actio habebit. Quare si-ve locata, si-ve commodata, si-ve etiam pignorat, si-ve deposita sit [res] apud Titium, sic ut intersit ejus eam rem [per vim] non auferri, (veluti si in deposita re culpam quoque promissit) si-ve bona fide possideat, si-ve usumfructum quis habeat in ea, vel quid aliud juris, ut intersit ejus non rapi: dicendum est, ei competere hanc actionem, non ut dominium accipiat; sed illud solum, [quod] ex bonis ejus qui rapinum passus est, [id est,] quod ex substan-

stantia ejus ablatum esse proponatur. Et generaliter dicendum est, ex quibus causis furti actio competit in re clam facta, ex eisdem causis omnes habere hanc actionem.

## DE LEGE AQUILIA.

## TITULUS III.

**D**Amni injuriæ actio constituitur per legem Aquilianam: cujus primo capite cautum est, *ut si quis alienum hominem, alienamve quadrupedem, quæ pecudum numero sit, injuria occiderit: quanti ea res in eo anno plurimi fuerit, tantum domino dare damnetur.*

1 ¶ Quod autem non præcise de quadrupede, sed de ea tantum, quæ pecudum numero est, cavetur: eo pertinet, ut neque de feris bestiis, neque de canibus cautum esse intelligamus: sed de iis tantum, quæ [gregatim] proprie pasci dicuntur: quales sunt equi, muli, asini, oves, boves, capræ. De suis quoque idem placuit. Nam & sues pecudum appellatione continentur: quia & hi gregatim pascuntur. Sic denique & Homerus in Odyssæa ait (sicut Ælius Martianus in suis institutionibus refert,)

*Δήεις τόν γε σύστασι παράδουον, οἱ δ' ἐνέμονται.*

*Πὰρ Κόρακι πέρη ὅτι τε κρήνη ἀρεθύση. id est, Sessantem videas, qui errant per pascua, porcos, Ad Coracis saxum, juxta fontemque Arcthusam.*

2 ¶ Injuria autem occidere intelligitur, qui nullo jure occidit. Itaque qui latronem [insidiatorem,] occiderit, non tenetur, utique, si aliter periculum effugere non potest.

3 ¶ Ac ne is quidem hac lege tenetur, qui casu occidit, si modo culpa ejus nulla inveniat. nam alioqui non minus ex dolo quam ex culpa quisque hac lege tenetur.

4 ¶ Itaque si quis dum jaculis ludit, vel exercitatur, transeuntem servum tuum trajecerit, distinguitur. Nam si id à milite in eo campo, ubi solitum est exercitari, admissum est: nulla culpa ejus intelligitur, si alius tale quid admiserit: culpæ reus est. Idem juris est de milite, si in alio loco, quam qui ad exercitandum militibus destinatus est, id admiserit.

5 ¶

5 ¶ Item si putator ex arbore dejecto ramo servum tuum transeuntem occiderit: si prope viam publicam aut vicinalem id factum est, neque proclamavit, ut casus evitari posset, culpæ reus est: sed si proclamavit, nec ille curavit præcavere, extra culpam est putator. Æque extra culpam esse intelligitur, si seorsum à via forte, vel in medio fundo cædebat, licet non proclamavit: quia [in] eo loco nulli extra-neo jus fuerat versandi.

6 ¶ Præterea, si Medicus, qui servum tuum secuit, dereliquerit curationem [ejus,] & ob id mortuus fuerit servus, culpæ reus erit.

7 ¶ Imperitia quoque culpæ adnumeratur: veluti si Medicus [ideo] servum tuum occiderit, quia male eum secuerit, aut perperam ei medicamentum dederit.

8 ¶ Impetu quoque mularum, quas mulio propter imperitiam retinere non potuit, si servus tuus oppressus fuerit: culpæ reus est mulio. Sed si & propter infirmitatem eas retinere non potuerit, cum alius firmior eas retinere potuisset: æque culpa tenetur. Eadem placuerunt de eo quoque qui cum equo veheretur, impetum ejus aut propter infirmitatem, aut propter imperitiam suam retinere non potuerit.

9 ¶ His autem verbis legis, *quanti id eo in anno plurimi fuerit*, illa sententia exprimitur: ut si quis hominem tuum, qui hodie claudus, aut mancus, aut luscus erit, occiderit, qui in eo anno integer, aut pretiosus fuerit: non tanti teneatur, quanti hodie erit, sed quanti in eo anno plurimi fuerit. Qua ratione creditum est pœnalem esse hujus legis actionem: quia non solum tanti quisque obligatur, quantum damni dederit, sed aliquando longe pluris. Ideoque constat in hæredem eam actionem non transire, quæ transitura fuisset, si ultra damnum nunquam lis æstimaretur.

10 ¶ Illud non ex verbis legis, sed ex interpretatione placuit: non solum perempti corporis æstimationem habendam esse, secundum ea quæ diximus: sed eo amplius, quicquid præterea, perempto eo corpore, damni vobis illatum fuerit: veluti si servum tuum hæredem ab aliquo institutum, ante quis occiderit, quam is jussu tuo hæreditatem adierit. nam hæreditatis quoque amissæ rationem esse habendam

con-

constat. Item si ex pari mularum unam, vel ex quadrigis equorum unum quis occiderit, vel ex comœdis unus servus occisus fuerit: non solum occisi fit æstimatio, sed eo amplius, id quoque computatur, quanti depretiati sunt, qui supersunt.

11 ¶ Liberum autem est ei, cujus servus occisus fuerit, & ex iudicio privato legis Aquiliæ damnum persequi, & capitalis criminis [eum] reum facere.

12 ¶ Caput secundum legis Aquiliæ in usu non est.

13 ¶ Capite tertio de omni cætero damno cavetur. Itaque si quis servum vel eam quadrupedem, quæ pecudum numero est, vulneraverit; sive eam quadrupedem, quæ pecudum numero non est, veluti canem aut feram bestiam vulneraverit, aut occiderit: hoc capite actio constituitur. In cæteris quoque omnibus animalibus, item in omnibus rebus, quæ anima carent, damnum per injuriam datum, hac parte vindicatur. Si quid enim ustum, aut ruptum, aut fractum fuerit: actio ex hoc capite constituitur, quanquam poterat sola rupti appellatio in omnes istas causas sufficere. Ruptum enim intelligitur, quod quoque modo corruptum est. Unde non solum fracta, autusta, sed etiam scissa, & collisa, & effusa, & quoque modo perempta, atque deteriora facta, hoc verbo continentur. Denique responsum est, si quis in alienum vinum aut oleum, id miscuerit, quo naturalis bonitas vini aut olei corrumpetur: ex hac parte legis [Aquiliæ] eum teneri.

14 ¶ Illud palam est, sicut ex primo capite ita demum quisque tenetur, si dolo aut culpa ejus homo aut quadrupes occisus occisusve fuerit: ita ex hoc capite, & dolo aut culpa, [&] de cætero damno quemque teneri. [Ex] hoc tamen capite non quanti in eo anno, sed quanti in diebus triginta proximis res fuerit, obligatur is, qui damnum dederit.

15 ¶ At nec *plurimi* quidem verbum adjicitur. Sed Sabino recte placuit, perinde habendam æstimationem, ac si etiam hac parte *plurimi* verbum adjectum fuisset. nam plebem Romanam, quæ Aquilio tribuno interrogante hanc legem tulit, contentam fuisse, quod per maiora parte eo verbo usa esset.

16 ¶ Cæterum placuit, ita demum directam ex

hac



hac lege actionem esse, si quis **præcipue** corpore suo damnum dederit. **Ideo**que in eum, qui alio modo damnum dederit, utiles actiones dari solent. **veluti** si quis hominem alienum, aut pecus ita incluserit, ut fame necaretur: aut jumentum ita vehementer egerit, ut rumperetur: aut pecus in tantum exagitaverit, ut præcipitaretur: aut si quis alieno servo persuaferit, ut in arborem ascenderet, vel in puteum descenderet, & is ascendendo, vel descendendo, aut mortuus, aut aliqua parte corporis læsus fuerit, utilis actio in eum datur. Sed si quis alienum servum [aut] de ponte aut de ripa in flumen dejecerit, & is suffocatus fuerit: eo, quod projecit, corpore suo damnum dedisse, non difficulter intelligi potest: ideoque ipsa lege Aquilia tenetur. Sed si non corpore damnum fuerit datum, neque corpus læsum fuerit, sed alio modo alicui damnum contigerit: quum non sufficiat, neque directa, neque utilis legis Aquiliæ actio: placuit eum, qui obnoxius fuerit, in factum actione teneri: **veluti** si quis misericordia ductus alienum servum compeditum solverit, ut fugeret.

## DE INJURIIS.

## TITULUS IV.

**G**eneraliter injuria dicitur omne, quod non jure fit. specialiter, alias contumelia, quæ à contemnendo dicta est, quam Gr. ὕβρις appellant: alias culpa, quam Græci ἑκλήμια dicunt, sicut in lege Aquilia damnum injuria datum accipitur: alias iniquitas & injustitia, quam Græci [ἀδικία καὶ] ἀδίκημα vocant. cum enim prætor vel judex non jure contra quem promittat, injuriam accepisse dicitur.

**I** ¶ Injuria autem committitur, non solum cum quis pugno pulsatus, aut fustibus cæsus, vel etiam verberatus erit: sed & si cui convicium factum fuerit; siue ejus bona quasi debitoris, qui nihil deberet, possessa fuerint ab eo, qui intelligebat nihil eum sibi debere: **vel** si quis ad infamiam alicujus libellum, aut carmen, [aut historiam] scripserit, composuerit, ediderit, dolo malo fecerit, quo quid eorum fieret: siue quis matrem familias, aut prætextatum, prætex-

ta-

tatamve adfectatus fuerit: sive **cujus pudicitia attentata esse dicetur: & denique aliis plurimis modis** admitti injuriam manifestum est.

2 ¶ **Patitur** autem **quis injuriam** non solum **per semetipsum**, sed [etiam] **per liberos** suos, **quos in potestate habet**: itemque **per uxorem** suam; id enim magis pravaluit. Itaque si filia alicujus, quæ Titio nupta est, injuriam feceris: non solum filia nomine tecum injuriarum agi potest, sed etiam patris quoque & mariti nomine. Contra autem, **si viro injuria facta sit: uxor injuriarum agere non potest**. Defendi enim uxores à viris, non viros ab uxoribus, æquum est. Sed & **focer nurus nomine, cujus vir in [ejus] potestate est, injuriarum agere potest**.

3 ¶ **Servis** autem ipsis quidem nulla injuria fieri intelligitur, **sed domino fieri per eos videtur**; non tamen iisdem modis, quibus etiam per liberos & uxores: **sed ita, cum quid atrocius commissum fuerit, & quod aperte ad contumeliam domini respicit**: veluti si quis alienum servum [atrociter] verberaverit; & in hunc casum actio proponitur. At si quis **servo convivium fecerit, vel pugno eum percusserit**: nulla in eum actio domino competit.

4 ¶ Si **communi servo injuria facta sit: æquum est**, non pro ea parte, qua dominus quisque est, **æstimationem injuriæ fieri, sed ex dominorum persona**, quia ipsis fit injuria.

5 ¶ Quod si ususfructus in servo Titii est, proprietas Mævii: magis Mævio injuria fieri intelligitur.

6 ¶ Sed si **libero [homini,] qui tibi bona fide servit, injuria facta sit**: nulla tibi actio dabitur, sed suo nomine is **experiri poterit, nisi in contumeliam tuam pulsatus sit**; tunc enim competit & tibi injuriarum actio. Idem ergo est & in servo alieno bona fide tibi serviente; ut totiens admittatur injuriarum actio, quotiens in tuam contumeliam injuria ei facta sit.

7 ¶ **Pœna** autem **injuriarum ex lege duodecim tabularum propter membrum quidem ruptum talio erat**: propter os vero fractum nummaria pœnæ erant constitutæ, quasi in magna veterum paupertate. Sed postea prætores permittebant ipsis, qui injuriam pas-

si fuerit, eam æstimare; ut iudex vel tanti [reum] condemnet, quanti injuriam passus æstimaverit, vel minoris, prout ei visum fuerit. Sed pœna quidem injuriæ, quæ ex lege duodecim tabularum introducta est, in desuetudinem abiit. quam autem prætores introduxerunt (quæ etiam honoraria appellatur) in judiciis frequentatur. Nam secundum gradum dignitatis, vitæque honestatem, crescit aut minuitur æstimationis injuriæ. qui gradus condemnationis, & in servili persona non immerito servatur: ut aliud in servo actore, aliud in mediis actus homine, aliud in vilissimo vel compedito jus [æstimationis] constituitur.

8 ¶ Sed & lex Cornelia de injuriis loquitur, & injuriarum actionem introduxit, quæ competit ob eam rem, quod se pulsatum quis, verberatumve, vel domum suam vi introitam esse dicat. Domum autem accipimus, sive in propria domo quis habitet, sive in conductâ, sive gratis, sive hospitio receptus sit.

9 ¶ Atrox injuria æstimatur vel ex facto, veluti si quis ab alio vulneratus sit, vel fustibus casus. vel ex loco: veluti si cui in theatro, vel in foro, vel conspectu prætoris injuria facta sit. vel ex persona: veluti si magistratus injuriam passus fuerit. vel si senatori ab humili persona injuria facta sit, aut parenti patronove fiat à liberis vel libertis. Aliter enim Senatoris & parentis patronique, aliter extranei & humilis personæ injuria æstimatur. Nonnunquam & locus vulneris atrocem injuriam facit, veluti si in oculo quis percussus fuerit. Parvi autem refert, utrum patrifamilias an filiofamilias talis injuria facta sit: nam & hæc atrox injuria æstimabitur.

10 ¶ In summa sciendum est, de omni injuria eum, qui passus est, posse vel criminaliter agere vel civiliter. Et si quidem civiliter agitur, æstimatione facta secundum quod dictum est, pœna reo imponitur. Sin autem criminaliter: officio judicis extraordinaria pœna reo irrogatur: hoc videlicet observando, quod Zenoniana constitutio introduxit, ut vii illustres, quique super eos sunt, & per procuratores possint actionem injuriarum criminaliter vel persequi

sequi vel suscipere, secundum ejus tenorem, qui ex ipsa manifestius apparet.

11 ¶ Non solum autem is **injuriarum** tenetur, qui fecit injuriam, id est, qui percussit: verum ille quoque tenetur, qui dolo fecit (injuriam,) vel qui procuravit; ut cui mala pugno percuteretur.

12 ¶ **Hæc actio dissimulatione aboletur.** & ideo si quis injuriam dereliquerit, hoc est, statim passus ad animum suum non revocaverit: postea ex pœnitentia remissam injuriam non poterit recolare.

## DE OBLIGATIONIBUS, QUÆ QUASI ex delicto nascuntur.

### TITULUS V.

**SI** **judex litem suam fecerit:** non proprio ex maleficio obligatus videtur. sed quia neque ex maleficio, neque ex contractu obligatus est, & utique peccasse aliquid intelligitur, licet per imprudentiam: ideo videtur quasi ex maleficio teneri; & in quantum de ea re æquum religioni judicantis videbitur, pœnam sustinebit.

1 ¶ Item is, ex cujus coenaculo, vel proprio ipsius, vel conducto, vel in quo gratis habitat, dejectum effusumve aliquid est, ita ut alicui noceret: quasi ex maleficio obligatus intelligitur. Ideo autem non proprie ex maleficio obligatus intelligitur, quia plerumque ob alterius culpam tenetur, aut servi, aut liberi. Cui similis est is, qui ea parte, qua vulgo iter fieri solet, id positum aut suspensum habet, quod potest (si ceciderit) alicui nocere: quo casu pœna decem aureorum constituta est. De eo vero, quod dejectum effusumve est, dupli, quantum damni datum sit, constituta est actio. Ob hominem vero liberum occisum, quinquaginta aureorum pœna constituitur. Si vero vivat, nocitumque ei esse dicatur: quantum ob eam rem æquum judici videtur, actio datur. Judex enim computare debet mercedes medicis præstitas, ceteraque impendia, quæ in curatione facta sunt; præterea operas, quibus caruit, aut cariturus est ob id, quod inutilis est factus.

2 ¶ Si filiusfamilias seorsum à patre habitaverit,  
&

& quid ex coenaculo ejus dejectum effusumve fuerit, five quid positum suspensumve habuerit, cujus casus periculosus est: Juliano placuit in patrem nullam [esse] actionem, sed cum ipso filio agendum esse. Quod & in filiofamilias judice observandum est, si litem suam fecerit.

3 ¶ Item exercitor navis, aut cauponæ, aut stabuli, de dolo aut furto, quod in navi aut caupona aut stabulo factum erit, quasi ex maleficio teneri videtur, si modo ipsius nullum est maleficio, sed alicujus eorum, quorum opera navem aut cauponam aut stabulum exercet. Cum enim neque ex maleficio, neque ex contractu sit adversus eum constituta hic actio, & aliquatenus culpæ reus est, quod opera malorum hominum uteretur: ideo quasi ex maleficio teneri videtur. In his autem casibus in factum actio competit: quæ hæredi quidem datur; adversus heredem autem non competit.

## DE ACTIONIBUS.

## TITULUS VI.

**S**uperest, ut de actionibus loquamur. Actio autem nihil aliud est, quam jus persequendi in judicio, quod sibi debetur.

1 ¶ Omnium autem actionum, quibus inter aliquos apud iudices arbitrosve de quacunque re queritur, summa divisio in duo genera deducitur, aut enim in rem sunt, aut in personam. Namque agit unusquisque, aut cum eo qui ei obligatus est, vel ex contractu, vel ex maleficio: quo casu proditæ sunt actiones in personam, per quas intendit adversarium ei dare aut facere oportere, & aliis quibusdam modis. Aut cum eo agit, qui nullo jure ei obligatus est, movet tamen alicui de aliqua re controversiam, quo casu proditæ actiones in rem sunt: veluti si rem corporalem possideat quis, quam Titius suam esse affirmet, possessor autem dominum ejus se esse dicat. nam si Titius suam esse intendat: in rem actio est.

2 ¶ Æque si agat [quis,] jus sibi esse fundo foris vel adibus utendi fruendi, vel per fundum vicini cundi agendi, vel ex fundo vicini aquam ducendi, in rem

rem actio est. Ejusdem generis est actio de jure prædiorum urbanorum: veluti si [quis] agat jus sibi esse altius ædes suas tollendi prospiciendive, vel projiciendi aliquid, vel immittendi tignum in vicini ædes. Contra quoque de usufructu, & de servitutibus prædiorum rusticorum, item prædiorum urbanorum, invicem quoque proditæ sunt actiones: ut si quis intendat jus non esse adversario utendi fruendi, eundi, agendi, aquamve ducendi: item altius tollendi prospiciendive, vel projiciendi immittendive: istæ quoque actiones in rem sunt, sed negativæ. Quod genus actionis in controversiis rerum corporalium proditum non est. Nam in his is agit, qui non possidet: ei vero, qui possidet, non est actio prodita, per quam neget rem actoris esse. Sane uno casu, qui possidet, nihilominus [is] actoris partes obtinet, sicut in latioribus Digestorum libris opportunius apparebit.

3 ¶ Sed istæ quidem actiones, quarum mentionem habuimus, & si quæ sunt similes, ex legitimis & civilibus causis descendunt. Aliæ autem sunt, quas prætor ex sua jurisdictione comparatas habet tam in rem, quam in personam, quas & ipsas necessarium est exemplis ostendere. [ut] ecce, Plerumque ita permittit [prætor] in rem agere, ut vel actor dicat se quasi usufrucipisse, quod non usufruciperit: vel ex diverso possessor dicat adversarium suum non usufrucipisse, quod usufruciperit.

4 ¶ Namque si cui ex justa causa res aliqua tradita fuerit (veluti ex causa emptionis, aut donationis, aut dotis, aut legatorum) [&] necdum ejus rei dominus effectus est: si ejus rei possessionem casu amiserit, nullam habet in rem directam actionem ad eam persequendam: quippe ita proditæ sunt jure civili actiones, ut quis dominium suum vindicet. sed quia sane durum erat, eo casu deficere actionem: inventa est à prætore actio, in qua dicit is qui possessionem amisit, eam rem se usufrucipisse, quam usu non cepit, & ita vindicat suam esse: quæ actio Publiciana appellatur, quoniam primum à Publicio prætore in edicto proposita est.

5 ¶ Rursus ex diverso, si quis cum Reipublicæ causa abesset, vel in hostium potestate esset, rem ejus,

qui

qui in civitate esset, usuceperit: permittitur domino, si possessor reipublicæ causa abesse desierit, tunc intra annum, rescissa usucapione, eam petere: id est, ita petere, ut dicat possessorem usu non cepisse, & ob id suam rem esse. Quod genus actionis quibusdam & aliis simili æquitate motus prætor accommodat, sicut ex latiore Digestorum seu Pandectarum volumine intelligere licet.

6 ¶ Item si quis in fraudem creditorum rem suam alicui tradiderit: bonis ejus à creditoribus possessis, ex sententia prædis permittitur ipsis creditoribus, rescissa traditione, eam rem petere, id est, dicere eam rem traditam non esse, & ob id in bonis debitoris mansisse.

7 ¶ Item Serviana & quasi Serviana (quæ etiam hypothecaria vocatur) ex ipsius prætoris jurisdictione substantiam capiunt. Serviana autem expetitur quis de rebus coloni; quæ pignoris jure pro mercedibus fundi ei tenentur. Quasi Serviana autem est, qua creditores pignora hypothecæve persequuntur. Inter pignus autem & hypothecam (quantum ad actionem hypothecariam attinet) nihil interest. nam de qua re inter creditorem & debitorem convenit, ut sit pro debito obligata: utraque hac appellatione continetur. sed in aliis differentia est. Nam pignoris appellatione eam proprie rem contineri dicimus, quæ simul etiam traditur creditori, maxime si mobilis sit. At eam quæ sine traditione, nuda conventionione tenetur, proprie hypothecæ appellatione contineri dicimus.

8 ¶ In personam quoque actiones ex sua jurisdictione propositas habet prætor: veluti de pecunia constituta. cui similis videbatur receptitia. Sed ex nostra constitutione (cum [&] si quid plenius habebat, hoc in actionem pecuniæ constitutæ transfusum est) [&] ea quasi supervacua jussa est cum sua auctoritate à nostris legibus recedere. Item prætor proposuit actionem de peculio servorum, filiorumque familiarum; & eam, ex qua quaeritur, an actor juraverit; & alias complures.

9 ¶ De constituta autem pecunia cum omnibus agitur, quicumque pro se vel pro alio soluturos se

**Constituerint: nulla** scilicet stipulatione interposita. Nam alioqui si stipulanti promiserint, jure civili teneantur.

10 ¶ **Actiones** autem de peculio, ideo **adversus patrem dominumve comparavit** prætor: quia licet ex contractu filiorum se, vorumve ipso jure non teneantur: æquum tamen est **peculio tenus** (quod veluti patrimonium est filiorum filiarumque, item servorum) condemnari eos.

11 ¶ **Item si quis postulante adversario juraverit, deberi sibi pecuniam, quam peteret, neque ei solvatur: iustissime accomodat ei talem actionem, per quam non illud quaritur, an ei pecunia debeatur, sed an juraverit.**

12 ¶ **Pœnales quoque actiones** prætor multas ex sua jurisdictione introduxit: veluti **adversus eum qui quid ex albo ejus corrupisset: & in eum, qui patronum vel parentem in jus vocasset, cum id non impetrasset: item adversus eum, qui vi exemerit eum, qui in jus vocaretur, cujusve dolo alius exemerit: & alias innumerabiles.**

13 ¶ **Præjudiciales actiones in rem esse videntur: quales sunt per quas quaritur, an aliquis liber, an libertus sit, vel de partu agnoscendo. Ex quibus fere una illa legitimam causam habet, per quam quaritur, an aliquis liber sit. ceteræ ex ipsius prætoris jurisdictione substantiam capiunt.**

14 ¶ **Sic itaque discretis actionibus, certum est, non posse actorem suam rem ita ab aliquo petere, si apparet eum dare oportere. Nec enim quod actoris est, id ei dari oportet: scilicet quia dari cuiquam id intelligitur, quod ita datur, ut ejus fiat. Nec res quæ [jam] actoris est, magis ejus fieri potest. Plane odio furum, quo magis pluribus actionibus teneantur, effectum est, ut extra pœnam dupli aut quadrupli, rei recipiendæ nomine fures etiam hac actione teneantur, si appareat eos dare oportere: quamvis sit adversus eos etiam [hæc] in rem actio, per quam rem suam quis esse petit.**

15 ¶ **Appellamus autem in rem quidem actiones, vindicationes: in personam vero actiones, quibus dare aut facere oportere intenditur, condictiones.**  
Con-



Condicere enim est denuntiare prisca lingua; nunc vero abusive dicimus conditionem actionem in personam esse, qua actor intendit dari sibi oportere. Nulla enim hoc tempore eo nomine denunciatio fit.

16 ¶ Sequens illa divisio est, quod *quædam actiones rei persequendæ gratia comparatæ sunt, quædam pœnæ persequendæ, quædam mixtæ sunt.*

17 ¶ *Rei persequendæ causa comparatæ, sunt omnes in rem actiones. Earum verò actionum, quæ in personam sunt, ex quidem, quæ ex contractu nascuntur, fere omnes rei persequendæ causa comparatæ videntur: veluti quibus mutuam pecuniam, vel in stipulatum deductam petit actor; item commodati, depositi, mandati, pro socio, ex empto, vendito, locato, conducto. Plane si depositi agatur eo nomine, quod tumultus, incendi, ruinæ, naufragii causa depositum sit: in duplū actionem prætor reddit: si modo cum ipso, apud quem depositum sit, aut cum hærede ejus de dolo ipsius agitur, quo casu mixta est actio.*

18 ¶ *Ex maleficiis vero proditæ actiones, aliæ tantum pœnæ persequendæ causa comparatæ sunt: aliæ tam pœnæ, quam rei persequendæ, & ob id mixtæ sunt. Pœnam tantum persequitur quis actione furti, sive enim manifesti agatur, quadrupli; sive non manifesti, dupli: de sola pœna agitur. nam ipsam rem propria actione persequitur quis, i. e. suam esse petens: sive fur ipse eam rem possideat, sive alius quilibet. Eo amplius adversus furem etiam conditio est [rei.]*

19 ¶ *Vi autem bonorum raptorum actio mixta est: quia in quadruplo rei persecutio continetur: pœna autem tripli est. Sed & legis Aquiliæ actio de damno injuria [dato,] mixta est: non solum si adversus inficiantem in duplum agatur, sed interdum & si in simplum quisque agat: veluti si quis hominem claudum aut luscum occiderit, qui in eo anno integer & magni precii fuerit: tanti enim damnatur, quanti is homo eo in anno plurimi fuerit, secundum jam traditam divisionem. Item mixta est actio contra eos, qui relicta sacrosanctis Ecclesiis, vel aliis venerabilibus locis, legati vel fideicommissi*

nomine, dare distulerint: usque adeo, ut etiam in iudicium vocarentur. tunc enim & ipsam rem vel pecuniam, quæ relicta est, dare compelluntur, & aliud tantum pro pœna: & ideo in duplum ejus fit condemnatio.

20 ¶ Quædam actiones multam causam obtinere videntur, tam in rem, quam in personam: qualis est familiae erciscundæ actio, quæ competit cohæredibus de dividenda hæreditate. Item communi dividundo, quæ inter eos redditur, inter quos aliquid commune est, ut id dividatur. Item finium regundorum actio, qua inter eos agitur, qui confines agros habent. In quibus tribus judiciis permittitur iudici rem alicui ex litigatoribus ex bono & æquo ad iudicare: & si unius pars prægravari videbitur, eum invicem certa pecunia alteri condemnare.

21 ¶ Omnes autem actiones, vel in simplum conceptæ sunt, vel in duplum, vel in triplum, vel in quadruplum: ulterius autem nulla actio extenditur.

22 ¶ In simplum agitur: veluti ex stipulatione, & mutui datione, ex empto, vendito, locato, conducto, mandato, & denique ex aliis quam plurimis causis.

23 ¶ In duplum agimus: veluti furti nec manifesti, damni injuriæ ex lege Aquilia, depositi ex quibusdam causis. Item servi corrupti: quæ competit in eum, cujus hortatu consiliove servus alienus fugerit, aut contumax adversus dominum factus est, aut luxuriose vivere cœperit, aut denique quolibet modo deterior factus sit. In qua actione earum etiam rerum, quas fugiendo servus abstulerit, æstimatio deducitur. Item ex legato, quod venerabilibus locis relictum est, secundum ea, quæ supra diximus.

24 ¶ Tripli vero [agimus,] cum quidam majorem vera æstimatione quantitatem in libello conventionis inserunt, ut ex hac causa viatores, id est, executores litium, ampliorem summam sportularum nomine exigent. tunc enim id, quod propter eorum causam damnum passus fuerit reus, [in] triplum ab actore consequetur: ut in hoc triplo etiam simplum, in quo damnum passus est, connumeretur. Quod nostra constitutio introduxit, quæ in nostro Codice ful-

fulget, quam proculdubio certum est ex lege condictionis emanare.

25 ¶ **Quadrupli autem agitur** : veluti **furti manifesti** : item **de eo**, quod **metus causa factum sit**, deque ea pecunia, quæ in hoc data sit, ut is cui datur calumniæ causa, negotium alicui faceret, vel non faceret. Item, ex lege condictionis nostra constitutio oritur, in quadruplum condemnationem imponens iis executoribus litium, qui contra nostræ constitutionis normam à reis quicquam exegerint.

26 ¶ **Sed furti quidem nec manifesti actio, & servi corrupti**, à cæteris, de quibus simul locuti sumus, eo differunt, quod hæ actiones omnimodo dupli sunt : at illæ, id est, **damni injuriæ ex lege Aquilia, & interdum depositi**, inficiatione duplicantur ; in consistentem autem in simplum dantur. Sed illa, quæ de his competit, quæ relicta venerabilibus locis sunt, non solum inficiatione duplicatur, sed etiam si distulerit relicti solutionem usquequo jussu magistratuum [nostrorum] conveniatur. In consistentem vero, antequam jussu magistratuum conveniatur, solveat, simpli redditur.

27 ¶ Item, **actio de eo quod metus causa factum sit**, à cæteris, de quibus simul locuti sumus, eo differt, quod ejus natura tacite continetur, ut qui **judicis jussu ipsam rem actori restituat**, absolvatur : quod in cæteris casibus non est ita : sed omnimodo quisque in quadruplum condemnatur, quod est & in furti manifesti actione.

28 ¶ **Actionum autem quædam bonæ fidei sunt**, quædam stricti juris. Bonæ fidei sunt hæ : ex empto, vendito, locato, conducto, negotiorum gestorum, mandati, depositi, pro socio, tutelæ, commodati, pignoratitia, familiæ erciscundæ, communi dividundo, præscriptis verbis, quæ de æstimato proponitur, & ea quæ ex permutatione competit, & hæreditatis petitio. Quamvis enim usque adhuc incertum erat, inter bonæ fidei judicia connumeranda hæreditatis petitio esset, an non : nostra tamen constitutio aperte eam esse bonæ fidei disposuit.

29 ¶ **Fuerat antea & rei uxoriæ actio una ex bonæ fidei judiciis**, sed cum plenior em esse ex stipulaz-

tu actionem inveniētes, omne jus, quod res uxoria antea habebat, cum multis divisionibus in actionem ex stipulatu, quæ de dotibus exigendis proponitur, transfulerimus; merito **rei uxoriæ actione sublata**, ex stipulatu [actio,] quæ pro eo introducta est, naturam bonæ fidei iudicii tantum in exactione dotis meruit, ut bonæ fidei sit, [sed] & tacitam ei dedimus hypothecam. Præferri autem aliis creditoribus in hypothecis tunc censuimus, cum ipsa mulier de dote sua experiatur; cuius solius providentia hoc induximus.

30 ¶ In bonæ fidei iudiciis libera potestas permitti videtur iudici ex bono & æquo æstimandi, quantum actori restitui debeat. In quo & illud continetur, ut si quid invicem præstare actorem oporteat, eo compensato, in reliquum is, cum quo actum est, debeat condemnari. Sed & in stricti juris iudiciis, ex rescripto divi Marci, opposita doli mali exceptione, compensatio inducebatur. Sed nostra constitutio easdem compensationes, quæ jure aperto nuntentur, latius introduxit, ut actiones ipso jure minuant, siue in rem, siue in personam, siue alias quascunque: **excepta sola depositi actione**, cui aliquid compensationis nomine opponi, sane iniquum esse credimus: ne sub prætextu compensationis, depositarum rerum quis ex actione defrauderetur.

31 ¶ Præterea quasdam actiones arbitrarias, id est, **ex arbitrio iudicis pendentes appellamus**, in quibus, nisi arbitrio iudicis is, cum quo agitur, actori satisfaciatur: veluti rem restituatur, vel exhibeat, vel solvat, vel ex noxali causa servum dedat: condemnari debeat. Sed istæ actiones, **tam in rem, quam in personam inveniuntur**. In rem, veluti Publiciana, Serviana de rebus coloni, quasi Serviana, quæ etiam hypothecaria vocatur. In personam, veluti quibus de eo agitur, quod [vi] aut metus causa, aut dolo malo factum est. Item cum id, quod certo loco premissum est, petitur. Ad exhibendum quoque actio ex arbitrio iudicis pendet. In his enim actionibus & cæteris similibus, permittitur iudici ex bono & æquo, secundum cuiusque rei, de qua actum est, naturam æstimare, quemadmodum actori satisfieri oporteat.

32 ¶ Curare autem debet iudex, ut omnino, quantum possibile ei sit, certæ pecuniæ vel rei sententiam ferat: etiam si de incerta quantitate apud eum actum est.

33 ¶ Si quis agens, [in] intentione sua plus complexus fuerit, quam ad eum pertineat: à causa cadebat, id est, rem amittebat: nec facile in integrum restituebatur à prætore, nisi minor erat viginti quinque annis. Huic enim, sicut in aliis causis, causa cognita succurrebatur, si lapsus iuventute fuerat: ita & in hac causa succurri solitum erat. Sane si tam magna causa iusti erroris interveniebat, ut etiam constantissimus quisque labi posset, etiam majori viginti quinque annis succurrebatur. veluti si quis totum legatum petierit: post deinde prolari fuerint codicilli, quibus aut pars legati adempta sit, aut quibusdam aliis legata data sint, quæ efficiebant, ut plus petiisse videretur petitor, quam dodrantem, atque ideo lege Falcidia legata minuebantur. Plus autem quatuor modis petitur: re, tempore, loco, [&] causa. Re, veluti si quis pro decem aureis, quæ ei debebantur, viginti petierit: aut si is, cujus ex parte res est, totam eam, vel maiorem partem suam esse intenderit. Tempore: veluti si quis ante diem, vel [ante] conditionem petierit. Qua enim ratione quis tardius solvit, quamolvere deberet, minusolvere intelligitur; eadem ratione, qui præmature petit, plus petere videtur. Loco plus petitur: veluti cum quis id, quod certo loco sibi [dari] stipulatus est, alio loco petit, sine commemoratione illius loci, in quo sibi dari stipulatus est: verbi gratia, si is, qui ita stipulatus fuerit, *Ephesi dare spondet*? Romæ pure intendat sibi dari oportere. Ideo autem plus petere intelligitur: quia utilitatem, quam haberet promissor, si Ephesi solveret, adimit ei pura intentione. Propter quam causam alio loco petenti arbitraria actio proponitur: in qua scilicet ratio habetur utilitatis, quæ promissori competitura fuisset, si illo loco solveret, (quod se soluturum spondit.) Quæ utilitas plerumque in mercibus maxima invenitur: veluti vino, oleo, frumento, quæ per singulas regiones diversa habent pretia. Sed & pecuniæ numeratæ non in omnibus

regionibus sub eisdem usuris fœnerantur. Si quis tamen Ephesi petat, id est, eo loco petat, quo ut sibi detur stipulatus est: pura actione recte agit: idque etiam prator monstrat: scilicet quia utilitas solvendi salva est promissori. Huic autem, qui loco plus petere intelligitur, proximus est is, qui causa plus petit. ut ecce, si quis ita à te stipuletur, *Hominem Stichum, aut decem aureos dare spondes?* deinde alterum petat, veluti hominem tantum aut decem aureos tantum. Ideo autem plus petere intelligitur, quia in eo genere stipulationis promissoris est electio, utrum pecuniam, an hominem solvere malit. Qui igitur pecuniam tantum, vel hominem tantum sibi dari oportere intendit, eripit electionem adversario: & eo modo suam quidem conditionem meliorem facit, adversarii vero [sui] deteriore. Quae de causa talis in ea re prodita est actio, ut quis intendat hominem Stichum, aut aureos decem sibi dari oportere: id est, ut eodem modo peteret, quo stipulatus est. Præterea, si quis generaliter hominem stipulatus sit, & specialiter Stichum petat: aut generaliter vinum stipulatus sit, & specialiter Campanum petat: aut generaliter purpuram stipulatus sit, deinde specialiter Tyriam petat: plus petere intelligitur: quia electionem adversario tollit, cui stipulationis jure liberum fuit, aliud solvere, quam quod peteretur. Quinetiam licet utilissimum sit, quod quis petat: nihilominus plus petere intelligitur: quia sæpe accidit, ut promissori facilius sit illud solvere, quod majoris pretii est. Sed hæc quidem antea in usu fuerant: postea vero lex Zenoniana & nostra iem coarctavit. Et si quidem tempore plus fuerit petiturum: quid statui oporteat, Zenonis divæ memoriæ loquitur constitutio: si autem quantitate, vel alio modo plus fuerit petiturum: [in] omne, si quod forte damnum ex hac causa acciderit ei, contra quem plus petiturum fuerit, commissæ tripli condemnatione (sicuti supra diximus) puniatur.

34 ¶ Si minus in intentione sua complexus fuerit actor, quam ad eum pertineat: veluti si cum ei decem [aurei] deberentur, quinque sibi dari oportere intenderit: aut [si] cum totus fundus ejus esset, partem

tem dimidiam suam esse petierit: sine periculo agit, in reliquum enim nihilominus iudex adversarium in eodem iudicio [ei] condemnat, ex constitutione divæ memoriæ Zenonis.

35 ¶ Si quis aliud pro alio intenderit: nihil eum periclitari placet, sed in eodem iudicio, cognita veritate, errorem suum corrigere [ei] permittitur: veluti si is, qui hominem Stichum petere deberet, Errotem petierit: aut si quis ex testamento dari sibi oportere intenderit, quod ex stipulatu debetur.

36 ¶ Sunt præterea quædam actiones, quibus non [semper] solidum, quod nobis debetur, persequimur: sed modo solidum persequimur, modo minus: ut ecce, si in peculium filii servive agamus. Nam si non minus in peculio sit, quam persequimur: in solidum dominus paterve condemnat: si vero minus inveniatur: eatenus condemnat iudex, quatenus in peculio sit. Quemadmodum autem peculium intelligi debeat, suo ordine proponemus.

37 ¶ Item si de dote [in] iudicio mulier agat: placet eatenus maritum condemnari debere, quatenus facere possit, id est, quatenus facultates ejus patiuntur. Itaque si dotis quantitati concurrant facultates ejus, in solidum damnatur: si minus, in tantum, quantum facere potest. Propter retentionem quoque dotis repetitio minuitur. Nam ob impensas in res dotales factas, marito [quasi] retentio concessa est: quia ipso jure necessariis sumptibus dos minuitur, sicut ex latioribus Digestorum libris cognoscere licet.

38 ¶ Sed & si quis cum parente suo patronove agat: item si socius cum socio, iudicio societatis agat: non plus actor consequitur, quam adversarius ejus facere potest. Idem est si quis ex donatione sua conveniatur.

39 ¶ Compensationes quoque oppositæ plerumque efficiunt, ut minus quisque consequatur, quam ei debeatur. Nam ex bono & æquo habita ratione ejus, quod invicem actorem ex eadem causa præstare oportet, [iudex] in reliquum eum, cum quo actum est [condemnat,] sicut jam dictum est.

40 ¶ Cum eo quoque, qui creditoribus suis bonis

cessit, si postea aliquid adquisierit, quod idoneum emolumentum habeat, ex integro in id, quod facere potest, creditores experiuntur. inhumanum enim erat spoliatum fortunis suis, in solidum damnari.

QUOD CUM EO, QUI IN ALIENA POTESTATE EST, NEGOTIUM GESTUM ESSE DICITUR.

### TITULUS VII.

**Q**uia [tamen] superius mentionem habuimus de actione, qua in peculium filiorum familiarum servorumque agitur: opus est, ut de hac actione & de ceteris, quæ eorundem nomine in parentes dominosve dari solent, diligentius admoneamus. Et quia, siue cum servis negotium gestum sit, siue cum his, qui in potestate parentum sunt, eadem fere iura servantur: ne verbosa fiat disputatio, dirigamus sermonem in personam servi dominique, idem intellecturi de liberis quoque & parentibus, quorum in potestate sunt. Nam si quid in his proprie servetur, separatim ostendemus.

1 ¶ Si igitur jussu domini cum servo negotium gestum erit: in solidum prætor adversus dominum actionem pollicetur: scilicet quia is, qui ita contrahit, fidem domini sequi videtur.

2 ¶ Eadem ratione prætor duas alias in solidum actiones pollicetur: quarum altera exercitoria, altera institoria appellatur. Exercitoria tunc habet locum, cum quis servum suum magistrum navi præposuerit, & quid cum eo ejus rei gratia, cui præpositus erit, contractum fuerit. ideo autem exercitoria vocatur, quia exercitor is appellatur, ad quem quotidianus navis quaestus pertinet. Institoria tunc locum habet, cum quis tabernæ forte, aut cuilibet negotiationi servum suum præposuerit, & quid cum eo ejus rei causa, cui præpositus erit, contractum fuerit. ideo autem institoria appellatur, quia qui negotiationibus præponuntur, institores vocantur. Istas tamen duas actiones prætor reddit, & si liberum quis hominem, aut alienum servum navi, aut tabernæ, aut cuilibet negotiationi præposuerit: scilicet



licet quia eadem æquitatis ratio etiam eo casu interveniat.

3 ¶ Introduxit & aliam actionem prætor, quæ tributoria vocatur. Namque si servus in peculiari merce sciente domino negotietur, & quid cum eo ejus rei causa contractum erit: ita prætor jus dicit, ut quicquid in his mercibus erit, quodque inde receptum erit, id inter dominum, si quid ei debebitur, & ceteros creditores, pro rata portione distribuatur. & [ideo tributoria vocatur] quia ipsi domino distributionem prætor permittit. Nam si quis ex creditoribus queratur quasi minus ei tributum sit, quam oportuerit, hanc ei actionem accommodat, quæ tributoria appellatur.

4 ¶ Præterea introducta est actio de peculio, deque eo, quod in rem domini versum erit: ut quamvis sine voluntate domini negotium gestum erit, tamen siue quid in rem ejus versum fuerit, id totum præstare debeat: siue quid non sit in rem ejus versum, id eatenus præstare debeat, quatenus peculium patitur. In rem autem domini versum intelligitur, quicquid necessario in rem ejus impenderit servus: veluti si mutuatus pecuniam creditoribus ejus solverit, aut ædificia ruentia fulserit, aut familiæ frumentum emerit, vel etiam fundum, aut quamlibet aliam rem necessariam mercatus erit. Itaque si ex decem puta aureis, quos servus tuus à Titio mutuo accepit, creditori tuo quinque aureos solverit, reliquos vero quinque quolibet modo consumpserit: pro quinque [quidem] in solidum damnari debes: pro cæteris vero quinque eatenus, quatenus in peculio sit. Ex quo scilicet apparet, si toti decem aurei in rem tuam versi fuerint, totos decem aureos Titium consequi posse. Licet enim una est actio, quæ de peculio, deque eo, quod in rem domini versum sit, agitur: tamen duas habet condemnationes. Itaque judex, apud quem de ea actione agitur, ante dispicere solet, an in rem domini versum sit: nec aliter ad peculii æstimationem transit, quam aut nihil in rem domini versum intelligatur, aut non totum. Cum autem queritur, quantum in peculio sit: ante deducitur, quicquid servus domino, eive,

qui in potestate ejus sit, debet: & quod superest, id solum peculium intelligitur. Aliquando tamen id, quod ei debet servus, qui in potestate domini sit, non deducitur ex peculio: veluti si is in ipsius peculio sit. quod eo pertinet, ut si quis vicario suo servus debeat: id ex peculio ejus non deducatur.

5 ¶ Ceterum dubium non est, quin is quoque qui jussu domini contraxerit, cuique institoria vel exercitoria actio competit: de peculio, deque eo, quod in rem domini versum est, agere possit. Sed erit stultissimus, si omissa actione, qua facillime solidum ex contractu consequi possit, se ad difficultatem perducatur probandi in rem domini versum esse, vel habere servum peculium, & tantum habere, ut solidum sibi solvi possit. Is quoque, cui tributoria actio competit, &que de peculio, & de in rem verso agere potest. Sed sane huic modo tributoria expedit agere, modo de peculio, & de in rem verso. Tributoria ideo expedit agere, quia in ea domini conditio præcipua non est, id est, quod domino debetur, non deducitur, sed ejusdem juris est dominus, cujus & ceteri creditores. At in actione de peculio ante deducitur, quod domino debetur: & in id, quod reliquum est, creditori dominus condemnatur. Rursus de peculio ideo expedit agere, quod in hac actione totius peculii ratio habetur: at in tributoria, ejus tantum, quo negotiatur. Et potest quisque tertia forte parte peculii, aut quarta, vel etiam minima negotiari: majorem autem partem in prædiis vel mancipiis, aut scænebri pecunia habere. Prout ergo expedit, ita quisque vel hanc actionem vel illam eligere debet. Certe qui potest probare in rem domini versum esse: de in rem verso agere debet.

6 ¶ Quæ diximus de servo & domino, eadem intelligimus & de filio & filia, & nepote & nepte, & patre avove, cujus in potestate sunt.

7 ¶ Illud proprie servatur in eorum persona, quod Senatusconsultum Macedonianum prohibuit, mutuas pecunias dare eis, qui in potestate parentis sunt: & si qui crediderit, denegatur actio tam adversus ipsum filium filiamve, nepotem neptemve (sive adhuc in po-

potestate sint, five morte parentis, vel emancipatione suæ potestatis esse cœperint) quam adversus patrem avumve: five eos habeat adhuc in potestate, five emancipaverit. Quæ ideo Senatus prospexit, quia sæpe onerati ære alieno creditarum pecuniarum, quas in luxuriam consumeabant; vitæ parentum insidiabantur.

8 ¶ Illud in summa admonendi sumus, id, quod jussu patris dominive contractum fuerit, quodque in rem ejus versum erit: directo quoque posse à patre dominove condici, tanquam si principaliter cum ipso negotium gestum esset. Ei quoque, qui exercitoria vel institoria actione tenetur, directo posse condici placet: quia hujus quoque jussu contractum intelligitur.

## DE NOXALIBUS ACTIONIBUS.

### TITULUS VIII.

**EX maleficiis servorum:** veluti si furtum fecerint, aut bona rapuerint, aut damnum dederint, aut injuriam commiserint: **noxales actiones prodita sunt,** quibus domino damnato permittitur, aut litis estimationem sufferre, aut ipsum hominem noxæ dedere.

1 ¶ Noxa autem, est [ipsum] corpus quod nocuit, id est, servus: **noxia ipsum maleficiū,** veluti furtum, damnum, rapina, injuria.

2 ¶ Summa autem ratione permissum est noxæ deditioe fungi. Namque erat iniquum, nequitiam eorum ultra ipsorum corpora dominis damnosam esse.

3 ¶ Dominus noxali judicio servi sui nomine conventus, servum auctori noxæ dedendo liberatur: nec minus in perpetuum ejus servi dominium à domino transfertur. Sin autem damnum ei, cui deditus est, [servus] refarcierit quæsitæ pecunia: auxilio prætoris invito domino manumittetur.

4 ¶ Sunt autem **constitutæ noxales actiones aut legibus, aut edicto prætoris.** Legibus: veluti furti ex lege duodecim tabularum, damni injuriæ ex lege Aquilia. Edicto prætoris: veluti injuriarum, & vi bonorum raptorum.

5 ¶ **Omnis autem noxalis actio caput sequitur.**

Nam si servus tuus noxam commiserit: quamdiu in tua potestate sit, tecum est actio. Si autem in alterius potestatem pervenerit: cum illo incipit actio esse. At si manumissus fuerit: directo ipse tenetur, & extinguitur noxæ deditio. Ex diverso quoque directa actio noxalis esse incipit. Nam si liber homo noxam commiserit, & is servus tuus esse cœperit (quod quibusdam casibus effici primo libro tradidimus) incipit tecum esse noxalis actio, quæ ante directa fuisset.

6 ¶ Si servus domino noxiam commiserit: actio nulla nascitur. Namque inter dominum & eum, qui in potestate ejus est, nulla obligatio nasci potest. Ideoque & si in alienam potestatem servus pervenerit, aut manumissus fuerit: neque cum ipso, neque cum eo, cujus nunc in potestate sit, agi potest. Unde si alienus servus noxiam tibi commiserit, & is postea in potestate tua esse cœperit, interdicatur actio: quia in eum casum deducta sit, in quo consistere non potuit. Ideoque licet exierit de tua potestate, agere non potes: quemadmodum si dominus in servum suum aliquid commiserit; nec si manumissus aut alienatus fuerit, servus ullam actionem contra dominum habere potest.

7 ¶ Sed veteres quidem hoc in filiis familiarum masculis & fœminis admiscere: nova autem hominum conversatio hujusmodi asperitatem recte respuendam esse existimavit, & ab usu communi hoc penitus recessit. Quis enim patiatur filium suum, & maxime filiam, in noxam alii dare: ut pene per [filii] corpus pater magis, quam filius periclitetur: cum in filiabus etiam pudicitix favor hoc bene excludat? Et ideo placuit in servos tantummodo noxales actiones esse proponendas: cum apud veteres legum commentatores invenerimus sæpius dictum, ipsos filios familiarum pro suis delictis posse conveniri.

SI QUADRUPES PAUPERIEM  
fecisse dicatur.

#### TITULUS IX.

A Nimalium nomine, quæ ratione carent, si qua lascivia, aut pavore, aut feritate pauperiem fecerint:

**rint: noxalis actio** lege duodecim tabularum **prodita est.** Quæ animalia si noxæ dedantur, proficiunt reo ad liberationem: quia ita lex duodecim tabularum scripta est, ut puta, *Si equus calcitransus calce percusserit, aut bos cornu petere solitus [cornu] petierit.* Hæc autem actio in iis, **quæ contra naturam moventur**, locum habet. Caterum **si genitalis sit feritas: cessat actio.** Denique si ursus fugerit à domino, & sic nocuerit: non potest quondam dominus conveniri: quia desuit dominus esse, ubi fera evasit. **Pauperies autem est damnum sine injuria facientis datum.** Nec enim potest animal injuriam fecisse dici, quod sensu caret. Hæc quidem ad noxalem pertinet actionem.

**I ¶** Caterum **sciendum est**, ædilitio edicto prohiberi nos canem, verrem, aprum, ursum, leonem ibi habere, qua vulgo iter fit, & si adversus ea factum erit, & nocitum libero homini esse dicatur, quod bonum & æquum judici videtur, tanti dominus condemnatur. cæterarum [vero] rerum, quanti damnum datum sit, dupli. Præter has autem ædilitias actiones, & de pauperie locum habebit. Numquam enim actiones, præsertim pœnales, de eadem re concurrentes, alia aliam consumit.

## DE IIS, PER QUOS AGERE POSSUMUS.

### TITULUS X:

**N**unc admonendi sumus, agere posse quemlibet hominem, aut suo nomine, aut alieno. Alienò: **veluti procuratorio, tutorio, curatorio:** cum olim in usu fuisset, alterius nomine agere non posse, nisi pro populo, pro libertate, pro tutela. Præterea lege Hostilia permissum erat furti agere eorum nomine, qui apud hostes essent, aut reipublicæ causa abessent, quive in eorum cujuscunque tutela essent. Sed quia hoc non minimam incommoditatem habebat, quod alieno nomine neque agere, neque excipere actionem licebat: cœperunt homines per procuratores litigare. Nam & morbus, & ætas, & necessaria peregrinatio, itemque aliarum multarum causarum sæpe hominibus impedimento sunt, quo minus rem suam ipsi exequi possint.

1 ¶ Procurator neque certis verbis, neque praesente [semper] adversario, imo plerumque eo ignorante constituitur. Cuicumque enim permiseris rem tuam agere, aut defendere, is tuus procurator intelligitur.

2 ¶ Tutores & curatores quemadmodum constituentur, primo libro expositum est.

## DE SATISDATIONIBUS.

### TITULUS XI.

Satisfactionum modus alius antiquitati placuit, alium novitas per usum amplexa est. Olim enim si in rem agebatur, satisfacere possessor compellebatur: ut si victus [esset,] nec rem ipsam restitueret, nec litis aestimationem, potestas esset petitori, aut cum eo agendi, aut cum fidejussoribus ejus. quæ satisfactio appellatur *judicatum solvi*. Unde autem sic appelletur, facile est intelligere. Namque stipulabatur quis, ut solveretur sibi, quod fuisset judicatum. Multo magis is, qui in rem actione conveniebatur, satisfacere cogebatur, si alieno nomine judicium accipiebat. Ipse autem, qui in rem agebat, si suo nomine petebat, satisfacere non cogebatur. Procurator vero si in rem agebat: satisfacere jubebatur, rem ratam dominum habiturum. Periculum enim erat, ne iterum dominus de eadem re experiretur. Tutores [vero] & curatores eodem modo, quo & procuratores satisfacere debere, verba edicti faciebant: sed aliquando his agentibus satisfactio remittebatur. Hac ita [erant,] si in rem agebatur.

1 ¶ Si vero in personam: ab actoris quidem parte eadem obtinebant, quæ diximus in actione, quæ in rem agitur. ab ejus vero parte, cum quo agitur, siquidem alieno nomine aliquis interveniret, omnimodo satisfaceret; quia nemo defensor in aliena re sine satisfactione idoneus esse creditur. Quod si proprio nomine aliquis judicium accipiebat in personam: *judicatum solvi* satisfacere non cogebatur.

2 ¶ Sed hodie hæc aliter observantur. Sive enim quis in rem actione convenitur, sive personali suo nomine: nullam satisfactionem pro litis aestimatione dare

dare compellitur: sed pro sua tantum persona, quod in iudicio permaneat usque ad terminum litis, vel committitur suæ promissioni cum jurejurando (quam juratoriam cautionem vocant) vel nudam promissionem, vel satisfactionem pro qualitate personæ suæ dare compellitur.

3 ¶ Sin autem per procuratorem lis vel inferatur, vel suscipitur: in actoris quidem persona, si non mandatum actis insinuatum est, vel præsens dominus litis in iudicio procuratoris sui personam confirmaverit: ratam rem dominum habiturum, satisfactionem procurator dare compellitur. eodem observando, & si tutor, vel curator, vel aliæ tales personæ, quæ alienarum rerum gubernationem receperunt, litem quibusdam per alium inferunt.

4 ¶ Sivero aliquis convenitur: si quidem præsens procuratorem dare paratus est: potest vel ipse in iudicium venire, & sui procuratoris personam per *judicatum solvi* satisfactionem solenni stipulatione firmare, vel extra iudicium satisfactionem exponere, per quam ipse sui procuratoris fidejussor existat pro omnibus *judicatum solvi* satisfactionis clausulis. ubi & de hypotheca suarum rerum convenire compellitur: sive in iudicio promiserit, sive extra iudicium caverit: ut tam ipse, quam hæredes ejus obligentur. Alia *insuper* cautela, vel satisfactione propter personam ipsius exponenda, quod tempore sententiæ recitandæ in iudicium veniet: vel si non venerit, omnia dabit fidejussor, quæ in condemnatione continentur, nisi fuerit provocatum.

5 ¶ Si vero reus præsto ex quacunque causa non fuerit, & alius velit defensionem ejus subire: nulla differentia inter actiones in rem vel personales introducenda, potest hoc facere: ita tamen, ut satisfactionem *judicatum solvi*, pro litis æstimatione præstet. Nemo enim secundum veterem regulam (ut jam dictum est) alienæ rei sine satisfactione defensor idoneus intelligitur.

6 ¶ Quæ omnia apertius & perfectius à quotidianis iudiciorum usu in ipsis rerum documentis apparent.

7 ¶ Quam formam non solum in hac regia urbe, sed [etiam] in omnibus nostris provinciis (etsi propter

pter imperitiam forte aliter celebratur) obtinere censemus: quum necesse sit, omnes provincias, caput omnium nostrarum civitatum, id est, hanc regiam urbem, ejusque observantiam sequi.

DE PERPETUIS ET TEMPORALIBUS  
actionibus, & quæ ad hæredes & in hæredes  
transeunt.

### TITULUS XII.

**H**Oc loco admonendi sumus, eas quidem actiones, quæ ex lege, senatusve consulto, sive ex sacris constitutionibus proficiuntur: perpetuo solere antiquitus competere, donec sacra constitutiones: tam in rem, quam in personam actionibus certos fines dederunt: eas vero, quæ ex propria prætoris jurisdictione pendent, plerumque intra annum vivere. nam & ipsius prætoris intra annum erat imperium. Aliquando tamen & in perpetuum extenduntur: id est, usque ad finem ex constitutionibus introductum: quales sunt ex, quas bonorum possessori, cæterisque qui hæredis loco sunt, accomodat. Furti quoque manifesti actio, quamvis ex ipsius prætoris jurisdictione proficiatur: tamen perpetuo datur. absurdum enim esse existimavit anno eam terminari.

**I** ¶ Non autem omnes actiones quæ in aliquem aut ipso jure competunt, aut à prætore dantur: & in hæredem æque competunt, aut dari solent. Est enim certissima juris regula, ex maleficiis pœnales actiones in hæredem [rei] non competere: [veluti] furti, vi bonorum raptorum, injuriarum, damni injuriæ. Sed hæredibus hujusmodi actiones competunt, nec denegantur, excepta injuriarum actione, & si qua alia similis inveniatur. Aliquando tamen etiam ex contractu actio contra hæredem non competit: veluti cum testator dolose versatus sit, & ad hæredem ejus nihil ex eo dolo pervenit. Pœnales autem actiones, quas supra diximus, si ab ipsis principalibus personis fuerint contestatæ, & hæredibus dantur, & contra hæredes transeunt.

**2** ¶ Superest, ut admoneamus, quod si ante rem ju-



judicatam is, cum quo actum est, satisfaciat auctori: officio judicis convenit eum absolvere, licet in ea causa fuisset judicii accipiendi tempore, ut damnari deberet. & hoc est, quod antea vulgo dicebatur, omnia judicia absolutoria esse.

## DE EXCEPTIONIBUS.

## TITULUS XIII.

**S**equitur, ut de exceptionibus dispiciamus. **Comparata** autem sunt exceptiones defendendorum eorum gratia, cum quibus agitur. Sæpe enim accidit, ut licet ipsa persecutio, qua actor experitur, justa sit: tamen iniqua sit adversus eum, cum quo agitur.

1. ¶ Verbi gratia, si metu coactus, aut dolo inductus, aut errore lapsus, stipulanti Titio promissisti, quod non debueras [promittere:] palam est, jure civili te obligatum esse: & actio, qua intenditur dare te oportere, efficax est: sed iniquum est te condemnari. Ideoque datur tibi exceptio, quod metus causa, aut doli mali, aut in factum, composita ad impugnandam actionem.

2. ¶ Idem juris est, si quis [quasi] credendi causa pecuniam à te stipulatus fuerit, neque numeraverit. Nam, eam pecuniam à te petere posse eum, certum est. dare enim te oportet: quum ex stipulatione tenearis. Sed quia iniquum est, eo nomine te condemnari: placet exceptione pecuniæ non numeratæ te defendi debere. cujuscumque tempora nos (secundum quod jam superioribus libris scriptum est) constitutione nostra coarctavimus.

3. ¶ Præterea debitor si pactus fuerit cum creditore, ne à se pecunia peteretur, nihilominus obligatus manet: quia pacto convento obligationes non omnino dissolvuntur: qua de causa efficax est adversus eum actio, quam actor intendit, si apparet eum dare oportere. sed quia iniquum est, contra pactum eum condemnari: defenditur per exceptionem pacti conventi.

4. ¶ Æque si debitor creditore deferente juraverit, nihil se dare oportere: adhuc obligatus permanet, sed quia iniquum est de perjurio queri: defenditur per

per exceptionem jurisjurandi. In iis quoque actionibus, quibus in rem agitur, æque necessariæ sunt exceptiones: veluti si petitore deferente possessor juraverit eam rem suam esse, & nihilominus petitor eandem rem vindicet. licet enim verum sit, quod intendit, id est, rem ejus esse: iniquum tamen est possessorem condemnari.

5 ¶ Item si in judicio tecum actum fuerit, siue in rem, siue in personam: nihilominus obligatio durat: & ideo ipso jure de eadem re postea adversus te agi potest: sed debes per exceptionem rei judicatz adjuvari.

6 ¶ Hæc exempli causa retulisse sufficiat. Alioqui quam ex multis variisque causis exceptiones necessariæ sint; ex latioribus Digestorum seu Pandectarum libris intelligi potest.

7 ¶ Quarum quædam ex legibus, vel ex iis, quæ legis vicem obtinent, vel ex ipsius prætoris jurisdictione substantiam capiunt.

8 ¶ Appellantur autem exceptiones. alix perpetuæ & peremptoriæ, alix temporales & dilatoriæ.

9 ¶ Perpetuæ & peremptoriæ sunt, quæ semper agentibus obstant, & semper rem, de qua agitur, perimunt: qualis est exceptio doli mali, & quod metus causa factum est, & pacti conventi, cum ita convenerit, ne omnino pecunia peteretur.

10 ¶ Temporales atque dilatoriæ sunt, quæ ad tempus nocent, & temporis dilationem tribuunt: qualis est pacti conventi, cum ita convenerit, ne intra certum tempus ageretur, veluti intra quinquennium. nam finito eo tempore non impeditur actor rem exequi. Ergo ii, quibus intra certum tempus agere volentibus objicitur exceptio aut pacti conventi, aut alia similis: differre debent actionem, & post tempus agere. Ideo enim & dilatoriæ istæ exceptiones appellantur. Alioqui si intra tempus egerint, objectaque sit exceptio: neque eo judicio quicquam consequabantur, propter exceptionem; neque post tempus olim agere poterant: cum temere rem in judicium deducebant, & consumebant. qua ratione rem amittebant. Hodie autem non ita stricte hoc procedere volumus; sed eum, qui ante tempus pactio-

tionis vel obligationis litem inferre ausus sit, Zenonianæ constitutioni subiacere censemus, quam sacratissimus legislator de iis, qui tempore plus petierint, protulit: ut & inducias, quas ipse actor sponte indulserit, vel quas natura actionis continet, si contempserit: in duplum habeant ii, qui talem injuriam passi sunt: & post eas finitas non aliter litem suscipiant, nisi omnes expensas litis antea acceperint: ut actores tali poena perterriti, tempora litium doceantur observare.

II ¶ Præterea etiam ex persona sunt dilatoriæ exceptiones, quales sunt procuratoriæ: veluti si per militem aut per mulierem agere quis velit. Nam militibus, nec pro patre, vel matre, vel uxore, nec ex sacro rescripto procuratorio nomine experiri conceditur: suis vero negotiis superesse sine offensa [militaris] disciplinæ possunt. Eas vero exceptiones, quæ olim procuratoribus propter infantiæ vel dantis, vel ipsius procuratoris opponebantur: cum in judiciis frequentari nullo modo perspeximus, conquiescere sancimus: ne dum de iis altercatur, ipsius negotii discipatio proteletur.

## DE REPLICATIONIBUS.

## TITULUS XIV.

Interdum evenit, ut exceptio, quæ prima facie iusta videtur, [tamen] inique noceat. quod cum accidit: alia allegatione opus est, adjuvandi actoris gratia: quæ replicatio vocatur: quia per eam replicatur, atque resolvitur jus exceptionis. veluti cum pactus est aliquis cum debitore suo, ne ab eo pecuniam petat; deinde postea in contrarium pacti sunt, id est, ut creditori petere liceat: si creditor agat, & excipiat debitor, ut ita demum condemnetur, si non convenerit, ne eam pecuniam creditor petat: nocet ei exceptio. convenit enim ita. namque nihilominus hoc verum manet, licet postea in contrarium pacti sunt. sed quia iniquum est creditorem excludi, replicatio ei dabitur ex posteriore pacto convento.

I ¶ Rursus interdum evenit, ut replicatio, quæ

prima facie iusta est, inique noceat. quod cum accidit, alia allegatione opus est, adjuvandi rei gratia, quæ duplicatio vocatur.

2 ¶ Et si rursus ea prima facie iusta videatur, sed propter aliquam causam actori inique noceat: rursus alia allegatione opus est, qua actor adjuvetur: quæ dicitur triplicatio.

3 ¶ Quorum omnium exceptionum usum interdum ulterius, quam diximus, varietas negotiorum introducit, quas omnes apertius ex Digestorum latiore volumine facile est agnoscere.

4 ¶ Exceptiones autem, quibus debitor defenditur, plerumque accommodari solent etiam fidejussoribus ejus, & recte: quia quod ab iis petitur, id ab ipso debitore peri videtur: quia mandati iudicio redditurus est eis, quod [ii] pro eo solverint. Qua ratione, & si de non petenda pecunia pactus quis cum reo fuerit, placuit perinde succurrendum esse per exceptionem pacti conventi illis quoque, qui pro eo obligati sunt, ac si etiam cum ipsis pactus esset, ne ab eis ea pecunia peteretur. Sane quædam exceptiones non solent his accommodari. Ecce enim debitor, si bonis suis cesserit, & cum eo creditor experitur: defenditur per exceptionem, si bonis cesserit. Sed hæc exceptio fidejussoribus non datur: ideo scilicet, quia qui alios pro debitore obligat, hoc maxime prospicit, ut cum facultatibus lapsus fuerit debitor, possit ab iis, quos pro eo obligavit, suum consequi.

## DE INTERDICTIS.

### TITULUS XV.

SEquitur, ut dispiciamus de interdictis seu actionibus, quæ pro his exercentur. Erant autem interdicta formæ atque conceptiones verborum, quibus prætor aut jubebat aliquid fieri, aut fieri prohibebat: quod tunc maxime fiebat, cum de possessione, aut quasi possessione inter aliquos contendebatur.

1 ¶ Summa autem divisio interdictorum hæc est: quod aut prohibitoria sunt, aut restitutoria, aut exhibitoria. Prohibitoria sunt, quibus prætor vetat aliquid fieri; veluti vim sine vitio possidenti: vel mortuum

tuum inferenti, quo ei jus erat inferendi: vel in sacro loco ædificari: vel in flumine publico ripave ejus aliquid fieri, quo pejus navigetur. **Restitutoria** sunt, quibus restitui aliquid jubet, veluti bonorum possessori possessionem eorum, quæ quis pro hæredē, aut pro possessore possidet [ex ea hæreditate:] aut cum jubet ei, qui videt possessione fundi dejectus sit, restitui possessionem. **Exhibitoria** sunt, per quæ jubet exhiberi: veluti cum, cujus de libertate agitur; aut libertum, cui patronus operas indicere velit; aut parenti liberos, qui in potestate ejus sunt. **Sunt** tamen, qui putent, proprie interdicta ea vocari, quæ prohibitoria sunt, quia interdicerē sit denuntiari & prohibere: **restitutoria** autem & **exhibitoria**, proprie decreta vocari. Sed tamen obtinuit omnia interdicta appellari: quia inter duos dicuntur.

2 ¶ Sequens divisio interdictorum hæc est, quod quædam adipiscendæ possessionis causa comparata sunt, quædam retinendæ, quædam recuperandæ.

3 ¶ Adipiscendæ possessionis causa interdictum accommodatur bonorum possessori, quod appellatur, *quorum bonorum*, ejusque vis & potestas hæc est: ut quod ex his bonis quisque, quorum possessio alicui data est, pro hærede aut pro possessore possideat, id ei, cui bonorum possessio data est, restituere debeat. *Pro hærede* autem possidere videtur, qui putat se hæredem esse. *Pro possessore* is possidet, qui nullo jure rem hæreditariam, vel etiam totam hæreditatem, sciens ad se non pertinere, possidet: Ideo autem adipiscendæ possessionis vocatur interdictum: quia ei tantum utile est, qui nunc primum conatur adipisci rei possessionem. Itaque si quis adeptus possessionem, amiserit eam: hoc interdictum ei inutile est. Interdictum quoque, quod appellatur *Salvianum*, adipiscendæ possessionis causa comparatum est: eoque utitur dominus fundi de rebus coloni, quas is pro mercedibus fundi pignori furas pepigisset.

4 ¶ Retinendæ possessionis causa comparata sunt interdicta, *uti possidetis*, & *utrubi*: cum ab utraque parte de proprietate alicujus rei controversia sit: & ante quaratur uter ex litigatoribus possidere, & uter petere debeat. Namque nisi ante exploratum fuerit, utrius

utrius eorum possessio sit; non potest petitoria actio institui: quia & civilis, & naturalis ratio facit, ut alius possideat, & alius à possidente petat. Et quia longe commodius est [& potius] possidere, quam petere: ideo plerumque & fere semper ingens existit contentio de ipsa possessione. Commodum autem possidendi in eo est, quod etiam si ejus res non sit, qui possidet; si modo actor non potuerit suam esse probare, remanet [in] suo loco possessio: propter quam causam cum obscura sunt utriusque jura, contra petitorum judicari solet. Sed interdicto quidem *uti possidetis*, de fundi vel adium possessione *contenditur*: *utrubi* vero *interdicto*, de rerum *mobili*um possessione. Quorum vis ac potestas plurimam inter se differentiam apud veteres habebat. Nam *uti possidetis* interdicto is vincebat, qui interdicti tempore possidebat: si modo nec vi, nec clam, nec precario nactus fuerat ab adversario possessionem: etiam si alium vi expulerat, aut clam arripuerat alienam possessionem, aut precario rogaverat aliquem, ut sibi possidere liceret. *utrubi* vero interdicto is vincebat, qui majore parte ejus anni, nec vi, nec clam, nec precario ab adversario possidebat. *Hodie* tamen aliter observatur. Nam *utriusque* interdicti *potestas* (quantum ad possessionem pertinet) *exaquare* est: *uti ille vincat*, [&] in re soli, & in re mobili, qui possessionem nec vi, nec clam, nec precario ab adversario litis contestata tempore detinet.

§ ¶ Possidere autem videtur quisque, non solum si ipse possideat, sed & si ejus nomine aliquis in possessione sit, licet is ejus juri subiectus non sit; qualis est colonus & inquilinus. Per eos quoque, apud quos deposuerit quis, aut quibus commodaverit, ipse possidere videtur. Et hoc est, quod dicitur, retinere possessionem posse aliquem per quemlibet, qui ejus nomine sit in possessione. *Quinetiam animo quoque solo retineri possessionem placet*: id est, ut quamvis neque ipse sit in possessione, neque ejus nomine alius: tamen si non relinquenda possessionis animo, sed postea reversurus inde discesserit, retinere possessionem videatur. Adipisci vero possessionem per quos aliquis potest, secundo libro ex-

posuimus. Nec ulla dubitatio est, quia animo solo adipisci possessionem nemo possit.

6 ¶ Recuperandæ possessionis causa solet interdici, si quis ex possessione fundi vel ædium vi dejectus fuerit: Nam ei proponitur interdictum *unde vi*, per quod is, qui dejecit, cogitur ei restituere possessionem: licet is ab eo, qui vi dejecit, vi vel clam vel precario possideat. Sed ex constitutionibus sacris (ut supra diximus) si quis rem per vim occupaverit, si quidem in bonis ejus est, dominio ejus privatur. si aliena: post ejus restitutionem, etiam æstimationem [rei] dare vim passo compellitur. qui autem aliquem de possessione per vim dejecerit: tenetur lege Julia de vi privata aut de vi publica. sed de vi privata, si sine armis vim fecerit. si autem cum armis cum de possessione vi expulerit, de vi publica [tenetur.] Armorum autem appellatione non solum scuta, & gladios, & galeas, sed & fustes, & lapides significari intelligimus.

7 ¶ Tertia divisio interdictorum hæc est, quod aut simplicia sunt, aut duplicia. Simplicia sunt, veluti in quibus alter actor, alter reus [est:] qualia sunt omnia restitutoria aut exhibitoria: Nam actor is est, qui desiderat aut exhiberi, aut restitui: reus autem is est, à quo desideratur, ut restituat, aut exhibeat. Prohibitoriorum autem interdictorum alia simplicia sunt, alia duplicia. Simplicia sunt, veluti cum prætor prohibet in loco sacro, vel in flumine publico ripæ ejus aliquid fieri. Nam actor est, qui desiderat, ne quid fiat: reus est, qui aliquid facere conatur. Duplicia sunt, veluti *uti possidetis* interdictum, & *ut rubi*. Ideo autem duplicia vocantur, quia parutriusque litigatoris in his conditio est, nec quisquam præcipue reus vel actor intelligitur: sed unusquisque tam rei, quam actoris partes sustinet.

8 ¶ De ordine & vetere exitu interdictorum supervacuum est hodie dicere. Nam quotiens extra ordinem jus dicitur (qualia sunt hodie omnia judicia), non est necesse reddi interdictum: sed perinde judicatur sine interdictis, ac si utilis actio ex causa interdicti reddita fuisset.

## DE POENA TEMERE LITIGANTIIUM.

## TITULUS XVI.

**N**unc admonendi sumus, magnam curam egisse eos, qui iura sustinebant, ne facile homines ad litigandum procederent: quod & nobis studio est. Idque eo maxime fieri potest, quod temeritas tam agendi, quam eorum, cum quibus agitur modo pecuniaria poena, modo iurisjurandi religione, modo infamiae metu coercetur.

1. ¶ Ecce enim iusjurandum omnibus, qui conveniuntur, ex constitutione nostra defertur. Nam reus non aliter suis allegationibus utitur, nisi prius iuraverit, quod putans se bona instantia uti, ad contradicendum pervenit. At adversus inficientes, ex quibusdam causis dupli (vel tripli) actio constituitur: veluti si damni iniuriæ, aut legatorum locis venerabilibus relictorum nomine agatur. Statim autem ab initio pluri, quam simpli est actio: veluti furti manifesti, quadrupli: nec manifesti, dupli. Nam ex his & aliis quibusdam causis (sive quis neget, sive fateatur) pluri, quam simpli est actio. Item actoris quoque calumnia coercetur. Nam etiam actor pro calumnia iurare cogitur ex nostra constitutione. Utriusque etiam partis advocati iusjurandum iubeant: quod alia nostra constitutione comprehensum est. Hæc autem omnia pro veteris calumniæ actione introducta sunt, quæ in desuetudinem abiit: quia in partem decimam litris actores multabat, quod nusquam factum esse invenimus, sed pro his introductum est [8c] præfatum iusjurandum, & ut improbus litigator [8c] damnus, & impensas litis inferre adversario suo cogatur.

2. ¶ Ex quibusdam judiciis damnati, ignominiosi sunt: veluti furti, vi bonorum raptorum, iniuriarum, de dolo; item tutelæ, mandati, depositi, directis, non contrariis actionibus. item pro socio, quæ ab utraque parte directa est: & ob id quilibet ex sociis eo iudicio damnatus, ignominia notatur. Sed furti quidem, aut vi bonorum raptorum, aut iniuriarum, aut de dolo, non solum damnati notantur ignominia; sed & pacti; & recte. plurimum enim inter-

est,



est, utrum ex delicto aliquis, an ex contractu debitor sit.

3 ¶ **Omnium autem actionum instituendarum principium**, ab ea parte edicti proficiscitur, qua prator edicit de in jus vocando. Utique enim in primis adversarius in jus vocandus est: id est, ad eum vocandus, qui jus dicturus sit. Qua parte prator parentibus & patronis, item parentibus liberisque patronorum & patronarum hunc præstat honorem: ut non aliter. liceat liberis libertisque eos in jus vocare, quam si id ab ipso prætore postulaverint, & impetraverint. Et si quis aliter vocaverit: in eum poenam solidorum quinquaginta constituit.

## DE OFFICIO JUDICIS.

## TITULUS XVII.

**S**uperest, ut de officio judicis dispiciamus. Et quidem in primis illud observare debet judex, ne aliter judicet, quam legibus, aut constitutionibus, aut moribus proditum est.

1 ¶ Ideoque si noxali judicio aditus est, observare debet, ut si condemnandus videretur dominus, ita debeat condemnare, *Publium Mævium Lucio Titio in decem aureos condemnno, aut noxam dedere.*

2 ¶ Et si in rem actum sit [coram iudice:] sive contra petito rem judicaverit, absolvere debet possessorem; sive contra possessorem, jubere ei debet, ut rem ipsam restituat cum fructibus. Sed si possessor neget in præsentem se restituere posse, & sine frustratione videbitur tempus restituendi causa petere; indulgendum est ei: ut tamen de litis æstimatione caveat cum fidejussore, si intra tempus quod ei datum est, non restituerit. Et si hæreditas petita sit, eadem circa fructus interveniunt, quæ diximus intervenire de singularum rerum petitione. Illorum autem fructuum, quos culpa sua possessor non perceperit, [sive illorum,] quos perceperit, in utraque actione eadem ratio pene habetur, si prædo fuerit. Si vero bonæ fidei possessor fuerit: non habetur ratio [neque] consumptorum, neque non perceptorum. Post inchoatam autem petitionem, etiam illorum [fructuum] ratio habetur, qui culpa possessoris percepti non sunt, vel percepti consumpti sunt.

3 ¶ Si ad exhibendum actum fuerit: non sufficit, si exhibeat rem is, cum quo actum est: sed opus est, ut etiam rei causam debeat exhibere, id est, ut eam causam habeat actor, quam habiturus esset, si cum prius ad exhibendum egisset, exhibita res fuisset. Ideoque si inter moras [exhibendi] usucapta sit res à possessore: nihilominus condemnabitur. Præterea fructum medii temporis, id est, ejus quod post acceptum ad exhibendum iudicium, ante rem iudicatam intercesserit; rationem habere debet iudex. Quod si neget reus, cum quo ad exhibendum actum est, in præsentem se exhibere posse, & tempus exhibendi causa petat, idque sine frustratione postulare videatur: dari ei debet, ut tamen caveat se restitutum, quod si neque statim jussu iudicis rem exhibeat, neque postea exhibiturum se caveat: condemnandus fit in id, quod actoris intererat, si ab initio res exhibita esset.

4 ¶ Si familiaris exciscundæ [iudicio] actum sit: singulas res singulis hæredibus adjudicare debet. & si in alterius persona prægravare videatur adjudicatio: debet hunc invicem cohæredi certa pecunia (sicut jam dictum est) condemnare. Eo quoque nomine cohæredi quisque suo condemnandus est, quod solum fructus hæreditarii fundi perceperit, aut rem hæreditariam corruperit, aut consumpserit. Quæ quidem similiter inter plures quoque, quam duos cohæredes, subsequuntur.

5 ¶ Eadem interveniunt, & si communi dividundo de pluribus rebus actum sit. Quod si de una re, veluti de fundo: si quidem iste fundus commode regionibus divisionem recipiat: partes ejus singulis adjudicare debet. & si unius pars prægravare videbitur: is invicem certa pecunia alteri condemnandus est. Quod si commode dividi non possit: veluti si homo forte, aut mulus erit, de quo actum sit, tunc totus uni adjudicandus est, & is invicem alteri certa pecunia condemnandus est.

6 ¶ Si finium regundorum actum fuerit, dispicere debet iudex, an necessaria sit adjudicatio. quæ sane uno casu necessaria est, si evidentioribus finibus distinguere agros commodius sit, quam olim fuissent

di-

**distincti.** Nam tunc necesse est ex alterius agro partem aliquam alterius agri domino adjudicari: quo casu conveniens est, ut is alteri certa pecunia debeat condemnari. Eo quoque nomine condemnandus est quisque hoc judicio, quod forte circa fines aliquid malitiose commisit: verbi gratia, quia lapides finales furatus est, vel arbores finales excidit. Contumaciæ quoque nomine quisque eo judicio condemnatur: veluti si quis jubente iudice metiri agros passus non fuerit.

7 ¶ **Quod** autem istis judiciis alicui adjudicatum fuerit: id statim ejus fit, cui adjudicatum est.

## DE PUBLICIS JUDICIIS.

### TITULUS XVIII.

**P**ublica judicia neque per actiones ordinantur, neque omnino quicquam simile habent [cum] ceteris judiciis, de quibus locuti sumus: magnaue diversitas eorum est & in instituendo, & in exercendo.

1 ¶ **Publica** autem dicta sunt, quod cuivis ex populo executio eorum plerumque datur.

2 ¶ **Publicorum** judiciorum quædam capitalia sunt, quædam non capitalia. Capitalia dicimus, quæ ultimo supplicio afficiunt [homines,] vel [etiam] aquæ & ignis interdictione, vel deportatione, vel metallo. Cætera, si quam infamiam irrogant, cum damno pecuniario: hæc publica quidem sunt, non tamen capitalia.

3 ¶ **Publica** autem judicia hæc sunt: lex Julia majestatis, quæ in eos, qui contra Imperatorem, vel rempublicam aliquid moliti sunt, suum vigorem extendit. Cujus poena animæ amissionem sustinet, & memoria rei etiam post mortem damnatur.

4 ¶ **Item** lex Julia de adulteriis coercendis, quæ non solum temeratores alienarum nuptiarum gladio punit, sed & eos, qui cum masculis nefandam libidinem exercere audent. Sed eadem lege Julia etiam stupri flagitium punitur, cum quis sine vi vel virginem, vel viduam honeste viventem, stupraverit. Pœnam autem eadem lex irrogat stupratoribus: si honesti sunt, publicationem partis dimidix bonorum: si humiles, corporis coercitionem cum relegatione.

5 ¶ Item lex Cornelia de sicariis, quæ homicidas ultore ferro persequitur, vel eos, qui hominis occidendi causa cum telo ambulant. Telum autem (ut Caius noster ex interpretatione legum duodecim tabularum scriptum reliquit) vulgo quidem id appellatur, quod ab arcu mittitur. sed & omne significat, quod manu cuiusque jacitur. sequitur ergo, ut lignum, & lapis, & ferrum hoc nomine contineatur: dictum ab eo, quod in longinquum mittitur, [à] Græca voce *τὴλὲ* figuratum. Et [sic] hanc significationem invenire possumus & in Græco nomine. nam quod nos telum appellamus, illi *βέλτε* appellant. Admonent nos epigrammata in Xerolopho urbis faustissimæ scripta, καὶ τὰ βέλῃ ὅμῃς ἐφέρετο, λόγχαί, τοξεύματα, σφινδόναι, πλείστοι δὲ καὶ λίθοι. i. e. Et huiusmodi tela simul ab eis ferebantur, lanceæ, spicula, fundæ, plurimi autem & lapides. Sicarii autem appellantur à sica, quod significat ferreum cultrum. Eadem lege & venefici capite damnantur, qui artibus odiosis, tam venenis, quam susurris magicis homines occiderint, vel malæ medicamenta publice vendiderint.

6 ¶ Alia deinde lex asperissimum crimen nova poena persequitur, quæ Pompeja de parricidiis vocatur: quæ cavetur, ut si quis parentis, aut filii, aut omnino adfinitatis ejus, quæ nuncupatione parentum continetur; fata præparaverit, (sive clam, sive palam, id ausus fuerit), [nec non is, cujus dolo malo id factum est, vel conscius criminis existit, licet extraneus sit,] poena parricidii puniatur, & neque gladio neque ignibus, neque ulli alii solemnī poenæ subijciatur, sed insutus culleo cum Canes, & Gallo gallinaceo, & Vipera, & Simia, & inter eas feratiles angustias comprehensus, (secundum quod regionis qualitas tulerit) vel in vicinum mare, vel in omnem projiciatur, ut omnium elementorum usu vivus carere incipiat; & ei cælum superstiti, [&] terra mortuo auferatur. Si quis autem alias cognatione vel adfinitate personas conjunctas necaverit: poenam legis Corneliæ de sicariis sustinebit.

7 ¶ Item lex Cornelia de falsis, quæ etiam testamentaria vocatur, poenam irrogat ei, qui testamentum,

tum, vel aliud instrumentum falsum scripserit, signaverit, recitaverit, subjecerit; vel signum adulterinum fecerit, sculperit, exprefferit sciens dolo malo. Ejusque legis poena in servos, ultimum supplicium est (quod etiam in lege de sicariis & veneficis, servatur); in liberos vero deportatio.

8 ¶ Item lex Julia de vi publica seu privata, adversus eos exoritur, qui vim vel armatam, vel sine armis commiserint. Sed si quidem armata vis arguatur: deportatio ei ex lege Julia de vi publica irrogatur. si vero sine armis: in tertiam partem bonorum [suorum] publicatio imponitur: Sin autem per vim raptus virginis, vel viduæ, vel sanctimonialis, vel alterius fuerit perpetratus: tunc & raptores, & ii, qui opem [huic] flagitio dederunt, capite puniuntur, secundum nostræ constitutionis definitionem, ex qua hoc apertius possibile est scire.

9 ¶ Item lex Julia peculatus eos punit, qui publicam pecuniam, vel rem sacram, vel religiosam furati fuerint. Sed si quidem ipsi iudices tempore administrationis publicas pecunias subtraxerint: capitali animadversione puniuntur: & non solum hi, sed etiam qui ministerium eis ad hoc exhibuerint, vel qui substractas ab his scientes susceperint. Alii vero, qui in hanc legem inciderint: poenæ deportationis, subjungentur.

10 ¶ Est & inter publica judicia lex Flavia de plagiariis, quæ interdum capitis poenam ex sacris constitutionibus irrogat, interdum leviolem.

11 ¶ Sunt præterea publica judicia, lex Julia de ambitu, lex Julia repetundarum, & lex Julia de annona, & lex Julia de residuis, quæ de certis capitulis loquuntur, & animæ quidem amissionem non irrogant: aliis autem poenis eos subjiciunt qui præcepta earum neglexerint. Sed de publicis judiciis hæc exposuimus, ut vobis possibile sit summo digito, & quasi per indicem ea tetigisse: alioqui diligentior eorum scientia vobis ex latioribus Digestorum seu Pandectarum libris Deo propitio adventura est.

## INSTITUTIONUM FINIS.

Libri L. Digestorum Titulus XVI.  
**DE VERBORUM  
 SIGNIFICATIONE.**

1. *Ulpianus lib. 1. ad Edictum.*

**V**erbum hoc, *si quis*, tam masculos quam foeminas complectitur.

2. *Paulus lib. 1. ad Edictum.*

**U**rbis appellatio muris: Romae autem continentibus aedificiis finitur, quod latius patet.

1 ¶ Cujusque diei major pars est horarum septem primarum diei, non supremarum.

3. *Ulpianus lib. 2. ad Edictum.*

**I**tinere faciendo viginti millia passuum in dies singulos peragenda, sic sunt accipienda: ut, si post hanc dinumerationem minus quam viginti millia superfint, integrum diem occupent. veluti viginti unum millia sunt passus: biduum eis attribuetur, quae dinumeratio ita demum facienda erit, si de die non conveniat.

1 ¶ Ejus, qui apud hostes decessit, dici hereditas non potest, qui servus decessit.

4. *Paulus lib. 1. ad Edictum.*

**N**ominis appellatione rem significari, Proculus ait.

5. *Idem. lib. 2. ad Edictum.*

**R**ei appellatio latior est, quam pecuniae; qua etiam ea, quae extra computationem patrimonii nostri sunt, continet: cum pecuniae significatio ad ea referatur, quae in patrimonio sunt.

1 ¶ Opere locato, conducto: his verbis Labeo significari ait id opus, quod Graeci *σποτίλεισμα* vocant, non *ἔργον*, id est, ex opere facto corpus aliquod perfectum.

6. *Ulpianus lib. 3. ad Edictum.*

**N**ominis & rei appellatio ad omnem contractum & obligationem pertinet.

1 ¶ Verbum *Ex legibus* sic accipiendum est: tam ex legum sententia quam ex verbis.

7. *Paulus*

7. *Paulus lib. 2. ad Edictum.*

**S**PONSIO appellatur, non solum quæ per sponsus interrogacionem fit, sed omnis stipulatio promissioque.

8. *Idem lib. 3. ad Edictum.*

**V**ERBUM *Oportebit* tam præsens, quam futurum tempus significat.

1 ¶ **A**CTIONIS verbo non continetur exceptio.

9. *Ulpianus lib. 5. ad Edictum.*

**M**ARCELLUS apud Julianum notat, verbo *perisse & scissum & fractum* contineri, & vi raptum.

10. *Idem lib. 6. ad Edictum.*

**C**REDITORES accipiendos esse constat eos, quibus debetur ex quacunque actione, vel persecutione, vel jure civili sine ulla exceptionis perpetuæ remotione, vel honorario, vel extraordinario, sive pure, sive in diem, vel sub conditione. Quod si natura debeatur, non sunt loco creditorum. Sed si non sit mutua pecunia, sed contractus: creditores accipiuntur.

11. *Gajus lib. 1. ad Edict. Provinc.*

**C**REDITORUM appellatione non hi tantum accipiuntur, qui pecuniam crediderunt: sed omnes, quibus ex qualibet causa debetur.

12. *Ulpianus lib. 6. ad Edictum.*

**U**T si cui ex empto, vel ex locato, vel ex alio usulo debetur. Sed etsi ex delicto debeatur, mihi videtur posse creditoris loco accipi. Quod si ex populari causa, ante litis contestationem recte dicitur creditoris loco non esse, postea esse.

1 ¶ **M**INUS solvit, qui tardius solvit: nam & tempore minus solvitur.

13. *Idem lib. 7. ad Edictum.*

**M**ULIERIS appellatione etiam virgo viri potens continetur.

1 ¶ **R**ES abesse videntur, ut Sabinus ait, & Pedius probat, etiam hæ, quarum corpus manet, forma mutata est, & ideo si corruptæ redditæ sint, vel transfiguratæ, videri abesse; quoniam plerumque plus est in manus pretio quam in re.

2 ¶ **D**ESINERE autem abesse res tunc videtur, cum sic redit in potestatem, ne amittere ejus possessionem possimus: ob hoc, quod furto pridem subtrahitur.

cta est. Abest & ea res quæ in rebus humanis non est.

14. *Paulus lib. 7. ad Edictum.*

**L**abeo & Sabinus existimant, si vestimentum scissum reddatur, vel res corrupta reddita sit, veluti scyphi collisi, aut tabula rasa pictura, videri rem abesse: quoniam earum rerum pretium non in substantia, sed in arte sit positum. Item si dominus rem, quæ furto sibi aberat, ignorans emerit: recte dicitur res abesse, etiam si postea id ita esse scierit: quia videtur res ei abesse, cui pretium abest.

1. ¶ Rem amisisse videtur, qui adversus nullum ejus persequendæ actionem habet.

15. *Ulpianus lib. 10. ad Edictum.*

**B**ona civitatis abusive publica dicta sunt; sola enim ea publica sunt, quæ populi Romani sunt.

16. *Gajus lib. 3. ad Edictum Provi.*

**E**um, qui vectigal populi Romani conductum habet, publicanum appellamus. nam publica appellatio in compluribus causis ad populum Romanum respicit. civitates enim privatorum loco habentur.

17. *Ulpianus lib. 10. ad Edictum.*

**I**nter publica habemus non sacra, nec religiosa, nec quæ publicis usibus destinata sunt: sed si quæ sunt civitatum velut bona. sed peculia servorum civitatum proculdubio publica habentur.

1. ¶ Publica vectigalia intelligere debemus, ex quibus vectigal fiscus capit: quale est vectigal portus, vel venalium rerum, item salinarum, & metallorum, & picariarum.

18. *Paulus lib. 9. ad Edictum.*

**M**unus tribus modis dicitur. uno donum: & inde munera dici dari, mittere. altero onus, quod cum remittatur, vacationem militiæ munerisque præstat. inde immunitatem appellari. tertio officium: unde munera militaria, & quosdam milites muniticos vocari. Igitur municipes dici, quod munera civilia capiant.

19. *Ulpianus lib. 11. ad Edictum.*

**L**abeo libro primo prætoris urbani definit, quod quædam agantur, quædam gerantur, quædam contrahantur. Et actum quidem generale verbum esse, sive verbis, sive re quid agatur: ut in stipulatione



tionem, vel numerationem. Contractum autem ultro citroque obligationem, quod Græci συνδλλαγμα vocant, veluti emptionem, venditionem, locationem, conductionem, societatem. Gestum rem significare sine verbis factam.

20. Idem lib. 12. ad Edictum.

**V**erba Contraxerunt, gesserunt, non pertineant ad testandi jus.

21. Paulus lib. 11. ad Edictum.

**P**rinceps bona concedendo videtur etiam obligationes concedere.

22. Gajus lib. 4. ad Edict. Prov.

**P**lus est in restitutione quam in exhibitione, nam exhibere est, presentiam corporis præbere. restituere est, etiam possessorem facere, fructusque redde-  
dere. pleraque præterea restitutionis verbo continentur.

23. Ulpianus lib. 14. ad Edictum.

**R**ei appellatione & causa & jura continentur.

24. Gajus lib. 6. ad Edict. Prov.

**N**ihil est aliud hæreditas, quam successio in universum jus, quod defunctus habuit.

25. Paulus lib. 21. ad Edictum.

**R**ecte dicimus eum fundum totum nostrum esse, etiam cum usufructus alienus est: quia usufructus non domini pars, sed servitutis sit: ut via, & iter, nec falso dici, totum meum esse, cujus non potest ulla pars dici alterius esse. hoc & Julianus, & est verius.

¶ Quintus Mucius ait, partis appellatione res pro indiviso significari. nam quod pro diviso nostrum sit, id non partem, sed totum esse. Servius non ineleganter partis appellatione utrumque significari.

26. Ulpianus lib. 16. ad Edictum.

**P**artum non esse partem rei furtivæ, Scævola libro undecimo questionum scribit.

27. Idem lib. 17. ad Edictum.

**A**ger est locus, qui sine villa est.

¶ Stipendium à stipe appellatum est, quod per stipes, id est modica æra, colligatur. Idem hoc etiam tributum appellari Pomponius ait. Et sane appellatur ab intributione tributum: vel ex eo, quod militibus tribuatur.

28. *Paulus lib. 21. ad Edictum.*

**A**lienationis verbum etiam usucapionem continet. vix est enim, ut non videatur alienare, qui patitur usucapi. Eum quoque alienare dicitur, qui non utendo amisit servitutes. Qui occasione acquirendi non utitur, non intelligitur alienare: veluti qui hereditatem omittit, aut optionem intra certum tempus datam non amplectitur.

1 ¶ Oratio, quæ neque conjunctionem, neque disjunctionem habet, ex mente pronuntiantis, vel disjuncta vel conjuncta accipitur.

29. *Idem lib. 66. ad Edictum.*

**C**onjunctionem enim nonnunquam pro disjunctione accipi, Labeo ait: ut in illa stipulatione, *Mihi hereditque meo, te heredemque tuum.*

30. *Gajus lib. 7. ad Edict. Prov.*

**S**ilva cædua est, ut quidam putant, quæ in hoc habetur, ut caderetur. Servius eam esse quæ succisa rursus ex stirpibus aut radicibus renascitur.

1 ¶ Stipula illecta est spicæ in messe dejectæ, nec dum lectæ, quas rustici, cum vacaverint, colligunt.

2 ¶ Novalis est terra præcisa, quæ anno cessavit, quam Græci *νέανη* vocant.

3 ¶ Integra autem est, in quam nondum dominus pascendi gratia pecus immisit.

4 ¶ Glans caduca est, quæ ex arbore cecidit.

5 ¶ Pascua silva est, quæ pastui pecudum destinata est.

31. *Ulpianus lib. 18. ad Edictum.*

**P**ratum est, in quo ad fructum percipiendum falce duntaxat opus est: ex eo dictum, quod pratum sit ad fructum capiendum.

32. *Paulus lib. 24. ad Edictum.*

**M**inus solutum intelligitur, etiam si nihil esset solutum.

33. *Ulpianus lib. 21. ad Edictum.*

**P**alam est, coram pluribus.

34. *Paulus lib. 24. ad Edictum.*

**A**ctionis verbo etiam persecutio continetur.

35. *Idem lib. 17. ad Edictum.*

**R**estituere autem is intelligitur, qui simul & causam actori reddit, quam is habiturus esset, si statim

36. *Ulpianus lib. 23. ad Edictum.*

**L**itis nomen omnem actionem significat, siue in rem siue in personam sit.

37. *Paulus lib. 26. ad Edictum.*

**V**erbum *Oportere* non ad facultatem iudicis pertinet, qui potest vel pluris vel minoris condemnare: sed ad veritatem refertur.

38. *Ulpianus lib. 25. ad Edictum.*

**O**stentum Labeo definit, omne contra naturam cuiusque rei genitum, factumque: duo genera autem sunt ostentorum: unum quotiens quid contra naturam nascitur: tribus manibus forte aut pedibus, aut qua alia parte corporis, quæ naturæ contraria est. alterum cum quid prodigiosum videtur, quæ Græci *φαντάσματα* (id est, *visiones*) vocant.

39. *Paulus lib. 53. ad Edictum.*

**S**ubsignatum dicitur, quod ab aliquo subscriptum est. nam veteres subsignationis verbo pro adscriptione uti solebant.

1 ¶ Bona intelliguntur cuiusque, quæ deducto are alieno supersunt.

2 ¶ Detestari, est absenti denunciare.

3 ¶ Incertus possessor est, quem ignoramus.

40. *Ulpianus lib. 56.*

**D**etestatio est denunciatio facta cum testatione.

1 ¶ Servi appellatio etiam ad ancillam refertur.

2 ¶ Familiæ appellatione liberi quoque continentur.

3 ¶ Unicus servus familiæ appellatione non continetur. ne duo quidem familiam faciunt.

41. *Gajus lib. 21. ad Edictum Prov.*

**A**rmorum appellatio non utique scuta, & gladios, & galeas significat: sed & fustes, & lapides.

42. *Ulpianus lib. 57. ad Edictum.*

**P**robrum & opprobrium, id est probra quædam natura turpia sunt, quædam civiliter, & quasi more civitatis. utputa furtum, adulterium, natura turpe est. enimvero tutelæ damnari, hoc non natura probrum est, sed more civitatis. nec enim natura probrum est, quod potest etiam in hominem idoneum incidere.

43. *Idem lib. 58. ad Edictum.*

**V**ERBO *Viſtus* continentur, quæ eſui, potuique, cultuique corporis, quæque ad vivendum homini neceſſaria ſunt. veſtem quoque viſtus habere vicem, Labeo ait.

44. *Gajus lib. 22. ad Edictum Prov.*

**E**T cætera, quibus tuendi, curandive corporis noſtri gratia utimur, ea appellatione ſignificantur.

45. *Ulpianus lib. 58. ad Edictum.*

**I**N ſtratum omne veſtimentum contineri, quod injiciatur, Labeo ait. neque enim dubium eſt, quin ſtragula veſtis ſit omne pallium *ὅλης πεπαι*. In viſtum ergo veſtem accipiemus, non ſtragula: in ſtratu omnem ſtragulam veſtem.

46. *Idem lib. 59. ad Edictum.*

**P**RONUNTIATUM & ſtatutum idem poteſt. promiſcue enim & pronuntiaſſe & ſtatuſſe ſolemus dicere eos qui jus habent cognoscendi.

**I** Matremfamilias accipere debemus eam, quæ non inhoneſte vixit. Matrem enim familias à cæteris fœminis mores diſcernunt, atque ſeparant. proinde nihil intererit, nupta ſit, an vidua: ingenua ſit, an libertina. nam neque nuptiæ, neque natales faciunt matremfamilias, ſed boni mores.

47. *Paulus lib. 56. ad Edictum.*

**L**IBERATIONIS verbum eandem vim habet, quam ſolutionis.

48. *Gajus libro ad Edictum prætoris urbani, titulo:*

*Qui neque ſequantur neque ducantur.*

**S**OLUTUM non intelligimus eum, qui licet vinculis levatus ſit, manibus tamen tenetur. ac ne eum quidem intelligimus ſolutum, qui in publico ſine vinculis ſeryatur.

49. *Ulpianus lib. 59. ad Edictum.*

**B**ONORUM appellatio aut naturalis, aut civilis eſt. Naturaliter bona ex eo dicuntur quod beant, hoc eſt, beatos faciunt. beare eſt prodeſſe. In bonis autem noſtris computari ſciendum eſt non ſolum quæ domini noſtri ſunt: ſed & ſi bona fide à nobis poſſideantur, vel ſuperficiaria ſint. Æque bonis adnumerabitur, etiam ſi quid eſt in actionibus, petitionibus, perſecutionibus. nam hæc in bonis eſſe videntur.

50. *Idem lib. 61. ad Edictum.*

**N**urus appellatio etiam ad pronurum, & ultra porrigenda est.

51. *Gajus lib. 23. ad Edictum Prov.*

**A**ppellatione parentis non tantum pater, sed etiam avus, & proavus, & deinceps omnes superiores continentur: sed & mater, & avia, & proavia.

52. *Ulpianus lib. 61. ad Edictum.*

**P**atroni appellatione & patrona continetur.

53. *Paulus lib. 59. ad Edictum.*

**S**æpe ita comparatum est, ut conjuncta pro disjunctis accipiantur, & disjuncta pro conjunctis, interdum soluta pro separatis. Nam cum dicitur apud veteres, *Adgnatorum gentiliumque*, pro separatione accipitur. At cum dicitur, *Super pecunia, tutelave sue*, tutor separatim sine pecunia dari non potest. Et cum dicimus, *Quod dedi aut donavi*, utraque continemus. Cum vero dicimus, *Quod eum dare facere oportet*, quodvis eorum sufficit probare. Cum vero dicit prætor, *Si donum, munus, operas redemerit*, si omnia imposita sunt, certum est, omnia redimenda esse. ex re ergo pro conjunctis habentur. si quædam imposita sunt, cætera non desiderabuntur.

¶ Item dubitatum, illa verba, *Ope, consilio*, quemadmodum accipienda sunt: sententiæ conjungentium aut separantium? sed verius est, quod & Labeo ait, separatim accipienda: quia aliud factum est ejus, qui ope, aliud ejus, qui consilio furtum facit. sic enim alii condici potest, alii non potest. & sane post veterum auctoritatem eo perventum est, ut nemo ope videatur fecisse, nisi & consilium malignum habuerit: nec consilium habuisse noceat, nisi & factum secutum fuerit.

54. *Ulpianus lib. 62. ad Edictum.*

**C**onditionales creditores dicuntur & hi, quibus nondum competit actio, est autem competitura: vel qui spem habent, ut competat.

55. *Paulus lib. 16. brevis Edicti.*

**C**reditor autem is est, qui exceptione perpetua summoverti non potest. qui autem temporalem exceptionem timet, similis est conditionali creditori.

56. *Ulpianus lib. 62. ad Edictum.*

**C**ognoscere instrumenta, est relegere & recognoscere. dispungere est conferre accepta & data.

1 ¶ Liberorum appellatione continentur non tantum qui sunt in potestate: sed omnes, qui sui juris sunt, sive virilis, sive fœminini sexus sunt, exve fœminini sexus descendentes.

57. *Paulus lib. 59. ad Edictum.*

**C**ui præcipua cura rerum incumbit, & qui magis quam ceteri diligentiam, & sollicitudinem rebus, quibus præsumt, debent, hi magistri appellantur. Quinetiam ipsi magistratus per derivationem à magistris cognominantur. unde etiam cujusslibet disciplinæ præceptores, magistros appellari à monendo, vel monstrando.

1 ¶ Persequi videtur, & qui satis accepit.

58. *Gajus lib. 24. ad Edictum Prov.*

**L**icet inter gesta & facta videtur quædam esse subtilis differentia: attamen *καταχρηστικῶς*, (id est, *abusive*) nihil inter factum & gestum interest.

1 ¶ Paternos liberos recte videmur dicere nostros liberos. liberorum liberos non recte nostros liberos dicimus.

59. *Ulpianus lib. 68. ad Edictum.*

**P**ortus appellatus est conclusus locus, quo importantur merces, & inde exportantur. eaque nihilo minus statio est conclusa, atque munita. inde angustum dictum est.

60. *Idem lib. 69. ad Edictum.*

**L**ocus est non fundus, sed portio aliqua fundi: fundus autem integrum aliquid est. & plerumque sine villa locum accipimus. Ceterum adeo opinio nostra & constitutio locum à fundo separat, ut & modicus locus possit fundus dici, si fundi animo eum habuimus. Non etiam magnitudo locum à fundo separat, sed nostra affectio. & quælibet portio fundi poterit fundus dici, si jam hoc constituerimus. nec non & fundus, locus constitui potest. nam, si eum alii adjunxerimus fundo, locus fundi efficietur.

1 ¶ Loci appellationem non solum ad rustica, verum ad urbana quoque prædia pertinere, Labeo scribit.

2 ¶ Sed fundus quidem suos habet fines: locus ve-

ro latere potest, quatenus determinetur, & definiatur.

61. *Paulus lib. 65. ad Edictum.*

**S**atisfactionis appellatione interdum etiam repositio continetur: qua contentus fuit is cui satisfactio debebatur.

62. *Gajus lib. 26. ad Edictum Prov.*

**T**igni appellatione in lege duodecim tabularum omne genus materiarum, ex qua ædificia constant, significatur.

63. *Ulpianus lib. 71. ad Edictum.*

**P**enes te amplius est, quam apud te, nam apud te est, quod qualiter a te teneatur: penes te est, quod quodam modo possidetur.

64. *Paulus lib. 67. ad Edictum.*

**I**ntestatus est, non tantum qui testamentum non fecit, sed etiam cujus ex testamento hæreditas adita non est.

65. *Ulpianus lib. 72. ad Edictum.*

**H**æredis appellatio non solum ad proximum hæredem, sed & ad ultiores refertur. nam & hæredis hæres, & deinceps, hæredis appellatione continetur.

66. *Idem lib. 74. ad Edictum.*

**M**ercis appellatio ad res mobiles tantum pertinet.

67. *Idem lib. 76. ad Edictum.*

**A**lienatum non proprie dicitur, quod adhuc in dominio venditoris manet. venditum tamen recte dicitur.

**I** ¶ Donationis verbum simpliciter loquendo, omnem donationem comprehendisse videtur, sive mortis causa, sive non mortis causa fuerit.

68. *Idem lib. 77. ad Edictum.*

**I**lla verba, *Arbitratu Lucii Titii fieri*, jus significant, & in servum non cadunt.

69. *Idem lib. 78. ad Edictum.*

**H**æc verba, *Cui rei dolus malus aberit, asuerit*, generaliter comprehendunt omnem dolum, quicumque in hanc rem admissus est, de qua stipulatio est interposita.

70. *Paulus lib. 73. ad Edictum.*

**S**ciendum est, hæredem etiam per multas successiones accipi. nam paucis speciebus hæredis appellatio

rio proximum continet : Veluti in substitutione impuberis, *Quisquis mihi hæres erit, idem filio hæres esto* : ubi hæredis hæres non continetur, quia incertus est. item in lege Ælia Sentia filius hæres proximus potest libertum patrum ut ingratum accusare, non etiam si hæredi hæres exstiterit. idem dicitur in operarum exactione, ut filius hæres exigere possit, non ex successione effectus.

¶ Verba hæc, *Is ad quem ea res pertinet*, sic intelliguntur, ut qui in universum dominium vel jure civili vel jure prætorio succedit, contineatur.

71. *Ulpianus lib. 79. ad Edictum.*

**A**liud est capere, aliud accipere. Capere, cum effectum accipitur. Accipere, & si quis non accepit, ut habeat. ideoque non videtur quis capere, quod erit restitutus. sicut pervenisse proprie illud dicitur quod est remansurum.

¶ Hæc verba, *His rebus recte præstari*, hoc significant, ne quid periculum vel damnum ex ea re stipulator sentiret.

72. *Paulus lib. 76. ad Edictum.*

**A**ppellatione rei, pars etiam continetur.

73. *Ulpianus lib. 80. ad Edictum.*

**H**æc verba in stipulatione posita, *Eam rem recte restitui*, fructus continent. Recte enim verbum pro viri boni arbitrio est.

74. *Paulus lib. 2. ad Edict. edil. curul.*

**S**ignatorius anulus ornamentum appellatione non continetur.

75. *Idem lib. 50. ad Edictum.*

**R**estituere is videtur, qui id restituit, quod habiturus esset actor, si controversia ei facta non esset.

76. *Idem lib. 51. ad Edictum.*

**E**disse intelligendus est etiam is, qui permutavit, vel compensavit.

77. *Idem lib. 49. ad Edictum.*

**F**rugem pro redditu appellari, non solum quod frumentis, aut leguminibus : verum & quod ex vino, silvis caduis, cretifodinis, lapidicinis capitur. Julianus scribit, fruges omnes esse, quibus homo vescatur, falsum esse : non enim carnem, aut aves, ferasve, aut poma fruges dici. Frumentum autem id esse, quod



quod arista se teneat, recte Gallum definisse. lupinum vero & fabam fruges potius dici: quia non arista, sed siliqua continentur. quæ Servius apud Alfenum in frumento contineri putat.

78. *Paulus lib. 3. ad Plantium.*

**I**nterdu[m] proprietatem quoque verbum possessionis significat: sicut in eo, qui possessiones suas legasset, responsum est.

79. *Idem lib. 6. ad Plantium.*

**I**mpensæ necessariae sunt, quæ si factæ non sint, res aut peritura, aut deterior futura sit.

1 ¶ Utiles impensas esse Fulcinius ait, quæ meliorem dotem faciant, non deteriorem esse non sinant: ex quibus reditus mulieri acquiratur. sicut arbusi pastinatione ultra quam necesse fuerat: item doctrinam puerorum, quorum nomine onerari mulierem ignorantem vel invitam, non oportet: ne cogatur fundo, aut mancipiis carere. in his impensis & pistrinum & horreum insulæ dotali adjectum plerumque dicemus.

2 ¶ Voluptariæ sunt, quæ speciem duntaxat ornant, non etiam fructum augent: ut sunt viridia, & aquæ salientes, incrustationes, loricaciones, picturæ.

80. *Idem lib. 9. ad Plantium.*

**I**n generali repetitione legatorum etiam data libertates continentur ex mente legis duodecim tabularum.

81. *Idem lib. 10. ad Plantium.*

**C**um prætor dicat, ut opus factum restituatur, etiam damnum datum actor consequi debet: nam verbo restitutionis omnis utilitas actoris continetur.

82. *Idem lib. 14. ad Plantium.*

**V**erbum *Amplius* ad eum quoque pertinet; cui nihil debetur. sicuti ex contrario minus solutum videtur, etiam si nihil esset exactum.

83. *Favolenus lib. 5. ex Plantio.*

**P**ropriæ bona dici non possunt, quæ plus incommodi, quam commodi habent.

84. *Paulus lib. 2. ad Vitellium.*

**F**ilii appellatione omnes liberos intelligimus.

85. *Marcellus lib. 1. Digestorum.*

**N**eratius Priscus tres facere existimat collegium, & hoc magis sequendum est.

86. *Celsus lib. 5. Digestorum.*

**Q**uid aliud sunt jura prædiorum, quam prædia qualiter se habentia? ut bonitas, salubritas, amplitudo?

87. *Marcellus lib. 12. Digestorum.*

**U**T Alfenus ait, urbs est Roma, quæ muro cingeretur. Roma est etiam, qua continenti ædificia essent. nam Romam non muro tenuis existimari, ex consuetudine cotidiana posse intelligi, cum diceremus Romam nos ire, etiam si extra urbem habitaremus.

88. *Celsus lib. 18. Digestorum.*

**T**antum quisque pecuniæ relinquit, quantum ex bonis ejus refici potest. sic dicimus, centies aureorum habere, qui tantum in prædiis, cæterisque similibus rebus habeat. non idem est in fundo alieno legato, quanquam is hæreditaria pecunia parari potest. neque quisquam eum, qui pecuniam numeratam habet, habere dicit quicquid ex ea parari potest.

89. *Pomponius lib. 6. ad Sabinum.*

**B**Oves magis armentorum, quam jumentorum generis appellantur.

1 ¶ Hoc sermone, *Dum nupta erit*, primæ nuptiæ significantur.

2 ¶ Inter edere & reddi rationes, multum interest. nec is, qui edere jussus sit, reliquum reddere debet. nam & argentarius edere rationem videtur, etiam si quod reliquum sit apud eum, non solvat.

90. *Ulpianus lib. 27. ad Sabinum.*

**Q**ui uri optimæ maximæque sunt, ædestradit, non hoc dicit, servitutem illis deberi: sed illud solum, ipsas ædes liberas esse, hoc est, nulli servire.

91. *Paulus lib. 2. Fideicommissorum.*

**M**Eorum & tuorum appellatione actiones quoque contineri dicendum est.

92. *Idem lib. 7. Questionum.*

**P**roximus est, cui nemo antecedit. supremus est, quem nemo sequitur.

93. *Celsus lib. 19. Digestorum.*

**M**Oventium, item mobilium appellatione idem significamus, si tamen apparet defunctum animalia duntaxat, quia se ipsa moverent, moventia vocasse. quod verum est.

94. *Idem*

94. *Idem lib. 20. Digestorum.*

**V**erbum reddendi quanquam significatum habet retro dandi, recipit tamen & per se dandi significationem.

95. *Marcellus lib. 14. Digestorum.*

**P**otest reliquorum appellatio & universos significare.

96. *Celsus lib. 25. Digestorum.*

**L**ittus est, quousque maximus fluctus à mari pervenit. idque Marcum Tullium aiunt, cum arbiter esset, primum constituisse.

1 ¶ Prædia dicimus aliquorum esse, non utique communiter habentium ea; sed vel alio aliud habente.

97. *Idem lib. 32. Digestorum.*

**C**um stipulamur, *Quanta pecunia ex hereditate Titii ad te pervenerit*: res ipsas, quæ pervenerunt, non pretia earum spectare videmur.

98. *Idem lib. 39. Digestorum.*

**C**um bissextum Kalendis est, nihil refert utrum priore an posteriore die quis natus sit: & deinceps sextum Kalendas ejus natalis dies est. nam id biduum pro uno die habetur, sed posterior dies intercalatur, non prior. ideo quo anno intercalatum non est, sexto Kalendas natus, cum bissextum Kalendis est, priorem diem natalem habet.

1 ¶ Cato putat, mensem intercalarem addititium esse. omnesque ejus dies pro momento temporis observat, extremoque diei mensis Februarii attribuit Quintus Mucius.

2 ¶ Mensis autem intercalaris constat ex diebus viginti octo.

99. *Ulpianus lib. 1. de officio Consulis.*

**N**otionem accipere possumus, & cognitionem & jurisdictionem.

1 ¶ Continentes provincias accipere debemus eas quæ Italiæ junctæ sunt: utputa Galliam. sed & provinciam Siciliam magis inter continentes accipere nos oportet, quæ modico freto Italia dividitur.

2 ¶ Instrumentorum appellatione quæ comprehendantur, perquam difficile erit separare. quæ enim proprie sint instrumenta, propter quæ dilatio danda sit, inde dignoscemus, si in præsentiam per-

sonæ quæ instruere possit, dilatio petatur. puta qui actum gessit, licet in servitute, vel qui actor fuit constitutus: putem videri instrumentorum causa peti dilationem.

100. *Idem lib. 2. de officio consulis.*

**S**peciosas personas accipere debemus, clarissimas personas utriusque sexus. item eorum, quæ ornamentis senatoriis utuntur.

101. *Modestinus lib. 9. Differentiarum.*

**I**nter stuprum & adulterium, hoc interesse quidam putant, quod adulterium in nuptam, stuprum in viduam committitur. sed lex Julia de adulteriis hoc verbo indifferenter utitur.

1 **¶** Divortium inter virum & uxorem fieri dicitur: repudium vero sponsæ remitti videtur. quod & in uxoris personam non absurde cadit.

2 **¶** Verum est, morbum esse temporalem corporis imbecillitatem, vitium vero perpetuum corporis impedimentum. veluti si talum excusit. nam & luscus itaque vitiosus est.

3 **¶** Servis legatis etiam ancillas deberi, quidam putant: quasi commune nomen utrumque sexum contineat.

102. *Idem lib. 7. Regularum.*

**D**erogatur legi, aut abrogatur. derogatur legi, cum pars detrahitur. abrogatur legi, cum prorsus tollitur.

103. *Idem lib. 8. Regularum.*

**L**icet capitalis Latine loquentibus omnis causa estimationis videatur, tamen appellatio capitalis, mortis, vel amissionis civitatis, intelligenda est.

104. *Idem lib. 2. Excusationum.*

**Η** τῶν τέκνων ἀποκαταστάσι καὶ ἐπὶ τὰς ἐγγύους ἐκτείνεται. natorum appellatio & ad nepotes extenditur.

105. *Idem lib. 11. Responsorum.*

**M**odestinus respondit, his verbis, *Libertis libertabusque meis, libertum libertæ testatoris non contineri.*

106. *Idem libro singulari de Prescript.*

**D**imissoriæ literæ dicuntur, quæ vulgo apostoli dicuntur. dimissoriæ autem dictæ, quod causa ad eum, qui appellatus est, dimittitur.

107. *Idem lib. 3. Pandectarum.*

**A**dsignare libertum hoc est, testificari, cujus ex liberis libertum eum esse voluit.

108. *Idem lib. 4. Pandectarum.*

**D**ebitor intelligatur is, à quo invito exigì pecunia potest.

109. *Idem lib. 5. Pandectarum.*

**B**onæ fidei emptor esse videtur, qui ignoravit eam rem alienam esse: aut putavit eum, qui vendidit, jus vendendi habere, puta procuratorem, aut tuto-rem esse.

110. *Idem lib. 6. Pandectarum.*

**S**equester dicitur, apud quem plures eandem rem, de qua controversia est, deposuerunt: dictus ab eo, quod occurrenti, aut quasi sequenti eos, qui contendunt, committitur.

111. *Favolenus lib. 6. ex Cassio.*

**C**enseri est constituere, & præcipere: unde etiam dicere solemus, Censeo hoc facias: & semet ali- quid censuisse. Inde censoris nomen videtur esse tra- ctum.

112. *Idem lib. 11. ex Cassio.*

**L**ittus publicum est eatenus, qua maxime fluctus exæstuat. Idemque juris est in lacu, nisi is totus privatus est.

113. *Idem lib. 14. ex Cassio.*

**M**orbus fonticus est, qui cuique rei nocet.

114. *Idem lib. 15. ex Cassio.*

**S**olvendo esse nemo intelligitur, nisi qui solidum potest solvere.

115. *Idem lib. 4. Epistolarum.*

**Q**uæstio est, fundus à possessione vel agro vel prædio quid distet. Fundus est omne, quicquid solo tenetur. Ager est, si species fundi ad usum ho- minis comparatur. Possessio ab agro-juris propieta- te distat. quicquid enim apprehendimus, cujus pro- prietas ad nos non pertinet, aut nec potest pertine- re: hoc possessionem appellamus. Possessio ergo usus, ager proprietas loci est. Prædium utriusque supra- scriptæ generale nomen est. nam & ager & posses- sio hujus appellationis species sunt.

116. *Idem lib. 7. Epistolarum.*

**Q**uifquis mihi alius filii filiusve hæres sit, Labeo non videri filiam contineri: Proculus contra. mihi Labeo videtur verborum figuram sequi, Proculus mentem testantis. respondit, Non dubito, quin Labeonis sententia vera non sit.

117. *Idem lib. 9. Epistolarum.*

**N**on potest videri minus solvisse is, in quem amplioris summæ actio non competit.

118. *Pomponius lib. 2. ad Quintum Mucium.*

**H**ostes hi sunt, qui nobis aut quibus nos publice bellum decrevimus. ceteri latrones, aut prædones sunt.

119. *Idem lib. 3. ad Quintum Mucium.*

**H**æreditatis appellatio sine dubio continet etiam damnosam hæreditatem. juris enim nomen est, sicuti bonorum possessio.

120. *Idem lib. 5. ad Quintum Mucium.*

**V**erbis legis duodecim tabularum his, *Uti legassit sue rei, ita jus esto*, latissima potestas tributa videtur & hæredis instituendi, & legata & libertates dandi, tutelas quoque constituendi. sed id interpretatione coangustatum est vel legum, vel auctoritate jura constituentium.

121. *Idem lib. 6. ad Quintum Mucium.*

**U**sura pecuniæ, quam percipimus, in fructu non est: quia non ex ipso corpore, sed ex alia causa est, id est nova obligatione.

122. *Idem lib. 8. ad Quintum Mucium.*

**S**ervius ait, si ita scriptum sit, *Filio filiisque meis hosce tutores do*, masculis duntaxat, tutores dados: quoniam singulari casu hoc, *filio*, ad pluralem videtur transisse, continentem eundem sexum, quem singularis prior positus habuisset. sed hoc facti, non juris habet quæstionem: potest enim fieri, ut singulari casu de filio senserit, deinde plenius omnibus liberis prospexisse in tutore dando voluerit. quod magis rationabile esse videtur.

123. *Idem lib. 26. ad Quintum Mucium.*

**V**erbum erit interdum etiam præteritum, nec solum futurum tempus demonstrat. quod est nobis necessarium scire, & cum codicilli ita confirmati testan-

stamento fuerint, *Quod in codicillis scriptum erit*, utrum ne futuri temporis demonstratio fiat, an etiam præteriti, si ante scriptos codicillos quis relinquat. quod quidem ex voluntate scribentis interpretandum est. Quemadmodum autem hoc verbum *erit* non solum præsens, sed & præteritum tempus significat: ita & hoc verbum *erit* non solum futurum, sed interdum etiam præteritum tempus demonstrat. nam cum dicimus, *Lucius Titius solutus est ab obligatione*: & præteritum & præsens significamus. sicut hoc, *Lucius Titius alligatus est*. & idem fit, cum ita loquimur, *Troja capta est*. non enim ad præsentis facti demonstrationem refertur is sermo, sed ad præteritum.

124. *Proculus lib. 2. Epistolarum.*

**H**Æc verba *ille aut ille* non solum disjunctivæ, sed etiam subdisjunctivæ orationis sunt. Disjunctivum est, veluti cum dicimus, *aut dies aut nox est*, quorum posito altero, necesse est tolli alterum. item sublato altero, poni alterum. ita simili figuratione verbum potest esse subdisjunctivum. Subdisjunctivi autem genera sunt duo: unum, cum ex propositis finibus ita non potest uterque esse, ut possit neuter esse. veluti cum dicimus, *aut sedet, aut ambulat*. nam ut nemo potest utrumque simul facere, ita aliquis potest neutrum, veluti is, qui accumbit. Alterius generis est, cum ex propositis finibus ita non potest neuter esse, ut possit utrumque esse, veluti cum dicimus, *omne animal aut facit, aut patitur*. nullum est enim, quod nec faciat, nec patiatur: at potest simul & facere & pati.

125. *Idem lib. 5. Epistolarum.*

**N**Epos Proculo suo salutem. Ab eo, qui ita dotem promisit, *Cum commodum erit, dotis filia mea tibi erunt auri centum*, putasne protinus nuptiis factis dotem peti posse? quid, si ita promississet, *Cum potuero, doti erunt*? quod si aliquam vim habeat posterior obligatio, possit verbum quomodo interpretaris? utrum auri alieno deducto, an extante? Proculus: Cum dotem quis ita promisit, *Cum potuero, doti tibi erunt centum*? existimo ad id, quod actum est, interpretacionem redigendam esse. nam qui ambigue loquitur, id loquitur, quod ex his, quæ significantur, sensit.

propius est tamen, ut hoc eum sensisse existimem : deducto ære alieno potero. potest etiam illa accipi significatio, cum salva dignitate mea potero. quæ interpretatio ea magis accipienda est, si ita promissum est, cum commodum erit. hoc est, cum sine incommodo meo potero.

126. *Idem lib. 6. Epistolarum.*

**S**I cum fundum tibi darem, legem ita dixi, *Uti optimus maximusque esset*, & adjeci, jus fundi deterius factum non esse per dominum : præstabitur. amplius eo præstabitur nihil : etiam si prior pars, qua scriptum est, *uti optimus maximusque sit*, liberum esse significat. eoque, si posterior pars adjecta non esset, liberum præstare deberem. tamen inferiore parte satis me liberatum puto, quod ad jura attinet, ne quid aliud præstare debeam, quam jus fundi per dominum deterius factum non esse.

127. *Callistratus lib. 4. de Cognitionibus.*

**V**estis appellatione tam virilis quam muliebris, & scænica, etiam si tragica aut citharædica sit, continetur.

128. *Ulpianus lib. 1. ad leg. Jul. & Pap.*

**S**padonum generalis appellatio est. quo nomine tam hi, qui natura spadones sunt, item thlibæ, thlasix : sed & si quod aliud genus spadonum est, continentur.

129. *Paulus lib. 1. ad leg. Jul. & Pap.*

**Q**ui mortui nascuntur, neque nati, neque procreati videntur : quia nunquam liberi appellari potuerunt.

130. *Ulpianus lib. 2. ad leg. Jul. & Pap.*

**L**ege obvenire hæreditatem non improprie quis dixerit & eam, quæ ex testamento defertur : quia lege duodecim tabularum testamentariæ hæreditates confirmantur.

131. *Idem lib. 3. ad leg. Jul. & Pap.*

**A**liud fraus est, aliud pœna. fraus enim sine pœna esse potest, pœna sine fraude esse non potest. pœna est noxæ vindicta, fraus & ipsa noxa dicitur, & quasi pœnæ quædam præparatio.

**I**nter multam autem & pœnam multum inter est : cum pœna generale sit nomen, omnium delictorum coercitio : multa specialis peccati, cujus animad-

versio



versio hodie pecuniaria est. poena autem non tantum pecuniaria, verum capitis & existimationis irrogari solet. & multa quidem ex arbitrio ejus venit, qui multam dicit, poena non irrogatur, nisi quæ quaque lege; vel quo alio jure specialiter huic delicto imposita est. quinimo multa ibi dicitur, ubi specialis poena non est imposita. Item multam is dicere potest, cui judicatio data est. magistratus solos, & præsides provinciarum posse multam dicere, mandatis permissum est. poenam autem unusquisque irrogare potest, cui hujus criminis sive delicti executio competit.

132. *Paulus lib. 3. ad leg. Jul. & Pap.*

**A**nniculus amittitur, qui extremo anni die moritur. & consuetudo loquendi id ita esse declarat, *Ante diem decimum Kalendarum, post diem decimum Kalendarum.* neque utro enim sermone undecim dies significantur.

¶ Falsum est eam peperisse, cui mortuæ filius exfectus est.

133. *Ulpianus lib. 4. ad leg. Jul. & Pap.*

**S**I quis sic dixerit, ut intra diem mortis ejus aliquid fiat: ipse quoque dies, quo quis mortuus est numeratur.

134. *Paulus lib. 2. ad leg. Jul. & Pap.*

**A**nniculus non statim ut natus est, sed trecentesimo sexagesimoquinto die dicitur, incipiente plane, non exacto die: quia annum civiliter, non ad momenta temporum, sed ad dies numeramus.

135. *Ulpianus lib. 4. ad leg. Jul. & Pap.*

**Q**uæret aliquis, si portentosum, vel monstrosam, vel debile mulier ediderit, vel qualem visu vel vagitu novum, non humanæ figuræ, sed alterius magis animalis quam hominis partum: an, quia enixa est, prodesse ei debeat? & magis est, ut hæc quoque parentibus prosint. nec enim est, quod eis imputetur, quæ qualiter potuerunt, statutis obtemperaverunt, neque id, quod fataliter accessit, matri damnum injungere debet.

136. *Idem lib. 5. ad leg. Jul. & Pap.*

**G**eneri appellatione & neptis, & proneptis, tam ex filio, quam ex filia editorum, cæterarumque maritos contineri, manifestum est.

137. *Paulus lib. 2. ad leg. Jul. & Pap.*

**T**er enixa videtur, etiam quæ trigeminos pepererit.

138. *Idem lib. 4. ad leg. Jul. & Pap.*

**H**æreditatis appellatione bonorum quoque possessio continetur.

139. *Ulpianus lib. 7. ad leg. Jul. & Pap.*

**Æ**dificia Romæ fieri etiam ea videntur, quæ in continentibus Romæ ædificiis fiant.

¶ **¶** Perfecisse ædificium is videtur, qui ita consummavit, ut jam in usu esse possit.

140. *Paulus lib. 6. ad leg. Jul. & Pap.*

**C**episse quis intelligitur, quamvis alii acquisiit.

141. *Ulpianus lib. 8. ad leg. Jul. & Pap.*

**E**tiam ea mulier, cum moreretur, creditur filium habere, quæ exciso utero edere possit. nec non etiam alio casu mulier potest habere filium, quem mortis tempore non habuit: utputa eum, qui ab hostibus remeavit.

142. *Paulus lib. 6. ad leg. Jul. & Pap.*

**T**riplici modo conjunctio intelligitur. aut enim re per se conjunctio contingit, aut re & verbis, aut verbis tantum. nec dubium est quin conjuncti sint, quos & nominum & rei complexus jungit: veluti *Titius & Mævius ex parte dimidia hæredes sunt.* vel ita *Titius Mæviusque hæredes sunt.* Vel, *Titius cum Mævio ex parte dimidia hæredes sunt.* videamus autem ne etiam si hos articulos detrahas &, *que, cum,* interdum tamen conjunctos accipi oporteat. veluti *Lucius Titius, Publius Mævius ex parte dimidia hæredes sunt.* vel ita, *Publius Mævius, Lucius Titius hæredes sunt. Sempronius ex parte dimidia hæres esto.* ut Titius & Mævius veniant in partem dimidiam, & re & verbis conjuncti videantur. *Lucius Titius ex parte dimidia hæres esto. Scius ex parte, qua Lucius Titium hæredem institui, hæres esto. Sempronius ex parte dimidia hæres esto.* Julianus dubitari posse, tres semisses facti sint, an Titius in eundem semissem cum Gajo Sejo institutus sit. sed eo quod Sempronius quoque ex parte dimidia scriptus est, verisimilius esse, in eundem semissem duos coactos: & conjunctim hæredes scriptos esse.

143. *Ulpianus lib. 9. ad leg. Jul. & Pap.*

**I**D apud se quis habere videtur, de quo habet actionem, habetur enim, quod peti potest.

144. *Paulus lib. 10. ad leg. Jul. & Pap.*

**L**ibro memorialium Massurius scribit, pellicem apud antiquos eam habitam, quæ cum uxor non esset, cum aliquo tamen vivebat: quam nunc vero nomine amicam, paulo honestiore concubinam appellari. Granius Flaccus in libro de jure Papiriano scribit, pellicem nunc vulgo vocari, quæ cum eo, cui uxor sit, corpus misceat. quosdam eam, quæ uxoris loco sine nuptiis in domo sit, quam Παλλακήν Græci vocant.

145. *Ulpianus lib. 10. ad leg. Jul. & Pap.*

**V**irilis appellatione interdum etiam totam hæreditatem contineri dicendum est.

146. *Terentius Clemens lib. 2. ad leg. Jul. & Pap.*

**S**Oceri, socrus appellatione avum quoque & aviam uxoris vel mariti contineri, respondetur.

147. *Idem lib. 3. ad leg. Jul. & Pap.*

**Q**ui in continentibus urbis nati sunt, Romæ nati intelligantur.

148. *Gajus lib. 8. ad leg. Jul. & Pap.*

**N**on est sine liberis, cui vel unus filius unave filia est. hæc enim enuntiatio, *habet liberos, non habet liberos*, semper plurativo numero profertur: sicut & pugillares & codicilli.

149. *Idem lib. 10. ad leg. Jul. & Pap.*

**N**am quem sine liberis esse, dicere non possumus: hunc necesse est dicamus liberos habere.

150. *Idem lib. 9. ad leg. Jul. & Pap.*

**S**I ita à te stipulatus fuero, *Quanto minus à Titio consecutus fuero, tantum dare spondes?* non solet dubitari, quin si nihil à Titio fuero consecutus, totum debeas, quod Titius debuerit.

151. *Terentius Clemens lib. 5. ad leg. Jul. & Pap.*

**D**elata hæreditas intelligitur, quam quis possit ad eundo consequi.

152. *Gajus lib. 10. ad leg. Jul. & Pap.*

**H**ominis appellatione tam fœminam quam masculum contineri, non dubitatur.

153. *Terentius Clemens lib. 11. ad leg. Jul. & Pap.*

**I**ntelligendus est mortis tempore fuisse, qui in utero relictus est.

154. *Macer lib. 1. ad legem vicefamam.*

**M**ille passus non à miliario urbis, sed continentibus aedificiis numerandi sunt.

155. *Licinius Rufinus lib. 7. Regularum.*

**P**roximi appellatione etiam ille continetur qui solus est.

156. *Idem lib. 10. Regularum.*

**M**ajore parte anni possedisse quis intelligitur, etiam si duobus mensibus possederit: si modo adversarius ejus aut paucioribus diebus, aut nullis possederit.

157. *Aelius Gallus lib. 1. de verborum, qua ad jus pertinent, significatione.*

**P**aries est, sive murus, sive maceria est.

¶ Item via est, sive semita, sive iter est.

158. *Celsus lib. 25. Digestorum.*

**I**n usu juris frequenter uti nos Cascellius ait singulari appellatione, cum plura generis ejusdem significare vellemus: nam multum hominem venisse Romanam, & piscem vilem esse dicimus. item in stipulando satis habemus de hærede cavere, *Si ea res secundum me hæredemve meum judicata erit.* & rursus, *Quod ob eam rem te hæredemve tuum.* nempe æque, si plures hæredes sint, continentur stipulatione.

159. *Ulpianus lib. 1. ad Sabinum.*

**E**tiam aureos nummos æs dicimus.

160. *Idem lib. 2. ad Sabinum.*

**C**æterorum & reliquorum appellatione etiam omnes continentur, ut Marcellus dixit circa eum, cui optio servi legata est, ceteri Sempronio. nam tentat, si non optet, omnes ad Sempronium pertinere.

161. *Idem lib. 7. ad Sabinum.*

**N**on est pupillus, qui in utero est.

162. *Pomponius lib. 2. ad Sabinum.*

**I**n vulgari substitutione, qua ei, qui supremus morietur, hæres substituitur, recte substitutus etiam unico intelligitur: exemplo duodecim tabularum, ex quibus proximus adgnatus & solus habetur.

¶ Si quis ita in testamento scripserit, *Si quid filio meo acciderit, Damas servus meus liber esto:* mortuo filio, Damas liber erit. licet enim accidant & vivis, sed vulgi sermone etiam mors significatur.

163. *Paulus lib. 2. ad Sabinum.*

**I**LLa verba, *Optimus maximusque*, vel in eum cadere possunt, qui solus est. Sic & circa edictum prætoris supremæ tabulæ habentur & solæ.

1 ¶ Pueri appellatione etiam puella significatur. nam & foeminas puerperas appellant recentes ex partu, & Græce *παῖδιον* communiter appellatur.

164. *Ulpianus lib. 15. ad Sabinum.*

**N**omen filiarum & in posthumam cadere, quæstionis non est. quamvis posthumæ non cadere in eam, quæ jam in rebus humanis sit, certum sit.

1 ¶ Partitionis nomen non semper dimidium significat: sed prout est adjectum. potest enim juberi aliquis & maximam partiri: posse & vicesimam, & tertiam, & prout libuerit. sed si non fuerit portio adjecta, dimidia pars debetur.

2 ¶ Habere, sicut pervenire, cum effectu accipiendum est.

165. *Pomponius lib. 5. ad Sabinum.*

**V**enisse ad hæredem nihil intelligitur, nisi deducto ære alieno.

166. *Idem lib. 6. ad Sabinum.*

**U**Rbana familia, & rustica, non loco, sed genere distinguitur. potest enim aliquis dispensator non esse servorum urbanorum numero: veluti is, qui rusticarum rerum rationes dispense, ibique habiter, non multum abest à villico, insularius autem urbanorum numero est. Videndum tamen est, ipse dominus, quorum loco quemque habuerit: quod ex numero familiæ, & vicariis apparebit.

1 ¶ Pernoctare extra urbem intelligendus est, qui nulla parte noctis in urbe est. *Per* enim totam noctem significat.

167. *Ulpianus lib. 25. ad Sabinum.*

**C**arbonum appellatione materiam non contineri. sed an lignorum? & fortassis quis dicet, nec lignorum: non enim lignorum gratia habuit. Sed & titiones, & alia ligna cocta, ne fumum faciant, utrum ligno, an carboni, an suo generi adnumerabimus? & magis est, ut proprium genus habeatur. sulphurata quoque de ligno æque eandem habebunt definitionem. ad faces quoque parata, non erunt ligno.

gnorum appellatione comprehensa, nisi hæc fuit voluntas. idem & de nucleis olivarum, sed & de balanis est, vel si qui alii nuclei. de pinu autem integri strobili, ligni appellatione continebuntur.

168. *Paulus lib. 4. ad Sabinum.*

**P**Ali & pertica in numerum materiæ redigendi sunt : & ideo lignorum appellatione non continentur.

169. *Idem lib. 5. ad Sabinum.*

**N**on tantum in traditionibus, sed & in emptionibus, & stipulationibus, & testamentis adjectio hæc, *Uti optimus maximusque est*, hoc significat : ut liberum præstetur prædium, non ut etiam servitutes ei debeantur.

170. *Ulpianus lib. 33. ad Sabinum.*

**H**æredis appellatione omnes significari successores credendum est, etsi verbis non sint expressi.

171. *Pomponius lib. 16. ad Sabinum.*

**P**ervenisse ad te recte dicitur, quod per te ad alium pervenerit. ut in hæreditate à liberto per patronum filiumfamilias patri ejus adoptivo acquisita responsum est.

172. *Ulpianus lib. 38. ad Sabinum.*

**L**iberti appellatione etiam libertam contineri placuit.

173. *Idem lib. 39. ad Sabinum.*

**C**ollegarum appellatione hi continentur, qui sunt ejusdem potestatis.

**¶** Qui extra continentia urbis est, abest. cæterum usque ad continentia, non abesse videbitur.

174. *Idem lib. 42. ad Sabinum.*

**A**liud est promittere furem non esse, aliud furto noxaque solutum. qui enim dicit furem non esse, de hominis proposito loquitur. qui furtis noxaque solutum, nemini esse furti obligatum promittit.

175. *Pomponius lib. 22. ad Sabinum.*

**F**aciendi verbo, reddendi etiam causa continetur.

176. *Ulpianus lib. 45. ad Sabinum.*

**S**olutionis verbo, satisfactionem quoque omnem accipiendam placet. solvere dicimus eum, qui fecit quod facere promisit.

177. *Idem lib. 47. ad Sabinum.*

**N**atura cavillationis, quam Græci *συνεχισμὸν* (id est, *acervalem syllogismum*) appellaverunt, hæc est, ut ab evidenter veris per brevissimas mutationes disputatio ad ea, quæ evidenter falsa sunt, perducatur.

178. *Idem lib. 49. ad Sabinum.*

**P**ecuniæ verbum, non solum numeratam pecuniam complectitur: verum omnem omnino pecuniam, hoc est, omnia corpora. nam corpora quoque pecuniæ appellatione contineri, nemo est qui ambiget.

1 ¶ **H**æreditas juris nomen est, quod & accessionem & decessionem in se recipit. hæreditas autem vel maxime fructibus augetur.

2 ¶ **A**ctionis verbum, & speciale est, & generale: nam omnis actio dicitur, sive in personam, sive in rem sit petitio. sed plerumque actiones personales solemus dicere. petitionis autem verbo, in rem actiones significari videntur. Persecutionis verbo extraordinarias persecuciones putò contineri: ut puta fideicommissorum, & si quæ aliæ sunt, quæ non habent juris ordinarii executionem.

3 ¶ **H**oc verbum *debet*, omnem omnino actionem comprehendere intelligitur, sive civilis, sive honoraria: sive fideicommissi fuit persecutio.

179. *Idem lib. 51. ad Sabinum.*

**I**nter hæc verba, *Quanti ea res erit*, vel, *Quanti eam rem esse paret*, nihil interest: in utraque enim clausula placet veram rei æstimationem fieri.

180. *Pomponius lib. 30. ad Sabinum.*

**T**ugurii appellatione omne ædificium, quod rusticæ magis custodiæ convenit, quam urbanis ædibus, significatur.

1 ¶ **O**filius ait, tugurium à tecto, tanquam tegularium, esse dictum, ut toga, quod ea tegamur.

181. *Idem lib. 35. ad Sabinum.*

**V**erbum illud *pertinere*, latissime patet. nam & eis rebus petendis aptum est, quæ domini nostri sint: & eis, quas jure aliquo possideamus, quamvis non sint nostri domini. pertinere ad nos etiam ea dicimus, quæ in nulla eorum causa sint, sed esse possint.

182. *Ulpianus lib. 27. ad Edictum.*

**P**aterfamilias liber peculium non potest habere, quemadmodum nec servus bona.

183. *Idem lib. 28. ad Edictum.*

**T**abernæ appellatio declarat omne utile ad habitandum ædificium, non ex eo quod tabulis cluditur.

184. *Paulus lib. 30. ad Edictum.*

**I**nde tabernacula, & contubernaless dicti sunt.

185. *Ulpianus lib. 28. ad Edictum.*

**I**nstruatam autem tabernam sic accipiemus, quæ & rebus & hominibus ad negotiationem paratis constat.

186. *Idem lib. 30. ad Edictum.*

**C**ommendare nihil aliud est, quam deponere.

187. *Idem lib. 32. ad Edictum.*

**V**erbum *Exacta pecunia*, non solum ad solutionem referendum est: verum etiam ad delegationem.

188. *Paulus lib. 33. ad Edictum.*

**H**abere duobus modis dicitur: altero, jure domini: altero, obtinere sine interpellatione id quod quis emerit.

**I** ¶ Cautum intelligitur, siue personis siue rebus cautum sit.

189. *Idem lib. 34. ad Edictum.*

**F**acere oportere & hanc significationem habet, ut abstineat quis ab eo facto, quod contra conventionem fieret: & curaret, ne fiat.

190. *Ulpianus lib. 34. ad Edictum.*

**P**rovinciales eos accipere debemus, qui in provincia domicilium habent: non eos, qui ex provincia oriundi sunt.

191. *Paulus lib. 35. ad Edictum.*

**I**nter divortium & repudium hoc interest, quod repudiari etiam futurum matrimonium potest: non recte autem sponsa divortisse dicitur. quod divortium ex eo dictum est, quod in diversas partes eunt, qui discedunt.

192. *Ulpianus lib. 37. ad Edictum.*

**H**æc adjectio *plurifve*, non infinitam pecuniam continet, sed modicam: ut taxatio hæc, *Solidos decem plurifve*, ad minutulam summam referatur.



193. *Idem lib. 38. ad Edictum.*

**H**Æc verba, *Quanti eam rem paret esse*, non ad quod interest: sed ad rei æstimationem referuntur.

194. *Ulpianus lib. 43. ad Edictum.*

**I**Nter donum & munus hoc interest, quod inter genus & speciem. nam genus esse donum Labeo à donando dictum, munus speciem. nam munus esse donum cum causa, utputa natalicium, nuptalicium.

195. *Idem lib. 46. ad Edictum.*

**P**Ronuntiatio sermonis in sexu masculino, ad utrumque sexum plerumque porrigitur.

1 ¶ *Familie* appellatio qualiter accipiatur, videamus. & quidem varie accepta est: nam & in res, & in personas deducitur. in res, utputa in lege duodecim tabularum his verbis, *adgnatus proximus familiam habeto*. ad personas autem refertur familiæ significatio ita, cum de patrono & liberto loquitur lex: *ex ea familia*, inquit, *in eam familiam*. & hic de singularibus personis legem loqui constat.

2 ¶ *Familie* appellatio refertur & ad corporis cujusdam significationem, quod aut jure proprio ipsorum, aut communi universæ cognationis continetur. Jure proprio familiam dicimus, plures personas, quæ sunt sub unius potestate, aut natura, aut jure subjectæ. utputa patremfamilias, matremfamilias, filiumfamilias, filiamfamilias, quique deinceps vicem eorum sequuntur, utputa nepotes, & neptes, & deinceps. Pater autem familias appellatur, qui in domo dominium habet. recteque hoc nomine appellatur, quamvis filium non habeat. non enim solam personam ejus, sed & jus demonstramus. denique & pupillum patremfamilias appellamus: & cum paterfamilias moritur, quotquot capita ei subjecta fuerint, singulas familias incipiunt habere. singuli enim patrumfamiliarum nomen subeunt. idemque eveniet & in eo, qui emancipatus est: nam & hic sui juris effectus propriam familiam habet. Communi jure familiam dicimus omnium adgnatorum. nam etsi patrefamilias mortuo, singuli singulas familias habent: tamen omnes, qui sub unius potestate fuerunt, recte ejusdem familiæ appellabuntur, qui ex eadem domo & gente proditi sunt.

3 ¶ Servitutium quoque solemus appellare familias, ut in edicto prætoris ostendimus sub titulo de furtis, ubi prætor loquitur de familia publicanorum. sed ibi non omnes servi, sed corpus quoddam servorum demonstratur hujus rei causa paratum, hoc est, vectigalis causa. alia autem parte edicti omnes servi continentur, ut de hominibus coactis, & vi bonorum raptorum. item redhibitoria, si deterior res reddatur emptoris opera, aut familiæ ejus. & interdicto unde vi, familiæ appellatio omnes servos comprehendit. sed & filii continentur.

4 ¶ Item appellatur familia plurium personarum, quæ ab ejusdem ultimi genitoris sanguine profiscuntur. sicuti dicimus familiam Juliam, quali à fonte quodam memoria.

5. ¶ Mulier autem familiæ suæ & caput, & finis est.

196. *Gajus lib. 16. ad Edictum Prov.*

FAMILIÆ appellatione & ipse princeps familiæ continetur.

1 ¶ Fœminarum liberos in familia earum non esse, palam est: quia qui nascuntur, patris, non matris, familiam sequuntur.

197. *Ulpianus lib. 50. ad Edictum.*

INDICASSE est detulisse, arguisse, accusasse, & convicisse.

198. *Idem lib. 2. de omnibus tribunalibus.*

URBANA prædia, omnia ædificia accipimus, non solum ea, quæ sunt in oppidis, sed & si forte stabula sunt, vel alia meritoria in villis, & in vicis, vel si prætoria voluptati tantum deservientia. quia urbanum prædium non locus facit, sed materia. Proinde horti quoque, si qui sunt in ædificiis constituti, dicendum sit urbanorum appellatione contineri. plane si plurimum horti in reditu sunt, vinearii forte, vel etiam olitorii, magis hæc non sunt urbana.

199. *Idem lib. 8. de omnibus tribunalibus.*

ABSENTEM accipere debemus eum, qui non est eo loci, in quo loco petitur. non enim trans mare absentem desideramus. & si forte extra continentia urbis sit, abest. cæterum usque ad continentia, non abesse videbitur, si non latitet.

1 ¶

1. ¶ Abesse non videtur qui ab hostibus captus est; sed qui à latronibus detinetur.

200. *Julianus lib. 2. Digestorum.*

**H**Æc stipulatio *Noxis solum præstari*, non existimatur ad eas noxas pertinere, quæ publicam exercitationem, & coërcitionem capitalem habent.

201. *Idem lib. 81. Digestorum.*

**J**USTA interpretatione recipiendum est, ut appellatione filii, sicuti filiamfamilias contineri. sæpe respondemus, ita & nepos videatur comprehendi: & patris nomine avus quoque demonstrari intelligatur.

202. *Alfenus Varus lib. 2. Digestorum.*

**C**UM in testamento scriptum esset, ut hæres in funere, aut in monumento duntaxat aureos centum consumeret, non licet minus consumere. si amplius vellet, licet: neque ob eam rem contra testamentum facere videtur.

203. *Idem lib. 7. Digestorum.*

**I**N legē censoria portus Sicilia ita scriptum erat: *Servos quos domo quis ducet suo usu, pro his portorium ne dato.* quærebatur, si quis à Sicilia servos Romam mitteret fundi instruendi causa: utrum pro his hominibus portorium dare deberet, necne. respondit, duas esse in hac scriptura quæstiones: primam, quid esset *domum* ducere: alteram, quid esset *suo usu* ducere. Igitur quæri solet, utrum ubi quisque habitaret, sive in provincia, sive in Italia, an duntaxat in sua cujusque patria domus esse recte diceretur. sed de ea re constitutum esse, eam domum unicuique nostrum debere existimari, ubi quisque sedes & tabulas haberet, suarumque rerum constitutionem fecisset. Quid autem esset *usu suo*, magnam habuisse dubitationem. & magis placet, quod victus sui causa paratum est, tantum contineri. Itemque de servis eadem ratione quæri, qui eorum usus sui causa parati essent: utrum dispensatores, insularii, villici, attrienses, textores, operarii quoque rustici, qui agrorum colendorum causa haberentur, ex quibus agris paterfamilias fructus caperet, quibus se toleraret: omnes denique servos, quos quisque emisset, ut ipse haberet, atque eis ad aliquam rem uteretur, neque ideo emisset, ut

venderet. Et sibi videri eos demum usus sui causa patremfamilias habere, qui ad ejus corpus tuendum, atque ipsius cultum præpositi, destinatique essent. quo in genere junctores, cubicularii, coci, ministratores, atque alii, qui ad ejusmodi usum parati essent, numerarentur.

204. *Paulus lib. 2. Epitomarum Alfeni.*

**P**ueri appellatio tres significationes habet: unam, cum omnes servos pueros appellaremus: alteram, cum puerum contrario nomine puellæ diceremus: tertiam, cum ætatem puerilem demonstraremus.

205. *Idem lib. 4. Epitomarum Alfeni.*

**Q**ui fundum vendidit, pomum recepit. nuces, & ficos, & uvas duntaxat duracinas, & purpureas, & quæ ejus generis essent, quas non vini causa haberemus, quas Græci τροφιμὸς (id est comestibiles) appellarent, recepta videri.

206. *Julianus lib. 6. ex Minicio.*

**V**inaria vasa propriè vasa torcularia esse placet. dolia autem & serias tamdiu in ea causa esse, quamdiu vinum haberent. cum sine vino esse desinerent, in eo numero non esse: quoniam ad alium usum transferri possent. veluti si frumentum in his addatur. eandem causam amphorarum esse: ut cum vinum habeant, tum in vasis vinariis: cum inanes sint, tum extra numerum vinariorum sint: quia aliud in his addi possit.

207. *Africanus lib. 3. Questionum.*

**M**ercis appellatione homines non contineri, Melait. & ob eam rem mangones non mercatores, sed venaliciarios appellari ait, & recte.

208. *Idem lib. 4. Questionum.*

**B**onorum appellatio, sicut hæreditatis, universitatem quandam ac jus successionis, & non singulares res demonstrat.

209. *Florentinus lib. 10. Institutionum.*

**C**oram Titio aliquid facere jussus, non videtur præsentem eo fecisse, nisi is intelligat. itaque si furiosus, aut insans sit, aut dormiat: non videtur coram eo fecisse. Scire autem, non etiam velle is debet: nam & invito eo recte fit, quod jussum est.

210. *Marcianus lib. 7. Institutionum.*

**I**S, qui natus est ex mancipiis urbanis, & missus est in villam nutriendus, in urbanis servis constituetur.

211. *Florentinus lib. 8. Institutionum.*

**F**UNDI appellatione omne ædificium, & omnis ager continetur: sed in usu urbana ædificia, ædes: rustica, villæ dicuntur. Locus vero sine ædificio, in urbe area; rure autem ager appellatur. idemque ager cum ædificio, fundus dicitur.

212. *Ulpianus lib. 1. de Adulteriis.*

**P**RÆVARICATORES eos appellamus, qui causam adversariis suis donant, & ex parte actoris in partem rei concedunt. à varicando enim prævaricatores dicti sunt.

213. *Idem lib. 1. Regularum.*

**C**EDERE diem significat incipere deberi pecuniam. *Venire* diem significat cum diem venisse, quo pecunia peti possit. Ubi pure quis stipulatus fuerit, & cessit, & venit dies. ubi in diem, cessit dies, sed nondum venit. ubi sub conditione, neque cessit, neque venit dies pendente adhuc conditione.

1 ¶ **Æs** alienum est, quod nos aliis debemus. **xs** suum est, quod alii nobis debent.

2 ¶ **Lata culpa** est nimia negligentia: id est, non intelligere, quod omnes intelligunt.

214. *Marcianus lib. 1. publicor. judicior.*

**M**UNUS proprie est, quod necessarie obimus, lege, more, imperiove ejus, qui jubendi habet potestatem. Dona autem proprie sunt, quæ nulla necessitate juris, officii, sed sponte præstantur. quæ si non præstantur, nulla reprehensio est. &, si præstantur, plerumque laus inest. sed in summa in hoc ventum est, ut non quodcunque munus, id & donum accipiat. at quod donum fuerit, id munus recte dicatur.

215. *Paulus libro singulari ad legem Fufiam Caniniam.*

**P**OTESTATIS verbo plura significantur. in persona magistratuum, imperium. in persona liberorum, patria potestas. in persona servi, dominium. At cum agimus de noxæ deditioe cum eo, qui servum non defendit, præsentis corporis copiam facultatemque significamus. In lege Atinia in potestatem domini rem furtivam venisse videri, & si ejus vindicandæ

potestatem habuerit, Sabinus & Cassius aiunt.

216. *Ulpianus lib. 1. ad legem Æliam Sentiam.*

**V**erum est, eum, qui in carcere clusus est, non videri neque vinctum neque in vinculis esse, nisi corpori ejus vincula sint adhibita.

217. *Favolenus lib. 1. ex Posterioribus Labeonis.*

**I**nter illam conditionem, *Cum fari potuerit*, & *postquam fari potuerit*, multum interest. nam posteriorem scripturam uberiolem esse constat. at *cum fari potuerit*, arctiorem: & id tantummodo tempus significari, quo primum fari possit.

¶ *Item ita data conditione, Illud facito in diebus, si nihil præterea fuisset adjectum, in biduo conditionem impleri oportet.*

218. *Papinianus lib. 27. Questionum.*

**V**erbum *Facere* omnem omnino faciendi causam complectitur: dandi, solvendi, numerandi, judicandi, ambulandi.

219. *Idem lib. 2. Responsum.*

**I**n conventionibus contrahentium voluntatem potius, quam verba, spectari placuit. Cum igitur ea lege fundum vestigalem municipes locaverint, ut ad hæredem ejus, qui suscepit, pertineret: jus hæredum ad legatarium quoque transferri potuit.

220. *Callistratus lib. 2. Questionum.*

**L**iberorum appellatione nepotes, & pronepotes, cæterique, qui ex his descendunt, continentur. hos enim omnes suorum appellatione lex duodecim tabularum comprehendit. totiens enim leges necessarium ducunt cognationem singulorum nominibus uti, veluti *fili*, *nepotes*, *pronepotes*, cæterorumve, qui ex his descendunt: quotiens non omnibus, qui post eos sunt, præstitum voluerint: sed solis his succurrent, quos nominatim enumerent. At ubi non personis certis, non quibusdam gradibus præstat, sed omnibus, qui ex eodem genere orti sunt: liberorum appellatione comprehenduntur.

¶ Sed & Papirius Fronto libro tertio responsum ait, prædio cum villico & contubernali ejus & filiis legato, nepotes quoque ex filiis contineri: nisi voluntas testatoris aliter habeat. filii enim appellatione sæpe & nepotes accipi multifariam placere.

2 ¶ Divus quoque Marcus rescripsit, non videri sine liberis defunctum, qui nepotem suum heredem reliquit.

3 ¶ Præter hæc omnia natura nos quoque docet parentes pios, qui liberorum procreandorum animo & voto uxores ducunt: filiorum appellatione omnes, qui ex nobis descendunt, contineri. nec enim dulciore nomine possumus nepotes nostros, quam filii appellare. etenim idcirco filios filiasve concepimus, atque edimus, ut ex prole eorum earumve diuturnitatis nobis memoriam in ævum relinquamus.

221. *Paulus lib. 10. Responsorum.*

**P**Aulus respondit, falsum tutorem cum vere dici, qui tutor non est, sive habenti tutor datus est, sive non. sicut falsum testamentum, quod testamentum non est. & modius iniquus, qui modius non est.

222. *Hermogenianus lib. 2. Juris epitomarum.*

**P**ECUNIÆ nomine non solum numerata pecunia: sed omnes res, tam soli, quam mobiles, & tam corpora, quam jura continentur.

223. *Paulus lib. 2. Sententiarum.*

**L**ATÆ culpæ finis est, non intelligere id, quod omnes intelligunt.

1. ¶ Amicos appellare debemus, non levi notitia conjunctos: sed quibus fuerint jura cum patrefamilias, honestis familiaritatis quæsitæ rationibus.

224. *Venulejus lib. 7. Stipulationum.*

**V**INCULORUM appellatione, vel privata, vel publica vincula significant. custodiæ vero, tantum publicam custodiam.

225. *Thryphonius lib. 1. Disputationum.*

**F**UGITIVUS est, non is, qui solum consilium fugiendi à domino suscepit, licet id se facturum jactaverit: sed qui ipso facto fugæ initium mente deduxerit. nam & furem, adulterum, aleatorem, quamquam aliqua significatione ex animi propositiōe cujusque sola quis dicere posset: ut etiam is, qui nunquam alienam rem invito domino subtraxerit, nunquam alienam matremfamilias corruperit, si modo ejus mentis sit, ut occasione data id commissurus sit: tamen oportere eadem hæc crimina assumpto actu intelligi, & ideo fugitivum quoque & erronem non

secundum propositionem solam, sed cum aliquo actu intelligi constat.

226. *Paulus lib. 1. Manualium.*

**M**agna negligentia, culpa est. magna culpa, dolus est.

227. *Idem lib. 2. Manualium.*

**E**x illa parte edicti, *Tum quem ei heredem esse oportet*, hæredis hæredibus bonorum possessio non defertur.

1 ¶ Item in substitutione his verbis, *Quisquis mihi hæres erit*, proximus hæres tantum significatur. imo non tantum proximus hæres, sed etiam scriptus.

228. *Idem libro singulari de cognitionibus.*

**M**unicipes intelligendi sunt, & qui in eodem municipio nati sunt.

229. *Idem libro singulari de tacitis fideicommissis.*

**T**ransacta finitave intelligere debemus, non solum quibus controversia fuit, sed etiam quæ sine controversia sint possessa.

230. *Idem libro singulari ad SC. Orficianum.*

**U**t sunt iudicio terminata, transactione composita, longioris temporis silentio finita.

231. *Idem libro singulari ad SC. Tertullianum.*

**Q**uod dicimus eum, qui nasci speratur, pro superstitite esse, tunc verum est, cum de ipsius jure quaeritur. aliis autem non prodest, nisi natus.

232. *Gajus lib. 1. de Verborum oblig.*

**H**æc enuntiatio, *Quæ sunt pluris aureorum triginta*, simul & quantitatis & æstimationis significativa est.

233. *Idem lib. 5. ad leg. 12. tabb.*

**S**i calvitur & moretur, & frustratur. Inde & calumniatores appellati sunt, quia per fraudem & frustrationem alios vexarent litibus. Inde & cavillatio dicta est.

1 ¶ Post Kalendas Januarias die tertio pro salute principis vota suscipiuntur.

2 ¶ Telum vulgo quidem id appellatur, quod ab arcu mittitur. sed nunc omne significatur, quod mittitur manu. Ita sequitur, ut & lapis, & lignum, & ferrum hoc nomine contineatur. Dictumque ab eo quod in longinquum mittitur, Græca voce figuratum *ἀπὸ τῆς τῆλῆς* (id est, *ab eo, quod est longe.*) & hanc significationem invenire possumus & in Græco.



nomine: nam, quod nos telum appellamus, illi βίλον<sup>Ⓞ</sup> appellant. eoque nomine vulgo quidem id significatur, quod ab arcu mittitur: sed non minus omne significatur, quod [cum] mittitur manu, ὑπὸ τῷ βέλλειν<sup>Ⓞ</sup> (id est, à jaciendo,) admonet nos Ξενοφον (id est, Xenophon) nam ita scribit: καὶ τὰ βίλη ὁμοίᾳ ἰφίρετο, λόγχοι, τοξεύματα, σφενδόνας: πλείους ἢ καὶ λίθοι. (id est, Et tela simul ferebantur, hasta, sagitta, funda, plurimi item lapides.) & id, quod ab arcu mittitur, apud Græcos quidem proprio nomine τέξιν<sup>Ⓞ</sup>, (id est, sagitta) vocatur: apud nos autem communi nomine telum appellatur.

234. Idem lib. 2. ad leg. 12. tabb.

Quos nos hostes appellamus, eos veteres perduelles appellabant, per eam adjectionem indicantes, cum quibus bellum esset.

1 ¶ Locuples est, qui satis idonee habet pro magnitudine rei, quam actor restituendam esse petit.

2 ¶ Verbum Vivere quidam putant ad cibum pertinere. sed Ofilius ad Atticum ait, his verbis & vestimenta & stramenta contineri. sine his enim vivere neminem posse.

235. Idem lib. 3. ad leg. 12. tabb.

Ferri proprie dicimus, quæ quis suo corpore bajulat: portari ea, quæ quis jumento secum ducit: agi ea, quæ animalia sunt.

1 ¶ Fabros tignarios dicimus non eos duntaxat, qui tigna dolarent: sed omnes qui ædificarent.

236. Idem lib. 4. ad leg. 12. tabb.

Qui venenum dicit, adjicere debet, utrum malum, an bonum. nam & medicamenta venena sunt: quia cō nomine omne continetur, quod adhibitum naturam ejus, cui adhibitum esset, mutat. cum id, quod nos venenum appellamus, Græci φάρμακον dicunt. apud illos quoque tam medicamenta, quam quæ nocent, hoc nomine continentur. unde adjectione alterius, nomine distinctio fit. admonet nos summus apud eos poetarum Homerus. nam sic ait:

Φάρμακα πολλὰ μὲν ἰσθλὰ μίμνρ<sup>Ⓞ</sup>, πολλὰ δὲ λυγρὰ. (id est,

Venena multa quidem bona mixta, multa autem mala:)

1. ¶ Glandis appellatione omnis fructus continetur.

tur, ut Javolenus ait, exemplo Græci sermonis, apud quos omnes arborum species ἀγκύρῃα (id est, *extremities arborum*) appellantur.

237. *Idem lib. 5. ad leg. 12. tabb.*

**D**Uobus negativis verbis quasi permittit lex magis quam prohibuit, idque etiam Servius animadvertit.

238. *Idem lib. 6. ad leg. 12. tabb.*

**P**LEbs est ceteri cives sine Senatoribus.

1 ¶ Detestatum est testatione denuntiatum.

2 ¶ Pignus appellatum à pugno : quia res, quæ pignori dantur, manu traduntur. unde etiam videri potest verum esse, quod quidam putant pignus proprie rei mobilis constitui.

3 ¶ Noxiæ appellatione omne delictum continetur.

239. *Pomponius libro singulari Enchiridii.*

**P**UPillus est, qui cum impubes est, desit in patris potestate esse aut morte aut emancipatione.

1 ¶ Servorum appellatio ex eo fluxit, quod Imperatores nostri captivos vendere, ac per hoc servare, nec occidere solent.

2 ¶ Incola est, qui aliqua regione domicilium suum contulit, quem Græci πέρποιον (id est, *juxta habitantem*) appellant. nec tantum hi, qui in oppido morantur, incolæ sunt : sed etiam qui alicujus oppidi finibus ita agrum habent, ut in eum se quasi in aliquam sedem recipiant.

3 ¶ Munus publicum est officium privati hominis, ex quo commodum ad singulos, universosque cives, remque eorum imperio magistratus extraordinarium pervenit.

4 ¶ Advena est, quem Græci ἀποικον, (id est, *domo profugum, colonum advenientem*) appellant.

5 ¶ Decuriones quidam dictos ajunt ex eo, quod initio, cum coloniæ deducerentur, decima pars eorum qui deducerentur, consilii publici gratia conscribi solita sit.

6 ¶ Urbs ab urbo appellata est. urbare est aratro definire. & Varus ait, urbem appellari curvaturam aratri, quod in urbe condenda adhiberi solet.

7 ¶ Oppidum ab ope dicitur, quod ejus rei causa moenia sunt constituta.

8 ¶ Territorium est universitas agrorum intra fines

cu-

cujusque civitatis. quod ab eo dictum quidam aiunt, quod magistratus ejus loci intra eos fines terrendi, id est summovendi, jus habet.

9 ¶ Verbum *Suum* ambiguum est, utrum de toto, an de parte significet. & ideo qui juret suum non esse, adjicere debet, neque sibi communem esse.

240. *Paulus ex libris sex, lib. 1. Imperialium sententiarum in cognitionibus prolatarum.*

Cum quærebatur, an verbum *Soluto matrimonio dotem reddi*, non tantum divortium, sed & mortem contineret, hoc est, an de hoc quoque casu contrahentes sentient: & multi putabant hoc sensisse, & quibusdam aliis contra videbatur: secundum hoc motus Imperator pronuntiavit, id actum eo pacto, ut nullo casu remaneret dos apud maritum.

241. *Quintus Mucius Scaevola libro singulari opōv.*

IN rutis casis ea sunt, quæ terra non tenentur, quæque opere struili, testoriove non continentur.

242. *Javolenus lib. 2. ex Posterioribus Labeonis.*

Malum navis esse partem, artemonem autem non esse, Labeo ait: quia pleræque naves sine malo inutiles essent. ideoque pars navis habetur. artemonem autem magis adjectamento, quam pars navis est.

1 ¶ Inter projectum & immissum, hoc interesse ait Labeo: quod projectum esset id, quod ita proceheretur, ut nusquam requiesceret: qualia moeniana, & suggrunda essent. immissum autem, quod ita fieret, ut aliquo loco requiesceret; veluti tigna, trabes, quæ immitterentur.

2 ¶ Plumbum, quod tegulis poneretur, ædificiū esse ait Labeo. sed id, quod hypathri tegendi causa poneretur, contra esse.

3 ¶ Viduam non solum eam quæ aliquando nupta fuisset, sed eam quoque mulierem, quæ virum non habuisset, appellari ait Labeo. quia vidua sic dicta est, quasi vecors, vefanus, qui sine corde, aut sanitate esset. similiter viduam dictam esse, sine divitate.

4 ¶ Straturam loci alicujus ex tabulis factis, quæ ætate tollerentur, & hyeme ponerentur, ædium esse, ait Labeo: quoniam perpetui usus paratæ essent. neque ad rem pertinere, quod interim tollerentur.

243. *Scævola lib. 18. Digestorum.*

SCÆVOLA respondit: semper acceptum est, ut liber-  
torum appellatione etiam hi contineri intelligan-  
tur, qui eodem testamento vel posteriore loco manu-  
mitterentur: nisi manifeste is, à quo peterentur, con-  
tra defuncti voluntatem doceret peti.

244. *Labeo lib. 4. Pithanon à Paulo epitomatorum.*

SI qua pœna est, multa est. si qua multa est, pœna  
est. *Paulus*: Utrumque eorum falsum est. namque  
harum rerum dissimilitudo ex hoc quoque apparet,  
quod de pœna provocatio non est: simul atque enim  
victus quis est ejus maleficii, cujus pœna est statuta,  
statim ea debetur. At multæ provocatio est: nec an-  
te debetur, quam aut non est provocatum, aut pro-  
vocator victus est. nec aliter, quam si is dixit, cui  
dicere licet. Ex hoc quoque earum rerum dissimilitu-  
do apparere poterit, quia pœnæ certæ singulorum  
peccatorum sunt: multæ contra. quia ejus judicis po-  
restas est, quantam dicat, nisi cum lege est constitu-  
tum, quantam dicat.

245. *Pomponius lib. 10. Epistolarum.*

STATUÆ affixæ basibus struclilibus, aut tabulæ reli-  
gatæ catenis, aut erga parietem adfixæ, aut si simi-  
liter coherant lychni, non sunt ædium: ornatus e-  
nim ædium causa parantur, non quo ædes perficiantur.

¶ Idem Labeo ait: Prothyrum, quod in ædibus  
iterum qui fieri solet, ædium est.

246. *Idem lib. 16. Epistolarum.*

APUD Labeonem Pithanon ita scriptum est: exhi-  
bēt, qui præstat ejus, de quo agitur, præsentiam.  
nam etiam qui sistit, præstat ejus, de quo agitur,  
præsentiam, nec tamen eum exhibet. & qui mutum  
aut furiosum aut infantem exhibet, non potest videri  
ejus præstare præsentiam: nemo enim ex eo genere  
præsens satis apte appellari potest.

¶ Restituit, non tantum qui solum corpus, sed  
etiam qui omnem rem conditionemque reddita cau-  
sa præstet. & tota restitutio juris est interpretatio.

Libri L. Digestorum Titulus XVII.

# DE DIVERSIS REGULIS JURIS ANTIQUI.

1. *Paulus lib. 16. ad Plantium.*

**R**egula est, quæ rem, quæ est, breviter enarrat. non ex regula jus sumatur: sed ex jure, quod est, regula fiat. Per regulam igitur brevis rerum narratio traditur, & ut ait Sabinus, quasi causæ conjectio est, quæ simul cum in aliquo vitiata est, perdit officium suum.

2. *Ulpianus lib. 1. ad Sabinum.*

**F**oemina ab omnibus officiis civilibus vel publicis remotæ sunt: & ideo nec judices esse possunt, nec magistratum gerere, nec postulare, nec pro alio intervenire, nec procuratores existere.

1 ¶ Item impubes omnibus officiis civilibus debet abstinere.

3. *Idem lib. 3. ad Sabinum.*

**E**jus est non nolle, qui potest velle.

4. *Idem lib. 6. ad Sabinum.*

**V**elle non creditur, qui obsequitur imperio patris, vel domini.

5. *Paulus lib. 2. ad Sabinum.*

**I**n negotiis contrahendis alia causa habita est furiosorum, alia eorum, qui fari possunt, quamvis actum rei non intelligerent. nam furiosus nullum negotium contrahere potest: pupillus omnia tutore auctore agere potest.

6. *Ulpianus lib. 7. ad Sabinum.*

**N**on vult hæres esse, qui ad alium transferre voluit hæreditatem.

7. *Pomponius lib. 3. ad Sabinum.*

**J**us nostrum non patitur eundem in paganis, & testato & intestato decessisse. earumque rerum naturaliter inter se pugna est, testatus, & intestatus.

8. *Idem lib. 4. ad Sabinum.*

**J**ura sanguinis nullo jure civili dirimi possunt.

9. *Ulpianus lib. 15. ad Sabinum.*

**S**emper in obscuris, quod minimum est, sequitur.

10. *Paulus lib. 3. ad Sabinum.*

**S**ecundum naturam est, commoda cujusque rei cum sequi, quem sequentur incommoda.

11. *Pomponius lib. 5. ad Sabinum.*

**I**D, quod nostrum est, sine facto nostro ad alium transferri non potest.

12. *Paulus lib. 3. ad Sabinum.*

**I**N testamentis plenius voluntates testantium interpretantur.

13. *Ulpianus lib. 19. ad Sabinum.*

**N**on videtur cepisse, qui per exceptionem à petitione removetur.

14. *Pomponius lib. 5. ad Sabinum.*

**I**N omnibus obligationibus; in quibus dies non ponitur, presenti die debetur.

15. *Paulus lib. 4. ad Sabinum.*

**I**S, qui actionem habet ad rem recuperandam, ipsam rem habere videtur.

16. *Ulpianus lib. 21. ad Sabinum.*

**I**maginaria venditio non est pretio accedente.

17. *Ulpianus lib. 23. ad Sabinum.*

**C**um tempus in testamento adjicitur, credendum est, pro hærede adjectum, nisi alia mens fuerit testatoris: sicuti in stipulationibus promissoris gratia tempus adjicitur.

18. *Pomponius lib. 6. ad Sabinum.*

**Q**uæ legata mortuis nobis ad hæredem nostrum transeunt, eorum commodum per nos his, quorum in potestate sumus, eodem casu acquirimus. aliter atque quod stipulati sumus. nam & sub conditione stipulantes, omnimodo eis acquirimus, etiam si liberatis nobis potestate domini conditio existat.

P A U L U S.

**S**i filiusfamilias sub conditione stipulatus, emancipatus fuerit: deinde exstiterit conditio: patri actio competit: quia in stipulationibus id tempus spectatur, quo contrahimus.

19. *Ulpianus lib. 24. ad Sabinum.*

**Q**ui cum alio contrahit, vel est, vel debet esse non signatus conditionis ejus. hæredi autem hoc imputari non potest, cum non sponte cum legatariis contrahit.

**I** ¶ Non solet exceptio doli nocere his , quibus voluntas testatoris non refragatur.

20. *Pomponius lib. 7. ad Sabinum.*

**Q**Uotiēns dubia interpretatio libertatis est , secundum libertatem respondendum erit.

21. *Ulpianus lib. 27. ad Sabinum.*

**N**on debet , cui plus licet , quod minus est , non licere.

22. *Idem lib. 28. ad Sabinum.*

**I**N personam servilem nulla cadit obligatio.

**I** ¶ Generaliter probandum est , ubicunque in bonæ fidei iudiciis confertur in arbitrium domini vel procuratoris ejus conditio , pro boni viri arbitrio hoc habendum esse.

23. *Idem lib. 29. ad Sabinum.*

**C**ONTRACTUS quidam dolum malum duntaxat recipiunt : quidam & dolum & culpam. dolum tantum , depositum , & precarium. dolum & culpam , mandatum , commodatum , venditum , pignori acceptum , locatum , item dotis datio , tutelæ , negotia gesta. in his quidem & diligentiam , societas & rerum communio & dolum & culpam recipit. sed hæc ita , nisi si quid nominatim convenit , vel plus , vel minus , in singulis contractibus : nam hoc servabitur , quod initio convenit. legem enim contractus dedit. excepto eo , quod Celsus putat , non valere , si convenerit , ne dolus præstetur. hoc enim bonæ fidei iudicio contrarium est. & ita utimur. Animalium vero casus , mortes , quæque sine culpa accedunt , fugæ servorum qui custodiri non solent , rapi-næ , tumultus , incendia , aquarum magnitudines , impetus prædonum à nullo præstantur.

24. *Paulus lib. 5. ad Sabinum.*

**Q**Uatenus cujus interfit , in facto , non in jure consistit.

25. *Pomponius lib. 11. ad Sabinum.*

**P**lus cautionis in re est , quam in persona.

26. *Ulpianus lib. 30. ad Sabinum.*

**Q**ui potest invitis alienare , multo magis & ignorantibus & absentibus potest.

27. *Pomponius lib. 16. ad Sabinum.*

**N**EC ex prætorio nec ex solemnī jure, privatorum conventionē quicquam immutandum est, quamvis obligationum causæ pactione possint immutari & ipso jure, & per pacti conventi exceptionem. quia actionum modus vel lege vel per prætorem introductus privatorum pactionibus non infirmatur, nisi tunc cum inchoatur actio, inter eos convenit.

28. *Ulpianus lib. 36. ad Sabinum.*

**D**IVUS Pius rescriptit, eos qui ex liberalitate conveniuntur, in id quod facere possunt, condemnandos.

29. *Paulus lib. 8. ad Sabinum.*

**Q**UOD initio vitiosum est, non potest tractu temporis convalescere.

30. *Ulpianus lib. 36. ad Sabinum.*

**N**UPTIAS non concubitus, sed consensus facit.

31. *Idem lib. 42. ad Sabinum.*

**V**ERUM est, neque pacta, neque stipulationes factum posse tollere. quod enim impossibile est, neque pacto neque stipulatione potest comprehendi, ut utilem actionem aut factum efficere possit.

32. *Idem lib. 43. ad Sabinum.*

**Q**UOD attinet ad jus civile, servi pro nullis habentur. non tamen & jure naturali: quia quod ad jus naturale attinet, omnes homines æquales sunt.

33. *Pomponius lib. 22. ad Sabinum.*

**I**N eo, quod vel is qui petit, vel is à quo petitur, lucri facturus est, durior causa est petitoris.

34. *Ulpianus lib. 45. ad Sabinum.*

**S**EMPER in stipulationibus & in cæteris contractibus id sequimur, quod actum est: aut si non pareat, quid actum est, erit consequens ut id sequamur, quod in regione in qua actum est frequentatur. Quid ergo, si neque regionis mos appareat, quia varius fuit? ad id quod minimum est, redigenda summa est.

35. *Idem lib. 48. ad Sabinum.*

**N**ILIL tam naturale est, quam eo genere quidve dissolvere, quo colligatum est. ideo verborum obligatio verbis tollitur: nudi consensus obligatio contrario consensu dissolvitur.

36. *Pomponius lib. 27. ad Sabinum.*

**C**ULPA est, immiscere se rei ad se non pertinenti.



37. *Ulpianus lib. 51. ad Sabinum.***N**emo, qui condemnare potest, absolvere non potest.38. *Pomponius lib. 29. ad Sabinum.***S**icuti poena ex delicto defuncti hæres teneri non debeat, ita nec lucrum facere, si quid ex ea re ad eum pervenisset.39. *Idem lib. 32. ad Sabinum.***I**n omnibus causis pro facto accipitur id, in quo per alium moræ sit, quo minus fiat.40. *Idem lib. 34. ad Sabinum.***F**uriosi, vel ejus cui bonis interdictum sit, nulla voluntas est.41. *Ulpianus lib. 26. ad Edictum.***N**on debet auctori licere, quod reo non permittitur.**I** ¶ In re obscura melius est favere repetitioni, quam adventitio lucro.42. *Gajus lib. 9. ad Edictum Prov.***Q**ui in alterius locum succedunt, justam habent causam ignorantia, an id, quod peteretur, deberetur. Fidejussores quoque non minus, quam hæredes, justam ignorantiam possunt allegare. Hæc ita de hærede dicta sunt, si cum eo agetur: non etiam si agat. nam plane qui agit, certus esse debet, cum sit in potestate ejus, quando velit, experiri: & ante debet rem diligenter explorare, & tunc ad agendum procedere.43. *Ulpianus lib. 28. ad Edictum.***N**emo ex his, qui negant se debere, prohibetur etiam alia defensione uti, nisi lex impedit.**I** ¶ Quotiens concurrunt plures actiones ejusdem rei nomine, una quis experiri debet.44. *Idem lib. 29. ad Edictum.***T**otiens in hæredem damus de eo quod ad eum pervenit, quotiens ex dolo defuncti convenitur, non quotiens ex suo.45. *Idem lib. 30. ad Edictum.***N**eque pignus, neque depositum, neque precarium, neque emptio, neque locatio rei suæ consistere potest.**I** ¶ Privatorum conventio juri publico non derogat.

46. *Gajus lib. 10. ad Edictum Prov.*

**Q**UOD à quoquo pœnæ nomine exactum est, id eadem restituere nemo cogitur.

47. *Ulpianus lib. 30. ad Edictum.*

**C**ONSILII non fraudulentæ nulla obligatio est. ceterum si dolus & calliditas intercessit, de dolo actio competit.

1 ¶ **S**ocii mei socius, meus socius non est.

48. *Paulus lib. 35. ad Edictum.*

**Q**UIDQUID in calore iracundiæ vel fit, vel dicitur, non prius ratum est, quam si perseverantia apparuit iudicium animi fuisse. ideoque brevi reversa uxor, nec divertisse videtur.

49. *Ulpianus lib. 35. ad Edictum.*

**A**LTERIUS circumventio alii non præbet actionem.

50. *Paulus lib. 39. ad Edictum.*

**C**ULPA caret qui scit, sed prohibere non potest.

51. *Gajus lib. 15. ad Edict. Prov.*

**N**ON videtur quisquam id capere, quod ei necesse est alii restituere.

52. *Ulpianus lib. 44. ad Edictum.*

**N**ON defendere videtur, non tantum qui latitat, sed & is qui præsens negat se defendere, aut non vult suscipere actionem.

53. *Paulus lib. 42. ad Edictum.*

**C**UJUS per errorem dati repetitio est, ejus consulto dati donatio est.

54. *Ulpianus lib. 46. ad Edictum.*

**N**EMO plus juris ad alium transferre potest quam ipse haberet.

55. *Gajus lib. 2. de testamentis ad Edictum urbicum.*

**N**ULLUS videtur dolo facere, qui suo jure utitur.

56. *Idem lib. 3. de legatis ad Edictum urbicum.*

**S**EMPER in dubiis benigniora præferenda sunt.

57. *Idem lib. 18. ad Edictum Prov.*

**B**ONA fides non patitur, ut bis idem exigatur.

58. *Ulpianus lib. 2. Disputationum.*

**E**X pœnalibus causis non solet in patrem de peculio actio dari.

59. *Idem lib. 3. Disputationum.*

**H**ÆREDem ejusdem potestatis jurisque esse, cujus fuit defunctus, constat.

60. *Idem*

60. *Idem lib. 10. Disputationum.*

**S**emper qui non prohibet pro se intervenire, mandare creditur. sed & si quis ratum habuerit, quod gestum est, obstringitur mandati actione.

61. *Idem lib. 3. Opinionum.*

**D**omum suam reficere unicuique licet, dum non officiat invito alteri, in quo jus non habet.

62. *Julianus lib. 6. Digestorum.*

**H**ereditas nihil aliud est, quam successio in universum jus quod defunctus habuerit.

63. *Idem lib. 17. Digestorum.*

**Q**ui sine dolo malo ad iudicium provocat, non videtur moram facere.

64. *Idem lib. 29. Digestorum.*

**E**a quæ raro accidunt, non temere in agendis negotiis computantur.

65. *Idem lib. 54. Digestorum.*

**E**a est natura cavillationis, quam Græci *συνερισμ* (id est, *acervalem syllogismum*) appellant, ut ab evidenter veris per brevissimas mutationes disputatio ad ea quæ evidenter falsa sunt, perducatur.

66. *Idem lib. 60. Digestorum.*

**M**arcellus: Desinit debitor esse is, qui nactus est exceptionem justam, nec ab æquitate naturali abhorrentem.

67. *Idem lib. 87. Digestorum.*

**Q**uotiens idem sermo duas sententias exprimit, ea potissimum excipiat, quæ rei gerendæ aptior est.

68. *Paulus libro singulari de dotis repetitione.*

**I**n omnibus causis id observatur, ut ubi personæ conditio locum facit beneficio, ibi deficiente ea beneficium quoque deficiat. ubi vero genus actionis id desiderat, ibi, ad quemvis persecutio ejus devenierit, non deficiat ratio auxilii.

69. *Idem libro singulari de adsignatione libertorum.*

**I**n invito beneficium non datur.

70. *Ulpianus lib. 1. de officio Procons.*

**N**emo potest gladii potestatem sibi datam, vel cuius alterius coercitionis, ad alium transferre.

71. *Idem lib. 2. de officio proconsulis.*

**O**mnia, quæcunque causæ cognitionem desiderant, per libellum expediri non possunt.

72. *Ja-*

72. *Javolenus lib. 3. ex posterioribus Labeonis.*

**F**RUCTUS rei est vel pignori dare licere.

73. *Quintus Mucius Scaevola libro singulari op̄v.*

**Q**UO tutela rediit, eo hæreditas pervenit, nisi cum fræminæ hæredes intercedunt.

1 ¶ Nemo potest tutorem dare cuicumque, nisi ei quem in suis hæredibus cum moritur habuit, habiturusve esset si vixisset.

2 ¶ Vi factum id videtur esse, qua de re quis, cum prohibetur, fecit: clam, quod quisque, cum controversiam haberet, habiturumve se putaret, fecit.

3 ¶ Quæ in testamento ita sunt scripta, ut intelligi non possint, perinde sunt, ac si scripta non essent.

4 ¶ Nec paciscendo, nec legem dicendo, nec stipulando quisquam alteri cavere potest.

74. *Papinianus lib. 1. Questionum.*

**N**ON debet alteri per alterum iniqua conditio inferri.

75. *Idem lib. 3. Questionum.*

**N**EMO potest mutare consilium suum in alterius injuriam.

76. *Idem lib. 24. Questionum.*

**I**N totum omnia quæ animi destinatione agenda sunt, non nisi vera & certa scientia perfici possunt.

77. *Idem lib. 28. Questionum.*

**A**CTUS legitimi, qui recipiunt diem, vel conditionem, veluti mancipatio, acceptilatio, hæreditatis aditio, servi optio, datio tutoris: in totum vitiuntur per temporis vel conditionis adjectionem, nonnunquam tamen actus supra scripti tacite recipiunt, quæ aperte comprehensa vitium adferunt. nam si acceptum feratur ei, qui sub conditione promisit, ita demum egisse aliquid acceptilatio intelligitur, si obligationis conditio exstiterit, quæ si verbis hominatum acceptilationis comprehendatur, nullius momenti faciet actum.

78. *Idem lib. 31. Questionum.*

**G**ENERALITER, cum de fraude disputatur, non quid habeat actor, sed quid per adversarium habere non potuerit, considerandum est.

79. *Idem*

79. *Idem lib. 32. Quæstionum.*

**F**raudis interpretatio semper in jure civili non ex eventu duntaxat, sed ex consilio quoque desideratur.

80. *Idem lib. 33. Quæstionum.*

**I**N toto jure, generi per speciem derogatur: & illud potissimum habetur, quod ad speciem directum est.

81. *Idem lib. 3. Responsorum.*

**Q**Uæ dubitationis tollendæ causa contractibus inferuntur, jus commune non lædunt.

82. *Idem lib. 9. Responsorum.*

**D**ONARI videtur, quod nullo jure cogente conceditur.

83. *Idem lib. 2. Definitionum.*

**N**ON videntur rem amittere, quibus propria non fuit.

84. *Paulus lib. 3. Quæstionum.*

**C**UM amplius solutum est, quam debebatur, cujus pars non invenitur quæ repeti possit, totum esse indebitum intelligitur manente pristina obligatione.

1 ¶ Is natura debet, quem jure gentium dare oportet, cujus fidem secuti sumus.

85. *Idem lib. 6. Quæstionum.*

**I**N ambiguis pro dotibus respondere melius est.

1 ¶ Non est novum, ut quæ semel utiliter constituta sunt, durent, licet ille casus exstiterit, à quo initium capere non potuerunt.

2 ¶ Quotiens æquitate desiderii naturalis ratio, aut dubitatio juris moratur, justis decretis res temperanda est.

86. *Idem lib. 7. Quæstionum.*

**N**ON solet deterior conditio fieri eorum, qui litem contestati sunt, quam si non: sed plerumque melior.

87. *Idem lib. 13. Quæstionum.*

**N**EMO enim in persequendo deteriorem causam, sed meliorem facit. Denique post litem contestatam hæredi quoque prospiceretur, & hæres tenetur ex omnibus causis.

88. *Scævola lib. 5. Quæstionum.*

**N**ULLA intelligitur mora ibi fieri, ubi nulla petitio est.

89. *Paulus lib. 10. Quæstionum.*

**Q**UAMDIU possit valere testamentum, tamdiu legitimus non admittitur.

90. *Idem*

90. *Idem lib. 15. Quaestionum.*

**I**N omnibus quidem, maxime tamen in jure, æquitas spectanda sit.

91. *Idem lib. 17. Quaestionum.*

**Q**uotiens duplici jure defertur alicui successio, repudiato novo jure, quod ante defertur, supererit vetus.

92. *Scævola lib. 5. Responsorum.*

**S**I librarius in transcribendis stipulationis verbis errasset, nihil nocere, quo minus & reus, & fidejussor tenetur.

93. *Macianus lib. 1. Fideicommiss.*

**F**iliusfamilias neque retinere, neque recuperare, neque adipisci possessionem rei peculiaris videtur.

94. *Ulpianus lib. 2. Fideicommiss.*

**N**on solent, quæ abundant, vitiare scripturas.

95. *Idem lib. 6. Fideicommiss.*

**N**emo dubitat, solvendo videri eum qui defenditur.

96. *Macianus lib. 12. Fideicommiss.*

**I**N ambiguis orationibus maxime sententia spectanda est ejus, qui eas protulisset.

97. *Hermogenianus lib. 3. Juris. Epitomarum.*

**E**A sola deportationis sententia aufert, quæ ad fiscum perveniunt.

98. *Idem lib. 4. Juris. Epitomarum.*

**Q**uotiens utriusque causa lucri ratio vertitur, is præferendus est, cujus in lucrum causa tempore præcedit.

99. *Venulejus lib. 12. Stipulationum.*

**N**on potest improbus videri, qui ignorat, quantum solvere debeat.

100. *Gajus lib. 1. Regularum.*

**O**Mnia, quæ jure contrahuntur, contrario jure percutiunt.

101. *Paulus libro singulari de Cognition.*

**U**bi lex duorum mensium fecit mentionem, & qui sexagesimo & primo die venerit, audiendus est: ita enim & Imperator Antoninus cum Divo patre suo rescripsit.

102. *Ulpianus lib. 1. ad Edictum.*

**Q**ui vetante prætore fecit, hic adversus edictum fecisse proprie dicitur.

**I** Ejus est actionem denegare, qui possit & dare.

103. *Paulus lib. 1. ad Edictum.***N**emo de domo sua extrahi debet.104. *Ulpianus lib. 2. ad Edictum.***S**i in duabus actionibus alibi summa major, alibi infamia est: præponenda est causa existimationis, ubi autem æquiparant famosa judicia, & si summam imparem habent, pro paribus accipienda sunt.105. *Paulus lib. 1. ad Edictum.***U**bicunque causæ cognitio est, ibi prætor desideratur.106. *Idem lib. 2. ad Edictum.***L**ibertas inæstimabilis res est.107. *Gajus lib. 1. ad Edictum Prov.***C**um servo nulla actio est.108. *Paulus lib. 4. ad Edictum.***F**ere in omnibus pœnalibus judiciis, & ætati & imprudentiæ succurritur.109. *Idem lib. 5. ad Edictum.***N**ullum crimen patitur is qui non prohibet, cum prohibere (non) potest.110. *Idem lib. 6. ad Edictum.***I**n eo quod plus sit, semper ineest & minus.1 ¶ **N**emo alienæ rei expromissor idoneus videtur, nisi si cum satisfactione.2 ¶ **P**upillus pati posse non intelligitur.3 ¶ **U**bi verba conjuncta non sunt, sufficit alterutrum esse factum.4 ¶ **M**ulieribus tunc succurrendum est, cum defendantur, non ut facilius calumnientur.111. *Gajus lib. 2. ad Edict. Prov.***P**upillum, qui proximus pubertati sit, capacem esse & furandi, & injuriæ faciendæ.1 ¶ **I**n hæredem non solent actiones transire, quæ pœnales sunt ex maleficio: veluti furti, damni, injuriæ, vi bonorum raptorum, injuriarum.112. *Paulus lib. 8. ad Edictum.***N**ihil interest, ipso jure quis actionem non habeat, an per exceptionem infirmetur.113. *Gajus lib. 3. ad Edict. Prov.***I**n toto & pars continetur.114. *Paulus lib. 9. ad Edictum.***I**n obscuris inspicere solere quod verisimilius est, aut quod plerumque fieri solet.

115. *Idem lib. 10. ad Edictum.*

**S**i quis obligatione liberatus sit, potest videri cepisse.

1 ¶ Non potest videri accepisse, qui stipulatus potest exceptione summoverti.

116. *Ulpianus lib. 11. ad Edictum.*

**N**ihil consensui tam contrarium est, qui ac bonæ fidei judicia sustinet, quam vis atque metus: quem comprobare, contra bonos mores est.

1 ¶ Non capitur, qui jus publicum sequitur.

2 ¶ Non videntur, qui errant consentire.

117. *Paulus lib. 11. ad Edictum.*

**P**rætor bonorum possessorem hæredis loco in omni causa habet.

118. *Ulpianus lib. 12. ad Edictum.*

**Q**ui in servitute est, usucapere non potest: nam cum possideatur, possidere non videtur.

119. *Idem lib. 13. ad Edictum.*

**N**on alienat, qui duntaxat omittit possessionem.

120. *Paulus lib. 12. ad Edictum.*

**N**emo plus commodi hæredi suo relinquit, quam ipse habuit.

121. *Idem lib. 13. ad Edictum.*

**Q**ui non facit, quod facere debet, videtur facere adversus ea, quia non facit. & qui facit, quod facere non debet, non videtur facere id quod facere jussus est.

122. *Gajus lib. 5. ad Edict. Prov.*

**L**ibertas omnibus rebus favorabilior est.

123. *Ulpianus lib. 14. ad Edictum.*

**N**emo alieno nomine lege agere potest.

1 ¶ Temporaria permutatio jus provinciæ non innovat.

124. *Paulus lib. 16. ad Edictum.*

**U**bi non voce, sed præsentia opus est, mutus, si intellectum habet, potest videri respondere. idem in furdo. hic quidem & respondere potest.

1 ¶ Furiosus absentis loco est, & ita Pomponius libro primo Epistolarum scribit.

125. *Gajus lib. 5. ad Edict. Prov.*

**F**avorabiliores rei potius, quam actores, habentur.



126. *Ulpianus lib. 15. ad Edictum.***N**emo prædo est, qui pretium numeravit.

1 ¶ Locupletior non est factus, qui libertum acquisierit.

2 ¶ Cum de lucro duorum quæzatur, melior est causa possidentis.

127. *Paulus lib. 20. ad Edictum.***C**um prætor in hæredem dat actionem quatenus ad eum pervenit, sufficit, si vel momento ad eum pervenit ex dolo defuncti.128. *Idem lib. 19. ad Edictum.***I**n pari causa possessor potior haberi debet.

1 ¶ Hi, qui in universum jus succedunt, hæredis loco habentur.

129. *Idem lib. 21. ad Edictum.***N**ihil dolo creditor facit, qui suum recipit.

1 ¶ Cum principalis causa non consistit, ne ea quidem quæ sequuntur, locum habent.

130. *Ulpianus lib. 18. ad Edictum.***N**unquam actiones, præsertim pœnales, de eadem re concurrentes, alia aliam consumit.131. *Paulus lib. 22. ad Edictum.***Q**ui dolo desierit possidere, pro possidente damnatur: quia pro possessione dolus est.132. *Gajus lib. 7. ad Edict. Prov.***I**mperitia culpæ adnumeratur.133. *Idem lib. 8. ad Edict. Prov.***M**elior conditio nostra per servos fieri potest: deterior fieri non potest.134. *Ulpianus lib. 21. ad Edictum.***N**on fraudantur creditores, cum quid non acquiritur à debitore: sed cum quid de bonis dimittitur.

1 ¶ Nemo ex suo delicto meliorem suam conditionem facere potest.

135. *Idem lib. 23. ad Edictum.***E**a quæ dari impossibilia sunt, vel quæ in rerum natura non sunt, pro non adjectis habentur.136. *Paulus lib. 18. ad Edictum.***B**ona fides tantundem possidenti præstat, quantum veritas, quotiens lex impedimento non est.

137. *Ulpianus lib. 25. ad Edictum.*

**Q**ui auctore iudice comparavit, bonæ fidei possessor est.

138. *Paulus lib. 27. ad Edictum.*

**O**mnis hæreditas, quamvis postea adeatur, tamen cum tempore mortis continuatur.

1 ¶ **N**unquam crescit ex postfacto præteriti delicti æstimationo.

139. *Gajus libro ad Edictum prætoris urbani.*

**O**mnes actiones quæ morte aut tempore percunt, semel inclusæ iudicio salvæ permanent.

1 ¶ **N**on videtur perfecte cuiusque id esse, quod ex casu auferri potest.

140. *Ulpianus lib. 56. ad Edictum.*

**A**bsentia ejus, qui reipublicæ causa abest, neque ei, neque alii damnosa esse debet.

141. *Paulus lib. 54. ad Edictum.*

**Q**uod contra rationem juris receptum est, non est producendum ad consequentia.

1 ¶ **U**ni duo pro solido hæredes esse non possunt.

142. *Idem lib. 56. ad Edictum.*

**Q**ui tacet, non utique faterur : sed tamen verum est eum non negare.

143. *Ulpianus lib. 62. ad Edictum.*

**Q**uod ipsis, qui contraxerunt, obstat, & successoribus eorum obitabit.

144. *Paulus lib. 62. ad Edictum.*

**N**on omne, quod licet, honestum est.

1 ¶ **I**n stipulationibus id tempus spectatur, quo contrahimus.

145. *Ulpianus lib. 66. ad Edictum.*

**N**emo videtur fraudare eos qui sciunt & consentiunt.

146. *Paulus lib. 62. ad Edictum.*

**Q**uod quis dum servus est, egit, proficere libero facto non potest.

147. *Gajus lib. 24. ad Edict. Prov.*

**S**emper specialia generalibus insunt.

148. *Paulus lib. 16. brevis Edicti.*

**C**ujus effectus omnibus prodest, ejus & partes ad omnes pertinent.

149. *Ulpianus lib. 67. ad Edictum.*

**E**x qua persona quis lucrum capit, ejus factum præstare debet.

150. *Idem lib. 68. ad Edictum.*

**P**AREM esse conditionem oportet ejus, qui quid possideat vel habeat: atque ejus, cujus dolo malo factum sit, quo minus possideret vel haberet.

151. *Paulus lib. 64. ad Edictum.*

**N**EMO damnnum facit, nisi qui id fecit, quod facere jus non habet.

152. *Ulpianus lib. 69. ad Edictum.*

**H**Oc jure utimur: ut, quidquid omnino per vim fiat, aut in vis publicæ aut in vis privatæ crimen incidat.

1 ¶ Dejicit, &amp; qui mandat.

2 ¶ In maleficio ratihabitio mandato comparatur.

3 ¶ In contractibus quibus doli præstatio vel bona fides inest, hæres in solidum tenetur.

153. *Paulus lib. 65. ad Edictum.*

**F**ERE quibuscunque modis obligamur, hisdem in contrarium actis liberamur: cum quibus modis acquirimus, hisdem in contrarium actis amittimus. ut igitur nulla possessio acquiri nisi animo & corpore potest: ita nulla amittitur, nisi in qua utrumque in contrarium actum.

154. *Ulpianus lib. 70. ad Edictum.*

**C**UM par delictum est duorum, semper oneratur petitor, & melior habetur possessoris causa: sicuti fit cum de dolo excipitur petitoris. neque enim datur talis replicatio petitori, *Aut si rei quoque in ea re dolo actum sit.*

1. ¶ Illi debet permitti pœnam petere, qui in ipsam non incidit.

155. *Paulus lib. 65. ad Edictum.*

**F**ACTUM cuique suum, non adversario nocere debet.

1 ¶ Non videtur vim facere, qui jure suo utitur, &amp; ordinaria actione experitur.

2 ¶ In pœnalibus causis benignius interpretandum est.

156. *Idem lib. 70. ad Edictum.*

**I**NVITUS nemo rem cogitur defendere.

1 ¶ Cui damus actiones, eidem &amp; exceptionem competere multo magis quis dixerit.

2 ¶ Cum quis in alius locum successerit, non est

M

æquum

æquum ei nocere hoc, quod adversus eum nocuit, in ejus locum successit.

3 ¶ Plerumque emptoris eadem causa esse debet circa petendum ac defendendum, quæ fuit auctoris.

4 ¶ Quod cuique pro eo præstatur, invito non tribuitur.

157. *Idem lib. 71. ad Edictum.*

**A**D ea quæ non habent atrocitatem facinoris vel sceleris, ignoscitur servis, si vel dominis, vel his, qui vice dominorum sunt, veluti tutoribus & curatoribus, obtemperaverint.

1 ¶ Semper qui dolo fecit, quominus haberet, pro eo habendus est, ac si haberet.

2 ¶ In contractibus successores ex dolo eorum (quibus) successerunt, non tantum in id quod per venit, verum etiam in solidum tenentur: hoc est unusquisque pro ea parte qua hæres est.

158. *Gajus lib. 26. ad Edictum Prov.*

**C**reditor qui permittit rem venire, pignus dimittit.

159. *Paulus lib. 70. ad Edictum.*

**N**on ut ex pluribus causis deberi nobis idem potest, ita ex pluribus causis idem possit nostrum esse.

160. *Ulpianus lib. 76. ad Edictum.*

**A**liud est vendere, aliud vendenti consentire.

1 ¶ Refertur ad universos, quod publice fit per majorem partem.

2 ¶ Absurdum est, plus juris habere eum cui legatus sit fundus, quam hæredem, aut ipsum testatorem si viveret.

161. *Idem lib. 77. ad Edictum.*

**I**n jure civili receptum est, quotiens per eum, cujus interest conditionem non impleri, fiat quo minus impleatur: perinde haberi, ac si impleta conditio fuisset. quod ad libertatem, & legata, & ad hæredum institutiones perducitur. quibus exemplis stipulationes quoque committuntur, cum per promissorem factum esset, quo minus stipulator conditioni pareret.

162. *Paulus lib. 70. ad Edictum.*

**Q**uæ propter necessitatem recepta sunt, non debent in argumentum trahi.

163. *Ulpianus lib. 55. ad Edictum.***C**ujus est donandi, eidem & vendendi, & concedendi jus est.164. *Paulus lib. 51. ad Edictum.***P**oenalia judicia semel accepta, in hæredes transmitti possunt.165. *Ulpianus lib. 53. ad Edictum.***C**um quis possit alienare, poterit & consentire alienationi. Cui autem donare non conceditur, probandum erit, nec si donationis causa consenserit, ratam ejus voluntatem habendam.166. *Paulus lib. 48. ad Edictum.***Q**ui rem alienam defendit, nunquam locuples habetur.167. *Idem lib. 49. ad Edictum.***N**on videntur data, quæ eo tempore quo dantur, accipientis non fiunt.

I ¶ Qui jussu judicis aliquid facit, non videtur dolo malo facere, qui parere necesse habet.

168. *Idem lib. 1. ad Plautium.***R**apienda occasio est, quæ præbet benignius responsum.

I ¶ Quod factum est, cum in obscuro sit, ex affectione cujusque capit interpretationem.

169. *Idem lib. 2. ad Plautium.***I**s damnum dat, qui jubet dare. ejus vero nulla culpa est, cui parere necesse sit.

I ¶ Quod pendet, non est pro eo quasi sit.

170. *Idem lib. 3. ad Plautium.***F**actum à judice quod ad officium ejus non pertinet, rarum non est.171. *Idem lib. 4. ad Plautium.***N**emo ideo obligatur, quia recepturus est ab alio, quod præstiterit.172. *Idem lib. 5. ad Plautium.***I**n contrahenda venditione ambiguum pactum contra venditorem interpretandum est.

I ¶ Ambigua autem intentio ita accipienda est, ut res salva auctori sit.

173. *Idem lib. 6. ad Plautium.***I**n condemnatione personarum, quæ in id quod facere possunt damnantur, non totum quod habent,

extorquendum est : sed & ipsarum ratio habenda est , ne egeant.

1 ¶ Cum & verbum *Restituas* lege invenitur , etsi non specialiter de fructibus additum est : tamen etiam fructus sunt restituendi.

2 ¶ Unicuique sua mora nocet. quod & in duobus reis promittendi observatur.

3 ¶ Dolo facit , qui petit quod redditurus est.

174. *Idem lib. 8. ad Plautium.*

**Q**ui potest facere , ut possit conditioni parere , jam posse videtur.

1 ¶ Quod quis si velit habere non potest , id repudiare non potest.

175. *Idem lib. 11. ad Plautium.*

**I**n his quæ officium per liberās fieri personas leges desiderant , servus intervenire non potest.

1 ¶ Non debeo melioris conditionis esse , quam auctor meus , à quo jus in me transit.

176. *Idem lib. 13. ad Plautium.*

**N**on est singulis concedendum , quod per magistratum publice possit fieri : ne occasio sit majoris tumultus faciendi.

1 ¶ Infinita æstimatio est libertatis , & necessitudinis.

177. *Idem lib. 14. ad Plautium.*

**Q**ui in jus , vel dominium alterius succedit , jure ejus uti debet.

1 ¶ Nemo videtur dolo exequi , qui ignorat causam , cur non debeat petere.

178. *Idem lib. 15. ad Plautium.*

**C**um principalis causa non consistat , plerumque ne ea quidem quæ sequuntur , locum habent.

179. *Idem lib. 16. ad Plautium.*

**I**n obscura voluntate manumittentis favendum est libertati.

180. *Idem lib. 17. ad Plautium.*

**Q**uod jussu alterius solvitur , pro eo est , quasi ipsi solutum esset.

181. *Idem lib. 1. ad Vitellium.*

**S**i nemo subiit hæreditatem , omnis vis testamenti solvitur.

182. *Idem lib. 3. ad Vitellium.*

**Q**UOD nullius esse potest, id ut alicujus fieret, nulla obligatio valet efficere.

183. *Marcellus lib. 3. Digestorum.*

**E**TSI nihil facile mutandum est ex solennibus, tamen ubi æquitas evidens poscit, subveniendum est.

184. *Celsus lib. 7. Digestorum.*

**V**ANI timoris justa excusatio non est.

185. *Idem lib. 8. Digestorum.*

**I**MPOSSIBILIMUM nulla obligatio est.

186. *Idem lib. 12. Digestorum.*

**N**IHIL peti potest ante id tempus, quo per rerum naturam persolvi possit. & cum solvendi tempus obligationi additur, nisi eo præterito peti non potest.

187. *Idem lib. 16. Digestorum.*

**S**I quis prægnantem uxorem reliquit, non videtur sine liberis decessisse.

188. *Idem lib. 17. Digestorum.*

**U**BI pugnantia inter se in testamento juberentur, neutrum ratum est.

**I** ¶ QUÆ rerum natura prohibentur, nulla lege confirmata sunt.

189. *Idem lib. 13. Digestorum.*

**P**UPILLUS nec velle nec nolle in ea ætate, nisi apposta tutoris auctoritate creditur: nam quod animi judicio fit, in eo tutoris auctoritas necessaria est.

190. *Idem lib. 24. Digestorum.*

**Q**UOD evincitur, in bonis non est.

191. *Idem lib. 33. Digestorum.*

**N**ERATIUS consultus, an quod beneficium dare se quasi viventi Cæsar rescripserat, jam defuncto dedisse existimaretur, respondit, non videri sibi principem, quod ei, quem vivere existimabat, concessisset, defuncto concessisse, quem tamen modum esse beneficii sui vellet, ipsius æstimationem esse.

192. *Marcellus lib. 29. Digestorum.*

**E**A, quæ in partes dividi non possunt, solida à singulis hæredibus debentur.

**I** ¶ Iu re dubia benigniorem interpretationem sequi, non minus justius est, quam tutius.

193. *Celsus lib. 38. Digestorum.*

**O**Mnia fere jura hæredum perinde habentur, ac si continuo sub tempus mortis hæredes exstiterent.

194. *Modestinus lib. 6. Differentiarum.*

**Q**ui per successionem quamvis longissimam defuncto hæredes constiterunt, non minus hæredes intelliguntur, quam qui principaliter hæredes existunt.

195. *Idem lib. 7. Differentiarum.*

**E**xpressa nocent, non expressa non nocent.

196. *Idem lib. 8. Regularum.*

**P**rivilegia quædam causæ sunt, quædam personæ. & ideo quædam ad hæredem transmittuntur, quæ causæ sunt. quæ personæ sunt, ad hæredem non transeunt.

197. *Idem libro singulari de ritu nuptiarum.*

**S**emper in conjunctionibus non solum quid liceat, considerandum est: sed & quid honestum sit.

198. *Javolenus lib. 13. ex Cassio.*

**N**eque in interdicto, neque in cæteris causis, pupillo nocere oportet dolum tutoris, siue solvendo est, siue non est.

199. *Idem lib. 6. Epistolarum.*

**N**on potest dolo carere, qui imperio magistratus non paruit.

200. *Idem lib. 7. Epistolarum.*

**Q**uotiens nihil sine captione investigari potest, eligendum est quod minimum habeat iniquitatis.

201. *Idem lib. 10. Epistolarum.*

**O**Mnia, quæ ex testamento proficiscuntur, ita statum eventus capiunt, si initium quoque sine vitio ceperint.

202. *Idem lib. 11. Epistolarum.*

**O**mnis definitio in jure civili periculosa est: parum est enim ut non subverti possit.

203. *Pomponius lib. 8. ad Qu. Mucium.*

**Q**uod quis ex culpa sua damnum sentit, non intelligitur damnum sentire.

204. *Idem lib. 28. ad Qu. Mucium.*

**M**inus est actionem habere, quam rem.

205. *Idem lib. 39. ad Qu. Mucium.*

**P**lerumque fit, ut etiam ea quæ nobis abire possint, proinde in eo statu sint, atque si non essent ejus



ejus conditionis, ut abire possent. & ideo, quod fisco obligamus, & vindicare interdum, & alienare, & servitutem in prædio imponere possumus.

206. *Idem lib. 9. ex variis sectionibus.*

**J**ure naturæ æquum est, neminem cum alterius detrimento & injuria fieri locupletiores.

207. *Ulpianus lib. 1. ad leg. Jul. & Pap.*

**R**es judicata pro veritate accipitur.

208. *Paulus lib. 3. ad leg. Jul. & Pap.*

**N**on potest videri desuisse habere, qui nunquam habuit.

209. *Ulpianus lib. 4. ad leg. Jul. & Pap.*

**S**ervitutem mortalitati fere comparamus.

210. *Licinius Rufinus lib. 2. Regularum.*

**Q**uæ ab initio inutilis fuit institutio, ex postfacto convallescere non potest.

211. *Paulus lib. 59. ad Edictum.*

**S**ervus reipublicæ causa abesse non potest.

F I N I S.

ARNOLDI CORVINI  
à BELDEREN, J. C.

Titulus XVI. Libri L. Digestorum  
DE VERBORUM  
SIGNIFICATIONE,

*Contractus, & secundum ordinem Alpha-  
beticum digestus.*

- A  
Besse res videntur, quarum corpus manet, forma mutata est. *l. mulieris* 13. ¶. 1. Quoniam plerumque plus est in manus pretio, quam in re. *d. l. 13. ¶. 1.*  
Abest & ea res, quæ in rebus humanis non est. *d. l. ¶. fin.*  
Abesse res videtur quæ corrupta redditur, si ejus pretium in arte positum. *l. Labeo. 14.*  
Abesse ei res videtur, cui pretium abest. *d. l. 14.*  
Abesse desinere videtur res tunc, cum sic redit in potestatem, ne amittere ejus possessionem possimus. *d. l. mulieris. 13. ¶. pen.*  
Abest qui extra continentia Urbis est; non qui intra. *l. Collegarum. 173. ¶. 1. l. absentem. 199.*  
Abesse non videtur, qui ab hostibus captus; sed qui à latronibus detinetur. *d. l. absentem. ¶. fin.*  
Absens est, qui non est eo in loco, in quo petitur. *l. absentem. 199. in princ.*  
Abrogatur legi, cum prorsus tollitur. Derogatur, cum pars detrahitur. *l. derogatur. 102.*  
Accidere verbo, etiam vulgi sermone mors significatur. *l. in vulgari. 162. in fin.*  
Accipere, est et si quis non accepit ut habeat. Capere, cum effectu accipitur: ideoque non videtur quis capere, quod erat restituturus. *l. aliud est. 71.*  
Ampēdpuæ omnes arborum species, (*id est, extremitates,*) appellantur. *l. qui venenum. 236. ¶. fin.*  
Actionis verbo non continetur exceptio. *l. verbum oportet*

*oportebit. 8. §. 1. Continetur persecutio. l. actionis verbo. 34.*

*Actio* omnis dicitur, siue in personam, siue in rem sit petitio, sed plerumque personales solemus dicere. *Petitionis* verbo in rem actiones significari videntur. *Persecutionis* verbo extraordinariæ persecutiones continentur. *l. pecunia. 178. §. 2.*

*Adulterum, Aleatorem, Furem*, quanquam aliqua significatione ex animi propositione cuiusque sola quis dicere posset; tamen oportet hæc crimina assumpto actu intelligi. *l. fugitivus. 225. vers. nam &c.*

*Adulterium*, in nuptam: *Stuprum*, in viduam committitur: sed lex Julia de adulteriis hoc verbo indifferenter utitur. *l. inter stuprum. 101. in princ.*

*Advena* est, quem Græc. ἀποικον (id est, domo profugum, colonum aduenientem) appellant. *l. pupillus. 239. §. 4.*

*Ædes optima maxima* sunt, quæ liberæ & nulli seruiunt. *l. qui uti optima. 90.*

*Ædificia urbana, ædes, rustica, villæ* in usu dicuntur. *l. fundi. 211.*

*Ædificii* est plumbum, quod regulis ponitur: non quod hypæthritegendi causâ ponitur. *l. malum. 242. §. 2.*

*Ædium* non sunt, statuæ affixæ basibus struclilibus, aut tabulæ religatæ catenis, aut si similiter cohaereant lychni. *l. statua. 245. Est prothyrum. d. l. 245. §. fin.*

*Æs*, etiam aureos nummos dicimus. *l. etiam. 159.*

*Æs alienum* est quod nos aliis debemus. *Æs suum* est, quod alii nobis debent. *l. cedere. 213. §. 1.*

*Ager*, est locus sine villa. *l. ager. 27. in pr.*

*Ager*, est si species fundi ad usum hominis comparatur. *l. quaestio est. 115.*

*Ager*, est locus sine ædificio, rure: qui in Urbe *area* dicitur. *l. fundi. 211.*

*Agere (Actum)* generale verbum est, siue verbis, siue re quid agatur. *Gestum* rem significat siue verbis factam. *l. Labeo. 19.*

*Agri* dicimus propriè quæ animalia sunt. *Ferri* quæ quis suo corpore bajulat. *Portari*, ea quæ quis iumento secum ducit. *l. ferri. 235.*

*Aleator*, vide *Adulter*.

*Alienationis* verbum etiam usucapionem continet. *vix*

enim est ut non videatur alienare qui patitur usucapi. *l. alienationis. 28. in princ.*

*Alienare* etiam dicitur, qui non utendo amisit servitutes. *d. l. 28. vers. eum.*

*Alienare* non intelligitur, qui non utitur occasione acquirendi. *d. l. 28. vers. qui occasione.*

*Alienatum* non proprie dicitur, quod adhuc in dominio venditoris manet. *l. alienatum. 67. in princ.*

*Aliquorum esse* prædia dicimus, non utique communiter habentium, sed vel alio aliud habente. *l. litus est. 96. §. 1.*

*Ambigere* qui loquitur, id loquitur, quod ex his quæ significantur sensit. *l. Nepos. 125. vers. nam qui.*

*Amicos* appellare debemus, non levi notitia conjunctos, sed quibus fuerunt jura cum patrefamilias, honestis familiaritatis quæ sita rationibus. *l. lata culpa. 223. §. 1.*

*Amisisse* rem videtur, qui adversus nullum ejus persequendæ actionem habet. *l. Labeo. 14. §. fin.*

*Amphora*, cum vinum habent, in vasis vinariis sunt; non cum sunt inanes; quia aliud in his addi possit. *l. vinaria vasa. 206. in fin.*

*Amplius* (verbum) ad eum quoque pertinet, cui nihil debetur: sicuti ex contrario *Minus solum* videtur, etiam si nihil esset exactum. *l. verbum. 82.*

*Angiportum*, vide Portus.

*Anniculus* amittitur, qui extremo anni die moritur. *l. anniculus. 132. in princ.*

*Anniculus* non statim ut natus est, sed trecentesimo sexagesimo quinto die dicitur, incipiente plane non exacto die. *l. anniculus. 134.*

*Annum* civiliter, non ad momenta temporum, sed ad dies numeramus. *d. l. 134. in fin.*

*Ante diem decimum Kalendarum*, *Post diem decimum Kalendarum*; neutro sermone undecima dies significantur. *d. l. anniculus. 132.*

*Αποικία*, vide Advena.

*Apostoli* vulgo dicuntur literæ dimissoriæ: sic dictæ, quod causa ad eum, qui appellatus est, dimittitur. *l. dimissoria. 106.*

*Αποτέλεσμα* est, ex opere facto, corpus perfectum. *l. rei. 5. §. 1.*

*Apud*

*Apud te est*, quod qualiter qualiter à te tenetur. *Penes te est*, quod quodammodo possidetur. *Penes te* amplius est, quam *apud te*. l. *penes te*. 63.

*Arbitratu Lucii Titii fieri*, (verba illa) jus significant & in servum non cadunt. l. *illa verba*. 68.

*Area*, vide *Ager*.

*Armorum* appellatio non utique scuta & gladios & galeas significat, sed & fustes & lapides. l. *armorum*. 41.

*Armentorum* magis generis boves, quam jumentorum appellantur. l. *boves*. 89. in princ.

*Artemon*, non est navis pars sed adjectamentum. *Malum* est: quia pleræque naves sine eo essent inutiliter. l. *malum*. 242. in princ.

*Adsignare libertum*, est testificari cujus ex liberis libertum cum esse voluit. l. *adsignare*. 107.

*Aut*, & disjunctivæ & subdisjunctivæ orationis est, e. g. *Ille aut Ille*. Disjunctivum est, quorum unoposito, alterum tolli necesse est; ut *aut dies*, *aut nox est*. Subdisjunctivi duo sunt genera; Unum cum ex propositis finibus, ita non potest uterque esse; ut possit neuter esse: e. g. *aut sedet*, *aut ambulat*. Alterum, cum ex propositis finibus, ita non potest neuter esse, ut possit utrumque esse: e. g. *omne animal aut facit*, *aut patitur*. l. *hac verba*. 124.

## B

**B**ELLO Græci dicunt, quod nos *Telum* dicimus. l. *si calvisur*. 233. ¶ 2.

*Bissexturnum Kalendis* cum est, nihil refert utrum priore, an posteriore die quis natus sit; & deinceps sextum Kalendas ejus natalis dies est. Nam id biduum pro uno die habetur, sed posterior dies intercalatur, non prior. Ideo quo anno intercalatum non est, sexto Kalendas natus, cum *Bissexturnum Kalendis* est, priorem diem natalem habet. l. *cum bissexturnum*. 98. in princ.

*Bona* intelliguntur cujusque quæ deducto ære alieno supersunt. l. *subsignatum*. 39. ¶ 1.

*Bona* concedendo, Princeps videtur etiam obligationes concedere. l. *Princeps*. 21.

*Bona* proprie dici non possunt, quæ plus incommodi, quam commodi habent. l. *proprie bona*. 83.

*Bonorum* appellatio aut naturalis est, aut civilis. *Natu-*

raliter bona dicuntur quæ beant. *l. bonorum. 49. in princ.*

In Bonis nostris sunt, non solum quæ dominii nostri sunt, sed & quæ bona fide possidentur. *d. l. bonorum. 49. vers. in bonis.*

Bona servus habere non potest, quemadmodum nec paterfamilias peculium. *l. paterfamilias. 182.*

Bona civitatis abusive publica dicta sunt: Sola enim ea publica sunt quæ Populi Romani sunt. *l. bona Civitatis. 15.*

In Bonis sunt, & quæ superficiaria sunt; item si quid est in actionibus, petitionibus, persecutionibus. *l. bonorum. 49.*

Bonorum appellatio universitatem quandam & jus successionis demonstrat. *l. bonorum. 208.*

Boves, vide Armentorum nomina.

## C

**C**apere. Cepisse quis intelligitur, quamvis alii acquisivit. *l. cepisse. 140.*

Capere aliud est, aliud accipere. *l. aliud est capere. 71. Vide Accipere.*

Catorum & reliquorum appellatione, etiam omnes continentur. *l. catorum. 160.*

Calumniatores appellati sunt, quia per fraudem & frustrationem alios vexarent litibus. Unde & Cavillatio dicta est. *l. 233. in princ.*

Capitalis, licet Latine loquentibus, omnis causa estimationis videatur: tamen appellatio capitalis mortis aut amissionis civitatis intelligenda est. *l. licet capitalis. 103.*

Carbonum appellatione materia non continetur. Titiones & alia ligna cocta ne fumum faciant, non ligno, nec carboni adnumerabimus; sed magis est ut proprium genus faciant. Sulphurata de ligno eandem habent definitionem. Ad faces comparata non erunt quoque lignorum appellatione comprehensa, nisi hæc sit voluntas. Idem & de nucleis olivarum, & de balanis, vel si qui alii nuclei. De pinu integri strobili ligni appellatione continentur. *l. Carbonum. 167.*

Cavillationis (Græce σωφιστική id est acervalis syllogismus) natura est, ut ab evidenter veris per brevissimas mutationes disputatio ad ea quæ evidenter falsa

falsa sunt perducatur. *l. natura cavillationis. 177. l. si calvitur. 233.*

*Cautum* intelligitur, siue personis, siue rebus cautum sit. *l. habere. 188. ¶ 1.*

*Cedere diem*, significat incipere deberi pecuniam: *Venire diem*, cum diem venisse, quo peti possit. Ubi pure quis stipulatus est, & cessit & venit dies: Ubi in diem cessit, nondum venit: Ubi sub conditione, nec cessit, nec venit pendente conditione. *l. cedere diem. 213. in princ.*

*Censeri*, est constituere & præcipere. *l. censeri. 111.*

*Centum aureos* in funus aut monumentum ut hæres consumeret, cum in testamento scriptum sit, non licet minus consumere, licet amplius. *l. cum in testamento. 202.*

*Civitates* privatorum loco habentur. Publica appellatio in compluribus causis ad populum Romanum respicit. *l. cum qui. 16.*

*Cognoscere* instrumenta, est relegere & recognoscere. *Dispungere*, conferre accepta & data. *l. cognoscere. 56. in princ.*

*Collegarum* appellatione continentur, qui sunt ejusdem potestatis. *l. Collegarum. 173. in princ.*

*Collegium* tres faciunt. *l. Neratius Priscus. 85.*

*Commendare*, est deponere. *l. commendare. 186.*

*cum Commodum erit*; hoc est, cum sine incommodo meo potero; vel cum salva dignitate mea potero; vel cum deducto ære alieno potero. *l. Nepos Proculo. 125.*

*Commune*, vide *Suum*.

*Conjunctio* nonnunquam pro *Disjunctione* accipitur; *l. conjunctionem. 29.* & viceversa: ut & interdum *Soluta* pro *Separatis*: *l. saepe ita. 53. in princ.* Nam cum apud veteres dicitur *Adgnatorum Gentiliumque* pro separatione accipitur: Cum *Super pecunia tutelave sua*; tutor separatim sine pecunia dari non potest. Cum *Quod dedi aut donavi*, utraque continemus: Cum *Quod cum dare aut facere oportet*; quodvis eorum probare sufficit: Cum dicit *Prætor, Si domum, munus, operas redemerit*; si omnia imposita sunt, omnia redimenda; si quædam, cætera non desiderabuntur. *d. l. saepe. in princ.*

*Conjunctio* triplici modo intelligitur; aut enim re per se contingit; aut re & verbis; aut verbis tantum.

*l. triplici modo. 142.*

*Continentes Provincia* sunt quæ Italiæ sunt junctæ; ut Gallia; imo & Sicilia; cum modico freto Italia dividatur. *l. notionem. 99. ¶ 1.*

*Contractus*, est ultro citroque obligatio; Græcè συνάλλαγμα. *l. Labeo. 19.*

*Verba Contraxerunt, Gefferunt*, non pertinent ad testandi jus. *l. verba. 20.*

In *Conventionibus* contrahentium voluntatem potius, quam verba spectari placuit. Cum igitur ea lege fundum vestigalem municipes locaverint, ut ad hæredem ejus qui suscepit pertineret: jus hæredum ad legatarium quoque transferri potuit. *l. in conventionibus. 219.*

*Coram Titio* aliquid facere jussus, non videtur præsentem eo fecisse, nisi is intelligat. Scire autem, non etiam velle is debet. Nam & eo invito recte fit quod jussum est. *l. coram Titio. 209.*

*Creditorum* sunt omnes quibus debetur ex quacunque actione, vel persecutione, vel Jure Civili sine ulla exceptionis perpetuæ remotione, vel honorario vel extraordinario; sive pure, sive in diem, sive sub conditione. Quod si natura debeatur, non sunt loco Creditorum. Si non sit mutua pecunia, sed contractus, Creditores accipiuntur. *l. creditores. 10.*

*Creditorum* appellatione accipiuntur omnes quibus ex qualibet causa debetur. *l. creditorum. 11.*

*Creditoris* loco accipi potest, etsi ex delicto debeatur. *l. ut si cui ex empto. 12.* Si ex populari causa, ante litis contestationem recte dicitur creditoris loco non esse, postea esse. *d. l. 12.*

*Creditor* est, qui exceptione perpetua summoverti non potest. Qui temporalem exceptionem timet, similis est conditionali creditori. *l. creditor autem est. 55.*

*Creditorum conditionales* dicuntur & hi quibus nondum competit actio, est autem competitura; vel spem habent ut competat. *l. conditionales. 54.*

*Culpa*, est magna negligentia; magna culpa est dolus. *l. magna. 226.*

*Culpa lata*, est nimia negligentia; id est, non intelligere



ligere quod omnes intelligunt: *l. cedere diem. 213.*

¶ *fin. ut & ejus est finis. l. lata culpa. 223. in princ.*

Inter conditionem; *Cum fari potuerit, & Postquam fari potuerit*, multum interest. Nam posterior scriptura uberior est, arctior prior; quæ id tantummodo tempus significat, quo primum fari possit. *l. interilam. 217.*

*Custodia* appellatione, publica tantum custodia: *Vinculorum* vero, vel privata, vel publica vincula continentur. *l. vinculorum. 224.*

## D

**D**ebitor, is est, à quo invito exigì pecunia potest. *l. debitor. 108.*

Verbum *debit*, omnem omnino actionem comprehendit, siue civilis, siue honoraria, siue fideicommissi fuit persecutio. *l. pecunia. 178. ¶ fin.*

*Decuriones*, dicti ex eo quod cum Colonia deducerentur, decima pars eorum, consilii publici gratia conscribatur. *l. pupillus. 239. ¶ decuriones. 5.*

*Dedisse* etiam intelligitur is, qui permutavit, vel compensavit. *l. dedisse. 76.*

*Delata hereditas* intelligitur, quam quis ad eundo possit consequi: *l. delata. 151.*

*Derogare*: *vide Abrogare.*

*Deterius jus fundi non esse*: *vide Optimus maximus uti esset.*

*Detestari*, est absenti denunciare. *l. subsignatum. 39. ¶ 2.*

*Detestatio*, est denuntiatio facta cum testatione. *l. detestatio. 40.*

*Detestatum*, est testatione denuntiatum. *l. plebs. 238. ¶ 1.*

*Dimissoria literæ*: *vide Apostoli.*

*Disjunctum*: *vide Conjuncta. Item Aut.*

*Dispungere*: *vide Cognoscere.*

*Divortium* dicitur fieri inter virum & uxorem. *Repudium* vero sponsæ remitti videtur. Quod & in uxoris personam non absurde cadit. *l. inter stuprum. 101. ¶ 1.*

*Divortium* inter & *Repudium* hoc interest; quod repudiari etiam futurum matrimonium potest; non recte autem sponsa divortisse dicitur. quod divortium ex eo dictum est, quod in diversas partes eunt qui discedunt. *l. inter divortium. 191.*

*Dolia & Seria* tamdiu vinaria vasa sunt, quamdiu  
vi-

vinum habent. *l. vinaria vasa.* 206.

**Dolus:** *vide* Culpa.

**Dolus malus cui rei (aberit,) afuerit,** hæc verba generaliter comprehendunt omnem dolum, quicumque in hanc rem admissus est, de qua stipulatio est interposita. *l. hæc verba.* 69.

**Domus** unicuique nostrum existimanda, ubi quisque sedes & tabulas habet, suarumque rerum constitutionem fecit. *l. in Lege Censoria.* 203. *vers.* *Igitur.*

**Donationis** verbum simpliciter loquendo, omnem donationem comprehendere videtur, sive mortis causa sive non mortis causa fuerit. *l. alienatum.* 67. ¶ 1.

**Inter Donum & Munus** hoc interest, quod inter genus & speciem; **Donum** genus est, **Munus** species. **Munus** est donum cum causa. *l. inter donum.* 194.

**Dona** proprie sunt, quæ nulla necessitate juris, officii, sed sponte præstantur. **Munus** proprie quod necessario obimus, lege, more, imperiove ejus qui jubendi habet potestatem. *l. munus.* 214. Summa in hoc ventum est, ut non quodcumque **Munus**, id & **Donum** accipiatur: at quod **Donum** fuerit, id **Munus** recte dicitur. *d. l. 214.*

## E

**E****dere rationes & Reddere** differunt, nec is qui edere jussus est, reliquum reddere debet. Nam & Argentarius edere rationes videtur, etiamsi quod reliquum sit apud eum non solvat. *l. boves.* 89. ¶ 2.

**Emptor bonæ fidei** est, qui ignoravit eam rem esse alienam, aut putavit, eum qui vendidit, jus vendendi habere. *l. bonæ fidei.* 109.

**Erronem & Fugitivum;** non secundum propositionem solam, sed cum aliquo actu intelligi constat. *l. fugitivus.* 225.

**Erit,** interdum etiam præteritum, nec solum futurum tempus demonstrat. Item **Est,** utrumque tempus significat. *l. verbum Erit.* 123.

**Exactæ pecuniæ** verbum, & ad solutionem, & ad delegationem referendum. *l. verbum exacta.* 187.

**Exhibere,** est præsentiam corporis præbere. **Restituere,** est etiam possessorem facere, fructusque reddere: aliaque præterea restitutionis verbo continentur. *l. plus in restitutione.* 22.

*Exhi-*

*Exhibet*, qui præstat ejus de quo agitur præsentiam. Qui *sistit*, præstat ejus de quo agitur præsentiam, nec tamen eum *exhibet*. *Restituit* non tantum, qui solum corpus, sed etiam omnem rem conditionemque redditâ causa præstat: & tota *Restitutio* est Juris interpretatio. *l. ult.*

*Ex legibus* (verbum) sic accipiendum est, tam ex Legum sententia, quam ex verbis. *l. nominis. 6. §. 1.*

## F.

**F**abri tignarii sunt, non tantum qui tignum dolant; sed omnes qui ædificant. *l. ferri 235. §. 1.*

*Facere*, omnem faciendi causam complectitur dandi, solvendi, numerandi, judicandi, ambulandi. *l. verbum facere. 218.*

*Faciendi* verbo reddendi etiam causa continetur. *l. faciendi. 175.*

ad Faces parata: vide Carbones.

*Familia* appellatio, & in res deducitur: ut in Leg. XII. Tabul. his verbis, *Agnatus proximus familiam habeto*, & in personas, ut cum de patrono & libero loquatur lex, *ex ea familia* inquit, & *in eam familiam*, & hic de singularibus personis loqui constat. *l. pronuntiatio. 195. §. 1.*

*Familia* appellatione liberi quoque continentur. *l. de testatio. 40. §. 2.*

*Familia* appellatione unicus servus non continetur. nec duo quidem familiam faciunt *d. l. 40. §. 3.*

*Familia* appellatio refertur ad corporis cujusdam significationem, quod aut *Jure proprio* ipsorum; sic familiam dicimus plures personas quæ sunt sub unius potestate, natura aut jure subjectæ: aut *communi*; sic familiam dicimus omnium cognatorum. *d. l. pronuntiatio 195. §. 2.*

*Familias* quoque servitutum solemus appellare. *d. l. pronuntiatio. §. 3.*

*Familia* appellatio omnes servos comprehendit; sed & filii continentur. *d. l. 195. §. 3. in fin.*

*Familia* item appellatur, plurium personarum quæ ab ejusdem ultimi genitoris sanguine profisciscuntur: sicut dicimus familiam Juliam, quali à fonte quodam memorix. *d. l. 195. §. 4.*

*Familia* nomine & ipse Princeps familiæ continetur.

*l. familia. 196. in princ.*

Mulier familiæ suæ caput & finis est. *d. l. pronuntiatio. 195. ¶ fin in fin.*

Fœminarum liberi in familia earum non sunt; quia qui nascuntur, patris, non matris, familiam sequuntur. *d. l. familia. 196. ¶ 1.*

Paterfamilias appellatur, qui in domo dominium habet, quamvis filium non habet: nec enim solam personam ejus, sed & jus demonstramus. *d. l. pronuntiatio. 195. ¶ 2.*

Patremfamilias & pupillum appellamus. *d. l. pronuntiatio. ¶ 2.*

Paterfamilias cum moritur, quotquot capita ei subiecta fuerunt singula familias habere incipiunt, & singuli patrumfamiliarum nomen subeunt. *d. l. pronuntiatio. ¶ 2.*

Familiam propriam habet & emancipatus, sui juris effectus. *d. l. pronuntiatio. ¶ 2.*

Familia urbana & rustica, non loco, sed genere distinguitur. *l. urbana familia. 166. princ.*

Falsus tutor vere dicitur qui tutor non est, sive habenti tutor datus est, sive non. *l. Paulus respondit. 221.*

Falsum testamentum, quod testamentum non est. *d. l. 221.*

Ferri vide Agi.

Filia nomen, & in posthumam cadit. *l. nomen. 164. in princ.*

Filium & ea mulier cum moreretur habere creditur, quæ exciso utero edere possit: sic & eum habet eo tempore filium, qui ab hostibus remeavit. *l. etiam ea mulier. 141.*

Fili appellatione omnes liberos intelligimus. *l. filii. 84.*

Filii appellatione, sicut filiafamilias sæpe continentur, ita & nepos videtur comprehendi. *l. iusta 201.*

Filiorum appellatione, omnes qui ex nobis descendunt continentur. *l. liberorum. 220. ¶ fin.*

Filii appellatione sæpe & nepotes accipi multifariam placet. *d. l. liberorum. 220. ¶ 1.*

Quisquis mihi Filii Filiusve hæres sit, & filia significatur. *l. quisquis. 116.*

Filio Filiisque meis hosce tutores do, si scriptum est; rationabile videtur omnibus liberis in tutore dando testa-

testatorem prospicere voluisse, non masculis tantum. *l. Servius ait. 122.*

*Finita*, *transacta* intelligere debemus, non solum quibus controversia fuit; sed etiam quæ sine controversia sunt possessa. *l. transacta 229.* Ut sunt iudicia terminata, transactione composita, longioris temporis silentio finita. *l. ut sunt. 230.*

*Fraus* aliud, aliud poena. *Fraus* enim sine poena esse potest; non *Pœna* sine *Fraude*. *Pœna* est noxæ vindicta; *Fraus* & ipsa noxa dicitur, & quasi quædam poenæ præparatio. *l. aliud fraus. 131. in princ.*

*Fruges* pro reditu appellantur, non solum (quod) frumentis aut leguminibus; verum & quod ex vinea, sylvis cæduis, cretifodinis, lapidicinis capitur. *Julianus* scribit *fruges* omnes esse quibus homo vescatur, falsum esse: non enim carnem, aut aves feræve, aut poma, *fruges* dici.

*Fru mentum* autem id esse quod arista se teneat, recte *Gallum* definivisse: *lupinum* vero, & *fabam* *fruges* potius dici, quia siliqua continentur; quæ *Servius* in frumento contineri putat. *l. frugem. 77.*

*Fugitivus* est, non is qui solum consilium fugiendi à domino suscepit, licet id se facturum iactaverit; sed qui ipso facto fugæ initium mente deduxerit. *l. fugitivus. 225. vide & Erro.*

*Fundus* integrum aliquid est; & plerumque sine villa locum accipimus. *Locus* non est *fundus*, sed portio aliqua fundi. *Modicus locus*, *fundus* dici potest; si fundi animo eum habemus: & quælibet portio fundi, *fundus* dici potest, si hoc constituerimus; nec non & *fundus* *Locus* constitui potest; puta si alii eum adjunxerimus fundo. *l. locus est. 60. princ.*

*Fundus* suos habet fines; *locus* latere potest, quatenus determinetur & definiatur. *d. l. locus est. 60. ¶ fin.*

*Fundus*, est omne quicquid solo continetur. *Ager*, si species fundi ad usum hominis comparatur. *Possessio* est, quicquid apprehendimus, cujus proprietates ad nos non pertinet. *Possessio* ergo usus, *Ager* proprietates loci est. *Prædium*, utriusque generale nomen est. Nam & *Ager* & *Possessio* huius appellationis species sunt. *l. questio est 115.*

*Fundi* appellatione, omne ædificium, & omnis *ager*, con-

- continetur. Sed in usu urbana ædificia, *ædes*; rustica, *villa* dicuntur. *Ager* cum ædificio, *fundus* dicitur. *l. fundi. 211.*

*Furem* non esse qui dicit, de hominis proposito loquitur. *Furtis noxaeque solutus est*; qui nemini furti est obligatus. *l. aliud est. 174. vide & Adulter.*

G.

**G**eneri appellatione, & neptis & proneptis, tam ex filio, quam ex filia editorum, cæterarumque mariti continentur. *l. generi 136.*

*Gesta* inter & *facta* licet videatur quædam subtilis differentia: attamen *καταχρηστικῶς* id est, *abusive*; nihil inter factum & gestum interest. *l. licet. 58. in princ. vide & Agere.*

*Glandis* appellatione omnis fructus continetur. *l. qui venenum. 236. ¶ 1.*

*Glans caduca* est quæ ex arbore cecidit. *l. silva caduca. 30. ¶ 4.*

H.

**H**abere id quis apud se dicitur, de quo habet actionem. Habetur enim quod peti potest. *l. id apud se. 143.*

*Habere*, sicut *Pervenire*, cum effectu accipiendum. *l. nomen. 164. ¶ fin.*

*Habere* duobus modis dicitur: altero jure dominii, altero obtinere sine interpellatione id, quod quis emerit. *l. habere. 188.*

*Hæres* ex illa parte Ediæti, *Tum quem ei hæredem esse oportet*; hæredis hæredibus bonorum possessio non defertur. *l. ex illa. 227. in princ.*

*Hæredis* appellatione omnes significari successores credendum est, etsi verbis non sunt expressi. *l. hæredis. 170.*

*Hæres* per multas successiones accipitur. Nam paucis speciebus hæredis appellatio proximum continet. *l. sciendum est. 70. in princ.*

*Hæredis* appellatio non solum ad proximum hæredem, sed & ad ultiores refertur: Nam & hæredis hæres, & deinceps, hæredis appellatione continetur. *l. hæredis. 65.*

*Hæreditas* nihil aliud est quam successio in universum jus quod defunctus habuit. *l. nihil est aliud hæreditas. 24.*

Ha-

*Hæreditas* dici ejus non potest, qui apud hostes decessit; quia servus decessit. *l. itinere. 3. ¶ fin.*

*Hæreditatis* appellatio etiam damnosam hæreditatem continet; juris enim nomen est; sicut & bonorum possessio. *l. hæreditatis. 119.*

*Hæreditatis* appellatione bonorum quoque possessio continetur. *l. hæreditatis. 138.*

*Hæreditas* nomen juris est, qui & accessionem & decessionem in se recipit. *l. pecunia. 178. ¶ 1.*

*Hæreditas* autem vel maxime & fructibus augetur. *l. pecunia. 178. ¶ 1.*

*Hæreditatem* quæ ex testamento defertur, etiam non male quis dixerit lege obvenire; quia lege XII. Tabul. testamentariæ hæreditates confirmantur. *l. lege obvenire. 130.*

*Hæreditas delata* intelligitur, quam quis ad eundo potest consequi. *l. delata. 151.*

*Hominis* appellatione tam fœmina, quam masculus continetur. *l. hominis. 152.*

*Hostes* sunt, qui nobis, aut quibus nos, publice bellum decrevimus. *l. hostes. 118.*

*Hostes*, quos nos appellamus, veteres perduelles appellarunt; per eam adjunctionem indicantes cum quibus bellum esset. *l. quos nos hostes. 234. in princ.*

## I.

**I**lle aut Ille, non solum disjunctivæ, sed etiam subdisjunctivæ orationis est. *l. hæc verba. 124. in princ.*

*Impensa necessaria* sunt, quæ si factæ non sint, res peritura aut deterior futura sit. *Utiles* quæ meliorem dotem faciant, deteriorem esse non sinant; ex quibus redditus mulieri acquiratur. *Voluptuaria*, quæ speciem duntaxat ornant, non etiam fructum augent. *l. impensa. 79.*

*Immissum* & *Proiectum* differunt. *Immissum* est, quod ita fieret, ut aliquo loco quiesceret; veluti, *tigna, trabes*. *Proiectum*, quod ita proveheretur, ut nusquam quiesceret; ut *mœniana*, *suggrunda* essent. *l. malum. 242. ¶ 1.*

*Incertus possessor* est, quem ignoramus. *l. subsignatum. 39. ¶ fin.*

*Incola* est, qui in aliena regione domicilium suum  
con-

contulit. Græci *πάροικον* appellant. Nec tantum, qui in oppido morantur, incolæ sunt; sed etiam qui alicujus oppidi finibus ita agrum habent, ut in eum se quasi in aliquam sedem recipiant. *l. pupillus. 239. § 2.*

*Indicasse*, est detulisse, arguisse, accusasse, & convicisse. *l. indicasse. 197.*

*In diebus illud facito*; ita data conditione, si nihil præterea fuisset adjectum, in biduo conditionem impleri oportet. *l. inter illam. 217. § 1.*

*Instrumentorum* appellatione quæ comprehendantur, difficile erit separare. Quæ proprie sint propter quæ danda dilatio, dignoscimus inde, si in præsentiam personæ quæ instruere possit, dilatio petatur; puta qui actum gessit, licet in servitute, vel qui actor fuit constitutus: putem instrumentorum causa peti dilationem. *l. nationem. 99. § 2.*

*Intestatus*, est non tantum qui testamentum non fecit, sed etiam cujus ex testamento hæreditas adita non est. *l. intestatus. 64.*

*Intra diem mortis ejus ut aliquid fiat*, si quis sic dixerit, ipse quoque dies quo quis mortuus est numeratur. *l. si quis sic. 133.*

*In utero qui relictus est*, intelligendus est mortis tempore fuisse. *l. intelligendus. 153.*

*Is qui nasci speratur* pro superstite est, cum de ipsius jure quæritur; aliis autem non prodest, nisi natus. *l. quod dicimus. 231.*

*Itinere faciundo 20000 passuum in dies singulos peragenda*, sic sunt accipienda; ut si post hanc dinumerationem minus quam integrum diem occupent; veluti viginti unum millia, biduum eis attribuantis; quæ dinumeratio ita denu facienda erit, si de die non conveniat. *l. itinere. 3.*

*Jumenta; vide Armenta.*

*Instratum; vide Stragula.*

K

**K**alendis bissextis; *vide Bissexturn.*

Kalendarum ante, post, diem; *vide Ante & post.*

L

**L**atrones: *vide Prædones.*

Legare. Verbis Leg. XII. Tab. his; *Ut legasset rei suæ,*



*sua; ita juseſſo; latiffima poteſtas tributa videtur, & hæredis inſtituendi, & legata, & libertates dandi, tutelæ quoque conſtituendi: ſed id interpretatione coangultatum eſt, vel legum, vel auctoritate jura conſtituentium. l. verbis legis. 120.*

*Legatorum in generali repetitione, etiam datæ libertates, ex legis XII. Tabul. mente continentur. l. in generali. 80.*

*Liberorum appellatione, continentur non tantum qui ſunt in poteſtate, ſed omnes qui ſui juris ſunt, ſive virilis ſive fœminini ſexus ſint, exve fœminini ſexus descendentes. l. cognoscere. 56. ¶ 1.*

*Liberorum appellatione continentur nepotes, & pronepotes, cæterique qui ex his descendunt: hos enim omnes ſuorum appellatione Lex XII. Tabul. comprehendit. Totiens Leges neceſſarium ducunt cognationum ſingulorum nominibus uti, veluti; filii, nepotes, pronepotes, cæterorumque qui ex his descendunt: quoties non omnibus, qui poſt eos veniunt præſtitum voluerint, ſed his ſolis ſuccurrent quos nominatim enumerent. Aſt ubi non perſonis certis, ſed omnibus, qui ex eodem genere orti ſunt, liberorum appellatione continentur. l. liberorum. 220. in princ.*

*Sine Liberis non videtur defunctus, qui nepotem ſuum hæredem reliquit. d. l. liberorum. 220. ¶ 2.*

*Sine Liberis non eſt, cui vel unus filius, una ve filia eſt. l. non eſt ſine. 148.*

*Quem ſine Liberis eſſe dicere non poſſumus, neceſſe eſt hunc dicamus Liberos habere. l. nam quem. 149.*

*Liberationis verbum eandem vim habet, quam ſolutionis. l. liberationis. 47.*

*Liberti appellatione etiam libertas continetur. l. liberti. 172.*

*Libertorum appellatione & hi contineri intelliguntur, qui eodem teſtamento, vel poſteriori loco manumitterentur; niſi manifeſte is, à quo peterentur, contra defuncti voluntatem doceret peti: l. Sævola reſpondit. 243.*

*His verbis, Libertis Libertabusque meis, libertus libertæ teſtatoris non continetur. l. Modestinus. 105.*

*Libertos paternos recte videmur dicere noſtros: Libero-*

berorum liberos, non recte. *l. licet* 58. ¶ 1.

*Lignorum* appellatione non continentur pali & per-  
ticæ; sed in numerum materiæ sunt redigendi. *l. pa-*  
*li.* 168.

*Lignorum* appellatione materia non continetur. Non  
enim lignorum gratia habuit. *l. carbonum* 167. in  
*princ.*

*Ligna* cocta: Ad faces parata: *vide* Carbones.

*Litis* nomen omnem actionem significat, siue in rem,  
siue in personam sit. *l. litis.* 36.

*Literæ* dimissoriæ: *vide* Apostoli.

*Littus* est quousque maximus fluctus à mari perve-  
nit. *l. littus.* 96. in *princ.*

*Littus* publicum eatenus est, qua maximus fluctus ex-  
æstuat. Idemque Juris est in *Lacu*, nisi is totus  
privatus sit. *l. littus publicum.* 112.

*Locuples* est, qui satis idonee habet pro magnitudine  
rei, quam actor restituendam esse petit. *l. quos*  
*nos.* 234. ¶ 1.

*Loci* appellatio non solum ad rustica, sed & urbana  
prædia pertinet. *l. locus.* 60. ¶ 1. *vide* & *Fundus.*

*Luscus* etiam vitiosus est. *l. inter stuprum.* 101. ¶ 2.

M.

**M***agistri* appellantur, quibus præcipua cura incum-  
bit, & qui magis quam ceteri diligentiam &  
solicitudinem rebus quibus præsumt debent. *l. cui*  
*præcipua.* 57.

*Magistri* etiam appellantur cujuslibet disciplinæ Præ-  
ceptores, à monendo & monstrando. *d. l.* 57.

*Magistratus* per derivationem à Magistris dicuntur.  
*d. l. præcipua.* 57.

*Mangones*, non mercatores, sed venalitarii dicun-  
tur. *l. mercis.* 207.

*Majore parte anni possedisse* quis intelligitur, etiam si  
duobus mensibus possederit: si modo adversarius  
ejus aut paucioribus diebus, aut nullis possederit.  
*l. majore parte.* 156.

*Malum*: *vide* Artemon.

*Masculino in sexu* pronuntiatio, ad utrumque sexum  
plerumque porrigitur. *l. pronuntiatio.* 195. in *princ.*

*Matrem familias* accipere debemus eam, quæ non inho-  
neste vixit.

Ma-

*Matremfamilias* enim à cæteris fœminis mores discernunt.

*Matremfamilias*, neque nuptiæ, neque natales faciunt, sed boni mores. *l. pronuntiatum. 46. §. 1.*

*Medicamenti*, sive *Veneri* nomine omne continetur, quod adhibitum naturam ejus cui adhibitum est, mutat. *l. qui venenum. 236.*

Cato putat *Mensem intercalarem* addititium esse, omnesque ejus dies pro momento temporis observat, extremoque diei mensis Februarii attribuit Quintus Mucius. *Mensis autem intercalaris* constat ex diebus viginti octo. *l. cum bissextum. 98. §. 1. 2.*

*Meorum & Tuorum* appellatione actiones quoque continentur. *l. meorum. 91.*

*Mercis* appellatio ad res mobiles tantum pertinet. *l. mercis 66.*

*Mercis* appellatione homines non continentur. *l. mercis appellatione. 207.*

*Meum totum* non falso dicitur, cujus non potest ulla pars dici esse alterius. *l. rectè dicimus, 25. in princ.*

*Mille passus*, non à milliario Urbis, sed continentibus ædificiis numerandi sunt. *l. mille passus. 154.*

*Minus solvit*, qui tardius solvit. Nam & tempore minus solvitur. *l. ut si cni. 12. in fin.*

*Minus solutum* intelligitur etsi nihil solutum sit. *l. minus. 32.*

*Minus solutum* videtur, etsi nihil exactum. *l. verbum amplius. 82.*

*Minus solvisse* videri non potest, in quem amplioris summæ actio non competit. *l. non potest. 117.*

*Moventium & Mobilium* appellatione idem significamus. Si tamen apparet, defunctum animalia duntaxat, quia se ipsa moverent, moventia vocasse: quod verum est, *l. moventium. 93.*

*Modius* iniquus est, qui modius non est. *l. Paulus. 221.*

*Morbus* est temporalis corporis imbecillitas: *Vitium* vero, perpetuum corporis impedimentum. *l. inter stuprum. 101. §. 2.*

*Morbus fonticus* est, qui cuique rei nocet. *l. morbus. 113.*

*Mortis tempore* est, qui in utero relictus est. *l. intelligendus. 153.*

*Mortui apud hostes*: vide *Hæreditas.*

N

Mortui

*Mortui* qui nascuntur, neque nati, neque procreati videntur; quia nunquam liberi appellari potuerunt.

*l. qui mortui.* 129.

*Multam* inter & *pœnam* multum interest. *Pœna* generale nomen est omnium delictorum coercitio.

*Multa* specialis peccati; cujus animadversio hodie pecuniaria est. *Pœna* non tantum pecuniaria, verum capitis & existimationis: Et *Multa* ex arbitrio ejus venit qui eam dicit: *Pœna* non irrogatur nisi quæ Lege, aut quo alio Jure specialiter huic delicto imposita est: Quinimo *Multa* ibi dicitur, ubi specialis *pœna* non est imposita. Item *Multam* is dicere potest, cui judicatio data est. Magistratus solos & Præsides Provinciarum posse *Multam* dicere mandatis permissum est. *Pœnam* autem unusquisque irrogare potest, cui hujus criminis sive delicti executio competit. *l. aliud fraus.* 131. ¶ 1.

*Multa* provocatio est, nec ante debetur quam aut non est provocatum, aut provocator victus est, nec aliter quam si is dixit cui dicere licet. De *Pœna* provocatio non est. Simulatque enim victus quis est ejus maleficii cujus pœna est statuta, statim ea debetur. *l. si quæ pœna.* 244.

*Pœna* certæ singulorum peccatorum sunt: *Multa* contra; quia ejus judicis potestas est quantam dicat; nisi lege est constitutum quantam dicat. *d. l. 244. vers. ex hoc.*

*Mulier* familiæ suæ & caput & finis est. *l. pronuntiatio.* 195. *in fin.*

*Mulieris* appellatione etiam virgo viripotens continetur. *l. mulieris.* 13. *in princ.*

*Municipes* dicuntur, quod munera civilia capiant. *l. munus.* 18. *in fin.*

*Municipes* intelligendi sunt, qui & in eodem municipio nati sunt. *l. municipales.* 228.

*Munus* tribus modis dicitur; uno donum; altero onus: unde immunitas; tertio officium; unde munera militaria. *l. munus.* 18. *vide & Donum.*

*Munus publicum*, est officium privati hominis, ex quo commodum ad singulos universosque cives remque eorum, imperio Magistratus, extraordinarium pervenit. *l. pupillus.* 239. ¶ 3.

qui

## N

qui **N**asci speratur: vide In utero.

*Natorum* appellatio & ad nepotes extenditur,  
l. *natorum*. 104.

*duobus* *Negativis* verbis quasi permittit lex magis,  
quam prohibet. l. *duobus*. 237.

*Nominis* appellatione res significatur. l. *nominis*. 4.

*Nominis* & rei appellatio ad omnem contractum &  
obligationem pertinet. l. *nominis*. 6. in princ.

*Nostri* liberti: vide *Liberti paterni*.

*Nostrium totum esse fundum* rectè dicimus; etiam cum  
ususfructus alienus est. Quia ususfructus non do-  
minii pars, sed servitutis sit. l. *rectè dicimus*. 25. in princ.

*Notionem* accipere possumus, & cognitionem, & ju-  
risdictionem. l. *notionem*. 99. in princ.

*Noxa* appellatione omne delictum continetur. l. *plebs*.  
238. in princ.

*Hæc stipulatio, Noxis solutum præstari*; non existima-  
tur ad eas noxas pertinere, quæ publicam exerci-  
tionem, & coercionem capitalem habent. l. *hæc*  
*stipulatio*. 200.

*Nupta dum erit*, hoc sermone & primæ nuptiæ signi-  
ficantur. l. *boves*. 89. ¶ 1.

*Nurus* appellatio, etiam ad pronurum, & ultra por-  
rigenda est. l. *nurus*. 50.

## O

**O**pe consilio separatim accipienda; quia aliud fa-  
ctum est ejus qui ope, aliud ejus qui consilio  
furtum facit: sic enim alii condici potest, alii non  
potest. Nemo ope videtur fecisse, nisi & consilium  
malignum habuerit; nec consilium habuisse nocet,  
nisi & factum secutum fuerit. l. *sape*. 53. ¶ 1.

*Opere locato, conducto*; his verbis non ἔργον sed ὑποτέ-  
λεσµα, id est, ex opere facto corpus aliquod per-  
fectum significatur. l. *rei*. 5. ¶ 1.

*Oportere*, non ad facultatem judicis pertinet, qui po-  
test, vel pluris, vel minoris, condemnare; sed ad  
veritatem refertur. l. *verbum*. 37.

*Oportebit*, tam præsens, quam futurum tempus signi-  
ficat. l. *verbum oportebit*. 8.

*Oppidum* ab ope dicitur, quod ejus rei causa mœnia  
sint constituta. l. *pupillus*. 239. ¶ 7.

**Opprobrium:** *vide* Probrum.

**Optimus maximus uti esset**, si legem ita dixi cum fundum tibi darem; & adjeci, jus fundi deterius factum non esse per dominum, præstabitur: amplius eo præstabitur nihil; etiamsi prior pars qua scriptum est, *Uti optimus maximusque esset*, liberum esse significat; ideoque si posterior pars adjecta non esset, liberum præstare deberem: tamen inferiore parte satis me liberatum puto, quod ad jura attinet, ne quid aliud præstare debeam, quam jus fundi per dominum deterius factum non esse. *l. si cum fundum. 126.*

**Optimus maximusque**: illa verba vel in eum cadere possunt, qui solus est. Sic circa Edictum Prætoris supremæ tabulæ habentur & solæ. *l. illa verba. 163. in princ.*

**Optimus maximus uti est**: adjectio hæc non tantum in traditionibus, sed & in emptionibus, & stipulationibus, & testamentis, hoc significat, ut liberum præstetur prædium, non ut etiam servitutes ei debeantur. *l. non tantum. 169.*

**Oratio**, quæ neque conjunctionem, neque disjunctionem habet, ex mente pronuntiantis, vel conjuncta vel disjuncta accipitur. *l. alienationis. 28. ¶ fin.*

**Ornamenti** appellatione signatorius annulus non continetur. *l. signatorius. 74.*

**Ostentum** est, omne contra naturam cujusque rei genitum factumque. Duo autem sunt *Ostentorum* genera: unum quotiens quid contra naturam nascitur: *tribus manibus forte &c.* alterum cum quid prodigiosum videtur: quæ Græci *φαντάσματα*, id est, *visiones*, appellant. *l. ostentum. 38.*

P

**Παιδιον**, *vide* Puer.

**Palam**, est coram pluribus. *l. palam. 33.*

**Pali**: *vide* Ligna.

**Παλλακή**: *vide* Pellex.

**Πάροικος**: *vide* Incola.

**Parentis** appellatione non tantum pater, sed & avus, & proavus, & deinceps omnes superiores continentur. *l. appellatione. 51.*

**Paries** est sive murus, sive maceria est. *l. paries. 157. in princ.*

*Par-*

**Partis** appellatione res pro indiviso significatur, ut ait Mutius. Nam quod pro diviso nostrum est, id non pars, sed totum est. Servius non ineleganter partis appellatione utrumque significari. *l. rectè dicimus. 25. § 1.*

**Partitionis** nomen non semper dimidium significat; sed prout est adjectum. Potest enim juberi aliquis & maximam partiri posse, & vicesimam, & tertiam, & prout libuerit. Sed portione non adjectâ, dimidia debetur. *l. nomen filiarum. 164. § 1.*

**Partus**, non est pars rei furtivæ. *l. partum. 26.*

**Partus**, licet monstrosus, portentosus, debilis, etiam non humanæ figuræ, matri prodest. Quia id quod fataliter accidit, matri damnum injungere non debet. *l. quæret aliquis. 135.*

**Paterfamilias** vide Familia.

**Patris** appellatione, etiam avus demonstratur. *l. iusta. 201. in fin.*

**Patroni** appellatione, & patrona continetur. *l. patroni 52.*

**Peculium**: vide Bona.

**Pecunia** appellatio, refertur ad ea quæ in patrimonio sunt. *l. rei. 5. in princ.*

**Pecunia** tantum quisque relinquit, quantum ex bonis ejus refici potest. *l. tantum quisque. 88. in princ.*

**Pecuniam** numeratam qui habet, non habet quicquid ex ea parari potest. *d. l. tantum quisque. 88. in fin.*

*quantum* Pecunia ex hereditate Titii ad te pervenit, cum stipulor; res ipsas quæ pervenerunt, non pretia earum, spectare videor. *l. cum stipulamur. 97.*

**Pecunia** verbum, non solum pecuniam numeratam complectitur; verum omnem omnino pecuniam, hoc est corpora omnia. *l. pecunia verbum. 178.*

**Pecunia** nomine, non solum numerata pecunia; sed omnes res, tam soli, quam mobiles, & tam corpora, quam jura continentur. *l. pecunia nomine. 222.*

**Pellex**, apud antiquos habita, quæ, cum uxor non esset, cum aliquo tamen vivebat: quam nunc concubinam vocamus, Græce παλλακήν. Nunc vulgo pellex vocatur, quæ cum eo, cui uxor est, corpus miscet. *l. libro. 144.*

**Penes te**: vide Apud te.

*Peperisse* eam, cui mortuæ filius exfectus est; falsum est. *l. anniculus. 132. § 1.*

*Perduelles*: *vide* Hostes.

*Perfecisse* ædificium is videtur, qui ita consummavit, ut jam in usu esse possit. *l. ædificia. 139. § 1.*

*Perisse* verbo & scissum & fractum continetur, & vi raptum. *l. perisse. 9.*

*Περὶ σῶμα*: *vide* Stragula.

*Pernostare* extra urbem intelligendus est, qui nulla parte noctis in urbe est. *Per* enim totam noctem significat. *l. urbana. 166. § 1.*

*Persequi* videtur, & qui satis accepit. *l. cui præcipua. 57. § 1.*

*Persecutio*: *vide* Actio.

*Personas speciosas* accipere debemus clarissimas personas, utriusque sexus. Item eorum qui ornamentis senatoriis utuntur. *l. speciosas. 100.*

*Perticæ*: *vide* Ligna.

*Pertinet. Is ad quem ea res pertinet*: verba hæc sic intelliguntur, ut qui in universum dominium, vel jure civili vel prætorio succedit, contineatur. *l. sciendum est. 70. § 1.*

Verbum illud *Pertinere* latissime patet: nam aptum etiam iis rebus petendis, quæ domini nostri sunt, & quas aliquo jure possidemus. *Pertinere* ad nos etiam ea dicimus, quæ in nulla eorum causa sint, sed esse possint. *l. verbum illud. 181.*

*Pervenisse* ad te recte dicitur, quod per te ad alium pervenit. *l. pervenisse. 171.*

*Pervenire*: *vide* Habere.

*Petitio*: *vide* Actio.

*παντάσµατα*: *vide* Ostentum.

*φάρµακον*: *vide* Venenum.

*Pignus*, à pugno appellatum: quia res quæ pignori dantur, manu traduntur: Unde etiam potest esse verum, quod quidam putant, pignus proprie rei mobilis constitui. *l. plebs. 238. § pignus. 2.*

*Plebs* est cæteri cives sine Senatoribus. *d. l. plebs. 238. in princ.*

*Plumbum*: *vide* Ædificia.

*Pluris aureorum triginta*; hæc enuntiatio simul & quantitatis, & æstimationis significativa est. *l. hac enuntiatio. 232.*

*Plu-*



*Plurifve* adjectio non infinitam pecuniam continet, sed modicam: ut taxatio hæc: *Solidos decem plurifve*, ad minutulam summam redigatur. *l. hæc adjectio. 192.*

*Pœna*: vide *Mulcta*.

*Pomum* qui recepit, fundum vendidit; nuces, & ficos & uvas duntaxat duracinas, & purpureas, & quæ ejus generis essent, quas non vini causa haberemus, quas Græci *τρωξίμας*, id est, comestibiles, appellarent, recepta videri. *l. qui fundum. 205.*

*Portari*: vide *Agi*.

*Portus*, est conclusus locus, quo importantur merces, & inde exportantur. Est & statio conclusa ac munita. Unde angiportum dictum. *l. portus. 59.*

*Possessionis* verbum interdum proprietatem quoque significat: sicut in eo, qui possessiones legasset, responsum est. *l. interdum. 78.*

*Possessio* ab agro juris proprietate distat. *l. questio est. 115. vide Fundus.*

*Posse*: cum potero: vide *Commodum* cum erit.

*Posthuma* nomen non cadit in eam quæ jam in rebus humanis sit. *l. nomen. 164. in princ.*

*Postquam* fari potuerit: vide *Cum* fari potuerit.

*Potestatis* verbo plura significantur. In persona Magistratum *imperium*: in persona liberorum, *patria potestas*: in persona servi, *dominium*; At cum agimus de noxæ deditioe cum eo qui servum non defendit, præsentis corporis copiam facultatemque significamus. *l. potestatis. 215.*

In *Potestatem* domini res furtiva venit, si ejus vindicandæ potestatem habuerit. *d. l. potestatis. 215. in fin.*

*Prædia* dicimus aliquorum esse, non communiter ea habentium, sed aliud alio habente. *l. litus & 96. ¶ 1.*

*Prædiorum jura*, sunt prædia qualiter se habentia: ut bonitas, salubritas, amplitudo, *l. quid aliud. 86.*

*Prædium*: vide *Fundus*.

*Prædones*, aut *Latrones* sunt, qui nec nobis, nec nos illis, publice bellum decrevimus. *l. hostes. 118.*

*Præsens*: vide *Absesse*.

*Præstari recte*. Hæc verba: *His rebus rectè præstari*; hoc significant, ne quid periculum aut damnum stipulator ex ea re sentiret. *l. aliud est capere. 71. ¶ 1.*

*Pravariatores* sunt qui causam adversariis suis donant, & ex parte actoris in partes rei concedunt. *l. pravariatores. 212.*

*Pratum* est in quo ad fructum percipiendum falce duntaxat opus est: quasi paratum. *l. pratum. 31.*

*Probrum* & *opprobrium*; id est, probra quædam natura turpia sunt, quædam civiliter & quasi more Civitatis: ut puta furtum, adulterium, natura turpe est. Enim-vero turelæ damnari, hoc non natura probrium est, sed more Civitatis. Nec enim natura probrium est, quod potest etiam in hominem idoneum incidere. *l. probrium. 42.*

*Proiectum*: vide *Immissum*.

*Pronuntiatum* & *statutum* idem potest. Promiscue enim pronuntiasse & statuisse solemus dicere eos qui habent jus cognoscendi. *l. pronuntiatum. 46.*

*Prothyrum*: vide *Ædium*.

*Provinciales* accipere debemus eos, qui in provincia domicilium habent: non eos qui ex provinæia oriundi sunt. *l. provinciales. 190.*

*Proximus* est, cui nemo antecedit: *Supremus* quem nemo sequitur. *l. proximus. 92.*

*Proximi* appellatione, etiam ille continetur qui solus est. *l. proximi. 155.*

*Proximus agnatus* & solus habetur ex Lege XII. Tabul. *l. in vulgari. 162. in princ.*

*Publica* appellatio, in compluribus causis, ad Populum Romanum respicit. *l. cum qui. 16. vide & Bona Civitatis.*

*Publica* inter habemus, non sacra nec religiosa, nec quæ publicis usibus destinata sunt; sed si qua sunt civitatum quasi bona. Sed peculia servorum Civitatum publica habentur. *l. inter publica. 17. in princ.*

*Publica vestigalia* sunt, ex quibus vestigal fiscus capit; quale est vestigal portus vel venalium rerum, item salinarum, & metallorum, & picariarum. *d. l. inter publica. 17. ¶ 1.*

*Publicanum* appellamus eum, qui vestigal Populi Romani conductum habet. *l. cum qui. 16.*

*Pueri* appellatione & puella significatur; Græce *παιδιον* communiter. *l. illa verba. 163. ¶ 1.*

*Pueri* appellatio tres habet significationes: unam, cum

cum omnes servos pueros appellamus : alteram , cum puerum contrario nomine puellæ dicimus : tertiam , cum ætatem puerilem demonstramus. *l. pueri. 204.*

*Pupillus non est , qui in utero est. l. non est pupillus. 161.*

*Pupillus est , qui cum impubes est , defuit in potestate patris esse , aut morte , aut emancipatione. l. pupillus est. 239. in princ.*

## Q

**Q**uanta pecunia : *vide Pecunia.*

Inter hæc verba , *Quanti ea res erit , & quanti eam rem esse paret ;* nihil interest : in utraque enim clausula placet veram rei æstimationem fieri. *l. inter hæc verba. 179. & l. hæc verba. 193.*

*Quanto minus à Titio consecutus fuero , tantum dare spondes ?* non solet dubitari , quin si nihil à Titio consecutus fuero , totum debeas quod Titius debuerit. *l. si ita à te. 150.*

Verbis *Quisquis mihi hæres erit* , in substitutione , proximus hæres tantum significatur. Imo non tantum proximus hæres , sed & scriptus. *l. ex illa parte 227. § 1.*

*Quisquis mihi filius &c. vide Filius.*

## R

Verba *his rebus Recte præstari ;* hoc significant , ne quid periculum aut damnum ex ea re stipulator sentiret. *l. aliud est capere. 71. § 1.*

Reddere rationes : *vide Edere.*

*Rei appellatio* latior est quam pecuniæ ; quia etiam ea , quæ extra computationem patrimonii nostri sunt , continet. *l. rei 5. in princ.*

*Rei appellatio ad omnem contractum & obligationem pertinet. l. nominis. 6. in princ.*

*Rei appellatione , & causæ & jura continentur. l. rei appellatione. 23.*

*Rei appellatione , pars etiam continetur. l. appellatione. 72.*

*Reliquorum appellatio & universos significat. l. potest reliquorum. 95. vide & Cæterorum.*

**Repudium** : *vide* Divortium.

**Restituere** is intelligitur, qui simul & causam auctori reddit, quam is habiturus esset, si statim iudicii accepti tempore res ei reddita fuisset; id est, & usufructuonis causam & fructuum. *l. restituere* 35. *vide* Exhibere.

**Restituere** videtur, qui id restituit quod habiturus esset auctor, si controversia ei facta non fuisset. *l. restituere*. 75.

Cum Prætor dicat; *Ut opus factum Restituatur*; etiam damnum datum auctor consequi debet: nam restitutionis verbo omnis utilitas auctoris continetur. *l. cum Prætor*. 81.

**Roma** appellatio continentibus ædificiis finitur, *Urbis*, muris. *l. Urbis*. 2.

**Urbis** est Roma, quæ muris cingeretur. Roma est etiam, qua continentibus ædificia essent. *l. ut Alfenus*. 87.

**Roma** non muris tenus existimatur. *d. l.* 87.

**Roma** etiam ea ædificia fieri dicuntur, quæ in continentibus Romæ ædificiis fiunt. *l. ædificia*. 139. *in princ.*

**Roma** nati intelliguntur, qui in continentibus Urbis nati sunt. *l. qui in* 147.

In *Rutis casis* sunt, ea quæ terra non tenentur, quæque opere struili, testoriove non continentur. *l. in rutis casis*. *l.* 241.

### S.

**Satisfactionis** appellatione interdum etiam *repromissio* continetur, qua contentus fuit cui satisfactio debebatur. *l. satisfactionis*. 61.

**Sequester** dicitur, apud quem plures eandem rem deponunt, de qua est controversia. *l. sequester*. 110.

**Serix**: *vide* Dolia.

**Servi** appellatio etiam ad ancillam refertur. *l. detestatio*. 40. ¶ 1.

**Servis** legatis, etiam ancillas deberi quidam putant: quasi commune nomen utrumque sexum contineat. *l. inter stuprum*. 101. ¶ *fin.*

**Servorum** appellatio ex eo fluit, quod Imperatores nostri captivos vendere & per hoc servare, nec occidere solent. *l. pupillus*. 239. ¶ 1.

in

in *Servis* urbanis constituitur, & is qui natus est ex mancipiis urbanis, & missus est in villam nutriendus: *l. is qui natus.* 210.

*Servitus*: vide *Familia*.

*Silva cadua* est quibusdam, quæ in hoc habetur ut caderetur. *Servio*, quæ succisa rursus ex stirpibus & radicibus renascitur. *l. silva cadua.* 30. *in prius.*

*Silva pascua* est, quæ pastui pecudum destinata est. *d. l. silva cadua* 30. ¶ *fin.*

*Συνάλλαγμα*: vide *Contractus*.

*Singulari* appellatione in usu juris frequenter utimur, cum plura generis ejusdem significare vellemus: sic multum hominem, vilem piscem dicimus. Item in stipulatione, *Si res ea secundum me hæredem meum erit judicata*: & plures continentur hæredes. *l. in usu juris.* 158.

*Si quis* (verbum hoc) tam masculos, quam fœminas cemplectitur. *l. 1.*

*Soceri* & *Socrus* appellatione, avus quoque & avia uxoris & mariti continentur. *l. soceri.* 146.

*Soluta pro separatis*: vide *Conjunctio*.

*Solutionis* verbo satisfactionem omnem quoque accipiendam placet. *Solvere* dicimus eum, qui fecit, quod facere promisit. *l. solutionis.* 176.

*Solvendo* esse nemo intelligitur, nisi qui solidum potest solvere. *l. solvendo.* 114.

*Solutum* non intelligimus eum, qui licet vinculis levatus, manibus tenetur; ut nec eum qui in publico sine vinculis servatur. *l. solutum.* 48.

*Soluto matrimonio dotem reddi*; Imperator pronuntiavit, id actum eo pacto, ut nullo casu remaneret dos apud maritum. *l. cum querebatur.* 240.

*Spadonum* generalis appellatio est. Quo nomine tam hi qui natura spadones sunt, item thlibiæ, thlasiæ; sed & quod aliud genus spadonum est, continentur. *l. spadonum.* 128.

*Sponsio* dicitur omnis stipulatio promissioque. *l. 7.*

*Statutum*: vide *Pronuntiatum*.

*Stipendium* à stipe appellatum est, quod per stipes, id est, modica æra, colligatur. Idem *Tributum* appellatur, ab intributione; vel ex eo quod militibus tribuatur. *l. ager* 27. ¶ *1.*

*Stipula illella* est spicæ in messe dejectæ, nec dum lectæ, quas rustici cum vacaverint colligunt. *l. silva* 30. ¶ 1.

*in Stratum*, omne vestimentum contineri quod injiciatur, Labeo ait. Neque enim dubium est, quin *Stragula* vestis sit omne pallium *στρωμα*. In vitum ergo vestem accipiemus non *Stragula*: In *stratum* omnem stragulam vestem. *l. in stratum*. 45.

*Stratæram* loci alicujus ex tabulis factis, quæ æstate tollerentur, & hyeme ponerentur, ædium esse ait Labeo. *l. 242. ¶ ult.* quoniam perpetui usus causa paratæ. *d. l.*

*Stuprum*: vide *Adulterium*.

*Subjunctivum*: vide *Aut*.

*Subsignatum* dicitur, quod ab aliquo subscriptum est. Nam veteres subsignationis verbo pro adscriptione uti solebant. *l. subsignatum*. 39.

*In Substitutione* vulgari, qua ei qui supremus morietur, hæres substituitur, recte substitutus etiam unico intelligitur. *l. in vulgari*. 162.

*Sulphurata de ligno*: vide *Carbones*.

*Sumptibus* in testamento constitutis; non licet minus consumere; amplius licet. *l. cum in*. 202.

*Supremus*: vide *Proximus*. *Item Substitutio. Item Optimus maximus*.

*Suum* ambiguum est, utrum de toto an de parte significet: & ideo qui jurat suum non esse, adjicere debet, neque sibi communem esse. *l. pupillus*. 239. ¶ *fin.*

*Σαπίρns*: vide *Cavillatio*.

## T

**T***Aberna* appellatio declarat omne utile ad habitandum ædificium, non ex eo quod tabulis clauditur. *l. taberna*. 183. Unde & *Tabernacula* & *Conuberna*les dicti sunt. *l. inde tabernacula*. 184.

*Tabernam instructam* sic accipimus, quæ & rebus & hominibus ad negotiationem paratis constat. *l. instructum*. 185.

*Τίχνα*. Ἡ ἤ τίχναν ἀγορηγορία καὶ ὅτι τοὺς ἰγγόνες ἐκτείνεταί. *l. 104.*

*Telum* vulgo appellatur, quod ab arcu mittitur; nunc omne

omne significatur quod mittitur manu. Itaque & lapis, & lignum, & ferrum hoc nomine continetur: quasi quod in longinquum mittitur; ὑπὸ τῆς τῆλῆς, id est, ab eo quod est longe. Græce βίλῳ, quod ab arcu mittitur. Proprio nomine Græce τοξύμα, communiter dicitur. *l. si calvitur. 233. ¶ 2.*

*Terra novalis*, est terra præcisa, quæ anno cessavit, Græce νέανη. *Integra* est, in quam nondum dominus pascendi gratia pecus immisit. *l. silva cadua. 30. ¶ 2. 3.*

*Territorium* est universitas agrorum intra fines cujusque Civitatis: dictum quod Magistratus loci intra eos fines terrendi, id est, summovendi jus habet. *l. pupillus. 239. ¶ pen.*

*Ter enixa* videtur, quæ trigeminos pepererit. *l. ter enixa. 137.*

*Testamentum falsum*; *vide* Falsus tutor.

*Tigni* appellatione in lege XII. Tabul., omne genus materiæ ex qua ædificia constant, significatur. *l. tigni, 62.*

*Titio*: *vide* Carbones.

*Totum meum*: *vide* Meum totum.

*Totum nostrum*: *vide* Nostrum totum.

*τοξύμα*: *vide* Telum.

*Transacta*: *vide* Finita.

*Tributum*: *vide* Stipendium.

*Tugurii* appellatione omne ædificium, quod rusticæ magis custodiæ convenit, quam urbanis ædibus, significatur. *l. tugurii. 180. in princ.*

*Tugurium* à tecto, tanquam tegularium, est dictum. *d. l. tugurii. 180. ¶ 1.*

*Tutor falsus*: *vide* Falsus tutor.

*Tuum*: *vide* Meum.

## V

*Vasa vinaria*, proprie vasa torcularia esse placet. *l. vasa. 206.*

*Vestigalia publica*: *vide* Publica vestigalia.

*Venenum* qui dicit, adjicere debet utrum malum an bonum. Nam & medicamenta venena sunt, quia eo nomine omne continetur, quod adhibitum naturam ejus cui adhibitum, mutat: Græce φάρμακον.

quo nomine tam medicamenta, quam quæ nocent continentur. *l. qui venenum. 236.*

Venisse ad hæredem: *vide Bona.*

Venire diem: *vide Cedere diem.*

*Vestis* appellatione, virilis, muliebris, & scenica, etiam si tragica aut citharœdica sit, continetur. *l. vestis. 127.*

*Via* est sive semita, sive iter est. *l. paries. 157. ¶ 1.*

*Victus* verbo continentur, quæ esui, potuique, cultuique corporis, quæque ad vivendum homini necessaria sunt, & vestis; *l. verbo victus. 43.* & cetera, quibus tuendi, curandive corporis nostri gratia utimur, ea appellatione significantur. *l. & cetera. 44.*

*Vidua* etiam ea appellatur, quæ virum non habuit; quia vidua sic dicta est quasi vecors, vesanus, qui sine corde & sanitate esset: similiter Vidua dum est sine duitate. *l. malum. 242. ¶ 3.*

*Villa*: *vide Fundus.*

*Vinctus* neque in vinculis esse videtur, qui in carcere clusus; nisi corpori ejus vincula sint adhibita. *l. verum est. 216.*

*Vincula*: *vide Vinctus. Custodia.*

*Virilis* appellatione interdum etiam tota hæreditas continetur. *l. virilis. 145.*

*Vitium*: *vide Morbus.*

*Vivere* quidam putant ad cibum pertinere. Sed his verbis & vestimenta, & stramenta continentur: sine his enim vivere nemo potest. *l. quos nos. 234. ¶ fin.*

*Vota* pro salute Principis suscipiuntur die tertio post Kalendas Januarias. *l. si calvitur. 233. ¶ 1.*

*Urbana prædia*, omnia ædificia accipimus, non solum ea quæ in oppidis; sed & si forte stabula sint, vel alia meritoria in villis & in vicis; vel si prætoria voluptati tantum deservientia: quia urbanum prædium non locus facit, sed materia. Proinde horti quoque si qui sunt in ædificiis constituti, dicendum urbanorum appellatione contineri. Plane si plurimum horti in reditu sunt, vinearii forte, vel olitorii, magis hæc non sunt urbana. *l. urbana prædia. 198.*

*Urbanum mancipium*: *vide Servus.*

*Urbs* ab urbo appellata; Urbare est aratro definire.

&c



& Varus ait urbem appellari curvaturam aratri, quod in urbe condenda adhiberi solet. *l. pupillus.*

*239. ¶ 6. vide & Roma.*

*Usu suo ducere* cum dicitur, quod victus causa paratum est tantum continetur. *Usus sui* gratia eos demum servos paterfamilias videtur habere, qui ad ejus corpus tuendum; atque ad ejus cultum praepositi destinatique essent: quo in genere junctores, cubicularii, coci, ministratores, atque alii qui ad ejusmodi usum parati essent, numerarentur. *l. in lege Censoria. 203.*

*Usura* pecuniae quam percipimus, in fructu non est: quia non ex ipso corpore, sed ex alia causa est, id est, nova obligatione. *l. usura. 121.*

F I N I S.

ARNOL.

ARNOLDI CORVINI  
à BELDEREN, J.C.

Titulus XVI. Libri L. Digestorum,  
DE DIVERSIS REGULIS  
JURIS ANTIQUI,

*Contractus, & secundum ordinem Alphabeticum digestus.*

A

**A** Besse Reipublicæ causa servus non potest. *l. ult. Absentia* ejus qui Reipublicæ causa abest, neque ei, neque alii, damnosa esse debet. *l. absentia. 140.* quæ *Abundant* non solent vitare scripturas. *l. non solent. 94.*

*Acceptum si feratur*, ei qui sub conditione promisit, ita denum egisse aliquid acceptilatio intelligitur, si obligationis conditio extiterit, quæ si verbis acceptilationis nominatim comprehendatur nullius momenti est actus. *l. actus. 77.*

*Actio de peculio in patrem ex causis pœnalibus dari* non solet. *l. ex pœnalibus. 58.*

*Actiones ejusdem rei nomine quoties plures concurrunt*, una quis experiri debet. *l. nemo. 43. § 1.*

*Actio nulla cum servo. l. cum servo. 107.*

*Actionem ipso jure quis non habeat*, an per exceptionem infirmetur, nihil interest. *l. nihil interest. 112.*

*Actionem ad rem recuperandam habens*, ipsam rem habere videtur. *l. is qui actionem. 15.*

*Actiones cui dantur*, eidem multo magis competunt exceptiones. *l. invitus. 156. § 1.*

*Actionem habere, minus est quam rem. l. minus est. 204.*

*Actiones omnes quæ morte aut tempore pereunt*, semel inclusæ judicio, salvæ manent. *l. omnes actiones. 139.*

*Actiones, præsertim pœnales, de eadem re concurrentes*, alia aliam nunquam consumit. *l. nunquam actiones. 130.*

*Actio-*

- Actionibus* in duabus, si alibi major summa, alibi infamia est: proponenda est causa existimationis. *l. si in duabus. 104.*
- Actionum* modus, vel Lege vel per Praetorem introductus, privatorum pactionibus non infirmatur; nisi tunc, cum inchoatur actio, inter eos convenit. *l. nec ex pratorio. 27. in fin.*
- Actionem* denegare est ejus, qui potest dare. *l. qui vetante. 102. ¶ 1.*
- Astor* certus esse debet, & ante debet rem diligenter explorare, & tum ad agendum procedere. *l. qui in alterius. 42.*
- Actori* licere non debet, quod reo non permittitur. *l. non debet. 41. in princ.*
- Aestimatio* delicti praeteriti ex postfacto non crescit. *l. omnis. 138. ¶ 1.*
- Actus* legitimus nec diem, nec conditionem recipit. *d. l. actus. 77.*
- Agere* alieno nomine nemo lege potest. *l. nemo.. 123. in princ.*
- Aequitas* in omnibus, maxime in Jure spectanda. *l. in omnibus. 90.*
- Aequitate* desiderii, quoties naturalis ratio, aut dubitatio Juris moratur, justis decretis res temperanda est. *l. in ambiguis. 85. ¶ fin.*
- Aequitas* ubi evidens possit, subveniendum est. *l. etsi nihil. 183. in fin.*
- Etati* in omnibus fere poenalibus Judiciis succurritur. *l. fere in omnibus. 108.*
- Alienare* qui invitis potest, multo magis & ignorantibus & absentibus potest. *l. qui potest. 26.*
- Alterutrum* factum esse sufficit, ubi verba conjuncta non sunt. *l. in eo. 110. ¶ 3.*
- Amittere* rem non videntur, quibus propria non fuit. *l. non videntur. 83.*
- Amittimus* iisdem modis, quibus acquirimus. *l. fere quibuscunque. 153.*
- In Ambiguis* pro dotibus respondendum est. *l. in ambiguis. 85. in princ.*
- Quotiens idem sermo* duas sententias exprimit, ea potissimum excipitur, quæ rei gerendæ est aptior. *l. quotiens idem. 67.*

In

In *Ambiguis* orationibus maxime spectanda est sententia ejus qui protulit. *l. in ambiguis. 96.*

*Ambiguum* pactum in contrahenda venditione, contra venditorem est interpretandum. *l. in contrahenda. 172.*

In *Arbitrium* domini vel procuratoris ejus conditio, in bonæ fidei judiciis ubicunque conferrur, pro viri boni arbitrio hoc habendum est. *l. in personam. 22. § 1.*

*Animi destinatione* quæ agenda sunt, non nisi vera & certa scientia perfici possunt. *l. in totum. 76.*

## B

**B**eneficio ubicunque personæ conditio locum facit, ibi deficiente ea, beneficium quoque deficit; Ubi vero genus actionis id desiderat, ibi ad quemvis persecutio ejus devenerit, non deficit ratio auxilii. *l. in omnibus. 68.*

*Beneficium* invito non datur. *l. invito. 69.* invito non tribuitur, quod cuique pro eo præstatur. *l. invitus 156. § fin.*

*Beneficium* quod viventi concessit Princeps, non videtur defuncto concessisse: quem tamen modum beneficii sui esse velit, ipsius æstimationis est. *l. Neratius. 191.*

*Bona fides* non patitur, ut idem bis exigatur. *l. bona fides. 57.*

*Bona fides* tantundem possidenti præstat, quantum veritas, quotiens lex impedimento non est. *l. bona fides. 136.*

*Bona fidei* judicia consensus sustinet. *l. nihil consensui. 116. in princ.*

*Bona fidei* possessor est, qui auctore judice comparavit. *l. qui auctore. 137.*

In *Bonis* non est quod evincitur. *l. quod evincitur. 190.*

*Bonis* cui interdictum est, ejus nulla voluntas est. *l. furiosi. 40.*

*Bonorum* possessorem Prætor hæredis loco in omni causa habet. *l. Prætor. 117.*

## C

**C**apere id quisquam non videtur, quod ei necesse est aliis restituere. *l. non videtur. 51.*

*Cepisse* non videtur qui per exceptionem à petitione removeretur. *l. non videtur. 13.*

*Captio*, quæ minimum habet iniquitatis, eligenda est, quo-

quoties nihil sine captione investigari potest. *l. quotiens nihil. 200.*

Clam: *vide Vis.*

Casus, quæque sine culpa accidunt, à nullo præstatur. *l. contractus 23. ¶ in fin.*

Casu auferri quod potest, non videtur perfecte cuiusque esse. *l. omnes actiones. 139. ¶ 1.*

Causa principalis cum non consistit, plerumque ne ea quidem quæ sequuntur locum habent. *l. cum principalis. 178.*

Cavillationis ea natura est, ut ab evidenter veris, per brevissimas mutationes, disputatio ad ea quæ evidenter falsa sunt, perducatur. *l. ea est natura. 65.*

Cavere alteri; nec paciscendo, nec legem dicendo, nec stipulando, quisquam potest. *l. quod tutela. 73. ¶ fin.*

Cautio in re plus est, quam in persona. *l. plus cautionis. 25.*

Circumventio alterius alii non præbet actionem. *l. alterius. 49.*

Cognitio causæ ubicunque est, ibi Prætor desideratur. *l. ubicunque. 105.*

Cognitionem causæ quæcunque desiderant, per libellum expediri non possunt. *l. omnia quæ. 71.*

Commoda cuiusque rei eum sequi quem sequuntur incommoda, secundum naturam est. *l. secundum. 10.*

Commodi plus quam ipse habuit, nemo hæredi relinquit. *l. nemo plus. 120.*

Condemnare nemo potest, qui absolvere non potest. *l. nemo qui. 37.*

Conditionis melioris quam auctor meus esse non debeo. *l. in his. 175. ¶ 1.*

Conditio nostra per servos melior fieri potest, non deterior. *l. Melior. 133.*

Conditioni parere ut possit, qui facere potest, jam posse videtur. *l. qui potest. 174.*

Conditio iniqua alteri per alterum inferri non debet. *l. non debet. 74.*

Conditionem suam nemo ex suo delicto meliorem facere potest. *l. non fraudantur. 134. ¶ 1.*

Conditionem non impleri, quoties fit per eum cuius interest non impleri, perinde habetur ac si impleta fuisset. *l. in jure Civil. 161.*

In

- In Conjunctionibus* semper non solum quod licet considerandum est, sed & quod honestum sit. *l. semper.* 197.
- Coniuncta* ubi verba non sunt, sufficit alterutrum factum esse. *l. in eo quod plus.* 110. ¶ 3.
- Consentire* non videntur, qui errant. *l. nihil consensui.* 116. ¶ *fin.*
- Consensui* nihil tam contrarium, quam vis ac metus. *d. l. nihil consensui. in princ.*
- Consensus*, non concubitus, nuptias facit. *l. nuptias.* 30.
- Consensus* nudi obligatio, contrario consensu dissolvitur. *l. nihil tam.* 35.
- Consilium* suum nemo in alterius injuriam mutare potest. *l. nemo potest.* 75.
- Consilii* non fraudulentum nulla obligatio est. si dolus & calliditas intercessit, de dolo actio competit. *l. consilii.* 47.
- Consulto* dati donatio est, cujus per errorem dati est repetitio. *l. cujus per errorem.* 53.
- Constituta* semel utiliter durant, licet ille casus extiterit, à quo initium capere non potuerunt. *l. in ambiguis.* 85.
- Contracta* jure, contrario jure pereunt. *l. omnia que.* 100.
- Contractus* legem dat. *l. contractus.* 23. *in med.*
- Contractus* quidam dolum malum duntaxat recipiunt; quidam dolum & culpam. dolum tantum depositum, & precarium. dolum & culpam mandatum, commodatum, venditum, pignori acceptum, locatum. item dotis datio, tutela, negotia gesta. in his quidem & diligentiam. societas & rerum communio, & dolum & culpam recipit. sed hæc ita, nisi si quid nominatim convenerit, vel plus, vel minus in singulis contractibus: nam hoc servabitur, quod initio convenit. *d. l. contractus.* 23.
- Contrahentibus* quod obstat, & successoribus eorum obstat. *l. quod ipfis.* 143.
- Conventio* privatorum juri publico non derogat. *l. neque pignus.* 45. ¶ 1.
- Conventio* legem dat contractui: *l. contractus.* 23. *in med.*
- Servabitur ergo de quo initio convenit. *ibid. in f.*
- Conventione* privatorum nec ex pratorio, nec ex solemni jure quicquam immutandum est, quamvis causæ obligationum possint pactione immutari, & ipso

ipso jure, & per pacti conventi exceptionem. *l. nec ex pratorio. 27.*

*Creditor nihil facit dolo, qui suum recipit. l. nihil dolo. 129. in princ.*

*Creditor, qui permittit rem venire, pignus dimittit. l. creditor, qui. 158.*

*Creditores non fraudantur, cum quid non acquiritur à debitore, sed cum quid de bonis diminuitur. l. non fraudantur. 134.*

*In Crimen vis publicæ aut privatæ incidit, quicquid omnino per vim fit. l. hoc jure utimur. 152.*

*Crimen nullum patitur is, qui non prohibet, cum prohibere non potest. l. nullum. 109.*

*Culpa est, se immiscere rei ad se non pertinenti. l. culpa est. 36.*

*Culpa caret qui scit, sed prohibere non potest. l. culpa caret. 50.*

*Culpa sua damnum sentiens, non intelligitur damnum sentire. l. quod quis ex. 203.*

*Culpa nulla est ejus, cui parere necesse sit. l. is damnum dat. 169.*

*Culpa annumeratur imperitia. l. imperitia. 132.*

D

*Damnnum is dat, qui jubet dare. l. is damnum. 169. in princ.*

*Damnnum nemo facit, nisi qui id fecit, quod facere jus non habet. l. nemo damnum. 151.*

*Damnnum quod quis ex sua culpa sentit, sentire non intelligitur. l. quod quis ex. 203.*

*Dati per errorem, cujus repetitio est; ejus consulto dati donatio est. l. cujus per. 53.*

*Debere se negantes, non prohibentur alia defensione uti, nisi lex impedit. l. nemo qui. 43.*

*Deberi ex pluribus causis idem nobis potest. l. non ut ex pluribus. 159.*

*Debet natura is, quem jure Gentium dare oportet, cujus fidem secuti sumus. l. cum amplius. 84.*

*Debitor esse definit, qui nactus est exceptionem justam, nec ab æquitate naturali abhorrentem. l. Marcellus. 66.*

*Defendere rem alienam invitus nemo cogitur. l. invitus. 156. in princ.*

Qui

Qui *Defendit* rem alienam, nunquam locuples habetur. *l. qui rem alienam. 166.*

*Defendere* non videtur, non tantum qui latitat, sed & is qui præsens negat se defendere, aut non vult suscipere actionem. *l. non defendere. 52.*

*Definitio* omnis in Jure Civili periculosa est. *l. omnis definitio. 202.*

*ex suo Delicto* meliorem suam conditionem nemo facit. *l. non fraudantur. 134. § 1.*

*Delictum* duorum cum par est, semper oneratur petitor, & melior habetur possessoris causa. *l. cum par. 154. in princ.*

*Delicti* præteriti æstimatio nunquam ex post facto crescit. *l. omnis hereditas. 138. § 1.*

*Denegare* actionem ejus est, qui possit & dare. *l. qui vetante. 102. § 1.*

*Deportationis* sententia ea sola aufert, quæ ad fiscum perveniunt. *l. ea sola. 97.*

*Destinatione animi* quæ agenda sunt, non nisi vera & certa scientia perfici possunt. *l. in totum. 76.*

*Dies* in obligationibus si non ponitur, præsentis die debetur. *l. in omnibus. 14.*

*Dissolvitur* quidque eo genere quo colligatum est. *l. nihil tam. 35.*

*Dividi* quæ in partes non possunt, solida à singulis hæredibus debentur. *l. ea qua. 192. in princ.*

*Dolo* facit, qui petit quod redditurus est. *l. in condemnatione. 173. § fin.*

*Dolus ne præstetur*, si convenerit, hoc bonæ fidei iudicio contrarium non servatur. *l. contractus 23. vers. penult.*

*Doli exceptio* non solet nocere his, quibus voluntas testatoris non refragatur. *l. qui cum alio. 19. § 1.*

*Dolo facere* nullus videtur, qui suo jure utitur. *l. nullus. 55.*

*Dolo carere* non potest, qui imperio Magistratus non paruit. *l. non potest. 199.*

*Dolo* non videtur exequi, qui ignorat causam, cur non debeat petere. *l. qui in jus. 177. § 1.*

de *Dolo* cum excipitur petitoris, non datur talis replicatio petitori. *l. cum par delictum. 154.*

*Dolo* qui desierit possidere, pro possidente damnatur:



tur: quia pro possessione *dolus* est. *l. qui dolo*. 131.  
*Dolo malo* facere non videtur, qui jussu judicis aliquid facit, qui parere necesse habet. *l. non videntur*. 167. ¶ 1.

*Dolo* cujus *malo* factum est, quominus possideret vel haberet, ejus parem oportet esse conditionem cum eo qui quid possideat, vel habeat. *l. parem esse*. 150.

*Dolam tutoris*, neque in interdicto, neque in cæteris causis, pupillo nocere oportet; sive solvendo est, sive non est. *l. neque in interdicto*. 198.

*Dolo* nihil facit creditor qui suum recipit. *l. nihil facit*. 129. *in prin.*

*Dolo* qui fecit quominus haberet, pro eo semper habendus est, ac si haberet. *l. ad ea quæ*. 157. ¶ 1.

*Domo sua* nemo extrahi debet. *l. nemo de*. 103.

*Domum suam* reficere cuique licet, dummodo alteri non officiat, in quo jus non habet. *l. domum suam*. 61.

*Donandi* cui est jus, eidem & vendendi & concedendi est. *l. cui jus est*. 163.

*Donari* videtur, quod nullo jure cogente conceditur. *l. donari*. 82.

*Donare* cui non conceditur, probandum erit; nec si donationis causa consenserit, ratam ejus voluntatem habendam. *l. cum quis*. 165. ¶ 1.

Pro *Dotibus* respondendum in ambiguis est. *l. in ambiguis*. 85. *in prin.*

*Dubia* quoties interpretatio libertatis est, secundum libertatem respondendum erit. *l. quotiens dubia*. 20.  
*Vide & l. in obscura*. 179.

In *Dubiis* benigniora semper sunt præferenda. *l. semper in dubiis*. 56.

In *re Dubia* benigniorem interpretationem sequi, non minus justius est, quam tutius. *l. ea quæ in*. 192. ¶ 1.

*Dubitationis* tollendæ gratia quæ contractibus inferuntur, jus civile non lædunt. *l. quæ dubitationis*. 81.

## E

**E***ffectus* cujus rei omnibus prodest, ejus & partes ad omnes pertinent. *l. cujus effectus*. 148.

*Eligendum* est, quod minimum habet iniquitatis, quoties nihil sine captione investigari potest. *l. quotiens nihil*. 200.

*Emptoris* plerunque eadem causa esse debet circa peten-

tendum ac defendendum, quæ fuit auctoris. *l. invitus nemo.* 156. ¶ 3.

*Errans consentire non videtur. l. nihil consensui.* 116. ¶ *fin.*

*Error Librarii, in transcribendis stipulationis verbis, nihil nocet quominus & reus & fidejussor teneatur. l. si librarius.* 92.

*Quod evincitur in bonis non est. l. quod evincitur.* 190.

*Exceptiones multo magis competunt eis, quibus dantur actiones. l. invitus.* 156. ¶ 1.

*Exceptio doli non solet nocere his, quibus voluntas testatoris non refragatur. l. qui cum alio.* 19. ¶ 1.

*Per Exceptionem pacti conventi, causæ obligationum mutari possunt. l. nec ex pratorio.* 27.

*Existimationis causa præponenda est, si in duabus actionibus, alibi major summa, alibi infamia est. l. si in duabus.* 104.

*Expressa nocent, non expressa non nocent. l. expressa.* 195.

*Expromissor alienæ rei, nemo idoneus videtur sine satisfactioe. l. in eo quod plus.* 110. ¶ 1.

*Extrahi de domo sua nemo debet. l. nemo de.* 103.

## F

**F***acere qui debet, non faciens, videtur facere adversus ea, quia non facit; & qui facit quod facere non debet, non videtur facere quod jussus est. l. qui non facit.* 121.

*Fecisse adversus Edictum proprie dicitur, qui vetante Pratore fecit. l. qui vetante.* 102.

*Factum cuique suum, non adversario, nocet. l. factum.* 155. *in princ.*

*pro Facto in omnibus causis accipitur id, in quo per alium moræ sit, quominus fiat. l. in omnibus.* 39.

*Factum neque pacta, neque stipulationes possunt tollere. l. verum est.* 31.

*Factum judicis, quod ad officium ejus non pertinet, ratum non est. l. factum.* 170.

*Factum quod est, cum in obscuro est, ex affectione cujusque capit interpretationem. l. rapienda.* 168.

¶ 1.

*Famosa judicia ubi æquiparant, etsi summam imparem ha-*

habent, pro paribus accipiuntur. *l. si in duabus. 104.*  
*Fidejussores* possunt allegare justam ignorantiam. *l. qui in alterius. 42.*

*Filiusfamilias* neque retinere, neque recuperare, neque adipisci possessionem rei peculiaris videtur. *l. filiusfamilias. 93.*

*Fisco* quod obligamus, & vindicare interdum & alienare, & servitutem prædio imponere possumus. *l. plerumque sit. 205. in f.*

*Famina* ab omnibus officiis civilibus, vel publicis sunt remotæ. *l. famina. 2.*

*Fraudare* eos qui sciunt, & consentiunt, nemo videtur. *l. nemo videtur. 145.*

de *Fraude* cum disputatur generaliter: non quid habeat actor, sed quid per adversarium habere non potuerit, considerandum est. *l. generaliter. 78.*

*Fraudis* interpretatio semper in jure Civili non ex eventu duntaxat, sed ex consilio quoque desideratur. *l. fraudis. 79.*

*Fructus* rei est, vel pignori date licere. *l. fructus. 72.*

*Furiosi*, vel ejus cui bonis interdictum sit, nulla voluntas est. *l. furiosi. 40.*

*Furioforum* in negotiis contrahendis alia causa habitata est, alia eorum qui fati possunt, quamvis actum rei non intelligerent. *l. in negotiis. 5. in princ.*

*Furiosus* nullum negotium contrahere potest. *l. in negotiis. 5. in fin.*

*Furiosus* absentis loco est. *l. ubi non voce. 124. ¶ 1.*

*Furiosus* nullum negotium contrahere potest; pupillus omnia auctore tutore agere potest. *d. l. in fin.*

## G

**G**eneralibus insunt specialia. *l. semper. 147.*

*Generi* per speciem in toto jure derogatur, & illud potissimum habetur, quod ad speciem directum est. *l. in toto jure. 80.*

*Gladii* potestatem sibi datam; vel cujus alterius coercionis, ad alium transferre nemo potest. *l. nemo potest. 70.*

## H

**H**abere desiisse videri non potest, qui nunquam habuit. *l. non potest. 208.*

*Hæreditas* nihil aliud est, quam successio in universum

## O

sum

sum jus quod defunctus habuerit. *l. hereditas. 62.*  
*in Heredem* totiens damus (actionem) de eo quod ad  
 eum pervenit, quotiens ex dolo defuncti conve-  
 nitur, non quotiens ex suo. *l. totiens. 44.*

*in Heredem* cum prætor dat actionem, quatenus ad  
 eum pervenit, sufficit, si vel momento ad eum per-  
 venit ex dolo defuncti. *l. cum prætor. 127.*

*Hæredes* duo pro solido uni esse non possunt. *l. quod  
 contra. 141. ¶ 1.*

*Hæredes*, si agatur cum iis, non si agant, justam igno-  
 rantiam allegare possunt. *l. qui in alterius. 42.*

*Hæredi* suo nemo plus commodi relinquit, quam ipse  
 habuit. *l. nemo plus. 120.*

*Hæredis* loco habentur hi, qui in universum jus suc-  
 cedunt. *l. in pari causa. 128. ¶ 1.*

*Hæreditas* eo pervenit quo tutela rediit, nisi cum  
 foeminae hæredes intercedunt. *l. quo tutela. 73. in  
 princ.*

*Hæreditas* omnis, quamvis postea adeatur, tamen  
 cum tempore mortis continuatur. *l. omnis hereditas.  
 138. in princ.*

*Hæreditatem* si nemo subit, omnis vis testamenti sol-  
 vitur. *l. si nemo. 181.*

*Hæres* esse non vult qui ad alium transferre voluit hæ-  
 reditatem. *l. non vult. 6.*

*Hæres* ejusdem potestatis jurisque est, cujus fuit de-  
 functus. *l. heredem. 59.*

*Hæres* sicut ex delicto defuncti poena teneri non de-  
 bet; ita nec lucrum facere, si quid ex ea re ad  
 eum pervenit. *l. sicuti. 38.*

*Hæres* in solidum tenetur in contractibus, quibus do-  
 li præstatio vel bona fides inest. *l. hoc jure. 152. ¶ fin.*

*Hæredum* jura fere omnia perinde habentur, ac si con-  
 tinuo sub tempus mortis hæredes exstiterissent. *l. om-  
 nia fere. 193.*

*Homines* omnes, quoad jus naturale, æquales sunt.  
*l. quod attinet. 32.*

*Honestum* non est omne quod licet. *l. non omne. 144.  
 in princ.*

## I

**I**gnorans quantum solvere debeat, non potest im-  
 probus videri. *l. non potest. 99.*

*Ignorantiam* justam fidejussores non minus quam heredes allegare possunt. *l. qui in alterius.* 42.

*Imperitia* culpæ adnumeratur. *l. imperitia.* 132.

*Impletum* : vide *Conditio*.

*Impossibile* quod est, neque pacto, neque stipulatione potest comprehendi, ut utilem actionem aut factum efficere possit. *l. verum est.* 31.

*Impossibilium* nulla est obligatio. *l. impossibilium.* 185.

Quæ rerum natura prohibentur, nulla lege confirmari possunt. *l. ubi pugnantia.* 188. ¶ 1.

quæ dari *Impossibilia* sunt, vel quæ in rerum natura non sunt, pro non adjectis habentur. *l. ea, quæ.* 135.

*Imprudencia* & ætati fere in omnibus pœnalibus judiciis succurritur. *l. fere in omnibus.* 108.

*Impubes* omnibus officiis civilibus debet abstinere. *l. 2. ¶ 1.*

*Improbis.* vide *Ignorans.*

*Institutio* quæ ab initio fuit inutilis, ex post facto non convalescit. *l. quæ ab initio.* 210.

*Intentio* ambigua ita accipienda est ut res salva auctori sit. *l. in contrahenda.* 172. ¶ 1.

*Interpretandum* est benignius in pœnalibus causis. *l. factum cuique.* 155. ¶ 2.

*Intersit* quatenus alicujus, in facto, non in jure consistit. *l. quatenus.* 24.

*Intervenire* pro se qui non prohibet, semper mandare creditur. *l. semper qui.* 60.

*Invitus* rem nemo cogitur defendere. *l. invitus.* 156. in princ.

*Invito* non tribuitur quodcumque pro eo præstatur. *d. l. invitus.* 156. ¶ fin.

*Invitis* alienare qui potest, multo magis & absentibus & ignorantibus potest. *l. qui potest.* 26.

*Iracundia* calore quod fit vel dicitur, non prius ratum est, quam si perseverantia apparuerit iudicium animi fuisse. *l. quicquid.* 48.

*Judicata* res, pro veritate accipitur. *l. res judicata.* 207. in bonæ fidei judiciis ubicunque in arbitrium domini vel procuratoris ejus confertur conditio, pro boni viri arbitrio hoc est habendum. *l. in personam.* 22. ¶ 1.

*Factum à Judice*, quod ad officium ejus non pertinet,

- net, ratum non est. *l. factum.* 170.  
*Judice* auctore qui comparavit, bonæ fidei possessor est. *l. qui auctore.* 137.  
*Jura sanguinis* nullo jure civili dirimi possunt. *l. jura.* 8.  
*Jure contracta* contrario jure pereunt. *l. omnia qua.* 100.  
*Jus commune* non lædunt, quæ dubitationis tollendæ gratia in contractibus inferuntur. *l. qua dubitationis.* 81  
*Jus publicum* qui sequitur, non capitur. *l. nihil consensui.* 116. ¶ 1.  
*Juris* plus eum habere, cui fundus est legatus, quam hæredem aut ipsum testatorem si viveret, absurdum est. *l. aliud est.* 160. ¶ 2.  
*Jus nostrum* non patitur eundem in paganis & testato & intestato decessisse. *l. jus nostrum.* 7.  
in *Jus* universum qui succedunt, hæredis loco habentur. *l. in pari.* 128. ¶ 1.  
*Jure* suo qui utitur, & ordinaria actione experitur; non videtur vim facere. *l. factum cuique.* 155. ¶ 1.  
*Juris* plus nemo ad alium transferre potest, quam ipse haberet. *l. nemo plus.* 54.  
*Jussu judicis* qui aliquid facit, non videtur dolo malo facere, quia parere necesse habet. *l. non videtur.* 167. ¶ 1.  
*Jussu alterius* quod solvitur, pro eo est, quasi ipsi solutum esset. *l. quod jussu.* 180.

## L

**L**egatarius. *vide* Juris plus.

*Legata* quæ mortuis nobis ad hæredem nostrum transeunt, eorum commodum per nos, his quorum in potestate sumus, eodem casu acquirimus: aliter atque quod stipulati sumus. Nam & conditione stipulantes, omnimodo eis acquirimus, etiam si liberatis nobis potestate domini, conditio existat. *l. qua legata.* 18.

Lege agere, *vide* Agere.

*Legitimi actus* in totum vitiantur per temporis vel conditionis adjectionem expressam: non tacitam. *l. actus.* 77.

per *Libellum* expediri non possunt, quæcunque causæ cognitionem desiderant. *l. omnia qua.* 71.

Ex liberalitate qui conveniuntur, in id quod facere possunt condemnantur. *l. Divus Pius.* 28.

Li-

*Liberamur fere iisdem modis quibus obligamur. l. fere quilibet. 153.*

*Liberatus si quis sit obligatione, potest videri cepisse. l. si quis. 115.*

*sine Liberis decessisse non videtur, qui uxorem prægnantem reliquit. l. si quis. 187.*

*Libero factio proficere non potest, quod quis, dum servus est, egit. l. quod quis. 146.*

*Libertum qui acquisierit, non est factus locupletior. l. nemo prædo. 126. ¶ 1.*

*Libertas inæstimabilis res est. l. libertas. 106.*

*Libertas omnibus rebus favorabilior est. l. libertas. 122.*

*Libertati favendum in obscura manumittentis voluntate. l. in obscura. 179.*

*Libertatis atque necessitudinis infinita æstimatio est. l. non est singularis. 176. ¶ 1.*

*Libertatis quoties dubia est interpretatio, secundum libertatem respondendum est. l. quotiens 20.*

*Licet: vide Honestum.*

*Litem qui contestati sunt, eorum conditio non solet deterior fieri, quam si non, sed plerumque melior. l. non solet. 86.*

*post Litem contestatam hæredi quoque prospicitur: & hæres tenetur ex omnibus causis. l. nemo enim. 87.*

*Locupliorem neminem fieri cum alterius detrimento & injuria, jure naturæ æquum est. l. jure natura. 206.*

*Locuples nunquam habetur, qui rem alienam defendit. l. qui rem. 166.*

*Lucrum facere hæres, si quid ex delicto defuncti ad eum pervenit, non debet. l. sicuti pœna. 38.*

*Lucri utriusque causa, quotiens ratio vertitur, is præferendus est, cujus in lucrum causa tempore præcedit. l. quotiens utriusque. 98.*

*Lucri quod facturum est, vel is qui petit, vel is à quo petitur, in eo durior causa est petitoris. l. in eo quod. 33.*

*Lucro adventitio favere, non est melius, in re obscura, sed repetitioni. l. non debet. 41. ¶ 1.*

*de Lucro duorum cum quæritur, melior est causa possidentis. l. nemo prædo. 126. ¶ 2.*

*Lucrum ex qua persona quis capit, ejus factum præstare debet. l. ex qua persona. 149.*

## M

per **M**agistratum quod publice fieri possit, non est singulis concedendum; ne occasio sit majoris tumultus faciendi. *l. non est singulis. 176.*

**Magistratus** imperio qui non paruit, dolo carere non potest. *l. non potest dolo. 199.*

per **Majorē** partem quod publice fit, ad universos refertur. *l. aliud est. 160. ¶ 1.*

**Mandare** semper creditur, qui non prohibet pro se intervenire. *l. semper qui non. 60.*

**Mandati** actione obstringitur, & si quis ratum habuerit. *d. l. semper qui. 60.*

qui **Mandat**, & dejicit. *l. hoc jure utimur. 152. ¶ 1.*

**Mandato** in maleficiis ratihabitio comparatur. *d. l. hoc jure utimur. 152. ¶ 2.*

**Metus & Vis;** nihil tam consensui contrarium. *l. nihil consensui. 116. in princ.*

**Metum** comprobare contra bonos mores est. *d. loco.*

**Mensum duorum**, ubi lex fecit mentionem, & qui sexagesimo primo die venerit audiendus est. *l. ubi lex. 101.*

**Minimum** quod est, semper in obscuris sequimur. *l. semper. 9.*

**Minus** semper inest in eo quod plus est. *l. in eo quod 110. in princ. vide Plus.*

**Minus** est actionem habere, quam rem. *l. minus est. 204.*

**Mora** sua unicuique nocet, quod & in duobus reis promittendi observatur. *l. in condemnatione. 173. ¶ penult.*

**Mora** nulla intelligitur ibi fieri, ubi nulla petitio est. *l. nulla. 88.*

**Mora** quominus fiat in quo per alium fit, id in omnibus causis pro facto accipitur. *l. in omnibus. 39.*

**Moram** facere non videtur, qui sine dolo malo ad judicem provocat. *l. qui sine dolo. 63.*

**Mulieribus** tunc succurrendum est cum defenduntur, non ut facilius calumnientur. *l. in eo quod. 110. ¶ fin.*

**Mutare** consilium nemo potest in alterius injuriam. *l. nemo potest. 75.*

**Mutatio** temporaria jus provinciæ non innovat. *l. nemo. 123. ¶ 1.*

**Mutandum** nihil facile ex solemnibus; tamen ubi acqui-



quitas evidens poscit, subveniendum est. *l. et finibil.* 183.

*Mutus*, si intellectum habet, potest videri respondere, ubi non voce, sed præsentia opus est. Idem de furdo; hic quidem & respondere potest. *l. ubi non voce.* 124. in princ.

## N

*Natura* rerum quæ prohibentur, nulla lege confirmata sunt. *l. ubi pugnantia.* 188.

propter *Necessitatem* quæ recepta sunt, non debent in argumentum trahi. *l. quæ propter.* 162;

*Necessitudinis* & libertatis infinita est æstimatione. *l. non est.* 176. §. 1.

*Negantes* se debere, non prohibentur alia defensione uti; nisi lex impedit. *l. nemo ex his.* 43. in princ.

*Nemo* plus juris in alium transferre potest, quam ipse habet. *l. nemo plus.* 54.

*Non nolle* ejus est, qui potest velle. *l. 3.*

*Nostrum* ex pluribus causis idem esse non potest. *l. non ut ex.* 159.

*Nostrum* quod est, sine facto nostro ad alium transferri non potest. *l. id quod nostrum.* 11.

*Nuptias* non concubitus, sed consensus facit. *l. nuptias.* 30.

## O

*Obligatio verborum* verbis tollitur; nudi consensus obligatio contrario dissensu dissolvitur. *l. nihil tam naturale.* 35.

*Obligatio* nulla valet efficere, ut id alicujus fieret, quod nullius esse potest. *l. quod nullius.* 182.

*Obligatio* nulla cadit in personam servilem. *l. in personam.* 22. in princ.

*Obligatio* nulla est impossibile. *l. impossibile.* 185.

*Obligatione* si quis liberatus sit, potest videri cepisse. *l. si quis.* 115. in princ.

in omnibus *Obligationibus*, in quibus dies non ponitur, præsenti die debetur. *l. in omnibus.* 14.

*Obligationum* cause pactione possunt immutari & ipso jure, & per pacti conventi exceptionem. *l. nec ex prætorio.* 27.

nemo *Obligatur* ideo, quia recepturus est ab alio quod præstiterit. *l. nemo ideo.* 171.

in *Obscuris* inspicere solere quod verisimilius est, aut quod plerumque fieri solet. *l. in obscuris. 114.*

## P

**nec Pacta**, nec stipulationes, factum possunt tollere. *l. verum est. 31.*

**Pactio** enim quod impossibile est, comprehendere non potest, ut utilem actionem aut factum efficere possit. *d. l. verum est. 31.*

**Pactione obligationum causa**: vide *Obligationum causa.*

**Pactionibus** privatorum, actionum modus, vel lege, vel per Praetorem introductus, non infirmatur, nisi tunc, cum inchoatur actio, inter eos convenit. *l. nec ex pratorio. 27. in fin.*

**Parere** cui necesse est, ejus nulla culpa est. *l. is damnum dat. 169. in princ.*

**Partes** ejus ad omnes pertinent, cujus effectus omnibus prodest. *l. cujus effectus. 148. vide & Major pars.*

**Peculiaris rei** possessionem filiusfamilias neque retinere, neque recuperare, neque adipisci videtur. *l. filiusfamilias. 93.*

**Quod Pendet**, non est pro eo quasi sit. *l. is damnum. 169. ¶ 1.*

**Persequendo** nemo deteriorem causam suam facit, sed meliorem. *l. nemo enim. 87.*

**Personale beneficium**, vide *Beneficium.*

**Personae**, quae in id quod facere possunt, damnantur, in totum quod habent excuti non debent, sed earum ratio habenda, ne egeant. *l. in condemnatione. 173. in princ.*

**Peti** nihil potest ante id tempus, quo per rerum naturam persolvi possit. *l. nihil peti. 186. in princ.*

**Peti** non potest, nisi solvendi tempore, obligationi adjecto, praeterito. *d. l. nihil peti. 186. in fin.*

**a Petitione** per exceptionem qui removetur, cepisse non videtur. *l. non videtur. 13.*

**Petitoris causa** durior est, in eo quod vel is qui petit, vel is à quo petitur, lucrifactor est. *l. in eo. 33.*

**Pignori** dare licere fructus rei est. *l. fructus rei. 72.*

**Plerumque** fit ut etiam ea, quae nobis abire possunt, perinde in eo statu sint, atque si abire non possent. *l. plerumque. 205.*

*Plus*

*Plus* cui licet, quod minus ~~est~~ non debet non licere. *l. non debet.* 21.

*Plus* juris ad alium transferre nemo potest, quam ipse haberet. *l. nemo plus.* 54.

*Plus* quod sit, in eo semper inest & minus. *l. in eo quod.* 110. *in princ.*

*Pæne* nomine quod à quoquo exactum est, id eidem restituere nemo cogitur. *l. quod à quoquo.* 46.

*Pænales* actiones de eadem re concurrentes, nunquam alia aliam consumit. *l. nunquam.* 130.

*Pænalia* judicia semel accepta, in hæredes transmitti possunt. *l. pænalia judicia.* 164.

*Pænalibus* ex causis non solet in patrem de peculio actio dari. *l. ex pænalibus.* 58.

*Pænam* petere, illi debet permitti, qui in ipsam non incidit. *l. cum par delictum.* 154. ¶ 1.

ut *Possessio* nulla, nisi animo & corpore acquiri potest, ita nec amitti. *l. fere quibuscunque.* 153.

*Possessor* in pari causa potior haberi debet. *l. in pari causa.* 128.

*Possidentis* quid, vel habentis, parem oportet esse conditionem, atque ejus cujus dolo malo factum sit, quominus possideret vel haberet. *l. parem esse.* 150.

*Possidentis* causa melior est, cum de duorum lucro queritur. *l. nemo prado.* 126. ¶ *fin.*

*Possidere* qui dolo deserit, pro possessore damnatur; quia pro possessione dolus est. *l. qui dolo.* 131.

*Possidere* non videtur, qui possidetur. *l. qui in servitute.* 118.

qui *Potest* facere ut possit conditioni parere, jam posse videtur. *l. qui potest.* 174. ¶ 1. *in princ.*

*Potestatem* gladii sibi datam, vel cujus alterius coërcitionis, nemo potest ad alium transferre. *l. nemo potest.* 70.

*Prado* nemo est, qui pretium numeravit. *l. nemo prado.* 126. *in princ.*

*Prætor* ibi desideratur ubicunque causæ cognitio est. *l. ubicunque.* 105.

*Prætor* bonorum possessorem hæredis loco in omni causa habet. *l. Prætor bonorum.* 117.

*Prætor* vetante qui fecit, hic adversus Edictum fecisse proprie dicitur. *l. qui vetante.* 102. *in princ.*

*Principalis causa cum non consistat, plerunque ne ea quidem quæ sequuntur locum habent. l. cum principalis. 178. & l. nihil dolo. 129. ¶ 1.*

*Privatorum conventionione, nec ex pratorio, nec ex solemni jure, quicquam immutandum est. l. nec ex pratorio. 27. in princ.*

*Privatorum passionibus actionum modus, vel lege, vel per prætorem introductus, non infirmatur, nisi tunc, cum inchoatur actio, inter eos convenerit. d. l. 27.*

*Privatorum conventio juri publico non derogat. l. neque pignus. 45. ¶ 1.*

*Privilegia quædam causæ sunt, quædam personæ; & ideo quædam ad hæredem transmittuntur, quæ causæ sunt; quæ personæ, ad hæredem non transeunt. l. privilegia. 196.*

*non Prohibens; cum prohibere non potest, nullum crimen patitur. l. nullum crimen. 109.*

*Provocans sine dolo malo ad Judicem, non videtur moram facere. l. qui sine dolo. 63.*

*Publicum Jus: vide Jus publicum.*

*Pugnantia inter se in testamento ubi juberentur, neutrum ratum est. l. ubi pugnantia. 188. in princ.*

*Pupillo dolum tutoris, neque in interdicto, neque in cæteris causis nocere oportet, sive solvendo est, sive non est. l. neque in interdicto. 198.*

*Pupillus omnia tutore auctore agere potest. l. 5.*

*Pupillus nec velle, nec nolle in eâ ætate, nisi appositæ tutoris auctoritate, creditur. l. pupillus nec velle. 189.*

*Pupillus pati non posse intelligitur. l. in eo quod plus. 110. ¶ 2.*

*Pupillus qui proximus pubertati est, & furandi, & injuriæ faciendæ est capax. l. pupillum. 111. in princ.*

R

*Raro quæ accidunt, non temere in agendis negotiis computantur. l. ea quæ raro. 64.*

*Ratihabitio in mandato, comparatur maleficio. l. hoc jure. 152. ¶ 2.*

*Ratum si quis habuerit quod gestum est, actione mandati obstringitur. l. semper qui. 60. in fin.*

*Recepta propter necessitatem, non debent in argumentum trahi. l. quæ propter. 162.*

Re-

*Receptum* contra rationem juris quod est, non est producendum ad consequentiam. *l. quod contra.* 141.  
 quia *Recepturus* ab alio, nemo ideo obligatur. *l. nemo ideo.* 171.

*Reficere* domum suam cuique licet, dum non officiat alteri, in quod jus non habet. *l. domum.* 61.

*Regula* est, quæ rem quæ est breviter enarrat. *l. 1.*

*Regula* ex jure, non jus ex regula, sumitur. *d. l. 1.*

*Regula* quasi causæ conjectio est. *d. l. 1.*

*Regula* simul atque in aliquo vitiata est, perdit officium suum. *d. l. 1.*

*Rei sue* neque pignus, neque depositum, neque precarium, neque emptio, neque locatio consistere potest. *l. neque pignus.* 45. *in pr.*

*Rei* favorabiliores potius habentur, quam actores. *l. favorabiliores.* 125.

ad *Rem* recuperandam qui habet actionem, is rem ipsam habere videtur. *l. is qui actionem.* 15.

*Reo* quod non permittitur, actori licere non debet. *l. non debet.* 41. *in princ.*

*Repetitioni* in re obscura favere melius est, quam adventitio lucro. *l. non debet.* 41. ¶ 1.

*Repudiare* non potest, quod quis, si velit, habere non potest. *l. cum potest.* 174. ¶ 1.

*Res* judicata pro veritate est. *l. res judicata.* 207.

*Res* peculiaris: vide *Peculiaris.*

*Restitutionis* verbum cum lege invenitur, etsi non specialiter de fructibus additum, tamen & fructus sunt restituendi. *l. in condemnatione.* 173. ¶ 1.

## S

*Sanguinis* jura nullo jure Civili dirimi possunt. *l. jura sanguinis.* 8.

*Scripta* in testamento ut intelligi non possint, perinde sunt, ac si scripta non essent. *l. quo tutela.* 73. ¶ 3.

*Scriptoris* error: vide *Librarius.*

*Scripturas* non solent vitare ea quæ abundant. *l. non solent.* 94.

*Sententia* deportationis ea sola aufert, quæ ad fiscum perveniunt. *l. ea sola.* 97.

*Sermo* idem, quotiens duas sententias exprimit, ea potissimum excipitur, quæ rei gerendæ aptior. *l. quotiens idem.* 67.

*Servi*, quod ad jus civile attinet, pro nullis habentur; non tamen & jure naturali. *l. quod attinet. 32. in personam Servilem nulla cadit obligatio. l. in personam. 22. in princ.*

*Servis* ignoscitur ad ea quæ non habent atrocitatem facinoris vel sceleris, si vel dominis, vel his qui vice dominorum sunt, velut tutoribus & curatoribus obtemperaverint. *l. ad ea quæ. 157. in princ.*

in *Servitute* qui est, non usucapit. Nam cum possideatur, possidere non videtur. *l. qui in servitute. 118.*

*Servitutem* mortalitati fere comparamus. *l. servitutem. 209.*

cum *Servo* nulla est actio. *l. cum servo. 107.*

per *Servos* nostros conditio nostra melior fieri potest, non deterior. *l. melior conditio. 133.*

*Servus* intervenire non potest in his, quæ leges desiderant officium fieri per personas liberas. *l. in his quæ. 175. in princ.*

quod quis gessit dum *Servus* est; proficere libero facto non potest. *l. quod quis. 146.*

*Servus* Reipublicæ causa abesse non potest. *l. servus. 211.*

*Socii* mei socius, socius meus non est. *l. consilii. 47. ¶ 1.*

ex *Solemnibus* nihil facile mutandum: tamen ubi æquitas evidens possit, subveniendum est. *l. etsi nihil. 183.*

*Solida* à singulis hæredibus debentur ea, quæ in partes dividi non possunt. *l. ea quæ in. 192. in princ.*

*Solvendo* videri eum qui defenditur, nemo dubitat. *l. nemo dubitat. 95.*

*Solvendi* tempus cum obligationi additur, nisi eo præterito peti non potest. *l. nihil peti potest. 186. in fin.*

*Solvere* quantum debet qui ignorat, improbus videri non debet. *l. non potest. 99.*

*Solutum* cum est amplius quam debebatur, cujus pars non invenitur quæ repeti possit; totum esse indubitum intelligitur, manente pristina obligatione. *l. cum amplius. 84. in princ.*

*Speciata* semper insunt generalibus. *l. semper. 147.*

*Stipulatus*, qui exceptione potest removeri, non videtur accepisse. *l. si quis. 115. ¶ 1.*

Sti-

*Stipulantes sub conditione omnimodo iis acquirimus, quorum in potestate sumus, etiamsi liberatis nobis dominica potestate conditio existat. l. quæ legata. 18. in fin.*

*Stipulatus sub conditione filiusfamilias si fuerit emancipatus, deinde extiterit conditio, patri actio competit. d. l.*

*in Stipulationibus & cæteris contractibus id semper sequimur, quod actum est; aut si id non paret, erit consequens, ut id sequamur quod in regione in qua actum est, frequentatur. Quidsi neque mos regionis appareat, quia varius fuit? ad id quod minimum est redigenda summa est. l. semper stipulationibus. 34.*

*in Stipulationibus id tempus spectatur, quo contrahimus. l. non omne. 144. ¶ 1.*

*in Stipulationibus tempus promissoris gratia adjicitur. l. cum tempus. 17. in fin.*

*nec Stipulationes, nec pacta, factum tollere possunt. l. verum est. 31. in princ.*

*Stipulatione enim, aut pacto, quod impossibile est, comprehendere non potest, ut utilem actionem aut factum efficere possit. d. l. verum est. 31. in fin.*

*Succedens in dominium, vel jus alterius, jure ejus uti debet. l. qui in jus. 177. in princ.*

*Succedentes in universum jus, hæredis loco habentur. l. in pari causa. 128. ¶ 1.*

*Successio, quoties alicui duplici jure defertur, repudiato jure novo, quod ante defertur, superest vetus. l. quotiens. 91.*

*per Successionem quamvis longissimam, qui defuncto hæredes exstiterunt, non minus hæredes sunt, quam qui principaliter hæredes existunt. l. qui per successionem. 194.*

*Successores in contractibus ex dolo eorum, quibus successerunt, non tantum in id quod pervenit, verum etiam in solidum tenentur; hoc est, unusquisque pro ea parte qua hæres est. l. ad ea quæ. 157. ¶ fin.*

*Non debeo melioris conditionis esse quam auctor meus à quo jus in me transit. l. in his, quæ. 175. ¶ 1.*

*Successoribus etiam obstabit, quod ipsis qui contraxerunt, obstat. l. quod ipsis. 143.*

Suo

*Succedenti* in alius locum, non est æquum ei nocere, quod adversus eum nocuit, in cuius locum successit. *l. in vitus nemo.* 156. ¶ 2.

*Surdus*, si intellectum habet, ubi non voce, sed præsentia opus est, potest videri respondere; imo & respondere potest. *l. ubi non voce.* 124. in princ.

*Suum* qui recipit, nihil dolo facit creditor. *l. nihil dolo.* 129. in princ.

## T

*Tacens* non utique faretur; sed tamen verum est, cum non negare. *l. qui tacet.* 142.

*Tacita*, non expressa non nocent, expressa nocent. *l. expressa nocent.* 195.

*Tacite* nonnunquam quædam recipiunt, quæ aperte comprehensa vitium afferunt. *l. actus legitimi.* 77. in med.

*Temporaria permutatio* jus provinciæ non innovat. *l. nemo alieno.* 123. ¶ 1.

*Tempus* cum in testamento adjicitur, credendum pro hærede adjectum; nisi alia mens fuerit testatoris. *l. cum tempus.* 17.

*Tempus solvendi* cum obligationi additur, nisi eo præterito peti non potest. *l. nihil peti.* 186. in fine.

in *Testamentis* plenius voluntates testantium interpretantur. *l. in testamentis.* 12.

in *Testamento* ubi pugnantia inter se juberentur, neutrum ratum est. *l. ubi pugnantia.* 188.

in *Testamento* quæ scripta sunt, ita ut intelligi non possint, perinde sunt ac si scripta non essent. *l. quo tutela.* 73. ¶ 3.

in *Testamento* cum tempus adjicitur, credendum est pro hærede adjectum, nisi alia fuerit mens testatoris. *l. cum tempus.* 17.

ex *Testamento* quæ proficiscuntur, ita statum eventus capiunt, si initium quoque sine vitio ceperint. *l. omnia, quæ.* 201.

*Testamentum* quamdiu potest valere, tamdiu legitimus non admittitur. *l. quamdiu possit.* 89.

*Testatoris* voluntas quibus non refragatur, his non solet exceptio doli nocere. *l. qui cum alio.* 19. ¶ 1.

*Testato* & *intestato* eundem in paganis decessisse, jus nostrum non patitur; earumque rerum inter se

na-



naturaliter pugna est. *l. jus nostrum. 7.*

Timorvanus: *vide Vanus timor.*

in Toto & pars continetur. *l. in toto. 113.*

Transferre in alium nemo plus juris potest, quam ipse habet. *l. nemo plus. 54.*

Transferri ad alium sine facto nostro non potest id quod nostrum est. *l. id quod nostrum. 11.*

Tutela quo rediit, eo hæreditas pervenit, nisi cum fœminæ hæredes intercedunt. *l. quo tutela. 73. in princ.*

Tutorem dare nemo cuiquam potest, nisi ei quem suis in hæredibus cum moritur habuit, habiturusve esset, si vixisset. *d. l. quo tutela. 73. ¶ 1.*

Tutoris dolum neque in interdicto, neque in cæteris causis pupillo nocere oportet; sive solvendo est, sive non est. *l. neque in interdicto. 198.*

Tutoris auctoritas in eo necessaria est, quod animi iudicio fit. *l. pupillus. 189. in fin.*

## V

Vani timoris iusta excusatio non est. *l. vani. 184.*

Velle qui potest, ejus est non nolle. *l. 3.*

Velle non creditur; qui obsequitur imperio patris vel domini. *l. 4.*

Vendere aliud est, aliud venditori consentire. *l. aliud est. 160. in princ.*

Vendendi & concedendi jus est, cujus est donandi. *l. cujus est. 163.*

Venditio imaginaria est, pretio non accedente. *l. imaginaria. 16.*

in Venditione contrahenda ambiguum pactum contra venditorem interpretandum est. *l. in contrahenda. 172. in princ.*

Vi factum id videtur esse, qua de re quis, cum prohibetur, fecit: *clam*, quod quisque cum controversiam haberet, habiturumve se putaret, fecit. *l. quo tutela. 73. ¶ 2. vide & Jus, & Metus, Crimen.*

Vitiosum quod initio est, non potest tractu temporis convalescere. *l. quod initio. 29.*

in obscura Voluntate manumittentis favendum libertati. *l. in obscura. 179. vide & Testamentum & Furiosi.*

Uxorem prægnantem si quis reliquit, non videtur sine liberis decessisse. *l. si quis prægnantem. 187.*

F I N I S.

ANT 1318 P 46

